


上海辭書出版社  
安徽教育出版社

第三一七冊



上海辭書出版社  
安徽教育出版社

第三一七册



目錄

全宋文卷七二六一

丁 燾

秋江煙草跋 ····· 一

王公振

福源寺田記 ····· 二

王 烈

勅賜興修天慶觀記 ····· 三

釋普濟

北礪和尚語錄序 ····· 五

五燈會元題詞 ····· 五

跋通庵居士頌維摩經 ····· 五

跋笑翁和尚語錄 ····· 六

出山相贊 ····· 六

|           |    |
|-----------|----|
| 觀音大士贊     | 六  |
| 金剛經書大士像贊  | 七  |
| 馬郎婦贊      | 七  |
| 善財贊       | 七  |
| 維摩贊       | 七  |
| 布袋贊 一     | 八  |
| 布袋贊 二     | 八  |
| 達磨大師贊 一   | 八  |
| 達磨大師贊 二   | 九  |
| 五祖贊       | 九  |
| 六祖贊       | 九  |
| 五祖送六祖渡江圖贊 | 一〇 |
| 懶瓚贊       | 一〇 |
| 楊歧祖師贊     | 一〇 |
| 夾山見船子贊    | 一〇 |
| 馬祖接石鞏贊    | 一一 |

|                         |    |    |
|-------------------------|----|----|
| 鳥窠贊                     | …… | 一一 |
| 諾詎羅尊者贊                  | …… | 一一 |
| 四睡贊                     | …… | 一一 |
| 寒山贊                     | …… | 一二 |
| 佛心禪師頂相保福朋長老請贊           | …… | 一二 |
| 石佛清長老請贊                 | …… | 一二 |
| 圓覺頑空覺講主真贊               | 一  | 一三 |
| 圓覺頑空覺講主真贊               | 二  | 一三 |
| 隨龍都知王提舉喜容贊              | …… | 一三 |
| 悅堂穆知閣寫師頂相請贊             | …… | 一四 |
| 覺如周居士圓相贊                | …… | 一四 |
| 自贊                      | …… | 一四 |
| 福州長谿樂山王居士遣兒惟惺投師薙髮寫師頂相請贊 | 一  | 一五 |
| 福州長谿樂山王居士遣兒惟惺投師薙髮寫師頂相請贊 | 二  | 一五 |
| 諸葛琰                     | …… |    |
| 跋鶴林紫元問道集                | …… | 一六 |

姚鹿卿

廬山集序 ..... 一七

別之傑

蜀鑑跋 ..... 一八

全宋文卷七二六二

余日華 一

賀商總領除戶侍劄子 一 ..... 二〇

賀商總領除戶侍劄子 二 ..... 二一

賀商總領除戶侍劄子 三 ..... 二一

賀湖廣陳總郎劄 一 ..... 二二

賀湖廣陳總郎劄 二 ..... 二三

賀湖廣陳總郎劄 三 ..... 二三

賀湖廣陳總郎劄 四 ..... 二四

賀湖廣陳總郎劄 五 ..... 二四

賀湖廣陳總郎劄 六 ..... 二五

回前四川劉總郎劄 ..... 二五

|           |   |    |
|-----------|---|----|
| 賀新江西倉陳寺丞劄 | 一 | 二六 |
| 賀新江西倉陳寺丞劄 | 二 | 二六 |
| 賀新江西倉陳寺丞劄 | 三 | 二六 |
| 賀新江西倉陳寺丞劄 | 四 | 二七 |
| 賀新江西倉陳寺丞劄 | 五 | 二七 |
| 賀新江西倉陳寺丞劄 | 六 | 二八 |
| 賀新江西倉陳寺丞劄 | 七 | 二八 |
| 謝權漕劉倉監丞劄  | 一 | 二八 |
| 謝權漕劉倉監丞劄  | 二 | 二九 |
| 謝權漕劉倉監丞劄  | 三 | 二九 |
| 謝權漕劉倉監丞劄  | 四 | 三〇 |
| 謝權漕劉倉監丞劄  | 五 | 三〇 |
| 謝權漕劉倉監丞劄  | 六 | 三一 |
| 謝權漕劉倉監丞劄  | 七 | 三一 |
| 通閩倉劉監丞劄   | 一 | 三一 |
| 通閩倉劉監丞劄   | 二 | 三二 |

|           |   |    |
|-----------|---|----|
| 通閩倉劉監丞劄   | 三 | 三二 |
| 通閩倉劉監丞劄   | 四 | 三三 |
| 通閩倉劉監丞劄   | 五 | 三三 |
| 通閩倉劉監丞劄   | 六 | 三四 |
| 通閩倉劉監丞劄   | 七 | 三四 |
| 與江西陳倉劄    | 一 | 三四 |
| 與江西陳倉劄    | 二 | 三五 |
| 與江西陳倉劄    | 三 | 三五 |
| 與江西陳倉劄    | 四 | 三六 |
| 與江西陳倉劄    | 五 | 三六 |
| 與江西陳倉劄    | 六 | 三七 |
| 與江西陳倉劄    | 七 | 三七 |
| 代賀江西倉陳郎中劄 |   | 三七 |
| 回新江東倉張郎中劄 |   | 三八 |

全宋文卷七二六三

|           |   |    |
|-----------|---|----|
| 賀國子陳監簿劄   | 一 | 四〇 |
| 賀國子陳監簿劄   | 二 | 四〇 |
| 賀國子陳監簿劄   | 三 | 四一 |
| 賀國子陳監簿劄   | 四 | 四一 |
| 賀國子陳監簿劄   | 五 | 四二 |
| 賀鄭監簿劄     |   | 四二 |
| 賀李戶侍啓     |   | 四三 |
| 賀湖廣陳總郎啓   |   | 四四 |
| 賀江西倉卓編修啓  |   | 四四 |
| 謝浙東陳倉啓    |   | 四五 |
| 賀江西倉陳寺丞啓  |   | 四六 |
| 賀廣東陳倉啓    |   | 四七 |
| 代回曹統領啓    |   | 四七 |
| 與麻沙魏巡檢啓   |   | 四八 |
| 賀浙漕寶謨陳檢詳啓 |   | 四九 |
| 回陳宗簿啓     |   | 四九 |

回陳宗簿入國門啓……………五〇

賀胡宗簿啓……………五〇

回泰州洪寺簿啓……………五〇

回泰州洪寺簿啓……………五一

回泰州洪寺簿啓……………五一

回泰州洪寺簿啓……………五一

回泰州洪寺簿啓……………五一

回泰州洪寺簿啓……………五二

回泰州洪寺簿啓……………五二

回泰州洪寺簿啓……………五三

回泰州洪寺簿啓……………五三

賀鎮江守趙尚書啓……………五四

賀隆興施帥侍郎啓……………五四

賀太平曾侍郎移帥江西啓……………五四

賀建昌趙守啓……………五五

賀黃州王守啓……………五五

賀鄂州詹大卿啓 ..... 五五

賀李侍郎啓 ..... 五六

賀沈尚書啓 ..... 五六

代賀沈尚書啓 ..... 五六

全宋文卷七二六四

黃仲炎

繳進春秋通說表 ..... 五七

春秋通說序 ..... 五九

熊慶胄

贈王岳二相師序 ..... 六一

贈孫太史序 ..... 六二

劉子冶字說 ..... 六二

祭蔡覺軒文 ..... 六三

蔡覺軒哀辭 ..... 六四

祭姊文 ..... 六五

駐真道院修造疏 ..... 六五

平山建祠山大帝殿疏 ..... 六六

朱 鑑

詩傳遺說序 ..... 六七

朱文公易說跋 ..... 六七

易呂氏音訓跋 ..... 六八

歲時廣記序 ..... 六九

朱子肅

宋龍圖閣學士侍讀吏部尚書朱公壙誌 ..... 七〇

王 汶

瓜廬詩後序 ..... 七三

樓奇王周道墓誌 ..... 七三

高 稼

致桂如淵書 ..... 七五

沔州告神文 ..... 七六

全宋文卷七二六五

李 劉 一

|            |    |
|------------|----|
| 賀今上皇帝登寶位表  | 七八 |
| 賀皇帝御福寧殿表   | 七八 |
| 賀天基節表 一    | 七九 |
| 賀天基節表 二    | 七九 |
| 賀冊皇后表      | 八〇 |
| 賀皇帝誕皇子表    | 八〇 |
| 賀郊祀禮成表     | 八一 |
| 賀明堂禮成表 一   | 八一 |
| 賀明堂禮成表 二   | 八二 |
| 賀端平改元表     | 八二 |
| 賀元會表       | 八三 |
| 賀元正表       | 八三 |
| 賀冬至表       | 八四 |
| 榮州進貢紬斑布表   | 八四 |
| 代衛參政辭免知福州表 | 八五 |
| 代董侍郎再辭召命表  | 八五 |

|              |    |
|--------------|----|
| 代何尚書辭免除職與郡表  | 八六 |
| 謝明堂肆赦表 一     | 八六 |
| 謝明堂肆赦表 二     | 八七 |
| 謝宣賜曆日表 一     | 八七 |
| 謝宣賜曆日表 二     | 八八 |
| 謝賜銀合夏藥表      | 八八 |
| 謝賜銀合臘藥表      | 八九 |
| 代鄒給事除潭帥謝表    | 八九 |
| 成都漕到任謝表      | 九〇 |
| 知榮州到任謝表      | 九一 |
| 除寶謨閣學士知泉州謝表  | 九二 |
| 除閣學知潭州謝表     | 九二 |
| 賀皇太子元正牋      | 九三 |
| 賀皇太子冬至牋      | 九三 |
| 代董侍郎賀東宮生日牋   | 九四 |
| 代何尚書除刑侍謝皇太子牋 | 九四 |

代衛參政轉官謝皇太子牋 ..... 九五

賀皇后受冊箋 ..... 九五

全宋文卷七二六六

李 劉 二

上史丞相啓 ..... 九七

上鄭參政昭先啓 ..... 九九

上曾樞密從龍啓 ..... 一〇〇

見趙茶馬彥綰啓 ..... 一〇一

上魏運使了翁啓 ..... 一〇二

上任中書希夷啓 ..... 一〇三

上吳宣撫獵啓 ..... 一〇四

上曾運使槃啓 ..... 一〇五

上董制置居誼啓 ..... 一〇六

上李侍郎稟啓 ..... 一〇七

見李提刑堽啓 ..... 一〇七

上梁運使綸啓 ..... 一〇八

|       |    |     |
|-------|----|-----|
| 代上安撫啓 | …… | 一〇八 |
| 代見丞相啓 | …… | 一〇九 |
| 代上丞相啓 | …… | 一一〇 |
| 代上丞相啓 | …… | 一一一 |

全宋文卷七二六七

李 劉 三

|            |    |     |
|------------|----|-----|
| 謝董侍郎居誼舉狀啓  | …… | 一一三 |
| 謝魏運使了翁舉狀啓  | …… | 一一四 |
| 謝鄒運使孟卿舉狀啓  | …… | 一一五 |
| 謝衛參帥涇舉關陞啓  | …… | 一一六 |
| 謝曾運使槃舉關陞啓  | …… | 一一七 |
| 謝林提舉行知舉關陞啓 | …… | 一一八 |
| 謝衛參帥涇特薦啓   | …… | 一一九 |
| 謝曾安撫從龍特薦啓  | …… | 一二〇 |
| 謝林寺丞行知特薦啓  | …… | 一二一 |
| 謝瀘帥楊尚書汝明啓  | …… | 一二二 |

|                 |     |
|-----------------|-----|
| 代謝衛參帥啓          | 一二三 |
| 代謝帥座啓           | 一二四 |
| 代謝茶漕司啓          | 一二五 |
| 代謝茶使與合尖啓        | 一二六 |
| 代董侍郎謝史丞相啓       | 一二七 |
| 代陳帥機元勳謝衛參帥啓     | 一二八 |
| 代章監倉謝衛安撫瑒啓      | 一二九 |
| 代趙撫屬汝楫謝衛安撫啓     | 一二九 |
| 代趙撫屬汝楫上提刑啓      | 一三〇 |
| 代趙撫屬上衛參帥求合尖啓    | 一三一 |
| 代陳縣尉愷上衛參帥求舉啓    | 一三二 |
| 代趙縣丞善倪上撫州林守洽求舉啓 | 一三三 |

全宋文卷七二六八

李 劉 四

|                |     |
|----------------|-----|
| 代黃主簿夢得上樓倉觀求合尖啓 | 一三五 |
| 代回楊評事洪之謝求薦啓    | 一三六 |

|                   |     |
|-------------------|-----|
| 回資官王縣尉昌大謝舉狀啓      | 一三六 |
| 回郭僉判仲洪謝舉狀啓        | 一三七 |
| 回成副將謝舉狀啓          | 一三七 |
| 回史郡僉謝提刑舉狀啓        | 一三八 |
| 代回楊評事洪之許舉狀啓       | 一三八 |
| 代回高承直不倚謝舉啓        | 一三九 |
| 代回危教授稹謝列薦啓        | 一三九 |
| 代回崇仁潘知縣方謝舉啓       | 一四〇 |
| 代回涂察推岑啓           | 一四〇 |
| 謝劉閣學光祖舉節操方正可備獻納科啓 | 一四一 |
| 謝李參政壁舉獻納科啓        | 一四二 |
| 謝任尚書希夷舉著述科啓       | 一四三 |
| 代虞制參謝劉閣學光祖舉科目啓    | 一四四 |
| 謝曾尚書喚舉著述科啓        | 一四五 |
| 謝趙尚書汝述舉可備著述科啓     | 一四六 |
| 謝成都帥黃侍郎疇若舉科目啓     | 一四七 |

|             |     |
|-------------|-----|
| 代趙撫屬汝楫謝衛參帥啓 | 一四八 |
| 代回舒尉謝科目啓    | 一四九 |
| 謝中書舍人曾從龍啓   | 一四九 |
| 謝宗縣尉炳啓      | 一五〇 |

## 全宋文卷七二六九

李 劉 五

|              |     |
|--------------|-----|
| 帥到任謝任參政啓     | 一五二 |
| 帥到任謝鄭參政啓     | 一五三 |
| 太守到任謝丞相啓     | 一五三 |
| 榮州到任謝丞相啓     | 一五四 |
| 太守謝史丞相啓      | 一五五 |
| 榮州到任謝桂制置啓    | 一五六 |
| 通判到任謝參政啓     | 一五七 |
| 通判到任謝葛簽樞啓    | 一五八 |
| 通判到任謝臺諫啓     | 一五九 |
| 除兩浙運幹謝趙尚書汝述啓 | 一六〇 |

|              |     |
|--------------|-----|
| 代石僉判孝理到任謝丞相啓 | 一六〇 |
| 幕官到任謝丞相啓     | 一六一 |
| 代回鄒泉州應龍到任啓   | 一六二 |
| 代回史吉州定之到任啓   | 一六三 |
| 代回張建昌嵩到任啓    | 一六三 |
| 代回楊贛州長孺到任啓   | 一六四 |
| 太守解任謝丞相啓     | 一六五 |
| 代林提管岳謝五府啓    | 一六六 |

全宋文卷七二七〇

李 劉 六

|               |     |
|---------------|-----|
| 代董侍郎居誼回聶制置子述啓 | 一六七 |
| 通項運使寅孫啓       | 一六八 |
| 通眉州趙開國希濬啓     | 一六八 |
| 通徐架閣天麟啓       | 一六九 |
| 通魏府判峒啓        | 一七〇 |
| 通武岡權通判譚知錄良弼啓  | 一七〇 |

|                   |     |
|-------------------|-----|
| 通李制機元龍啓           | 一七一 |
| 通吳運幹彬啓            | 一七二 |
| 通兩浙林運幹良顯啓         | 一七二 |
| 通潭州劉教授時可啓         | 一七三 |
| 通善化盧縣丞補之啓         | 一七三 |
| 代魏兵部了翁除編修檢討謝丞相啓   | 一七四 |
| 代鍾監丞震除秘書省著作佐郎謝丞相啓 | 一七五 |
| 代江淮陳制幹韓除監丞謝丞相啓    | 一七六 |
| 除國子錄謝丞相啓          | 一七七 |
| 除國子錄謝執政啓          | 一七八 |
| 除國錄謝給舍臺諫啓         | 一七九 |
| 除國錄謝葛祭酒洪啓         | 一七九 |
| 除國錄回諸州啓           | 一八〇 |
| 除架閣謝丞相啓           | 一八一 |

全宋文卷七二七一

李 劉 七

除架閣謝五府臺諫侍從啓……………一八三

代陳架閣登謝丞相啓……………一八四

代舒架閣佑除藉田令謝丞相啓……………一八五

代舒架閣除藉田令謝五府侍從啓……………一八六

代范文思應鈴謝史丞相啓……………一八七

代衛運幹樸除太社令謝丞相啓……………一八八

代董惠州居誼除鼓院謝丞相啓……………一八九

代回鄒泉州應龍賀新除啓……………一九〇

代回諸路賀新除啓……………一九〇

代回衆官賀新除啓……………一九一

代潭州鄒帥應龍謝丞相啓……………一九一

除成都漕到任謝史丞相啓……………一九二

除成都漕謝政府啓……………一九三

除成都漕謝侍從啓……………一九四

除成都漕謝檢正都司啓……………一九五

除成都漕謝李制置啓……………一九六

|                |     |
|----------------|-----|
| 謝黃制副賀除成都漕啓     | 一九七 |
| 謝順慶李知府賀除成都漕啓   | 一九八 |
| 代羅制機壩改除太守謝史丞相啓 | 一九八 |
| 代董通判居誼除知惠州謝丞相啓 | 一九九 |

## 全宋文卷七二七二

李 劉 八

|                |     |
|----------------|-----|
| 除武岡通判謝丞相啓      | 二〇一 |
| 除武岡通判謝宣參政繒啓    | 二〇二 |
| 除武岡通判謝葛僉書洪啓    | 二〇三 |
| 代衛太社樸除袁州通判謝丞相啓 | 二〇四 |
| 除兩浙運幹謝丞相啓      | 二〇五 |
| 除兩浙運幹謝俞樞密應符啓   | 二〇六 |
| 代衛機宜樸謝史丞相啓     | 二〇七 |
| 代衛機宜樸謝陳憲天宜啓    | 二〇八 |
| 代衛機宜謝樓提舉啓      | 二〇八 |
| 代衛機宜謝陳太守啓      | 二〇九 |

|                |     |
|----------------|-----|
| 代王支鹽謝丞相定辟差啓    | 二〇九 |
| 回諸郡賀除成都漕啓      | 二一〇 |
| 回諸郡通判賀除成都漕啓    | 二一一 |
| 回諸郡教授賀除成都漕啓    | 二一一 |
| 回諸司屬官賀除成都漕啓    | 二一二 |
| 再辟制幹入蜀謝丞相啓     | 二一二 |
| 謝董制置居誼辟充成都撫幹啓  | 二一三 |
| 代趙主簿希坡謝衛參帥辟撫屬啓 | 二一四 |
| 代盧尉仲雋謝諸司辟知資興縣啓 | 二一五 |
| 謝李侍郎稟舉自代啓      | 二一六 |
| 代回董惠州居誼謝舉自代啓   | 二一七 |
| 代回倪告院千里謝舉自代啓   | 二一八 |

全宋文卷七二三

李 劉 九

|            |     |
|------------|-----|
| 賀黃制置伯固賜金帶啓 | 二一九 |
| 賀魏侍郎了翁賜金帶啓 | 二二〇 |

|                   |      |
|-------------------|------|
| 代回嗣秀王師揆謝賜玉帶啓      | 一二一〇 |
| 賀綿州高知府定子赴召啓       | 一二一一 |
| 回諸處賀召命啓           | 一二一二 |
| 謝趙制置彥呐安總領癸仲賀辭召不允啓 | 一二一二 |
| 謝利路高提刑稼賀辭召不允啓     | 一二一三 |
| 賀董侍郎居誼進職啓         | 一二一四 |
| 賀陳提刑天宜進職啓         | 一二一五 |
| 代回趙茶馬彥綰謝進職啓       | 一二一五 |
| 代董侍郎轉官謝三府啓        | 一二一六 |
| 轉朝請郎謝黃侍郎伯固啓       | 一二一六 |
| 轉朝請郎謝監司啓          | 一二一七 |
| 回趙司戶等賀轉官啓         | 一二一八 |
| 改官謝丞相啓            | 一二一八 |
| 改官謝喬司業行簡啓         | 一二一九 |
| 回劉教授大川謝舉改官啓       | 一二一九 |
| 賀瀘帥楊尚書汝明進職奉祠啓     | 一二二〇 |

|                     |      |
|---------------------|------|
| 賀李侍郎進秩敷文閣學士提舉嵩山崇福宮啓 | 二二二一 |
| 賀安觀文丙除節使開府宮觀啓       | 二二二一 |
| 代秘丞林郎中夢英謝丞相得祠祿啓     | 二二二二 |
| 代李制機大有得祠謝丞相啓        | 二二三三 |
| 回李致政坤載啓             | 二二三四 |
| 回彭致政琛謝致政壬仲啓         | 二二三五 |

全宋文卷七二七四

李 劉 一〇

|                 |      |
|-----------------|------|
| 代林運幹良顯謝丞相啓      | 二二三六 |
| 代察判徐愿謝史丞相啓      | 二二三七 |
| 代吳省倉玘謝丞相啓       | 二二三八 |
| 代饒運幹誼謝史丞相啓      | 二二三九 |
| 代李總幹伯長改任謝史丞相啓   | 二四〇〇 |
| 謝丞相書考啓          | 二四〇一 |
| 謝魏侍郎了翁爲先祖先父作墓誌啓 | 二四〇二 |
| 謝衛參政涇差校正書籍啓     | 二四〇三 |

|               |     |
|---------------|-----|
| 代袁子固謝縣宰啓      | 二四四 |
| 謝曹直學賀雨啓       | 二四五 |
| 謝曹直學喜雨詩啓      | 二四五 |
| 回平江府沈侍郎送酒啓    | 二四六 |
| 回岳總領珂送酒賀正啓    | 二四六 |
| 回新都廖宰子材送酒及石榴啓 | 二四七 |
| 代回安撫趙尚書送物啓 一  | 二四七 |
| 代回安撫趙尚書送物啓 二  | 二四七 |
| 代回趙京尹餞送啓      | 二四八 |
| 代回臨安府七夕送物啓    | 二四八 |
| 回蹇學諭賀得粟九穗啓    | 二四八 |
| 回李僉判賀瑞粟啓      | 二四九 |
| 回王監酒提督修城啓     | 二四九 |
| 代回運使賀雪啓       | 二四九 |
| 回陳術士啓         | 二五〇 |

## 全宋文卷七二七五

李 劉 一一

|               |     |
|---------------|-----|
| 謝張秘校晉臣投詩啓     | 二五一 |
| 謝汪秘校莘惠詩啓      | 二五一 |
| 謝監鎮陸子適惠詩啓     | 二五二 |
| 謝林秘校季熊投詩啓     | 二五二 |
| 謝盛登仕夢弼長書啓     | 二五二 |
| 謝許新恩裕惠詩啓      | 二五三 |
| 謝蘇秘教丙啓        | 二五三 |
| 謝程監丞準啓        | 二五三 |
| 謝朱新恩遜投書啓      | 二五四 |
| 謝吉州楊司理彭年惠詩啓   | 二五四 |
| 謝周秘校噩之惠梅詩啓    | 二五五 |
| 謝會稽趙宰善韞啓      | 二五五 |
| 謝石秘校巖啓        | 二五六 |
| 回劉進士日起惠書及封事藁啓 | 二五六 |
| 代回謝秘校耘投詩啓     | 二五七 |

|            |     |
|------------|-----|
| 回吳教授投啓和詩啓  | 二五七 |
| 代回朱上舍中有啓   | 二五七 |
| 回前蘄春陳尉格惠詩啓 | 二五八 |
| 回張上舍端道啓    | 二五八 |
| 回羅省元啓      | 二五九 |
| 回熊省元蒙正投贈啓  | 二五九 |
| 回徐殿幹暄投四六啓  | 二六〇 |
| 代回張秘校子賢惠詩啓 | 二六〇 |
| 回吳判院玘惠詩啓   | 二六一 |
| 回屈學正投書詩啓   | 二六一 |
| 回呂將仕啓      | 二六二 |
| 回衆官袖啓      | 二六二 |
| 回官員學職袖啓    | 二六二 |
| 回學職士人啓     | 二六三 |
| 回景省元啓      | 二六三 |
| 回宗子與銓啓     | 二六三 |

|         |     |
|---------|-----|
| 回王省元啓   | 二六四 |
| 回李叔璋啓   | 二六四 |
| 回合同王將仕啓 | 二六五 |
| 回王進士啓   | 二六五 |
| 回黃將仕啓   | 二六五 |

全宋文卷七二七六

李 劉 一一

|           |     |
|-----------|-----|
| 回王進士啓     | 二六六 |
| 回楊貢士啓     | 二六六 |
| 回蘇秘校材啓    | 二六七 |
| 回史機宜大異啓   | 二六七 |
| 回程秘校以南啓   | 二六七 |
| 回見任官袖賀啓   | 二六八 |
| 回史秘校公誨獻策啓 | 二六八 |
| 回楊普州伯雨袖詩啓 | 二六九 |
| 回趙進士大正啓   | 二六九 |

|             |     |
|-------------|-----|
| 謝得解啓        | 二七〇 |
| 縣補魁中謝縣令啓    | 二七一 |
| 謝成都解頭劉省元應起啓 | 二七二 |
| 謝成都解元五十一人啓  | 二七三 |
| 回臨安江解頭克家啓   | 二七三 |
| 謝解頭景簡文啓     | 二七四 |
| 謝衆解元啓       | 二七四 |
| 回陳上舍伯鳳啓     | 二七五 |
| 回水丘先輩袞謝解啓   | 二七五 |
| 回趙先輩子直謝解啓   | 二七六 |
| 回武岡新舉蕭漢龍啓   | 二七六 |
| 回新舉王道明啓     | 二七七 |
| 回免舉士人謝啓     | 二七七 |
| 回免解杜省元啓     | 二七八 |
| 回試官袖啓       | 二七八 |
| 回王省元胄謝取中啓   | 二七九 |

全宋文卷七二七七

李 劉 一三

|              |     |
|--------------|-----|
| 回何釋褐大主啓      | 二八〇 |
| 回郭正奏應王正奏已之啓  | 二八〇 |
| 回嘉定張正奏庚仲啓    | 二八一 |
| 回辛正奏守謙張正奏東寅啓 | 二八二 |
| 回類元唐正奏應龍啓    | 二八二 |
| 回郭正奏佺啓       | 二八三 |
| 回曹正奏啓 一      | 二八三 |
| 回曹正奏啓 二      | 二八四 |
| 回王正奏正寅啓      | 二八四 |
| 回張正奏申之啓      | 二八五 |
| 回特奏名李學正鳴鳳啓   | 二八五 |
| 回王特奏相悟啓      | 二八六 |
| 回特奏侯新恩曾榮啓    | 二八六 |
| 代胡侍郎謝朝士賀生日啓  | 二八七 |

|               |     |
|---------------|-----|
| 代謝朝士已下啓       | 二八七 |
| 謝黃侍郎伯固生日詩啓    | 二八七 |
| 謝魏侍郎了翁生日詩啓    | 二八八 |
| 謝諸處監司賀生日啓     | 二八八 |
| 謝都大賀生日詩啓      | 二八九 |
| 謝都大賀生日詞啓      | 二八九 |
| 謝呂提刑壽詩啓       | 二九〇 |
| 謝提刑啓          | 二九〇 |
| 謝呂運使賀生日啓      | 二九一 |
| 謝生日投詩啓        | 二九一 |
| 代謝生日投詞啓       | 二九二 |
| 普謝見任官賀生日詩詞啓   | 二九二 |
| 謝學職十四人投詩賀生日啓  | 二九三 |
| 謝潼川提刑謝太博賀生日啓  | 二九三 |
| 謝鄉官寄居士人賀生日詩啓  | 二九四 |
| 謝潼川知府趙監丞賀生日詩啓 | 二九四 |

全宋文卷七二七八

李 劉 一四

謝列郡太守以上賀生日啓 ..... 二九五

謝通判以下賀生日啓 ..... 二九五

謝王制參等八員賀生日啓 ..... 二九六

謝丁制置黼壽詞啓 ..... 二九六

謝丁制置賀壽詩啓 ..... 二九七

回賀生日啓 ..... 二九七

回武官賀生日啓 ..... 二九八

代回曾運使啓 ..... 二九八

代回安撫趙尚書師宰賀生日啓 ..... 二九九

代回衆官賀生日啓 ..... 二九九

代回道士賀生日啓 ..... 三〇〇

代回僧賀生日啓 ..... 三〇〇

回張縣尉煥啓 ..... 三〇一

回同官預賀壽詩啓 ..... 三〇一

|               |     |
|---------------|-----|
| 回鄉官上壽啓        | 三〇二 |
| 回謝同官投詩啓       | 三〇二 |
| 回士人投生日詩啓      | 三〇三 |
| 回三江文將仕啓       | 三〇三 |
| 回學職二十四人投詩啓    | 三〇四 |
| 回同官上壽詩詞啓      | 三〇四 |
| 回衆官賀生日詩啓      | 三〇五 |
| 回諸廳屬官賀生日五十人啓  | 三〇五 |
| 回魏制幹賀生日啓      | 三〇六 |
| 回黃侍郎伯固賀生日啓    | 三〇六 |
| 回魏機宜賀生日啓      | 三〇七 |
| 爲顯孫通魏宅問名啓     | 三〇七 |
| 爲顯孫通魏宅納采啓     | 三〇八 |
| 請媒書           | 三〇八 |
| 請期書           | 三〇八 |
| 代姜寺丞注回史丞相府定親書 | 三〇九 |

|                |     |
|----------------|-----|
| 賀丞相除少師啓        | 三〇九 |
| 代董侍郎賀丞相除少師啓    | 三一〇 |
| 賀史丞相除太傅啓       | 三一  |
| 賀史丞相除太傅啓       | 三二  |
| 賀史丞相除少傅啓       | 三三  |
| 代任參政希夷賀丞相除少傅啓  | 三四  |
| 賀史丞相父太師魏王追封越王啓 | 三五  |

全宋文卷七二七九

李 劉 一五

|                     |     |
|---------------------|-----|
| 賀鄭參政清之除右相兼樞使進光祿大夫啓  | 三一六 |
| 賀丞相明堂慶壽并冊皇后禮成平淮寇奏捷啓 | 三一七 |
| 上史丞相啓               | 三一八 |
| 代黃知縣燾上史丞相啓          | 三一九 |
| 賀喬樞密行簡除參政兼知院啓       | 三二〇 |
| 代賀鄭簽書昭先除參政兼太子賓客啓    | 三二一 |
| 賀俞樞密應符兼參政啓          | 三二一 |

|                            |     |
|----------------------------|-----|
| 賀陳簽書貴誼除參政兼同知啓              | 三二二 |
| 賀宣參政繒啓                     | 三二三 |
| 代賀禮部曾尚書從龍除簽書兼太子賓客啓         | 三二三 |
| 賀薛樞使極啓                     | 三二四 |
| 賀薛僉書極啓                     | 三二五 |
| 賀程同知卓啓                     | 三二五 |
| 賀俞僉書應符啓                    | 三二六 |
| 賀太府余大卿鑄除中書舍人仍兼右司除戶部侍郎兼知臨安啓 | 三二七 |
| 賀黃秘監序除中書舍人啓                | 三二八 |
| 賀直院莊少卿夏除中書舍人啓              | 三二九 |

## 全宋文卷七二八〇

李 劉 一六

|         |     |
|---------|-----|
| 賀聶左史子述啓 | 三三〇 |
| 賀聶左史啓   | 三三一 |
| 賀章尚書啓   | 三三一 |
| 賀任尚書希夷啓 | 三三一 |

|                   |     |
|-------------------|-----|
| 賀陳尚書率除吏部尚書仍兼內翰啓   | 三三二 |
| 賀鍾侍郎震除侍左侍郎兼中書及侍講啓 | 三三三 |
| 賀江陵趙制置方除工部侍郎啓     | 三三四 |
| 賀趙制置彥呐除兵部侍郎啓      | 三三五 |
| 賀朱倉在除度支啓          | 三三五 |
| 代回宮使待制史侍郎彌堅啓      | 三三六 |
| 代胡尚書回趙編修啓         | 三三六 |
| 賀洪郎中咨夔除察院啓        | 三三七 |
| 賀王寺簿遂除察院啓         | 三三八 |
| 賀董司諫居誼啓           | 三三八 |
| 代回傅大諫伯成啓          | 三三九 |
| 賀黃安撫除大理少卿啓        | 三四〇 |
| 賀岳總領珂除大卿啓         | 三四一 |
| 代回王大卿補之啓          | 三四一 |
| 代回李寺正直柄啓          | 三四二 |
| 代回劉寺正啓            | 三四二 |

|          |     |
|----------|-----|
| 代回李寺丞直柄啓 | 三四二 |
| 代回陳寺丞振啓  | 三四三 |
| 代回呂寺丞祖平啓 | 三四三 |

全宋文卷七二八一

李 劉 一七

|           |     |
|-----------|-----|
| 代回大理沈寺丞繹啓 | 三四四 |
| 代回沈評事啓    | 三四四 |
| 代回大理樓評事澄啓 | 三四五 |
| 代回程監丞準啓   | 三四五 |
| 代回程監丞準啓   | 三四六 |
| 代回軍器王監簿渥啓 | 三四六 |
| 回朱司令在啓    | 三四七 |
| 代回詹大社久中啓  | 三四七 |
| 代回趙太社汝讜啓  | 三四八 |
| 代回李國錄誠之啓  | 三四八 |
| 代回曾國正準啓   | 三四九 |

|                      |     |
|----------------------|-----|
| 賀聶宮教子述啓              | 三四九 |
| 代回史文思彌忠啓             | 三五〇 |
| 代回黃文思燾啓              | 三五〇 |
| 代回王文思自適啓             | 三五〇 |
| 代回趙文思師桌啓             | 三五〇 |
| 代回彭文思耕啓              | 三五〇 |
| 代回龔告院堪啓              | 三五〇 |
| 代回萬俟檢院似啓             | 三五〇 |
| 代回新監文思院門史從政彌忠啓       | 三五〇 |
| 代回吳架閣柔勝啓             | 三五〇 |
| 代回薛架閣君用啓             | 三五〇 |
| 代回曾架閣準啓              | 三五〇 |
| 代回黃架閣伯劑啓             | 三五〇 |
| 賀桂侍郎如淵再任制帥啓          | 三五〇 |
| 賀黃安撫大卿除工部侍郎仍兼安撫制置副使啓 | 三五〇 |
| 賀聶侍郎子述除制置啓           | 三五〇 |

|         |     |
|---------|-----|
| 賀聶侍郎交割啓 | 三五八 |
| 賀聶制置子述啓 | 三五八 |

## 全宋文卷七二八二

李 劉 一八

|              |     |
|--------------|-----|
| 賀丁制置交割啓      | 三六〇 |
| 通董制置居誼啓      | 三六一 |
| 通制帥安大資丙啓     | 三六二 |
| 代回成都黃待制疇若啓   | 三六二 |
| 代回成都吳制置獵啓    | 三六三 |
| 代回李制帥大東啓     | 三六三 |
| 代董侍郎回京湖趙制置方啓 | 三六四 |
| 回趙副帥彥呐啓      | 三六五 |
| 代回廣西李經略訢啓    | 三六五 |
| 代回廣西李經略訢啓    | 三六六 |
| 代回廣西李經略訢啓    | 三六六 |
| 賀衛參政涇除江西帥啓   | 三六七 |

|             |     |
|-------------|-----|
| 賀任樞密希夷除福建帥啓 | 三六八 |
| 代曹安撫賀衛參帥涇啓  | 三六九 |
| 賀廣西管漕湛除靜江帥啓 | 三六九 |
| 賀夔路徐安撫瑄除瀘帥啓 | 三七〇 |
| 賀徐漕瑄除東路安撫啓  | 三七〇 |
| 通湖南安撫曾參政從龍啓 | 三七一 |
| 通興元楊安撫九鼎啓   | 三七二 |
| 通湖南曹安撫彥約啓   | 三七三 |
| 通安撫衛大參涇啓    | 三七四 |
| 通浙西袁安撫韶啓    | 三七五 |
| 代回臨安趙帥師石啓   | 三七六 |
| 代回夔路王安撫宗孟啓  | 三七六 |
| 代回湖南曹安撫彥約啓  | 三七七 |
| 代回夔州王帥宗孟啓   | 三七七 |
| 代回襄陽劉安撫光祖啓  | 三七八 |
| 代回史安撫彌堅啓    | 三七八 |

|              |     |
|--------------|-----|
| 代回徐安撫邦憲啓     | 三七九 |
| 代回潼川劉閣學甲啓    | 三七九 |
| 代回揚州崔安撫與之啓   | 三八〇 |
| 代董侍郎回夔路丁安撫黼啓 | 三八〇 |
| 代回畢安撫再遇啓     | 三八一 |

全宋文卷七二八三

李 劉 一九

|            |     |
|------------|-----|
| 賀牛都大大年除總領啓 | 三八二 |
| 賀黃運使申除總領啓  | 三八三 |
| 賀楊總領九鼎啓    | 三八四 |
| 通四川王總領鉛啓   | 三八四 |
| 代回趙總領不憊啓 一 | 三八五 |
| 代回趙總領不憊啓 二 | 三八五 |
| 代董帥回楊總卿交割啓 | 三八六 |
| 代回四川陳總卿咸啓  | 三八六 |
| 代回湖廣趙總領彥櫛啓 | 三八七 |

代回湖北錢總領文子啓……………三八七

代回淮西趙總卿不憊啓……………三八八

賀新除川秦茶馬魏戶部泌啓……………三八八

代通制帥四川趙茶馬彥綰啓……………三八九

代回張茶馬子震啓……………三九〇

代錢塘趙縣丞彥昀通史都大啓……………三九〇

代回史都大定之啓……………三九一

代回鞏都大嶸啓……………三九二

代回鞏都大啓……………三九二

代回鞏都大啓……………三九二

代回市舶聶提舉周臣啓……………三九三

代回趙市舶伯鳳啓……………三九三

賀新潼川黃運使申啓……………三九四

賀黃運使申交割啓……………三九五

賀呂提刑徐運使啓……………三九五

賀夔路徐運使瑄啓……………三九六

賀李運使鼎啓 ..... 三九七

通張運使嗣古啓 ..... 三九七

## 全宋文卷七二八四

李 劉 二〇

通湖南黃運使桂啓 ..... 三九九

通潼川程運使遇孫啓 ..... 四〇〇

代通成都梁運使綸啓 ..... 四〇〇

上兩浙丘運使壽雋啓 ..... 四〇一

上湖南曾運使槃啓 ..... 四〇二

通權運司牛都大大年啓 ..... 四〇二

代回夔路王漕顧問啓 ..... 四〇三

代回夔路王運判宗孟啓 ..... 四〇四

代回潼川張運判師夔啓 ..... 四〇四

代回楊國博啓 ..... 四〇五

代董制置回利路楊運判九鼎啓 ..... 四〇五

代回湖南鄭漕肇之啓 ..... 四〇六

|             |     |
|-------------|-----|
| 代回淮南徐運判輝啓   | 四〇六 |
| 代回福建趙運判善宣啓  | 四〇七 |
| 代回江東莊運使夏啓   | 四〇七 |
| 代回江西李運使珏啓   | 四〇八 |
| 代回成都林漕文仲啓   | 四〇九 |
| 代回湖南曹漕彥約啓   | 四〇九 |
| 代回湖北王漕允初啓   | 四一〇 |
| 代回淮西傅漕誠啓    | 四一〇 |
| 代回趙漕彥倓啓     | 四一一 |
| 代回江西胡漕槻啓    | 四一一 |
| 代回黃漕輦啓      | 四一二 |
| 代回湖南徐運判輝啓   | 四一二 |
| 代回廣西楊漕方啓    | 四一三 |
| 代董侍郎回辛運使克承啓 | 四一三 |
| 代回淮南林運使拱啓   | 四一四 |
| 代回湖北范漕子長啓   | 四一四 |

全宋文卷七二八五

李 劉 二一

|               |     |
|---------------|-----|
| 賀李知府錫除潼川提刑啓   | 四一五 |
| 賀潼川李提刑錫除夔路提刑啓 | 四一六 |
| 賀新潼川王提刑禧啓     | 四一六 |
| 通劉提刑垕啓        | 四一七 |
| 通成都周提刑居信啓     | 四一八 |
| 通潼川丁提刑必稱啓     | 四一九 |
| 通湖南楊提刑楫啓      | 四二〇 |
| 代回夔路李憲丞啓      | 四二〇 |
| 代回浙東譙提刑令憲啓    | 四二一 |
| 代回陳提刑啓        | 四二一 |
| 代回提刑樂郎中啓      | 四二二 |
| 代回江東提刑譙寶文令憲啓  | 四二三 |
| 代回福建詹提刑徽之啓    | 四二三 |
| 代回湖南胡提刑澥啓     | 四二四 |

|             |     |
|-------------|-----|
| 代回江西李提刑珏啓   | 四二四 |
| 代回湖南胡憲澥啓    | 四二五 |
| 代回成都林憲潔己啓   | 四二五 |
| 代回江東葉憲簣啓    | 四二六 |
| 代回江西李憲珏啓    | 四二六 |
| 代回廣西郭提刑斌啓   | 四二七 |
| 代回利路鮮于提刑申之啓 | 四二七 |
| 代回江西陳提刑天宜啓  | 四二八 |
| 代回廣東潘提刑涓啓   | 四二八 |
| 代回江東葉憲簣啓    | 四二九 |
| 代回曹提刑叔遠啓    | 四二九 |
| 代回新夔路李提刑至啓  | 四三〇 |
| 代回方提刑信孺啓    | 四三一 |
| 代回方提刑信孺啓    | 四三一 |
| 回夔路李提刑錫啓    | 四三二 |

# 全宋文卷七二六一

## 丁 煊

丁煊，字晦父（或作晦夫），階州福津（今甘肅武都）人。嘉定七年爲太學博士、軍器少監，通判平江府。八年爲賀金主生辰使。徙利州東路安撫使、兼知興元府。見《宋史》卷三九、四〇、四〇二、四八六，黃幹《重遷和靖先生祠堂記》（《吳都文粹》續集卷一四），《南宋制撫年表》卷下。

## 秋江煙草跋

張君彥發湖海豪士，不喜爲舉子學，專意於詩，每以賈島、姚合爲法，所著僅成帙。清深閒雅，宛有唐人風致，至其得意警絕之句，雜之兩人集內，殆未易辨。彥發思甚苦，未嘗苟下一字，每有所作，必鎔煉數日乃定，揆其用力，蓋倍於江西之學。人必從事於此，而後知其難且工。彥發舊名奕，字韓伯，世爲孟之河陽人。嘉定戊寅仲冬八日，古晉丁煊晦夫書。《江湖小集》卷六八，影印文淵閣四庫全書本。又見《兩宋群賢小集》卷三〇三，同治《武階備志》卷一二。（李文澤校點）

## 王公振

王公振，福州（今福建福州）人，嘉定間在世。

### 福源寺田記

嘉定十二年二月

田疇利天下尚矣，神農作耒耜，后稷教稼穡，一或去食，人類絕矣。釋氏雖以虛無爲教，至饑食渴飲，未嘗與人殊。鐘鳴鼓奏，展鉢待哺，非有田疇，則何以哉？福源肇於梁之大同，廢於隋之大業，復於唐之貞觀，火於國朝之紹興。殿宇巋然，古跡僅存。東西廊廡映帶，皆比年草創之規撫也。寺初未有阡陌，慶元改元，比丘志寧奮發宿心，營浮屠宮，抵儀真，會里人勞公檀越相與言曰：「學道無有自虛空入者，常住二時，盍謀饘粥之計？」乃慷慨興念，與錢三十萬歸。今之掌事慧通，戮力營置田二十一畝有奇。惠明又募衆積勤累年，合爲八十餘畝，歲有常產，以充淨供，始免謀食之憂。有金穰之應，無水毀之菑，彼給孤施園，知末而不知本，妙意設食，可暫而不可常，視此孰勝？恒沙有竭，此食無竭，勞氏之德溥矣。予游西山十二年，知寺僧亦不妄食人之施者，於是乎書。嘉定十二年二月望日，三山王公振撰。康熙《具區志》卷一〇，康熙二十八年刻本。（李文澤校點）

# 王烈

王烈，嘉定間人。

## 勅賜興修天慶觀記

嘉定十三年

恭惟祖宗仁覆天下，克享天心，文教四敷，神道熙和，視漢唐有加焉。逮於祥符初，治化隆洽，乃詔天下郡國咸築道觀，錫號天慶。五年，又詔即觀創殿，嚴奉歷祖像，陳設有儀，朝謁有式。視周制天下邑立社稷祠，唐命州祀老子，其來尤遠，所以極推其本始所自也。祠宮之設，既所以彰聖緒，昭靈貺，又所以一民望，教民順，益永無疆，丕顯休命，敢不欽哉！普爲蜀東望郡，觀因唐開元故址，尊祖之宮位於東，雖岡阜清幽，規模宏壯，然歲月滋久，風雨蠹蝕，上頽下圯，勢將壓焉。遞遞相承，因循簡陋，不敢輒易一椽，豈非以役廣費繁，事大體重與？嘉定十有二年冬，臣泰之被命來守，俶修覲謁，視棟宇之傾剝，惕然弗寧，謂是爲尊祖之地，豈宜坐視其敝而恬不加意哉？越明年，急下令鳩材役，議徹其頽弛蠹腐，自殿宇以及於肅客之所，悉更新之。竹木筒瓦、石工廩費皆從官給，一毫弗以累民。僦工於季秋，告成於季冬，雖赤白囊交馳之際，工役鼎興，民不告病，迄用有

成。乃謂臣烈曰：「是役也，典禮之所重，而教化之所關，臣子之所修，而文物之所寓，匪徒爲虛玄清寂之奉而已。不可以弗識也。」烈曰：「明王以孝治天下，而天下之人亦莫不知以孝爲心，然事可以義舉，今之奉祖於觀，其亦允仁孝而以義舉者矣。」故拜手書而歌之曰：

煌煌聖祖，威神在天。衍慶邦中，本支綿綿。雲行雨施，垂三百年。華夏蠻貊，歸於幅員。翠華寶輅，儼殿遂筵〔一〕。萬國是瞻，疇敢不嚴！峨峨鳳嶺，冠冕左蜀。顧瞻神宇，久圯弗肅。侯來自西，載顧載祇。茲焉弗治，心乎忸怩。軍調方興，力雖弗贍，祖廟當嚴，修崇敢緩？輸樟運杞，轉輪是梓。炳炳薨楹，耽耽棟礎。朝覲之容，臣工之恭。億萬斯年，繼斯無窮。嘉慶《四

川通志》卷四二。（李文澤校點）

〔一〕遂：疑當作「邃」。

## 釋普濟

普濟（一一七九——一二五三），字大川，明州奉化（今浙江奉化）人，俗姓張氏。初習儒，淹博能文。年十九入香林院出家。嘉定十年出主妙勝，歷補陀、岳林、報恩、大慈、淨慈、靈隱。寶祐元年正月卒，壽七十五。撰有《五燈會元》二十卷（存），又有《大川普濟禪師語錄》一卷傳世。見《語錄》附釋大觀所撰行狀（續藏經第貳編第二六套第二冊）。

## 北磻和尚語錄序

淳祐十一年

北磻和尚，自是甘露滅、舟峰菴、秀紫芝之流亞。見佛照師祖後，巧盡拙出，如虎插翅，樊樊莫莫，乖乖厓厓。人知其一，未知其二。九會葛藤，自揚醜惡。從苗辨地，余言豈誣。眼裏無筋，此老受屈。淳祐辛亥解制前三日，住冷泉大川普濟。《北磻和尚語錄》卷首，續藏經第二編第二六套第一冊。又見《大川普濟禪師語錄》。

## 五燈會元題詞

世尊拈花，如蟲禦木。迦葉微笑，偶爾成文。累他後代兒孫，一一聯芳續焰。大居士就文挑剔，亘千古光明燦爛。淳祐壬子冬，住山普濟書于直指堂。《五燈會元》卷首，影宋刻本。

## 跋通庵居士頌維摩經

《淨名》一經，方等時說，所謂彈偏折小，歎大褒圓者也。居士示疾毗耶離城，鉤在不疑之地。

菩薩聲聞，咸往問候。不是好心，二千年後。通庵頌出，據款結案。三段不同，收歸上科。《大川普濟禪師語錄》，續藏經第二編第二六套第二冊。

## 跋笑翁和尚語錄

前佛後佛，搥塗毒鼓。笑翁一笑，起死學者。如稻麻竹葦，若有一語隨流截流，此錄即是魔說。

《大川普濟禪師語錄》。

## 出山相贊

龍章鳳質出王宮，肘露衣穿下雪峰。智願必空諸有界，不知諸有幾時空。《大川普濟禪師語錄》。

## 觀音大士贊

空如來藏，立大圓鏡。水落石出，月明雲淨。瞻之仰之，群機普應。《大川普濟禪師語錄》。

## 金剛經書大士像贊

大士應身三十二，一身三十二重非。金剛正體是非外，鵲噪鴉鳴無了時。《大川普濟禪師語錄》。

## 馬郎婦贊

有願必從，無刹不現。鬢亂釵橫，金沙灘畔。稽首皈依，漏卮難滿。《大川普濟禪師語錄》。

## 善財贊

福城東際錯商量，誤入烟蘿白鳥鄉。水遠山長無限意，到頭難寫此愁腸。《大川普濟禪師語錄》。

## 維摩贊

指桃罵李，敗種發機。詞窮理盡，一嘿橫施。大地山河背震吼，七佛之師慙懔歸。《大川普濟禪師

語錄》。

布袋贊 一

南無阿逸多，忙忙走寰宇。等個人未至，放下寬腸肚。來也來也，噓，泰嶽何曾乏土！《大川普濟禪師語錄》。

布袋贊 二

九十七大人之相，百千億微塵數身。兜率長汀人不識，抖擻精神一欠伸。《大川普濟禪師語錄》。

達磨大師贊 一

的的西天末法僧，來分此土最初燈。神光冷地一吹滅，葱嶺忙忙只暗登。《大川普濟禪師語錄》。

## 達磨大師贊 二

五天竺國，東震旦土。傳佛心宗，無本可據。無本據，一葦橫趨，大江東去。《大川普濟禪師語錄》。

## 五祖贊

萬本松杉，山山栽遍。颺下鏤頭，再呈舊面。雙峰峨峨翠插天，天下人見渠不見。《大川普濟禪師語錄》。

## 六祖贊

應無所住，白日迷路。失脚黃梅，道傳千古。不是風動非幡動，會也虬蟬撼鐵柱。《大川普濟禪師語錄》。

### 五祖送六祖渡江圖贊

有傳有受恩成怨，無受無傳怨似恩。船到岸頭恩怨絕，遍天遍地一兒孫。《大川普濟禪師語錄》。

### 懶瓚贊

垂頤寒涕滿頭霜，黃獨煨來別有香。三詔入雲三不起，兒孫各自立封疆。《大川普濟禪師語錄》。

### 楊歧祖師贊

三脚驢子弄蹄行，金毛師子大哮吼。五峰峭峻摩蒼穹，千古萬古揚家醜。《大川普濟禪師語錄》。

### 夾山見船子贊

毒手一撓難躡避，點頭不見問津人。烟波浩渺無窮恨，父子雖親未是親。《大川普濟禪師語錄》。

## 馬祖接石鞏贊

三十年不少鹽醬，一簇群狐中的時。大地山河諸草木，至今盡發箭鋒機。《大川普濟禪師語錄》。

## 烏窠贊

道高德高名愈高，問佛法而吹布毛。不是尋常閑啐啄，飛出鳳兒空鵲巢。《大川普濟禪師語錄》。

## 諾詎羅尊者贊

石壁攙空起，銀河一派懸。貪觀無斷續，來去不知原。《大川普濟禪師語錄》。

## 四睡贊

離了峨嵋別五臺，倒騎白額下天台。松間石上夢中夢，喚得閭丘太守回。《大川普濟禪師語錄》。

## 寒山贊

采樵沿嶺去，提水傍谿歸。个般無出谿，七佛不曾師。《大川普濟禪師語錄》。

## 佛心禪師頂相保福朋長老請贊

千聖頭邊殃禍作，春風和氣滿叢林。隨其機上者上之，任其器下者下之。一處不通，回天轉地。活天下死衲僧，死大地活衲子，是謂父不傳、子不記之妙。如保福千聖頭邊，殃禍者鮮矣。《大川普濟禪師語錄》。

## 石佛清長老請贊

東山之源，東澗之淵。截流之機，驗人之眼。揚清激濁，地覆天翻。六代祖師，豎毛呵手；三生大像，頓足擎拳。彼又何須指南，吳越令行，而後有傳。《大川普濟禪師語錄》。

## 圓覺禪空覺講主真贊

一

頭鬚鬢，眼乖角。得天台之奧旨，繼永嘉之先覺。執文字見，離文字縛。說大義則四座風生，徵異解則百川潮落。昭昭乎教苑之祥麟，昂昂乎雞群之野鶴。雖正席四處，不足暢其設施；然分座五山，亦不負其所學。是爲廣智九世之孫，嘯巖一枝，不致寥寞者矣。《大川普濟禪師語錄》。

## 圓覺禪空覺講主真贊

二

眼裏有筋，舌頭無骨。卓然特立，天台祖室。寫懸河辯而四方絕唱，離文字相而諸天雨花。扣其關者，紛紛紜紜而退席；得其旨者，崢崢嶸嶸而莫及。且不以慈悲寶帳、破塵白拂而當家傳，自有鸞膠續斷絃。《大川普濟禪師語錄》。

## 隨龍都知王提舉喜容贊

幅巾懶衣，風生步武。邛竹杖頭，高懸玉塵。奉至尊則雲從龍，勘衲僧如出林虎。夫是之謂吾教

之外護，皇家之內輔也。《大川普濟禪師語錄》。

### 悅堂穆知閣寫師頂相請贊

春水滿四澤，夏雲多奇峰。秋月揚明輝，冬嶺秀孤松。難描邈絕知音，悅堂不是閑相識，贊不欣兮罵不嗔。《大川普濟禪師語錄》。

### 覺如周居士圓相贊

一片虛凝絕謂情，眼橫鼻直強圖形。不知不覺全聲色，罵得毗耶老淨名。《大川普濟禪師語錄》。

### 自贊

出林虎方怒，橫岡蟒正嗔。世無途路客，終是不傷人。《大川普濟禪師語錄》。

福州長谿樂山王居士遣兒惟惺投師薙髮寫師頂相請贊 一

聞名不如見面，見面不如聞名。兩重虛假，一對眼睛。不近人情處，是句也剗，非句也剗；一味拍盲時，逼犬透牆，證龜成鼈。如斯杜撰，豈堪人師？誰知千里同風句，却有樂山居士知。《大川普濟禪師語錄》。

福州長谿樂山王居士遣兒惟惺投師薙髮寫師頂相請贊 二

瘦骨稜層一擔夫，幾年寥落在江湖。面皮挨轉無人識，有甚閑名上祖圖。《大川普濟禪師語錄》。（以上王曉波校點）

諸葛琰

諸葛琰，字如晦，號桂隱，泉州南安（今福建南安東）人。紹定三年以任子補光澤尉，以平寇功簽判信州，致仕歸隱。性豪邁，有學術，與白玉蟾友善。元兵南下，諸葛氏一門皆殉難，惟琰得免。見《閩中理學

淵源考》卷三三。

## 跋鶴林紫元問道集

海瑀先生人耶，仙耶，世不得而知之也。丙子歲，余於華陽道院有一笑之適，已而追從乎墨池筆塚間，凡三數月，莫能窺其際。今先生少憩無諸，日偕鶴林、紫元二真士發揮玄闡，朝夕問答，集以寄予，誦之終日，真奇書也。予別先生久矣，時起暮雲春樹之思，輒神交氣合於華胥之國。近有携《夢蟾圖》一卷惠予，圖中具載孔毅甫元祐初年，一夕夢月光斜照，高巖中有物如蝦蟆，雪色，旁立二道士，手各持文書。人告之云：此是上界真人，號娑羅臺青蓮白衣菩薩。夢覺，圖形事之。淳熙間，周益翁嘗刻以遺臨江簡壽玉，石湖居士賦詩以紀靈。余得此圖，始悟先生玉蟾之號似非偶然者。先生靈踪異跡，在在聲聞，其於佛老秘典及人間所未見之書靡不該貫，非自真人菩薩地位中來，儔克爾？余復怪先生雨中風帽，朝北海，暮蒼梧，所至戶屢雲集，獨於二君有不忍去，豈圖中所載執經二道士也耶？余非好爲附會者，以其事有足證，因爲之書，以附卷末云。古武榮桂隱諸葛琰。《瓊瑄白真人集》附錄。（劉琳校點）

## 姚鹿卿

姚鹿卿，撫州臨川（今江西撫州）人。嘉定四年登進士第，曾任南康軍軍學教授。見雍正《江西通志》卷五〇。

### 廬山集序

嘗謂世之學仙者，非羈困無聊之士放逸以自寬，則年齡遲暮之人僥倖於不死，蓋未有春秋鼎盛，功名方來，而甘心淡泊，脩然爲方外之游者。瓊山先生以妙齡赴高科，讀書種子，宿世培植根氣，已絕常人百倍矣；以其所學，肆而爲文，登金上玉，直餘事耳。顧乃棄軒冕之貴，而從冠褐之游，捨鍾鼎之榮，而嗜山林之樂。大還丹法獨得安爐立鼎之妙。昔錢宣請謁希夷，而麻衣熟視，以爲無此分。先生超然風塵之表，領悟翠虛不傳之旨，亶謂有此分者。龍虎鉛汞之說，鹿卿固未之學，然竊謂文章以氣爲主，尤不可以昏氣出之。先生噫笑涕唾皆爲文章，下筆輒數千言，不假思索，如元氣渾淪太虛中，隨物賦著，無一點剪刻痕，而曲盡其妙，則所養者可知矣。名章麗語，流落人間，有志者會粹成書，宜求當代大手筆以贊其美，篇首之序乃以屬陳人，豈翅借聽於聾而已！侯喜不識軒轅非世俗人，

而輒相與論詩，宜有石鼎之嘲。鹿卿雖未見先生，而讀其詩文，則知非食煙火人矣，其敢違蒼蠅蚯蚓之誚？所示巨編，以清靜心，爇自然香，莊誦三復而云。迪功郎、南康軍軍學教授姚鹿卿序。《瓊瑄白真人集》附錄。（劉琳校點）

## 別之傑

別之傑（？——一二五三），字宋才，郢州（今湖北鍾祥）人。嘉定二年進士。歷官京西安撫司參議官，遷太常寺主簿、將作監丞，知澧州、德安府、江陵府，遷湖北安撫使。爲京湖安撫制置使陳賅論罷。起復，知真州、江寧府、太平州等。淳祐二年授同知樞密院事兼權參知政事，七年拜參知政事。乞歸，依前職知紹興府，論罷。寶祐元年卒，特贈少師。《宋史》卷四一九有傳。

## 蜀鑑跋

昔蕭何入秦丞相府，獨收秦圖書，備知天下阨塞，戶口多少強弱處，乃用以相漢，益信《周官》訓方、形方等官之設，其意爲有在矣。余向帥江陵，郭湛溪仕蜀而出，遂爲江陵寓公，每語余以蜀事，而不知其著此書也。後十餘年，蜀道汹汹，余自邇列出鎮長沙，名爲託裏。而其子涉出示此書，

於是湛溪即世亦幾十年矣。嗟乎，揚雄既沒，而《法言》乃行。今蜀事如許，此書之出，豈不足爲經理恢拓者之助乎？淳祐五年八月某日，古郢別某跋。《蜀鑑》附錄，一九八四年四川人民出版社重印成都志古堂木刻綫裝本。又見《詠宋樓藏書志》卷二二，《鍾祥文徵》卷一。（曾棗莊校點）

# 全宋文卷七二六二

## 余日華一

余日華，字君實，仙游（今福建仙游）人。崇龜子。嘉泰二年進士及第，知潮陽縣，以除強宗不勝，爲其所陷，邑人惜之。日華平生嗜讀書，尤工文翰，著有《兌齋文集》、《凌江唱和集》。見《莆陽文獻傳》卷三四。

## 賀商總領除戶侍劄子 一

竊以赤煒布令，清和可人，共惟某官寵光鼎來，事權增重，清寧翊扶，台候動止萬福。某逖聞播告，不勝贊喜之情，謹拜手申敬下吏，伏幾仰符聖眷，俯尉師詹，攷視履之祥，謹觀頤之養，亟迎追詔，立登政涂。某詹願。《永樂大典》卷七三〇四。

## 賀商總領除戶侍劄子 二

某共審渙膺天詔，晉貳地官，班聯紫橐之華，人仰皇華之遠。列城順賴，多士懽忻。仰惟某官瓌偉閎達之資，醇深正大之學。清名直節，冠映一時。公輔之望，有識均企。逢時遇主，以宣令猷。正色立朝，無愧前哲。守專退勇，出總軍儲。董驪駕之將輸，裕轅門之供億，成績昭著，褒詔鼎來。升華禁涂，增重使指。士夫相慶，以爲創見，帝意有在，枋用可期。真儒登庸，侵疆自復。願擴宏綱，坐收雋功，以溥慰凡百君子之望。《永樂大典》卷七三〇四。

## 賀商總領除戶侍劄子 三

某違逖仞廡，三見槐綠。雲泥異勢，雖賒漫刺之期，而仰德之深，常若巍巍煌煌之在目。故臘僭申履端之賀，方懼瀆尊，而便翼言旋，重枉報翰，情文密縟，圭復藏去，愧感參懷。朱墨沉迷，姓名卑鄙，尺題寸札，不敢輒前。茲聞峻除，喜欲起舞，而守地千里，阻慶龍門，制削多儀，弗獲鱗楮，敬馮柔尺，少申厦成之私。草創匪儀，凌兢采劇，黨蒙情亮，感幸何如！某賦分謏嗇，依然一寒，冒焉此來，倏十閱月。地當衝要，扞蔽江湖，日來羽檄交馳，文書雜沓，戍兵盡發，營壘一空，客旅不

通，調發百出。常平之米，撥發幾盡；遞角之官，驅磨沓來。閔勉夙宵〔二〕，不皇寧處，而郡計窘束，頗費支吾。一羽百鈞，懼不勝任，豐敗可立而待也。幸甚獲私二天之芘，凡覆護其短，而掀揭其將蹟者，惟執事少加意焉。不勝榮荷台悃星斗之眷〔三〕。寅想靈秘咸右，福祿來崇。屬部使令，敢請要束。《永樂大典》卷七三〇四。

〔二〕閔：原作「閑」，據下《賀湖廣陳總郎劄》五改。

〔三〕悃：疑當作「梱」。「台梱」乃對掌握一方大權的地方要員的敬稱。

### 賀湖廣陳總郎劄 一

竊以向春之末，迎夏之陽，共惟某官六轡星輝，百城風竦，穹示贊襄，台候起居萬福。某謹熏被具赫蹠仰干籤虔〔二〕，伏乞熏慈原宥。某仰惟間氣所鍾，興運所關，清明在躬，太極合德。寒燠燥濕之變，曷能侵寇？視履攷祥，勿問元吉。然屬隸愛助，不能自己，敢更以勺遵璣琯，申衛匕苾，卷卷爲誓御者請。《永樂大典》卷七三二九。

〔二〕赫蹠：原作「蹠赫」。按《漢書》卷九七下《孝成趙皇后傳》：「（籍）武發篋，中有裹藥二枚，赫蹠書。」顏注引應劭曰：「赫蹠，薄小紙也。」是此處「蹠赫」乃「赫蹠」之誤，據改。「具赫蹠」猶言具短札也。

賀湖廣陳總郎劄 二

某共審妙柬淵衷，肅將隆指，方觀風而問俗，爰涓日以建臺。凡隸按澄，率增抃蹈。某分符江介，託蔭方新，束縛官常，未由進拜。輒控悃悞，牽課駢儷，弄斧班門，巖電是瀆。惟是言詞拙澀，不足歌頌盛美之萬一，切幸矜念。《永樂大典》卷七三二九。

賀湖廣陳總郎劄 三

某恭以某官學古而淵深，通今而敏劭，蚤結隆眷，凌厲亨衢。內而樞屬星郎，外而虎符龍節，聲名事業，炳如丹青。必待駕空談而枚數之，則所以事門下者抑薄矣。善乎！歐陽子之頌韓公曰：「惟德被生民，功施社稷，以耀後世而垂無窮。」此公之志，而士亦以此望公也。後之能擺落時好而以歐陽子之頌韓公者望其人，亦庶乎知言矣。某不佞，請自隗始。《永樂大典》卷七三二九。

賀湖廣陳總郎劄 四

某嘗謂世之極賤甚愚，無若奴隸，至於青天白日，則曉然皆知其清明。矧冠員履方，隨牒南北，于今有年矣。當代有名公鉅卿，以正學振斯文，以清猷結主眷，用舍進退，不以一毫介乎其心。若門下之超卓乎薦紳間者，又豈直天日之清明而已哉！某雖愚，安肯自處於奴隸後？《永樂大典》卷七三二九。

賀湖廣陳總郎劄 五

某鉛槧晚生，自知甚白，冒昧乘障，實不自量。維天隕幸，宿世有遭，遂獲仰承，慶雲光覆。循頂及踵，顧奚適而非感荷者！尋易大不及斗，費力則百他州。某效官云始，適值歉歲，幾若不可一朝以居，策蹇磨鈍，閔勉夙夜。所幸兵民相安，牒訴滋簡，上供送使，僅免闕違，課虛責有，偶逃吏誹。忼時愒日，閱月十周，鼠技已窮，懼不勝任。門下夙嘗通刺是郡，遺愛依然。興念舊游，嘉善而矜不能，曲垂覆護，庶幾末路不玷于危。某帥爾陳誠，罪當萬坐。《永樂大典》卷七三二九。

賀湖廣陳總郎劄 六

某進越皇恐，頓首端拜，申敬瀛庭。珠斗聯珞之眷，並惟天胙釐嘏，載燕載寧。支壘恐有驅冊事件，願奉刊誨，毋敢不共。《永樂大典》卷七三二九。

回前四川劉總郎劄

伏以素商闔序，金風兆涼，共惟某官對越清渥，問望益昭，堪輿孚佑，台候動止萬福。某僭瞻道誼，圭籥婁周，如日星之麗天，可望而不可近。尊仰真切，栩存鑑寐。向貢竿尺，控謝隆施，塵冗全集，缺於嗣詞，第切愧慙，猶恃融察。敢意謙挹，復枉華緘！五雲流光，輝映心目，琅誦欣暢，感悚交懷。恭審顯膺異渥，榮復穹階。舊物青氈，從天而下；清名峻節，逐日以新。成命一敷，善類交慶。仰惟某官剛直之氣塞乎宇宙，忠嘉之論簡于冕旒。休聲丕績，中外騰誦。翩然去國，亦復許時。頃遭變之異常，即奉身而詢□。上方一新聖化，旁求哲人。衆正彙征，一賢猶遠，必有誦周南之滯者，休寵鼎來，願趣裝以俟。某過蒙儷章之況，英詞俊語，厥味雋永，口誦耳聽，當暑脩然。自惟何人，不得當也。已傳副墨，衍襲榮藏，拜賜侈矣。薄遽稟報，屬抱櫝制，不如來施之厓。矯首英躔，

未筮詹對。伏幾體眷兩闡，調和六氣，珍視茵匕，趣拜絲綸，晉儀禁林，紳笏均祝。台閥華集，共想珠聯璧合，履此清秋，自天隕祉，申錫無疆。日邊有所委策，切願稟承。《永樂大典》卷七三二九。

### 賀新江西倉陳寺丞劄 一

伏審月紀夏五，暑風清微，共惟某官肅將隆指，旌馭戒嚴，后皇東相，台候動止萬福。某謹涓泓穎，恪布心聲，仰涵典籤，儻幾攬擲。《永樂大典》卷七五一七。

### 賀新江西倉陳寺丞劄 二

某申詞寒燠，已勤右方。比辰南薰阜民，不審寶履奚若？仰惟譽望日隆，風采遠振，二星所次，萬祥必臻。更勾上體耳目之馮，珍毖鼎茵之節，佇迎丹詔，入侍清光。《永樂大典》卷七五一七。

### 賀新江西倉陳寺丞劄 三

共審渙綸堯陛，賁節周原。郵音一傳，所部千里，雖地靈川后，亦歡欣鼓舞，惟恐惠臨之不速。

也。載惟某官姿稟之英特，德量之恢宏，詞華之典麗，政術之疏通，視今名流，無出其右。自騰郡最，妙柬淵衷；入踐班行，益彰賢譽。輟從駕序，暫持龍英。光聲所孚，一道蒙福。然駟騎聯翻，當與前驅逢迎於道路，必孤江右望賜之氓耳。興誦同皈，僉言匪佞。《永樂大典》卷七五一七。

### 賀新江西倉陳寺丞劄 四

某耳剽閱聲秀望，閱居諸之馱浸久。雖接畛粉榆，而霄泥復隔，仰跋端範，欲近無階，每撫西風，私自愧悵而已。渠意幸會，試郡尋易，將以迂愚，奉承條教，平生夙素，慰滿可知。茲趨戍期，寄迹珂里。使星炳煥，瞻覲匪踰。千百有懷，欽遲拱布。《永樂大典》卷七五一七。

### 賀新江西倉陳寺丞劄 五

某資稟黤淺，無足比數。五年班綴，越俎郎闈。自詭外庸，誤恩予郡。屏息田里，偶逼瓜時。被旨趣行，觸熱登道，卿雲布護，中心皈仁。惟是舉百鈞於一羽之力，惕惕然以不勝任爲憂。天與其逢，密邇臺治，或蒙閔念，少賜寬假，俾孤踪有所馮依。某倍加自力，庶幾免於戾矣。《永樂大典》卷七五一七。

賀新江西倉陳寺丞劄 六

某竊聞書以代贄，古今所同。雖櫝制方嚴，禮不敢廢，輒裁短啓，附之稟劄，少伸賀厦之誠。塗次染布，蕪類不工，儻辱過目而置之，幸甚。《永樂大典》卷七五一七。

賀新江西倉陳寺丞劄 七

某敬問群玉大眷，欽想和氣隨軒，福祿來舍。沿涂應有委役，巨細悉願稟承。《永樂大典》卷七五一七。

謝權漕劉倉監丞劄 一

伏以金祗中御，涼風西來，共惟某官使指嚴重，疊組光華，列城蒙休，百神交贊，台候動止萬福。某滌涓泓穎，恭裁柔訥，仰干籤府，伏丐熏慈，以序省覽。《永樂大典》卷七五一七。

謝權漕劉倉監丞劄 二

某日敬未宣，敢復候問茵鼎，較平時何若？載惟天生英偉，出扶昌運，奉天子命，歛惠七閩。方且以陰陽爲役，若毋俟祝釐之請，然區區愛助，尚祈厚其身以福蒼生，願典司服御者留意。《永樂大典》卷七五一七。

謝權漕劉倉監丞劄 三

某官高明之資，殫洽之學，鯁直之操，雅健之文，在當今爲第一流人物。粵繇迪簡，徧歷清華〔一〕，議論風猷固已動冕旒而聳搢紳矣。虎符課最，龍節觀風，選擇既精，譽望益峻。歛泰華之雲而垂覆岑隴，猶屯其施。充而大之，以澤四海，善類所同徯。某惡夫佞者，公言以之。《永樂大典》卷七五一七。

〔一〕徧：原作「編」，據文意改。

謝權漕劉倉監丞劄 四

某疏遠微蹤，冒昧趨成。陟降堦阼，瞻望典刑。不自意料大賢存記，予其潔賜之坐，問勞先世，眷遇有加。驟爾稟辭，即許之任，殊非屬吏之所當得。懦衷昂激，銘篆奚窮！千百謝私，姑寓萬分之一。《永樂大典》卷七五一七。

謝權漕劉倉監丞劄 五

某綿薄之資，無以瘠人。科條所拘，俾司征市，撫塵走俗，已於前月二十七日庚寅交事。麻川一閩之市，數百之家，僻處山樊，強名爲鎮。東有後山，西有江坊，南有崇化，北有長平，商賈貿易，皆萃於斯。鎮居其中，譏征所不及，莫敢誰何，所倚辦者，紙劄瑣細而已。終日坐曹，錐刀是計。總其日入之數，難充月解之輸。退省疏庸，驟親財計，瘵曠之責，必不能逃。隻身僑寓，屏息埃譴。天侈其賜，獲依英蕩之下，所冀矜容，倍加覆護。匪怒伊教，漑以餘波，使斷潢絕港中，弗致如胥井之涸，則萬折必東，不敢忘滄海之惠也。僭蠟揅誠，馮楮不任戰懼。《永樂大典》卷七五一七。

謝權漕劉倉監丞劄 六

某屬部委吏，不敢犯分。僭申星臺閫輯燕寧之間。《永樂大典》卷七五一七。

謝權漕劉倉監丞劄 七

某切恐下鎮偶有區冊，願殫驚鈍〔二〕，以勸事上者。伏乞條布。《永樂大典》卷七五一七。

〔二〕鈍：原作「純」，據文意改。

通閩倉劉監丞劄 一

切以行夏之季，歌風之薰，共惟某官瑞節焜煌，澄清得體，明靈叶扶，台候動止萬福。某敬陶練精愴，滌染箋牘，從門下舍人班典籤問，伏祈矜省。《永樂大典》卷七五一七。

通閩倉劉監丞劄 二

某寅諏動作，申布在前。敬惟一道福星，列城司命，民頌其德，吏畏其威。百順之祥，以崇以集。俯仰際蟠，清寧無間。日用飲食，何有於我！鼎茵善頌，何所措詞？某用是懍忸自失。《永樂大典》卷七五一七。

通閩倉劉監丞劄 三

某前歲趨調，寄徑鐔津〔二〕，仰恃年家子姪之契，遂有登門望履之榮。伏蒙薰慈，略去位貌，執贄還贄，如敵已然。問勞之勤，斂餽之渥，銜戴盛意，肺腑輪囷。忽遽稟違，再見夏杪，尊慕道誼，如幾車辰斗，未嘗少昧所鄉。惟是位卑人下，箋謝缺然。每謂名分穹壤，禮之大者必簡，敬之至者無文。惟宣慈亮之，幸甚。《永樂大典》卷七五一七。

〔二〕鐔津：原作「鐔律」。按「律」乃「津」之誤，鐔津指南劍州。

## 通閩倉劉監丞劄 四

某官英姿勁特，直氣橫陳。見於文章，蓋其土苴；凜然忠義，塞乎乾坤。厥今衣冠，指爲宗匠。是宜冕旒結知，在庭莫望，紉書石室，涉筆成均，月拜旬除，跬步禁從。孰謂斂散之寄，乃煩慈惠之師！矧昔之宰邑，近之分符，今之建臺，不易所部，豈非福星照臨，自有分野，時雨滲漉，靡限封疆？政恐宣室興思，曹裝行趣，七閩人士，不能久私惠澤矣。《永樂大典》卷七五一七。

## 通閩倉劉監丞劄 五

某寒鄉晚出，無所知解。幼佩父師之訓，偶繼世科，憂患叢中，十年不調。雖荷諸公過聽，交剡于朝，迄以資淺人微，倍費造化。自知既審，亟叩銓曹，偶得今任。退省委吏之職，會計必當，取予必公，商旅必寬，吏謾必扼。叢此數責，孰謂書生之可辦？戍期既及，淵冰在懷。天相其逢，密拱華節，昕夕得以奉承條教。或蒙閔念，少賜寬假，俾孤蹤有所馮依，某十駕自力，或萬分有一及民，莫非門闌之賜。冒犯威嚴，某當暑戰栗。《永樂大典》卷七五一七。

通閩倉劉監丞劄 六

某竊謂以卑事尊，進必有贊，非假聲畫，無以自見，駢儷一通，控叙情素。惟是學殖將落，言久不文，骫骳煩瀆，上干電矚，某不勝震競之至。《永樂大典》卷七五一七。

通閩倉劉監丞劄 七

某塵埃下吏，分有常守，不敢輒申星臺玉悃之敬〔二〕。某職在奔走，屬部之內或有驅使，奉令承教，無敢不力。《永樂大典》卷七五一七。

〔二〕悃：疑當作「悃」。

與江西陳倉劄 一

伏以梅澤尚闕，荷風生涼，共惟某官對越龍光，戒嚴旌旆，山祇川后，夾轂薦祥，台候動止萬

福。某頓首奏記，仰溷中涓，切祈財幸。《永樂大典》卷七五一七。

## 與江西陳倉劄 二

某申詞鼎衣，已嚴右畫。比辰琴風未薰，敢再拜以諗台履之詳。仰惟德駿望隆，天相人詠，宜有百順萃于一身。更冀斟酌陽明，珍調滌瀦，上副九重之眷，下符四海之望。某勤惓有禱。《永樂大典》卷七五一七。

## 與江西陳倉劄 三

某官奧學家傳，遠猷天賦。蚤結前旒之眷，亟登清切之班。勇退急流，屢膺隆委，聲華赫奕，績用著聞。虎節龍英，來臨江右，實德廣惠，浹洽民心。簡在帝衷，疏恩易地。三輔去天尺五，結絲絢，上禁林，當不俟建臺而召節下矣。《永樂大典》卷七五一七。

與江西陳倉劄 四

某涵泳道德之光，半生轉徙於宦路，何往不竊蒙冒之賜！獨願一望符采，無因而前。敢意天開際遇，分憂江滸，獲受容察，其爲忻幸，當如何耶？輶星炳赫，行矣瞻覲，景慕之私，教條之奉，悉存進拜。莠序悃忱，併丐冰照。《永樂大典》卷七五一七。

與江西陳倉劄 五

某孤遠之跡，技能亡以瘳人。五載班行，代庖粉省。外庸自詭，過分得州。跼伏田廬，遂性魚鳥。瓜期偶及，被命趣行，冒暑問涂，勞勛萬狀〔一〕。清樾所暨，挈累苟安。惟是一羽百鈞，慮弗勝任，若涉大水，未知攸濟。閔存不替，匪怒伊教，俾迄遐譴，敢不知元？涉筆紆情，汗流竟趾。《永樂大典》卷七五一七。

〔一〕勛：疑當作「勛」。《爾雅·釋詁上》：「勛，勞也。」

與江西陳倉劄 六

某冒班一箋，爲通名謁者之計。涂次染布，荒累僭瀆，復以制削多儀，簡脫負負，得辱攬擲幸甚。《永樂大典》卷七五一七。

與江西陳倉劄 七

紫府德聚，共料即日若蓍若艾，嘉祥萃隱。沿涂應有委役，巨細拱竢頤指。《永樂大典》卷七五一七。

代賀江西倉陳郎中劄

伏以新陽來復，曉霜護晴，共惟某官旌馭戒嚴，龍光狎至，璇穹侑孚，台候動止萬福。某共審肅將隆指，趣覲嚴宸，成命誕放，留中可卜。載惟某官貴名揭日，直節抗雲。環學偉才，實爲世表；清規懿行，自結主知。入直粉闥，出典名郡，見於施設，績用昭然。上念遠民，遴選膚使，而執事實屈

臨之，其惠大矣。然民徯其來，士欲其歸，中外爭賢，若爲應之？盍亦一闖其境，抉剔蠹敝〔二〕，然後結絲綯，上禁林，行繼先猷，均福寓內。某粵自首夏，倏勿又見冬序，乃若仞廡在望，宏芘全存，眷戀盈懷，耿耿不寐。茲聞三節趣行，建臺有日，私心自幸，以爲他日震風凌雨之託，舍門下其誰歸？俯伏賓廡，拱布卑悃，并下違遠之拜，欽遲齊宿而前。僭冒塊圯氣機，金玉體府，上副隆雉，下慰具瞻。朝方損文，奉承惟恪，不敢屢楮，上瀆威尊。潭府仙集，寅料即日盛德昭融，百順翕襲。仙遊或有要束，潔己以聽攸寵。《永樂大典》卷七五一七。

〔二〕抉：原作「快」，據文意改。

### 回新江東倉張郎中劄

伏以春序維新，物華萌動，共惟某官寵渥鼎來，標望益竣，穹祗棐扶，台候動止萬福。某比飭一箋，仰致乘輶之慶。履端云始，又得以交馳善頌之私。惟是生平願見而不可得，使人有冰壺玉鑑之想，私自愧悵而已。忽拜華染，情旨勤渠，三復以還，一味慚感。茲審易閩中之使節，司江左之倉臺，雖華次小淹，諒芝封日至，自遠而近，彰眷之隆。仰惟某官盛名雅望，羽儀搢紳，藻翰英文，流傳編載。內而揚休於蘭省，外而課最於竹符。問俗觀風，暫煩攬轡；獻可替否，即聽持荷。某自知衰

遲，過叨恩命。晉貳武部，兼官瑣闥。再騰免章，迄闕俞旨。退循非據，惕然于中。吹借有初，感刻亡限。有可垂教，願無鄙夷。儼章過儀，非所宜辱。再拜以授來使，然錄副藏去〔二〕，其榮侈矣。忽冗報對，不如先辱。未由瞻覲，敢冀體睿明之知，毓真粹之稟，益恢正大之業，入攄獻納之忠。台閣星聚，均被春華，倍燕陽和之祉。日邊委屬，敢不敬承！《永樂大典》卷七五一七。

〔二〕藏：原作「臧」，據文意改。

# 全宋文卷七二六三

余日華 二

賀國子陳監簿劄 一

竊以月紀陽來，雨將寒至，共惟某官蹇華雲路，師道尊嚴，神貺狎臻，台候動止萬福。某謹飭筦翰，以塵記府，驤首膺仞，若馬趨風。伏祈順乘來復之辰，加眎觀頤之道。即聽一言之悟，亟遂九遷之榮。某忱頌。《永樂大典》卷一四六〇八。

賀國子陳監簿劄 二

某共審某官選擇儒宗，簿正冑監。班聯清峻，步武高華。敬以某官以靖重端方之資，濟博厚高明之識，學貫九流而守之以約，剛更百鍊而即之也溫「二」。中外踐揚，勲績超卓。惟成均之法，載籍攸

司；而賢士之關，詳咨惟謹。慙儲養於遠業，即超登於邇聯。枋用之期，旦晏可俟。《永樂大典》卷一四六〇八。

〔二〕剛：疑當作「鋼」。

### 賀國子陳監簿劄 三

某久客京華，數叩嚴序。曲厪降接，溫乎其容，懌乎其詞，所以拊存者備至。又辱薰慈，肆筵設席，俾飲食教載之惠，周洽於言語情意之表。薄雲襟誼，膺肺有銘。逖違下風，行見歲晚。引脰壁月，浸升浸高。何由親炙，昕夕詹叩。徒有卷卷，要非筆驛所能喻也。《永樂大典》卷一四六〇八。

### 賀國子陳監簿劄 四

某連顛固躓之蹤，不振特甚。冒暑還侍，川浮陸走，中秋前二日，幸抵敝廬。久違親庭，定省有闕。今也奉菽水，閉柴扉，讀父書，守先訓，蕭然環堵間，但知以窗紙晦明爲朝暮而已。鑑卹之舊，有以寵綏而振德之，良所幸望。《永樂大典》卷一四六〇八。

賀國子陳監簿劄 五

某共想華閭慶眷，即日和炁磅礴，嘉祉彬攸。里中委令，謹祇肅以俟命戒。《永樂大典》卷一四六〇八。

賀鄭監簿劄

竊以緒風初轉，愛景潛舒，共惟某官玉立鴛行，賢望卓偉，圓靈薦休，台候動止萬福。某謹齋明拜手，進櫝涓人。引脰仞廡，末由詹近，伏祈視小往大來之宜，謹鼎食坤裳之奉，亟登禁近，式副傾依。某共審渙奉綸言，晉列華監，師言允穆，枋用攸基。敬以某官以論議則剛正，以學問則醇粹。貫松柏之堅直，扈芷蘭而佩飾，周行布武，茂實益騰，循次而升，未足多賀。侍玉皇之香案，從屬車之清塵，此有識所共矚目者，願少須之。某曩不自揆，久客京華。侍在鄭鄉晚生，潔己求進。台仁善下，俯垂溫顧，一世龍門，得所登造。過蒙燕衍稠疊，復辱鼎言提撕，遂使不振之孤蹤，僥倖得闕，藉手還侍。跼伏窮隱，口誦心惟，仁哉此恩，當於古人中求之，一感不足言謝。逖去風度，倏睥仲冬，緒使所牽，遂稽修敬，非簡尊也。高山仰止，徒有此心，伏想融明，必垂開貸。某奇蹇連顛之

迹，川浮陸走，中秋前三日，平達先廬。奉菽水，侍偏親，讀父書，守先訓，養蒙衡宇，下友漁樵，得失升沈，付之度外。遠依芘賴，不足薦聞。某鄉蒙付下，令兄通守抵金安，訊到即送似《北盟集補》，近方呈納，伏丐矜照。紫府德眷，近天尺五，雨露恩深，溢爲休祥，上燕下裕。仙遊驅委，悉願稟聽。《永樂大典》卷一四六〇八。

### 賀李戶侍啓

疏札端門，躋班近侍。還青氈之舊，洞明財貨之源流；陳丹宸之箴，更賴日月之獻納。紳綏歸重，筆橐增輝。共惟某官奧學家傳，英名世濟。有魏鄭公祖烈，故笏猶存；真房太尉子孫，前光益耀。自結聖神之眷，遍儀清切之班。岫雲無心，應物暫離於三島；陽春有脚，祥刑乃惠於西江。帝思夜半之席前，公果晝三之命錫。外府躋榮於月士，禁除兼倚於辰猷。蓋地官遴選於貳卿，而帝眷實隆於兼命。印纍綬若，《前漢書》：印纍纍，綬若若。共高益辨之才；旬除歲遷，果拜爲真之寵。益彰已試之效，行疇底績之言。嗣啓金甌，進調玉鉉。某登門惟舊，賀厦方新。自憐筦庫之投，快睹絲綸之播。喜而不寐，知君子之逢辰；心有所期，俟朝廷之致治。《永樂大典》卷七三〇四。

### 賀湖廣陳總郎啓

伏審肅奉芝函，載馳華傳。輝光郎宿，歌杜陵寓直之秋；指示使星，對李邵仰瞻之夕。耄倪翹首，巡筦屬心。共惟某官氣塞堪輿，學談流略。措諸事業，妙三五六經之傳；作爲文章，羅二十八宿之秀。出入游膺於妙柬，操修遠邁於古人。鷺序駕行，徧儀清切；龍英虎節，遠有皇華。果分職於地官，再峙糧於天塹。左洞庭，右彭蠡，跨湖湘形勢之雄；東夏口，西武昌，覽吳魏興亡之迹。方整神兵而滅虜，正在總餉之得人。謂師律不嚴則下無戰心，儻軍儲不給則士有饑色。三十鐘而致一石，董驪駕之將輸；百萬師而費千金，裕轅門之供億。人誦新除之丹詔，上還舊物之青氈。攷諸已試之方，偉哉有用之學。關中糧不絕于道，慙煩今日之幹旋；制下士相資於朝，行看異時之勲業。某孔懷斗仰，爲幸星臨。身雖阻於分符，神預馳於掃簪。大賢容衆，門未遂於登龍；小紙爲書，屢先馳於賀燕。幘幘所暨，歡喜奚殫？《永樂大典》卷七三二九。

### 賀江西倉卓編修啓

伏審疏恩中宸，司庾外臺。紛紫氣以度關，方應斗墟之次；煥皇華而于隰，已符益部之占。巡筦

屬心，毫倪翹首。共惟某官文華國典，學探道原。志度冲融，秘金鍾於清廟；襟懷洒落，印玉鑑於寒潭。自奏最於一同，即躋榮於六院。麟宗設屬，夙資董正之功；鴻樞束僚，懋著編摩之績。將立登於要路，乃勇退於急流。眷洪府而西十一州，君德每難於下達；去行都之遠數千里，民情尤壅於上聞。昔鳴偃室之絃，今攬范車之轡。黃童白叟，喜曾沐於恩波；翠巘奇峰，亦歡迎於蕩節。德望既著，則人心素服；習俗已熟，則教條易孚。蘇凋瘵於一方，必有殊尤之策；調盈虛於諸郡，全資宏遠之規。倚需詔下於九天，即見位超於兩地。某一麾濫竊，百適易盈。耳方屬於鳴騶，情實隨於賀燕。刺史之天獨二，敢恃同登；諸侯之地方千，願圖末效。欣幸采切，染濡莫周。《永樂大典》卷七五一七。

### 謝浙東陳倉啓

麟臺涉筆，第深忤惕之慚；虎渡分符，獲在按臨之下。未覺二天之遠，已恨十年之遲。敬露斐箋，往塵涓史。共惟某官英咨玉粹<sup>(一)</sup>，盛德金昭。直節清規，人物元祐之上；高文大冊，典刑簡齋之餘。凜步武之莫量，聳聲稱之甚偉。自奏功於畿甸，即典匭於路門。勇退急流，荐分半刺。中和布政，稔聞撫字之良；禮樂寵行，益見光華之遠。爬痒櫛垢，噓枯燠寒。盡蟄饑腸百萬之雷，何憂赤地三千之旱！果自天而錫命，爰易地以疏榮。趣裝西江，乘輶東浙，共喜長安之日近，咸瞻益部之星移。分使而用虎龍，式展澄清之志；回首而憶鴛鴦，徑歸獻納之班。某稟資弗疆<sup>(二)</sup>，涉世尤拙。洿

朝五載，無補毫分；得請一麾，遽叨臨遣。偶戍期之甫及，被嚴旨以趣行。風雨不動而俱有歡顏，帡幪在望；雲霧豁披而爭先快睹，踴躍實深。卷卷有懷，喋喋罔既。《永樂大典》卷七五一七。

〔二〕英咨：似當作「英姿」。

〔三〕疆：似當作「彊」。

### 賀江西倉陳寺丞啓

伏審中宸疏恩，外臺將命。雲霄鳴玉，昔聯清切之班；英蕩輔金，今見皇華之遠。凡受容察，悉倍忻愉。共惟某官命世題期，元精毓粹。仰泰山之桂，擅參天直幹之高；俯平輿之淵，侈睽水方流之異。魏科拔萃，榮路舒翹。姓名久錄於御屏，步武盍躋於從橐。入陪卿月，沛若流錢；出擁使星，暫茲攬轡。惟郡國斂散之法，實朝廷闡闔之權。周爰咨度，周爰咨詢，願廣求於民瘼；糴無甚賤，行益衍於邦儲。小倚澄清，立盼渥洽。欲平治今誰舍我？夙蘊經綸；密飭裝秋當見卿，徑登丞弼。某自知頑鈍，見謂闊疏。五載立朝，已慚素食；一麾試郡，遽玷洪恩。被嚴旨以趣行，冒大暑以登道。適次鳴珂之里，輒羞載贄之恭。披霧而睹青天，將快瞻於躔象；震風而知大夏，忻有託於帡幪。《永樂大典》卷七五一七。

## 賀廣東陳倉啓

伏審十行渙汗，一節察州。使指驅馳，屬五嶺炎蒸之際；人心鼓舞，望幾時清冷之來。敬馮柔箋，往候前驛。共惟某官金山萬仞，玉海千尋。書讀五車，物來能名；事至能應；詞傾三峽，人皆不足，我乃厭餘。藹華問以淵停，班清朝而山立。中和宣布，競傳清香畫戟之詩；禮樂光華，退避東梓南荆之命。惟其爵祿於心之不入，是以富貴迫人而自來。往哉親被於帝俞，使乎肅將於王命。波熬山摘，貪賈五，廉賈三，各得於阜通；倉陵庾坻，粟藏九，米藏五，不勝其儲峙。小試富民之儒效，要觀期月而政成。連天觀閣，蓋海旂旛，恐不待外臺之建；大旱霖雨，巨川舟楫，已亟攸內制之除。某猥以顓蒙，獲受容察。久嘆匏瓜繫而不食，今知桃李下自成蹊。弩矢前驅，喜見驂騑之開道；刀圭點化，願隨雞犬以得仙。《永樂大典》卷七五一七。

## 代回曹統領啓

隨牒宦途，夙仰七十餘創之勇；剖符支郡，行瞻九尺四寸之容。大尉此心，曷勝其喜！某官豆箕思敏，競病才高，蚤傳黃石之書，妙得白猿之術。謂刀劍安用毛錐子，欲貂蟬生從兜鍪中。當拊髀思

李牧之賢，乃投筆抗班超之志。敦詩書，悅禮樂，以儒家者流；執鞭弭，屬橐鞬，與噲等爲伍。暫屈總戎之職，莫收汗馬之功。橫槊賦詩，志常在於千里；披甲上馬，老猶堪於一行。願趣舍人以治裝，即斬名王而擧鼓。某載驅夙駕，已及近疆。逆旅崎嶇，行李未遑於一介；搗謙繾綣，尺書先辱於雙魚。感極銘心，言殫佔畢。《永樂大典》卷八四一三。

### 與麻沙魏巡檢啓

聞英譽於諸公，期於識面；接臣遊於百里，實以尉心。敢列寸忱，敬寓尺削。某官材猷闔敏，智略縱橫。得兵法五十家，糟粕不專於紙上；折遐謀千萬里，機籌將滿於胸中。少損功名，下親巡警。暫來山水之邑，盡洗弓刀之塵。州縣之職徒勞人，寧久淹於逸駕；廟堂之舉不次用，即入侍於周廬。某學昧知新，分甘置散。一領青衫之落魄，數莖白髮之蕭騷。誰謂環堵之書生，乃堪實身於委吏？萬幸契之云始，喜有鄰而不孤。雖異事及同寮，勿謂兵民之殊治；輔吾志明以告，尚期藥石之垂規。喜動于中，言莫能控。《永樂大典》卷八四一三。

## 賀浙漕寶謨陳檢詳啓

伏審躋榮延閣，將漕內畿。列屬鴻樞，方賴參裨之益；有華龍節，尤高刺舉之權。除目一放，歡聲四洽。某辱知甚厚，贊喜爲多。嘗亟造於賓榮，愧莫伸於面慶。引商刻羽，辱華翰以相先；進櫝濡毫，愧蕪詞之弗飭。尚惟弘度，特與矜存。《永樂大典》卷一〇五四〇。

## 回陳宗簿啓

某共審恩頒宸宸，簿正仙源。展驥足於治中，久資關決；司麟宗之屬籍，方賴纂修。步武翱翔，薦紳忻愜。某尚稽贊慶，過沐貽箋。三復謙撝，一味漸感〔二〕，輒馮束尺，姑叙豪分。草帥悚然，融亮幸甚。《永樂大典》卷一四六〇七。

〔二〕漸感：似當作「慚感」。

### 回陳宗簿入國門啓

某伏審光奉璽書，勾稽瑤籍。修門初入，賢路有開。屬以拘文，無從納謁。先蒙損翰，良認謙勤。占報不莊，原亮幸甚。《永樂大典》卷一四六〇七。

### 賀胡宗簿啓

伏審錫寵宸廷，勾文屬籍。鏤白玉之牒，正資良史之才；涉赤墀之塗，行趾先猷之美。除音初布，輿論僉諧。某久矣辱知，劇于贊喜。華緘俯逮，已榮篋衍之藏；慶悃欲陳，敬俟門牆之詣。《永樂大典》卷一四六〇七。

### 回泰州洪寺簿啓 一

竊以青陽布令，芳意權輿，共惟某官塗雌播政，千里蒙休，昊靈昭相，台候動止萬福。某敬視來儀，潔蠲旋謝。草率弗恪〔一〕，伏幸原照。《永樂大典》卷一四六〇七。

〔二〕率：原作「帥」，徑改。按「率」、「帥」二字用爲率領、帶頭等義時可通用；意爲草率時似不可通。

## 回泰州洪寺簿啓 二

某首誦燕起，茲不荐陳，仰惟侯度有嚴，勛名焜燿，民宜豈弟，真福鼎來。更幾體方楨之眷，調未齊之序，對於公卿選表之命。《永樂大典》卷一四六〇七。

## 回泰州洪寺簿啓 三

某共審輟從鷺序，榮剖虎符，吏帖民安，塗歌里頌，伏惟慶愜。某官粹明之學，經濟之才，度越時流，結知宸扆。宜曳星履，密侍天光；暫違筍班，出分竹使。佇繇奏最，即慶遄歸。不容一方，久私德覆。《永樂大典》卷一四六〇七。

## 回泰州洪寺簿啓 四

某日者得侍同朝之末，餘光振拂，眷意周旋。慰滿生平，未易殫叙。逖遠睟盎，曾未踰時。岳峻

箕明，罔昧所鄉。方圖玃櫝，以慶開藩，風埃京塵，遂成逋慢。眷誼隆特，芳汗寵貽。蔚然其文，溢於情表，榮幸未易以聲畫既也。《永樂大典》卷一四六〇七。

回泰州洪寺簿啓 五

某僕邀亡庸，濫中省戶，清越傍逮，狃寬譴訶。風聲相聞，音郵賜誨，庶幾或免，渠不知元！冒昧興言，伏墨期望。黃堂凝燕，寶輯雍怡，福祉之來，河漢無際。《永樂大典》卷一四六〇七。

回泰州洪寺簿啓 六

某或恐都城偶有翫目，不以巨細，願得拱承。葆真於萬金，加重於九鼎。更祈屬意，以昌賢業。幸甚。《永樂大典》卷一四六〇七。

回泰州洪寺簿啓 七

某共審疏恩魏闕，易填通川。恩威已浹於兩邦，譽望益孚於衆聽。某官以長才粹履羽儀清朝，以

厚德重望結知丹宸，疇庸郡最，爰錫褒章。眷是海門，允爲重地，遴選賢牧，扞蔽長淮。少寬顧憂，即登禁近。《永樂大典》卷一四六〇七。

### 回泰州洪寺簿啓 八

某日篋柔尺，仰慶開藩，近蒙報章，方切愧感。謙執泰過，雲染鼎來，情文勤渠，雋永懋荷。惟是逖違冰峙，倏忽西風，兩地相望，一誠仰止。《永樂大典》卷一四六〇七。

### 回泰州洪寺簿啓 九

某材謏能薄，蠢蠢朝行，無異雀鼠盜太倉者。清樾傍逮，行矣滿歲，絲毫莫補，玩愒是慚。執事未忘舊遊，賜以良砭，免麗司敗，渠庸敢忘！瀛壖福星之聚，欽想自天降康，與日俱積。某伏恐日邊有翫，越惟台旨是遵。《永樂大典》卷一四六〇七。

賀鎮江守趙尚書啓

惟朱方之近甸，爲赤地之雄藩。列戍雲屯，撫江淮之表裏；連檣日集，分吳楚之東西。《輿地紀勝》卷七。

賀隆興施帥侍郎啓

分翼畛，接衡廬，益壯于蕃之勢；履星辰，運樞極，佇諧爰立之求。《輿地紀勝》卷二六。

賀太平曾侍郎移帥江西啓

眷是真主之潛龍，允爲大臣之歇馬。騷人社下，足白鷗野水之盟；帝子樓前，餘孤鶩落霞之興。八州遺愛，炳炳如存；一榻高風，言言未泯。《輿地紀勝》卷二六。

## 賀建昌趙守啓

載念澤國之上游，莫若盱江之勝概。道通百越山川，堂記十賢人物。《輿地紀勝》卷三五。

## 賀黃州王守啓

維邾城之名郡，爲淮甸之要衝。赤壁風月笛，慙坐嘯於黃堂；彤庭鴛鷺班，即入儀於紫禁。《輿地紀勝》卷四九。

## 賀鄂州詹大卿啓

秋夜胡牀，少適南樓之興；春風行李，旋爲北闕之歸。《輿地紀勝》卷六七。

### 賀李侍郎啓

勞侍從而厭承明，袖手許閑於梓里；閱禮樂而謀元帥，宜人獨號於桂林。

炎熱全消，見梅雪萬里之詠；登臨遠望，分江山一半之天。《輿地紀勝》卷一〇三。

### 賀沈尚書啓

惟富沙之大府，爲閩會之要衝。環七邑以星聯，乃南渡興王之故地；望九曲之雲氣，亦西山會真之洞天。《輿地紀勝》卷一二九。

### 代賀沈尚書啓

眷是真主潛龍之邸，實惟大臣歇馬之邦。山川鬱葱，有梅仙之舊隱；冠蓋走集，當閩會之要衝。

《輿地紀勝》卷一二九。（以上王曉波校點）

# 全宋文卷七二六四

## 黃仲炎

黃仲炎，字若晦，溫州永嘉（今浙江溫州）人。篤學窮經，老而不第。潛心十載，于紹定中著成《春秋通說》十三卷，端平中呈進。今傳于世。見所撰《繳進春秋通說表》，《四庫全書總目提要》卷二七。

### 繳進春秋通說表

臣仲炎言：伏以六經統天地，莫非用世之規；萬物聚《春秋》，尤切治人之道。洪惟烈祖，崇尚斯文。仁宗命昌朝侍講於邇英，曰監戒而不諱；高廟置安國進解於座右，謂喜學以無忘。至若咨輔弼以攷三《傳》之異同，又如因答問而審一言之造化。可見先朝極討論之意，所惜儒臣寡疏暢之功。厥理未彰，茲學幾廢。允賴厲精之上哲，丕承宏遠之前摹。臣仲炎惶恐惶恐，頓首頓首。臣竊以孔聖之修麟經，猶禹功之抑洪水。昏墊不塞，曷臻九叙之歌；亂賊匪除，莫救三綱之壞。即當時之事實，爲異代之鑑觀。昭示燎原，貴防曲突；顧瞻折軸，宜重後轅。雖仍魯史之文，實正周王之位。用全教

戒，體極謹嚴。自專門雜褒貶以論經，使後世眩是非而難辨。迄於科舉時文之弊，尤爲戲侮聖人之言。因欲獻諛於今，遂亦虛美於古。晉重耳坐邀萬乘，或善其明君臣之大經；周世子外附諸侯，或嘉其存王室之正統。南宮較藝，首選在茲；下國從風，流弊甚矣。獎崇功利，誇譽詐權。顧此時師友之染濡，莫能擇善；占他日臣工之獻替，必至文姦。臣肆舉業而罔功，抱遺經而永慨。潛心十稔，課稿一編。遠稽孟子之書，近酌朱熹之論。務陳理要，痛翦蕪繁。鳴世儒寡和之音，闢衆傳多岐之礙。強名《通說》，頗異舊聞。懼微命之填溝，致此書之覆瓿。僭塵間燕，期廣緝熙。茲蓋恭遇皇帝陛下躬攬大權，作新庶政。聞一善而川決，明四目以天臨。賢路亨通，侈今日雲龍之會；經帷啓沃，變昔時仗馬之瘖。日月就將，海澤浸潤。睠洙泗編年之旨，尚闕申明；念草茅攷古之勤，倘垂乙覽。察二霸之駁，而宅心至正；居一王之尊，而立志自強。睹喪敗起於佳兵，則安靖以輯福；推災異由於失德，則兢省以導和。刻桷築臺，深虞侈欲；取田納鼎，永戢貪風。中國盛，則何懼荆蠻、戎狄之馮陵；家道正，則必無仲子、文姜之僭濫。以至世變推移之故，物情紛錯之繇，郊雩嘗禘之經，朝聘會盟之節，皆可因文以攷，引類而知。息邪說，放淫辭，庶見仲尼之志；求多聞，克永世，用增列聖之光。臣無任瞻天望聖、激切屏營之至。臣謹繕寫前件《春秋通說》，成若干冊，囊封隨表繳進以聞。臣仲炎惶恐惶恐，頓首頓首。謹言。《春秋通說》卷首，通志堂經解本。又見《古今圖書集成》經籍典卷二〇〇。

## 春秋通說序

紹定三年五月

《春秋》者，聖人教戒天下之書，非褒貶之書也。何謂教？所書之法是也；何謂戒？所書之事是也。法，聖人所定也，故謂之教；事，衰亂之迹也，爲戒而已矣。彼三《傳》者，不知其紀事皆以爲戒也，而曰有褒貶焉，凡《春秋》書人、書名、或去氏、或去族者，貶惡也，其書爵、書字、或稱族、或稱氏者，褒善也。甚者如日月、地名之或書或不書，則皆指曰是褒貶所繫也。質諸此而彼礙，證諸前而後違；或事同而名爵異書，或罪大而族氏不削。於是褒貶之例窮矣。例窮而無以通之，則曲爲之解焉。專門師授，襲陋仍訛。由漢以來，見謂明經者不勝衆多，然大抵爭辨於褒貶之異，究詰於類例之疑，滓重煙深，莫之澄掃，而《春秋》之大義隱矣。自大義既隱，而或者厭焉，不知歸咎於傳業之失，而曰聖人固爾也。故劉知幾有虛美隱惡之謗，王安石有斷爛朝報之毀。遂使聖人修經之志，更千數百載而弗獲伸於世，豈不悲哉！故曰，《春秋》者，聖人教戒天下之書，非褒貶之書也。昔之善論《春秋》者，惟孟軻氏、莊周氏爲近之。軻之說曰「孔子作《春秋》，而亂臣賊子懼」，是以戒言也；周之說曰「《春秋》以道名分」，是以教言也。斯二者庶幾孔子之志也。夫人之所以異於禽獸者，以其有道也。如是而君臣，如是而父子，如是而長幼男女，親疏內外之差等不齊也。叙此者爲禮，順此者爲樂，理此者爲政，防此者爲刑，堯舜三王之治，皆是物也。時乎衰周，王政不行，物情放肆，於是

紊其叙，乖其順，廢其理，決其防，而天下蕩然矣。孔子有憂之，而無位以行其志，不得已而即吾父母國之史以明之。陳覆轍，所以懼後車也；遏人變，所以返天常也。霸圖之盛，王迹之熄也；盟會之繁，忠信之薄也。雖有彼善於此者，卒非治世之事也，聖人何褒焉？至於夷狄之陵中國，臣子之奸君父，鬪干戈以濟貪忿之志，悖理道以傷天地之和者，亦何待貶而後見其惡也？若夫筆削有法，而訓教存焉。崇王而黜霸，尊君而抑臣，貴華而賤夷，辨禮之非，防亂之始，畏天戒，重民生，爲萬世立治準焉。嗚呼，使後之爲君父、爲臣子、爲夫婦、爲兄弟、爲黨友、爲中國御夷狄者，由其法，戒其事，則彝倫正而禍亂息矣。余由童至壯，研思是經，嘗眩於舊說，如手棼絲、目暗室，難於解辨，蓋久而後能破之。旁稽記載，互參始末，爲書十有三卷，名曰《春秋通說》。通說者，去褒貶之茅塞，而通諸教戒之正途也。夫《春秋》固有以隻字垂法者矣，如加王於正、削吳楚僭號而從其本爵之類是也，而非字字有義也。亦固有所謂例者矣，如書其君歿曰薨，外諸侯曰卒，內大夫書卒，外大夫不書卒之類是也，此皆通例也。先儒謂左氏非左丘明，丘明乃孔子前輩，故孔子云「左丘明恥之，丘亦恥之」，先丘明而後己，尊之也。楚左史倚相能讀三墳五典、八索九丘，蓋今《左氏傳》即楚左史也。古者史世其官，則傳是書者，倚相之後也。故《左傳》載楚事比它國爲特詳，是得其實。公、穀亦莫明其所自來，或云子夏門人，要皆非親受經於聖人者，故於說經首失其義；而其間亦有得者，穀梁氏爾。若夫具載事實，則左氏尚可攷，故當據事以觀經。事或牴牾，難於盡從，則以經爲斷。上以仲尼之志，雖以立異取譏於世，而不辭也。紹定三年五月朔，黃仲炎序。《春秋通說》卷首。又見《經義

考》卷一九〇，《古今圖書集成》經籍典卷一六九，《南宋文範》卷五一。（以上劉琳校點）

## 熊慶胄

熊慶胄，字夢渭，號竹谷，建陽（今福建建陽）人。少受業于蔡淵，後游蔡元定之門，并師真德秀、劉垕。以《禮記》決科，精于《禮》學。壯歲棄科舉，潛心問學，不求聞知。著有《春秋約說》、《中興三朝通略》、《大學中庸緒言》、《易經集傳》、《采詩小紀》、《史學提綱》、《敬思齋稿》、《直方齋稿》、《三禮通議》等。見《閩中理學淵源考》卷三二，《宋元學案補遺》卷八一。

## 贈王岳二相師序

世儒之論常論子周子《太極圖說》，謂得之于希夷陳氏，陳氏之師，則麻衣道者也。故近世心易得以售其臆說，其實不然。彼麻衣者，乃離世毀形之士，元未知道，特不過精於風鑑而已，烏識四聖人之大義哉？朱子論辨，蓋得之矣。王岳二君儒其言，方外其服，至自漢、沔，頗能言西北遺事，豈非聞希夷麻衣之風而願受役其門者歟？有急流勇退者，君其爲我過而問焉。《事文類聚翰墨大全》壬集卷七。

## 贈孫太史序

予上下今古，素不喜機祥小數、幻荒誕謾之說「二」。間有過予言命者，每以君子不謂命而謂性之說謝之。或者則謂予語非其人，未得所以知言守默之義也。殊不知民受天地之中以生，均有此命，均謂之性，無智愚賢不肖之分。其動作禮義威儀之則，則所以定命也，性其有不存者乎？彼以衆方之生之辰之同，而揣度推驗，乃有大不同者，詎足訂哉？知乎此，則可言君子之事矣。孫生嘗爲儒，而又游君子之門，坐語從容，尚賴切有請焉。《事文類聚翰墨大全》壬集卷七。

「二」幻：原作「幼」，據文意改。

## 劉子冶字說

劉氏子鍊生十有五年而不改童心，厥明年，乃以父命而加冠焉。冠者何？將以責成人之道也。鍊乎鍊乎，其棄爾幼志，盡爲人之事乎，盡爲人子者之禮乎。冠必以字，字必以序。今欲以子冶訓而字，敢申序針義焉。五行五常，形氣非異。維乾爲金，合兌之義。大哉義乎！曰金之神。鈔鑒釧錯，

各無常名。天地爲爐，融會材質。至精至剛，百鍊之力。烈烈火城，鼓鞴具宜。造化爲工，居然器之。或爲太阿，或爲大呂。是有命焉，冶者攸上。踴躍而言，是誠何祥？既乖物初，復違天常。願言在鎔，自別良窳。毋使匠師，獨用心苦。《事文類聚翰墨大全》乙集卷一。

### 祭蔡覺軒文

某昔以孤童，自山中來拜庭下，時血氣寢盛，學未知方，獨好爲文，道古今之事，以行其直。君既許以責善之誼矣，憂幽以來，惕然內省，竊有志於古人爲己之學，讀書養性，莫知端倪。曰采《詩》，曰記《禮》，曰《大學》，實常就有道之誨。君之盛德，不斥其慙，乃若有取，至於益友相視。最後義文大義，獨幸示教，出處定命，亦俾得聞。是豈非僕之愛敬者同理而不同俗，君之告語者以實而不以文，故至久而益信歟。泰道方亨，大君有命，世方日夜望君一起，以承家學，以淑後人，僕亦將就下風以請。今乃窅然觀化，溘埃而上征，吾黨將何所依賴，師說將何所推行耶！斯文日衰，世道日隆，藐茲小子，惟有抱遺書，入山閉戶而已矣。一詞寓哀，直叙情愫。敬之至者，焉用文之。《蔡氏九儒書》卷七。

### 蔡覺軒哀辭

西山之陽有名儒，曰覺軒先生，姓蔡氏，西山隱君子之子也。西山是爲慶元之黨人，紫陽朱子題其墓，尊之曰先生。乃今有孫，是似其祖，人復以先生尊之。先生行甚高，度甚夷，所學蓋自孔氏，將進而未止，隕然處順，淵乎似道，是可謂能世其家矣。人士敬之，府公聘之，諸公貴人又薦之。乃自山中特起爲命士，將典教於州郡，以覺後學。先生辭焉，有避莫得，使者書幣在門，先生驚焉。已而得微疾，鉤深探微，涵茹古今，窮晝夜益不懈，心怦怦以悸。越數日，竟正襟危坐而逝。嗚呼！若先生者，可謂順理安常者矣，順受其正者矣。山中之君子野人，皆驚呼失聲甚哀。豫章熊某，其同門婿也，是有世舊，哀有甚焉。思昔求道未獲，蓋將以紫陽之敬程子者請事於左右。先生曰：「子知言也，益友也，奚師之足云？」顧念斯言，輔仁服義，庸非得易道之益謙也歟！斯文日衰，吾道如綫，良可哀已。於是修其辭曰：道之大原兮在天，待夫人兮弘焉。維聖賢之述作，斯有覺於民先。慨先覺之寥寥，傳後覺兮於一編。凜正性而不踰，妙探蹟而無前。蹇濩落而不偶，將白首於山泉。方抱道之將進，忽隨化而溘然。豈斯世之紛龐，不可得而參肩。抑聞道而既早，不復畀其耆年。將定命之有終，幹旦晝而推遷。仰高天而難問，慨神理之幽玄。繫修名之有立，尚磅礴於八埏。《事文類聚翰墨大全》戊集卷五。又見《蔡氏九儒書》卷七，《宋元學案補遺》卷六七。

## 祭姊文

嗚呼痛哉！人孰無親，何其孤且艱邪！人孰無家，何其羈且迍邪！人孰無憂，何其殷復伴邪！人孰無疾，何其棘復痊邪！人孰無子，何其風沙搏邪！人孰無妾，何其鴟梟奸邪！人孰無死，何其抱沈冤邪！人孰無冤，是必往呼天邪！天道幽遠，人道近可言邪！以人占天，何近何遠，特一息之間邪！嗚呼痛哉！《事文類聚翰墨大全》戊集卷四。

## 駐真道院修造疏

上界是宮府，不禁飛仙之遨游；仙人好樓居，莫名太上之感應。睠此孤峰之頂，超然一畝之宮。玉樓之起秋風，既足少安于飈馭；金鐘之在東序，若爲增耀於山門。要令武夷神君之留，必藉白水真人之力。有法無法，萬物主既聿振於崇風；同玄又玄，衆妙門更有關於元化。肯心不昧，道陰無窮。

《事文類聚翰墨大全》癸集卷一〇。

## 平山建祠山大帝殿疏

將軍富平侯之廟自漢而興，太師文忠公之碑在唐尤盛。遙遙香火，濯濯聲靈，相維衣冠所萃之鄉，獨闕鬚髯若神之像。盍捐力布，同運斧斤。三篋而訪道書，豈無餘祉；七葉而爲近侍，尚踵流風。凡有願心，悉徼弘賜。《事文類聚翰墨大全》癸集卷一一。（以上郭齊校點）

## 朱鑑

朱鑑，字子明，婺源（今江西婺源）人，塾子，熹孫。以蔭補迪功郎，歷任知巢縣、知興國軍、湖廣總領等職，入爲大理寺簿，除淮西制參兼運判。淳祐中奉祠，主管紹興府千秋鴻禧觀。著有《文公易說》二十三卷（存）、《詩傳遺說》六卷（存）。見所著《詩傳遺說序》，《朱文公易說跋》，《歲時廣記序》，《東澗集》卷六制詞，《平齋文集》卷二〇制詞，《閩中理學淵源考》卷一五，《宋元學案》卷四九，《宋元學案補遺》卷四九。

## 詩傳遺說序

端平二年五月

先文公《詩集傳》，豫章、長沙、后山皆有本，而后山本讎校爲最精。第初脫藁時，音訓間有未備，刻版已竟，不容增益。欲著補脫，終弗克就，未免仍用舊版，葺爲全書。補綴趨那，久將漫漶。謁來富川，郡事餘暇，輒取家本親加是正，刻實學宮，以傳永久。抑鑑昔在侍旁，每見學者相與講論是書，凡一字之疑，一義之隱，反覆問答，切磋研究，必令心通意解而後已。今文集書問語錄所記載，無慮數十百條，彙次成編，題曰《遺說》。後之讀《詩》者能兼攷乎此而盡心焉，則無異於親承誨誘，可以得其意而無疑於其言矣。若《七月》、《斯干》二詩，書以遺丘子服者，尚可考見去取位實小序之法，因附於後。端平乙未五月朔，孫承議郎、權知興國軍兼管內勸農營田事、節制屯戍軍馬鑑百拜敬識。《詩傳遺說》卷首，影印文淵閣四庫全書本。又見《古今圖書集成》經籍典卷一四二，《經義考》卷一〇八，《宋元學案補遺》卷四九，民國《福建通志》總卷二五《福建藝文志》卷四。

## 朱文公易說跋

淳祐十二年正月

先文公於《易》有《啓蒙》，有《本義》，皆所以發明往聖前民用之意，而《遺說》之輯，蓋取諸

門人記錄問答之語，往往與《啓蒙》、《本義》交相發揮，則又鑑假守富川時所會粹者也。建陽趙令刊此編於縣齋，鑑嘗爲之序。今復以付之書市，使鋟梓以廣其傳，不復敢贅爲之說云。淳祐壬子王春正月朔，適孫朝請大夫、主管紹興府千秋鴻禧觀朱鑑謹識。《晦庵先生朱文公易說》卷首，通志堂經解本。又見《古今圖書集成》經籍典卷六一，《鄭堂讀書記補逸》卷一。

## 易呂氏音訓跋

先公著述經傳悉加音訓，而於《易》獨否者，以有東萊先生此書也。鑑既刊《啓蒙》、《本義》，念音訓不可闕，因取寶婺、臨漳、鄂渚本，親正訛誤六十餘字而併刊之。如《豫》爻之「簪」，晁作「戠」，婺、漳、鄂本作「戠」。《損》象之「室」，晁作「嵒」，婺本作「嵒」，漳作「嵒」，鄂作「嵒」。則有未詳者。然非有害於文義，已足爲善本矣。至於嵩山《古易》跋語，先公嘗折衷鼂、呂之說於其後。今三本所載不同，而文集中乃有晚歲書，委鄂教滕珙以改換最後兩版者，其爲後出無疑云。鑑謹誌。《新安文獻志》卷二三。又見《古今圖書集成》經籍典卷六一，《經義考》卷三〇，《小學考》卷三五。

## 歲時廣記序

有天之時，有人之時。寒暑之推遷，此時之運於天者也。歷書所載，蓋莫詳焉。至於因某日而載某事，此時之係於人者，端千緒萬，非託之紀述，則莫能探其源委耳。噫！慶道長於一陽之生，謹履端於一歲之始，是蓋天事人事之相參，尤有可據。彼仲夏之重五，季秋之重九，豈天之炤候然也，而人實爲之。使微考訂，孰知競渡之繇楚靈均，登高之因費長房乎？引類而伸，若此者衆。雖然，荆楚歲時之記善矣，惜乎失之拘也。秦唐歲時之所記多矣，惜乎未之備也。今南潁陳君蒐獵經傳，以至野史異書，凡有涉於節序者，萃爲巨帙，殆靡一遺。仰以稽諸天時，俯以驗之人事，題其篇端曰《歲時廣記》，求予文而序之。予惟陳君嘗編《博聞三錄》，盛行於世。況此書該而不冗，雅而不俚，自當與並傳於無窮云。宣教郎、特差知無爲軍巢縣事、兼理武民兵軍正、總轄屯戍兵馬、借緋新安朱鑑撰。

《歲時廣記》卷首，學海類編本。（以上郭齊校點）

## 朱子肅

朱子肅，福州閩縣（今福建福州）人，著長子。嘗任兩浙西路安撫司主管機宜文字。見所撰朱著墳誌。

宋龍圖閣學士侍讀吏部尚書朱公壙誌

紹定四年正月

紹定四年，歲在辛卯，春正月二十有二日，孤子子肅、子恭奉考君柩葬于飛來山陰東園山之原。先期持玉堂少卿林先生岳狀行，從鄭寶制左史公性之請銘。鄭公，考君心知也，嘗語子肅等曰：「鄉同朝時，相遇惟評文論心，絕口不及聲利，而且簡儉介潔，使人愈久愈敬。」今痛九原之不可起，願志而揭墓右，以詔來世。窆日薄，子肅等不肖，廩焉亡以內諸幽，敬茹哀叙歷官遷次、出處梗概實之壙。考君諱著，字公明，一字性誠。朱氏爲沛國顯姓，十世祖御史中丞至自光之固始，遂貫福州閩縣。皇曾祖諱庭佐，太學博士，贈太保。曾祖妣黃氏，吳國夫人。皇祖諱倬，紹興末相高廟，贈太師、魏國公，賜謚文靖。祖妣劉氏、李氏，俱魏國夫人。皇考諱端學，中奉大夫、直秘閣，除憲江東，提舉華州雲臺觀，累贈金紫光祿大夫。皇妣余氏，建安郡夫人。金紫生三子，考君寔爲嫡長。以文靖遺澤，補承務郎。妙年刻苦自厲，銓中，初筮溫之天富支鹽，再調漳之龍溪丞，兩預福建漕薦。淳熙十四年擢進士乙科。阜陵賜第日，臚唱臬考君姓名，二相竝奏，曾被玉音「義方」之褒，堂除西外宗院監左藏東庫。秩滿，與職事官差遣，除太學博士。明年，遷國子博士。坐言事者失實，去國。丁金紫艱，廬墓哀毀。服除，祠冲佑，守道州，持湖右庾節兼提點刑獄，寓直中秘，分帥夔路，主四川類文衡。召入爲郎，歷刑部、度支、尚右三曹，權直舍人院。庚辰，大廷策士，充詳定官，除將作

監、秘書少監兼國史院編修官、實錄院檢討官，遷太常少卿，起居郎，權刑部侍郎。癸未，同知貢舉，陞兼同修國史、實錄院同脩撰，除吏部侍郎。皇上登大寶，首擢兼侍讀，除兵部尚書，守吏部尚書兼修國史、實錄院修撰，差郊祀大禮橋道頓遞使。年偪垂車，告老章幾十上，溫詔至再，始除職與郡，除顯謨閣學士、知潭州、湖南安撫使。便殿引辭，益被睿睽，有一「朕自知卿，欲留講筵，以卿苦求去」等語，錫賚甚渥。面奏三劄，以務學、廣謀、增聖德、濟國事爲言，詞旨剴切。且乞振綱紀、守法度、明賞罰、別廉貪、辨真僞、察賢否，汲汲爲固基本計，悉蒙開納。去歸其鄉，力請祠，提舉西京嵩山崇福宮。積階正議大夫、閩縣開國伯，食邑八百戶。前年冬，得左髀酸痺疾，稍岨于行。然清虛電炯，鬚鬢猶鬢，筆力不小衰「」。俄感微恙，奄棄二孤于正寢。生於紹興三十年歲庚辰九月之廿三日寅時，而沒於紹定庚寅七月二十四日，享年七十有一。烏虜痛哉！將死，遺言耿耿，皆愛君忠赤。戒後事勿溺緇黃，亦不怛化，正衣冠，危坐而逝。先，致仕□恩，除龍圖閣學士轉兩官，依所乞。遺表聞，贈四官，與致仕遺表澤。取洪氏，賜冠帔，贈淑人，故建寧府教授杞之女。白首相敬，爲女、爲婦、爲母之道皆可則。從宦都城，先四年卒，考君有誌。子男：長子肅，朝奉郎、前兩浙西路安撫司主管機宜文字，賜緋魚袋；次子恭，承議郎、前知汀州長汀縣，賜緋魚袋；又次子齊，蚤世。女曰卯，曰睦，未笄卒；曰耆，適文林郎、潮州司理林蓬孫從夫，亦先卒。孫男挺，承奉郎、監興化軍涵頭鹽倉，以考君郊恩換授。搏，將仕郎；拱，將仕郎，皆所任。稱翁、堅翁。女祉。曾孫男頤老。考君講學操踐自誠，入一言行必印券。事親孝，泣官廉，尚義勇，爲人謀忠，謙恭酬物。躬行

帥孫子，安於清約，有韋布不堪憂。樂施予，廣調卹，助未舉之喪，賴以入土者衆。平居寡欲，既達，無聲色娛。故其更治也，所至節愛，以化治稱。用公錢代民輸積帑，餘飲兵費。儒功久□□□清風惠政，今猶昭□□□□□靖共正直，不亢不隨，名德日以高顯。勤勞職業，風雨靡輒變。其在經幄也，亶亶告君，一本仁義，國體、民基，懇切真意，退朝率有隱憂。典綜銓衡，鏡清燭照，人不敢于以私。公道寢昌，不負親擢，險夷一致，終始玉粹，見幾知止。佚老，全節晦忠，一飯不忘。藥裹紛前，憂時尤極。見謂全德君子，亦其廉恥命義素明也。死之日，善類嗟悼，閭巷弔哭，以亡此哲人爲恨。况艱棘荼毒，忍死銜痛，爲人子者當如何？勉奉大事，姑叙顛末。考君生平追古琢文，尤工於詩。有《愛賢集稿》、《續稿》、《經筵進讀》、《西掖制稿》，藏于家。孤哀子子肅、子恭泣血謹書。

安徽省博物館藏拓片。（盧茂村供稿）

〔二〕小：疑爲「少」之訛字。

## 王 汶

王汶，字希道，號東谷，台州黃巖（今浙江黃巖）人，隱士王立族人。師事葉適、王誠叟，以《易》卦名書齋曰蒙齋。取古今載籍，讀之數年，豁然領悟，操筆爲文，日千言。著有《東谷集》。見嘉靖《太平縣志》卷六，《宋元學案》卷五五。

## 瓜廬詩後序

余蚤游東嘉，於瓜廬君投分最密。是集所銓次，非晤語所及，則書題所緘寄也。掩卷俛仰，遂成千古，悲哉！然君最愛劉長卿詩，余一日偶問姚賈如何，則曰：「某自愛此，何論姚賈。」後十年復過之，則手翻口諷，一以杜老爲師矣。且時時爲余言，詩惟恐其不空遠，空易到，遠難及。余洒然識其所謂。今是集所編大概趣極澹，意極元，句法極精妥，霜松雪柏，雖不以葩卉自命，然虬枝直上，勢摩霄漢，人不得不仰而視也。信矣，其名家哉！余猶記其游鴈山有「半洞容千佛，諸峰共一雲」，石橋有「泉涌龍頻躍，山靈鳥不來」之句，而是編乃獨逸，何邪？暇日更當從趙東閣評之。東谷王汶。《瓜廬詩》附錄。又見《赤城別集》卷二。

## 樓奇王周道墓誌

周道弟卒之，當紹定癸巳，缺與其兄沚祔其柩於父兆，請置石，請於予，缺言之耿耿，無一不存。今茲居廬，儻泯默以視其窆，是死周道也，乃泣而序之。周道姓王氏，名演，台黃巖人。祖士寧，父鎬。少失父，勇自樹立，日聚諸書，夜半深曠朗詠，音節清苦，與燈影同淒迷。堅坐者十年，

始挈而之東嘉。東嘉人士如林，咸側席曰佳士。周道益自貴重，山砧水崖，携一編徑往，飲食饑渴無期度，猝然遇人語不相酬對，不知者以爲目寄飛鴻也。以是於諸經史靡不通。其他文字若《植蘭說》、《顏樂齋記》等作，開闔自置，不蹈俗繩尺，稜稜蒼松，氣欲干霄，與世樗櫟異矣。予觀自昔文人類多興趣高遠，投以世故輒不了，而周道於家事極曉，於人情痛癢極周悉，耆年宿德尊奉不少懈，下至僮奴不以一毫意氣先之也。予一日過周道，見手數珠，問之，曰：「母病，日以此課梵典。」周道豈不解者，直欲娛慰其親至此也。噫，王氏家于樓奇，積十數世矣，冰蓄雪播，惟筆墨之畦畛是闢，然未有偶於時者。晚得周道，謂宜穫而收之矣，亦卒無年焉，何哉？雖然，合群從十數人語，其聲聯響接，必曰周道。間而適他郡，見可喜以十百數，亦莫有踰周道者。則其所樹立亦可自見於古人矣，無年乎何傷？周道卒以戊子八月六日，年纔二十有三。未屬續然，猶翻某書，驚曰：「吾目光隕矣。」急持其母，齧其臂以訣，連呼曰「負吾母，負吾母」，乃瞑。其從兄澄哭以詩曰：「把酒休教讀奠文，有才無命可憐君。向來五色江淹筆，今作空山一塚雲。」「塵滿書牀草滿庭，數間竹屋冷如冰。舊囊螢火應將去，散向松花作鬼燈。」未知當壤下意否。有《文囊》五卷，藏于家。銘曰：

山之上兮雲悠悠，山之下兮泉幽幽。昔盤而遊瘞于丘，恍兮惚兮誰與儔？《赤城後集》卷一

## 高稼

高稼（？——一二三五），字南叔，號縮齋，邛州蒲江（今四川蒲江）人，載弟。嘉定七年進士。寶慶三年，通判沔州，知洋州，爲利州路提刑兼權興元府，措置軍民抵禦蒙古軍。差知榮州、閬州，以直秘閣知沔州、利州路提刑。葺理創殘，招集流散。遷朝請大夫兼關外四州安撫司公事，駐守沔州。端平二年，蒙古軍大至，稼誓死堅守，城破，殉難。贈龍圖閣直學士，謚曰忠。後以子斯得執政，累贈太師。著有《縮齋類稿》三十卷。見《宋史》卷四四九本傳。

### 致桂如淵書

今日之事如弈棋，所校者先後爾。苟以分水、三泉、米倉爲可保，敵兵若至宕昌、清川以入，將孰禦之？盍以興、沔、利三戎司分駐鳳州，俾制司已招之忠義、關表復讎之豪傑，聯司以進，兵氣奪矣。《宋史》卷四四九《高稼傳》。

## 沔州告神文

郡當兵難之後，生聚撫摩，所當盡力。去之日，誓垂橐以入劍門。《宋史》卷四四九《高稼傳》。（以上黃錦君校點）

# 全宋文卷七二六五

## 李 劉 一

李劉，字公甫，號梅亭，撫州崇仁（今江西崇仁）人，號子。嘗從真德秀遊，登嘉定元年進士第，授迪功郎、潭州寧鄉縣主簿。待戍五年，始克赴任。六年，召除成都府路安撫司幹辦公事。七年，丁父憂。後爲兩浙轉運司幹辦公事，歷戶部架閣、國子錄，奉祠。理宗即位，起通判武岡軍，歷知榮、眉等州。入爲禮部郎官，兼崇政殿說書，遷中書舍人、直學士院。累官吏部侍郎、寶章閣待制。著有《梅亭類稿》三十卷、《續類稿》三十卷，今存《四六標準》四十卷。劉深於學術，蔚有文辭，甚爲名公卿衛涇、樓鑰、曾喚、何異、魏了翁所知。或稱其學問深粹、器識醇明；或稱其論事剴切，洋洋晁、董、公孫之對；或譽其文詞秀發，可追配古作。見衛涇《奏舉黃學行劉用行李劉乞賜甄擢狀》（《後樂集》卷一二），魏了翁《藏修先生李公墓銘》、《李次琮墓誌銘》（並見《鶴山集》卷七九），《宋會要輯稿》選舉二一之一八，《宋史翼》卷二九。

本書所收李劉文，以四部叢刊續編影印宋刻本《梅亭先生四六標準》爲底本，以文淵閣四庫全書本《四六標準》通校，并據以補入文三十一篇，另輯得佚文三十五篇，合編爲三十九卷。

### 賀今上皇帝登寶位表

具位臣姓某言：恭睹詔書，皇帝陛下登寶位者。佑下民而作君，仰膺帝命；有大德而得位，俯順人心。重明既升，萬民咸睹。華夷闡澤，社稷莫安。臣某實懼實忤，頓首頓首。恭惟皇帝陛下睿哲生知，緝熙丕顯。南面讓者五，道允備於親賢；西向遜者三，躬難逃於歷數。由剛健中正純粹之首出，致謳歌訟獄朝覲之皆歸。臣昔忝禁塗，今拘謫籍。天與則與，知符文帝之大橫；日新又新，願誦成王之《小毖》。臣無任瞻天望聖激切屏營之至，謹奉表陳賀以聞。《翰苑新書》後集上卷二〇。

### 賀皇帝御福寧殿表

秘殿鼎新，昭鴻名而日揭；宸居離麗，肅龍御以天臨。風來南面之薰，星拱北辰之所。中賀。恭惟皇帝陛下體元居正，圖大宅中，福庶民以是訓之彝，寧萬國以惟和之政。盡力致孝，既卑夏禹之宮；修政攘夷，復考宣王之室。棟取諸壯，蔀轉而豐，鸞聲既便於觀旂，鶴駕仍通於問寢。誕敷文德，聿觀舞羽於兩階；載纘武功，式燕躋堂之萬壽。臣攝麾黔鄙，馳夢清都。四海爲家，更願綢繆於牖戶；萬民安宅，益堅壯麗之山河。《翰苑新書》後集上卷二〇。又見《八代四六全書》卷三，《宋四六選》卷

五，《南宋文範》卷二八。

## 賀天基節表 一

正月始和，觀象越二三之日；皇天眷命，飛龍乘九五之時。百祿是宜，四方來賀。恭惟皇帝聰明淵懿，篤實輝光。體乾之元，首庶物而寧萬國；乘震以出，轉一氣而開八荒。瑞鳳應於虹流，歷誕增於鳳紀。臣仰瞻北極，遙頌南山。蜀道青天，身況居於蜀徼；華陽墨水，祝請效於華封。《翰苑新書》後集上卷二〇。又見《八代四六全書》卷三。

## 賀天基節表 二

虞帝生於甲子，衍鼎盛之春秋；周伯見於丙丁，麗離明之日月。俶開犒宴，肇聽嵩呼。中賀。恭惟皇帝陛下聖神武文，剛健篤實。五百慶千秋之節，博觀金鑑之篇；三朝受四海之圖，始御玉觴之享。混九州而共貫，斂五福以誕敷。臣將指雪邊，傾心日表。祠鷄蜀道，粗知蜀父老之情；歸馬華山，尤切華封人之祝。《翰苑新書》後集上卷二〇。

### 賀冊皇后表

上聖盡倫，懋建生民之極；中闡正位，益隆王化之基。冊命惟新，輿情胥慶。臣竊以《易》十八變，上《乾》《坤》而下《咸》《恒》；《詩》三百篇，經夫婦以成孝敬。合由天作，治自家齊。中賀。恭惟皇帝陛下時敏身修，日嚴親養。爰及姜女，思《豳·七月》之艱難；娶于塗山，續禹八年之勤儉。式涓穀旦，肇正璇宮。須承堯母之顏，降于媯汭；茲考宣王之室，因是謝人。邦之榮懷，民以寧一。臣傾心葵日，屬耳椒風。乏曹植之材，安敢獻母儀之頌；考張華之作，但知誦帝則之歌。《翰苑新書》後集上卷二〇。

### 賀皇帝誕皇子表

斗揭柄於子躔，式對履長之慶；星重暉於甲觀，肇開震索之祥。社稷安榮，華夷闡懌。臣竊以封人祝華，願惟在於多男；帝子生商，命誕膺於百祿。矧春秋鼎盛之際，重日月離麗之明，有道之長，無思不服。中賀。恭惟皇帝陛下孝型四海，仁育羣生。怡怡愉愉，愛敬盡九重之養；誥誥蟄蟄，治安隆千歲之基。《斯干》詠朱芾之宜，長樂增綵衣之喜。臣濫紆郡紱，阻綴庭紳。歌本支百世之詩，知

不遺於周士；獻父母萬年之頌，尚竊附於唐人。《翰苑新書》後集上卷二〇。

## 賀郊祀禮成表

靈承上帝，拜況于郊，敷錫厥民，並受其福。備成熙事，薰叶嘉生。中賀。恭惟皇帝陛下翼翼小心，顯顯令德。氣和感天地之應，百穀用成；兵寢極帝王之功，四方無侮。肇稱闊典，誕舉吉儀。泰時八觚，肅圓丘而歲事；細書一札，撫方夏以湛恩。臣濫守麾符，阻趨籩豆。共給楚貢，粗慙縮酒之茅；造託湘流，莫對受釐之席。《翰苑新書》後集上卷二〇。又見《八代四六全書》卷三。

## 賀明堂禮成表 一

至治馨香，備成熙事，湛恩汪濊，敷錫庶民。上下統和，華夷闡懌。中賀。恭惟皇帝陛下治民祇懼，受命溥將。鑑天明地察之嚴，屢修美報；思祖功宗德之大，尤謹精禋。肆因萬寶之成，肇舉九筵之典。高靈下墮，和氣上騰。臣久遠闕庭，莫奔籩豆。落霞秋水，身縻刺史之左符；廣樂鈞天，夢繞總章之右个。《翰苑新書》後集上卷二〇。又見《八代四六全書》卷三。

## 賀明堂禮成表 二

垂拱南面，夙陶萬國之驩；平秩西成，載歲九筵之享。下民祇若，上帝時歆。臣竊觀《洛誥》稱秩元祀之文，實維成周誕保七年之日。思文后稷，既歌爾極之詩；伊嘏文王，復舉我將之典。乃今異世，與古同符。中賀。恭惟皇帝陛下濬哲文明，嚴恭寅畏。寬裕足有容也，坐澄滄海之波；神武而不殺夫，潛息潢池之警。肆合祛於路寢，用均福於寰區。臣濫守封疆，阻趨籩豆。總章衢室，諒益盡天下之心；夜郎牂牁，亦知教諸侯之孝。《翰苑新書》後集上卷二〇。

## 賀端平改元表

政出九重，丕承二祖之烈；數周六十，肇新萬物之元。天開休命之申，日永宣光之甲。中賀。恭惟皇帝陛下緝熙正學，總攬大權。涵育羣生，務文景養民之政；導迎和氣，出禹湯罪己之言。思端拱信服於西戎，及咸平威伸於北狄。魚魚雅雅，享有道之長；蟄蟄繩繩，衍多男之慶。哀兩朝之美號，開萬世之丕圖。臣濫綴使輶，虔宣宸綍。審已正統，更願法五始之《春秋》；改定告元，行見襲百蠻於冠帶。《翰苑新書》後集上卷二〇。

## 賀元會表

元會葳儀，仗入龍樓之曉；孟陬占象，歷新鳳紀之編。夷夏來同，堪輿協慶。中賀。恭惟皇帝陛下乘乾之健，出震而亨。孝備愛欽，浹三宮之和氣；書頒寬大，轉四海之仁風。於萬斯年，自今以始。臣久違班著，俶布藩條。春見曰朝，徒想北辰之拱；閏餘成歲，敢稽東作之平！《翰苑新書》後集上卷二〇。

## 賀元正表

歲在闕逢，三日先甲，律中太簇，萬物出寅。茲惟行夏之時，孰非就堯之日！中賀。恭惟皇帝陛下湛恩汪濊，受命溥將。三光全，寒暑平，愈加寅畏；五穀熟，人民育，益厚撫摩。玉衡占七政之齊，木鐸謹百官之徇。履端於始，受祿于天。臣承惠守藩，馳心望闕。孟春之月爲端月，有開皇道之端；長沙之星曰壽星，請祝聖人之壽。《翰苑新書》後集上卷二〇。

### 賀冬至表

七年而得攝提，契元封之至日；八能之合前殿，闡大極之治朝。睿智有臨，福祿來萃。中賀。恭惟皇帝陛下聰明淵懿，剛健粹精。問寢龍樓，謹冬溫之定省；疏恩鳳檢，廣春育之涵濡。迎神策於泰元，薰嘉生之叶氣。臣宅西乘障，拱北傾心。自顧孤桐，難旅《周官》之琴瑟；幸舒一線，當圖蜀郡之袴襦。《翰苑新書》後集上卷二〇。

### 榮州進貢紬斑布表

屏西方之棘，莫輸螻蟻之忱；漚東門之麻，竊效狐狸之織。愧精麤之不度，肅恭敬以來將。恭惟皇帝居上不驕，取民有制。念彼褐夫之褐，成於紅女之紅。質匪橦華，緯以紺紵之飾；文非貝錦，比諸黃潤之筒。是雖蜀產之微，俾效齊官之戲。臣承流天角，修貢土毛。大衛文之衣，當退明於侯度；褒公孫之被，願謹簡於賢人。《翰苑新書》後集上卷二二。

## 代衛參政辭免知福州表

易地非才，輒控告歸之請；自天有命，備宣均逸之恩。雖當祇誦於堯言，猶冀趨銷於漢印。伏念臣強顏一出，屈指五年。頃守湘濱，既無善狀；迨移江右，亦愧空餐。洊嘗丐祠，未蒙賜允。十事九律之是守，姦猾怨之；再衰三竭而不休，顛隳必矣。誠知樂土，今在全閩，至因元會以選侯，尤且清朝之重遠。然臣欲遂卧疴之願，何必復貪坐嘯之榮？環轍而卒老於行，雖皆王事；御馬者不窮其力，是出君仁。伏望皇帝洞鑑忱誠，收回成命。別求良吏，俾之表東海之民；姑待病夫，退而祝南山之壽。《翰苑新書》後集上卷二二。

## 代董侍郎再辭召命表

忱詞上徹，冀寢召音；溫詔下頒，未攷俞旨。敢輸悃悃，再瀆威顏。伏念臣本出常才，濫叨重寄。使之牧養，猶可詭於民庸；責以規恢，實未嫻於將略。自戎帥殞身於疾戰，致遠敵忘命於長驅。果若人言，謂必失魚鳧之國；常有天幸，乃遂殄蛇豕之妖。然此寇得至腹心之間，使斯民重罹肝腦之苦，雖云幸勝，何足贖愆！王言大哉，固有憫勞之語；臣罪多矣，尚何選表之云！伏望皇帝斷自乾

剛，收回渙號。倘念殲渠魁之微績，未忍加誅；願乞禦魑魅之餘生，姑令置散。庶師言之可穆，亦愚分之少安。《翰苑新書》後集上卷二二。

### 代何尚書辭免除職與郡表

引年籲天，期於從欲；畀職分土，猶是誤恩。敢忘三瀆之嫌，更乞重申之命。伏念臣壯猶無用，耄復奚爲。深虞簪筆於甘泉，妨賢者路；故願挂冠於神武，爲聖人氓。若加寶閣之隆名，且領銅符之重寄，是丐閑而就劇，且未退而得遷。藉令齒宿而意新，猶當知足；矧復心灰而形槁，難更强顏。伏望皇帝曲徇忱誠，收回成渙。放牛歸馬，使逕返於山林；飛鳥泳魚，終不離於天地。《翰苑新書》後集上卷二二。又見《八代四六全書》卷四，《宋四六選》卷一〇。

### 謝明堂肆赦表 一

至治馨香，備成熙事；湛恩汪濊，敷錫庶民。沛解澤以旁流，徧坤垠而純被。中謝。恭惟皇帝陛下靈承景命，薰叶嘉生。重屋九筵，歲文武配天之禮；十行一札，布禹湯罪己之言。盪垢滌瑕，漸仁摩義。臣濫分銅獸，阻聽金鷄。呼萬歲者三，莫克仰觀於蕙莆；襲六藝而七，但知載詠於《蓼蕭》。

《翰苑新書》後集上卷二三。

## 謝明堂肆赦表 二

重屋精禋，降百祥於作善；端門肆赦，歛五福以錫民。《行葦》恩深，《蓼蕭》澤廣。中謝。恭惟皇帝陛下側身修行，至誠感神。伐崇崇降，無復昆夷之難；侵蔡蔡潰，皆知王祭之供。迄用熙成，靡懷專嚮。爰作雷雨之解，用脫桎梏之蒙。臣濫綴將輸，敢稽宣布？五刑有赦，知無嘉石之囚；萬國驩心，願謹總章之訪。《翰苑新書》後集上卷二三。

## 謝宣賜曆日表 一

乾統天而用九，敬授人時；巽申命於先三，以前民用。成書誕布，率土均驩。中謝。恭惟皇帝有孚惠心，無疆大曆。纂堯之緒，肇新景子之元；數舜之功，甫底撫辰之績。昭茲鳳紀，賚及侯藩。臣承乏鎮南，蒙恩頒朔。萬斯年佑，萬斯年佐，未能揚厲於歌詩；五百里甸，五百里侯，所願宣明於聲教。《翰苑新書》後集上卷二三。

謝宣賜曆日表 二

改元以順天道，昭然祖武之繩；命曆以授人時，謹乃侯邦之度。清臺盼課，黔鄙知榮。恭惟皇帝陛下禹數在躬，周年協卜。修金木水火土穀，九叙惟歌；證雨暘寒燠風時，五年而定。和欲均於玉燭，賜爰廣於璽書。臣涉筆負丞，挈瓶假守。覲四岳羣牧，雖知無預於會朝；通九夷八蠻，亦冀悉沾於正朔。《翰苑新書》後集上卷二三。

謝賜銀合夏藥表

代江西衛帥

侯服剖符，敢憚熏心之暑；恩綸分寶，載放苦口之良。暝眩用瘳，鬱陶有忸。中謝。伏念臣初無善狀，洊守雄藩。去湖即江，漸近尊鱸之境；玩歲愒月，甚慚竹馬之童。氣方溽於伏庚，恩忽疏於令甲。鼎丹分餌，鑒白作奩。南土爾居，自乏雙金之貢；西山無極，猥瞻五色之光。茲蓋伏遇皇帝陛下動惟厥時，予馭其幸。涼生殿閣，每思雲漢之側身；地接衡廬，更虞山藪之藏疾。速置郵而傳命，隆體貌以勵廉。臣敢不謹視一人之仁，各思尺寸之愛！《翰苑新書》後集上卷二三。

## 謝賜銀合臘藥表

代湖南衛帥

細書賜郡，正臨大蠟之辰；上藥攸庭，就賁中金之器。拜承恩旨，頓失寒顏。中謝。伏念臣假守蠻荆，馳心象魏。賜金所以褒循吏，愧治狀之蔑如；和藥所以活功臣，慙勞能之無有。歲忽忽而道盡，皇剡剡以揚靈。珍劑芬馨，似出蓬萊之采；鐐奩焜燿，有光蘭菊之華。茲蓋伏遇皇帝陛下加惠舊臣，寵華遠服。念長沙之濕，河魚之疾奈何；飲上池之清，厖駒之病起矣。臣仰體好生之德，誓殫盡瘁之年。《翰苑新書》後集上卷二三。又見《八代四六全書》卷六。

## 代鄒給事除潭帥謝表

撫桂筦之封，了無善狀；謀荆潭之帥，又玷恩除。晉邃直於奎文，蒙趣行之璽命。循墻靡獲，問路疾驅。俶見士民，虔宣德意。伏念臣賦材不腆，取數已多。青瑣追隨，日何裨於三接；朱幡旋轉，星坐閱於一周。未滿戍於池陽，尋改轅於嶺表。徒守無華之悃悞，曾微可紀之功名。願將母以投閑，幸蒙恩而受代。詎意升班於文閣，復令分閫於武安。惟長沙千里之平，寄隆岳牧；而洞庭九州之大，責重藩垣。前此委兩社之間，否則取六官之長，詎容謏薄，猥備使令！茲蓋伏遇皇帝任官惟賢，試臣

以職。大懷小畏，封疆已復於東秦；近悅遠來，保障仍先於南楚。俾承嘉惠，往撫疲甿。臣敢不祇遵教條，明將惠澤？材全而能鉅，難希開鎮之楊憑；功少而勢疏，願效稱忠之吳芮。《翰苑新書》後集上卷二三。

### 成都漕到任謝表

守蟆頤之江鄉，罔功攸御；用龍節於澤國，受命將輸。忱辭方切於循墻，便旨必令其叱馭。驅馳非據，踧踖知慚。臣切惟《大學》生財，義利是辨；《小雅》遣使，忠信爲先。顧在魚鳧，實爲狼狽。粟非天雨，古難轉粟以上天；錢不鬼輸，今豈有錢而使鬼？必盡諏謀咨度之智，斯知疾舒衆寡之源。伏念臣實不中聲，學未聞道。去國十暑，久違閭閻之風；起家一寒，再戍蓬婆之雪。誤連四千石之重，初乏萬分一之功。豈圖由列雉之城，就令濡四牡之轡。輕車熟路，敢言周道之逶遲；數罟洿池，適值益州之疲弊。外欲給貔貅之任，內當閔鴻雁之饑。此豈驚材，堪任驪駕！茲蓋伏遇皇帝明見萬里，聰冠群倫。凱未北旋，軫岷峨之淒愴；眷深西顧，急江漢之經營。肆令芻狗之陳，叶濟天人之運。臣敢不謹身率吏，節用使民？穿窬無羞惡之心，當奉六條之察；登攬有澄清之志，庶幾一路之安。《翰苑新書》後集上卷二五。

## 知榮州到任謝表

佐黔巫之東鄙，將及戍瓜；守巴夔之南安，濫叨符竹。出幕十年之未久，循牆三命之唯恭。冒象馬以牽江，跨犍牂而入境。皆知聖主清衷之一視，故令愚臣白首以重來。伏念臣殖學拙疏，賦材褊淺。耗精神於場屋，得弗償勞；疲筋力於塵埃，衰不待老。頃繇故府，入糾成均。韓愈補苴，奚益茫茫之墜；鄭虔轆軻，難培袞袞之登。久去國以奉祠，辱起家而貳郡。敢意三刀之夢蜀，復令五月而渡瀘。維今榮隱之邦，實昔夜郎之壤，貳耕火種，矛淅劍炊，歲計經營之租無六千斛，郡仰斥鹵之羨已五百年。此因刻木之花銷，致辱前茆之根括。熏鼠不嫌於穹室，奪牛反甚於蹊田。凡昔留州，悉令送使。無復斗升水之貸，存活介鱗；縱得二千石之良，終成狼狽。豈其庸謬，堪此奉承！茲蓋伏遇皇帝陛下政在養民，仁不異遠。雖蓬婆雪外之戍，萬里軫憂；與長安日邊之州，同時並命。殆念和義孤墉之陋，未正紹熙潛邸之名，三年弄印而印剋，四輩代庖而庖竭。破凡削例，不待張詠薦李旼之來；拔滯振淹，蓋法藝祖任王明之意。臣敢不謹身率下，節用愛人？臣飲冰食蘖以自將，勿爲義疚；儻求牧與芻而不得，甘俟罪歸。《翰苑新書》後集上卷二五。又見《八代四六全書》卷五，《宋四六選》卷八。

除寶謨閣學士知泉州謝表

何尚書

老臣納祿，勤大造之曲成；邃閣升華，分雄藩而出守。帶宜褫而或錫，衣既敝而改爲。有渥一麾，恪共三命。伏念臣去天雖近，來日無多。涖干不得謝之恩，力控致爲臣之請。鴻鴈高舉，已絕望於稻粱；牛羊下來，難更求於芻牧。敢意冕旒之邃，曲憐簪履之遺。溫洛寶儲，增賁嚴凝之直；清源巨鎮，俾需更戍之期。仍分在笥之裳，益耀還鄉之綬。於臣侈矣，何日忘之！所慙大耄之侵，恐負細書之賜。茲蓋恭遇皇帝陛下仁不遺舊，恩欲成終。郡守選用賢良，顧資已老之龔遂；學士足爲光寵，反加告去之知章。雖非爲官而擇人，殆於養廉而勵俗。臣敢不磨礪晚節，佩服宸恩？桑陰幾何，誓不忘於傾日；瓜期而往，願卒聽其引年。《翰苑新書》後集上卷二五。

除閣學知潭州謝表

鄒給事

解組外藩，屢控陳情之請；晉班內閣，仍叨改秩之恩。冒伸僂僂之再三，難拂顏威之咫尺。綸言已布，綿力奚堪！伏念臣材弱弗張，資凡不穎。歲糜月費，已成四十九之非；君寵母恩，未有萬分之一報。徒以《南陔》之相戒，難乎西廣之久留，力於丐祠，志在出嶺。敢意躡躋於美職，復令假守於

名邦！湖廣之壤三千，夙稱清絕之地；瀛洲之士十八，上通碧落之天。矧超階級之崇，殆非堵墻之冗。豈繁疏拙，可稱選掄！茲蓋伏遇皇帝陛下眷厚近臣，恩隆遠服。念臣一麾之出守，洊歷歲華；察臣四國之于蕃，粗諳民事。特峻西清之秩，更圖南土之居，俾諧便養之私，兼課承流之效。臣敢不思酬簡注，勉策疲庸？超遷而至大中，賈誼何辭於湘水；光寵而兼學士，知章終願於鑑湖。《翰苑新書》後集上卷二五。

### 賀皇太子元正牋

丙子代衛參政

堯年起丙，載新鳳曆之頒；夏正建寅，仰協龍杓之指。萬邦以正，百祿是邁。恭惟皇太子殿下賢智夙成，溫文天稟。春回嶰谷，剛潛蒼震之亨；日出隅夷，柔麗黃離之吉。履端於始，長發其祥。臣舊忝儲寮，今叨蕃牧。後天下而樂，濫假寵於虎闈；布正月之和，遠馳神於象魏。《翰苑新書》後集上卷二六。

### 賀皇太子冬至牋

黃鐘協律，七日驗於復來；青輅發祥，萬物由乎震出。式哀蕃祉，茂對新陽。恭惟皇太子殿下海

潤星輝，金聲玉裕。行一物而得三善，儲德克岐；奏六佾而建九旗，禮容有奕。履此應長之候，昭哉滋至之休。臣假守熊湘，阻趨鶴禁。合八能於漢殿，阻陪北闕之趨；襲《九辯》於楚詞，請祝東皇之壽。《翰苑新書》後集上卷二六。

### 代董侍郎賀東宮生日牋

十四月而生堯，實開昌運；八百國之歌啓，允屬休期。慶衍宗祫，驪騰寰海。恭惟皇太子殿下聰明時憲，聖敬日躋。震一索而亨，是爲天地之長子；離重明而照，孰窺日月之容光。茲臨載育之辰，益衍永膺之福。臣濫分閫寄，莫旅庭趨。敬與六十州之民，仰瞻銀闕；共祝八千歲之壽，永紹瑤圖。

《翰苑新書》後集上卷二六。

### 代何尚書除刑侍謝皇太子牋

刑曹劇部，貳職非輕；法從真除，參聯甚寵。況加盛服，仍束精鏐。拜使便蕃，拊躬震疊。伏念臣力綿材薄，歲暮日斜。舊陪碧落之班，屢玷清華之選。一笑微生於偃月，十年甘老於卧雲。豈意餘齡，復還舊綴！狐裘破碎，囊持紫以謂何；鶴骨支離，腰圍黃而不稱。靖循僥冒，亶有寅緣。茲蓋伏

遇殿下粹德玉溫，凝姿海潤。賢孝仁聖聞天下，未始自驕；左右前後皆正人，尤勤博采。故令蒲質，得傳楓宸。臣敢不祇服寵光，對揚休命？論思獻納，期殫入告之忠；惻怛哀矜，仰體好生之德。《翰苑新書》後集上卷二六。

### 代衛參政轉官謝皇太子牋

園壇八陛，錫福庶民；方岳諸侯，進官一列。併爰田而增衍，遡少海以知歸。伏念臣一去賓階，六周歲籥。高飛鴻鵠，寧資羽翼之功；行中鸞和，莫效箴謀之助。況南浮於湘水，徒東望於瑤山。恭聞肆類之休，遙想百神之享。敢圖賚予，若是駢蕃！此蓋伏遇皇太子殿下相祀紫壇，疏恩赤縣。悟南陽之牘，夙亶聰明；記東海之名，弗遺故舊。昭茲異數，施及孤蹤。臣敢不祇服恩言，益圖美報？賈誼自傷其無狀，既見受釐；吳芮勢疏而最忠，尚希著令。《翰苑新書》後集上卷二六。又見《八代四六全書》卷二六。

### 賀皇后受冊箋

楓宸發冊，渙號揚庭；椒殿升賢，坤儀正位。喜溢六宮之表，歡騰四海之濱。恭惟皇后殿下配德

河洲，發祥沙麓。赤城秀氣〔一〕，大邦夙表於倪天；白雪詠高，厚德寔宜於配地。慶長秋之定序，均函夏以蒙休。臣聳聞三瞿之升，喜極六龍之抃。施于中谷，萋萋諒感於《葛覃》；陟彼高岡，采采敢布於《卷耳》。《翰苑新書》後集上卷二六。

〔一〕秀氣：疑當作「氣秀」，與下聯「詠高」相對。

# 全宋文卷七二六六

李 劉 二

上史丞相啓

嘉定丙子

索長安之米，擬就辟書；伏光範之門，尚干賓謁。特有惓惓之意，未敢察察而言。輒以萬分，寫之四六。儀圖愛助，此周人待山甫之情；翕受敷施，亦虞舜舉皋陶之意。他無求者，公幸聽之。竊惟國家閒暇之時，當思文武長久之術。況外夷之雲擾，貴內治之日嚴，詎云行李之通，可緩包桑之慮！國虛難動，民困易搖，豈待謀國之數公，知諱用兵之兩字？然能應則乃可謂定，故欲翕者未始不張。今徒千里而畏人，未思四境之不治。一氣先竭，百爲弗開。羣材付之乍佞以乍賢，正論聽其自鳴而自息。耳目之受既狹，心腹之委亦偏。爲赤子，爲龍蛇，未始得敵情之實；以皮幣，以犬馬，但云量事力之宜。軍籍既隱於蔽蒙，將材又阨於媚嫉。舟師未練，馬政不脩。鑿斯池，築斯城，豈可無九攻之具；鍛乃戈，厲乃刃，孰能遏再鼓之衰！仰而思之，無非事者。上作而下不應，朝廷每有是言；外呼

而內不聞，郡國亦爲此論。惟事事備乃可無患，言人人殊何以成功！周得上，漢得中，策將安決；蠡治內，種治外，責恐宜分。試考先朝立四總管之謀，及觀諸儒分三大鎮之說，皆欲取之人望，從而假以事權。一用孔明、陸遜之規模，力行晁錯、充國之論議。移江上之屯於淮上，實關表之粟如關中。使權守禦之方，漸講招懷之略。衆犬方狴則養威持重，兩虎既傷則取亂侮亡。是爲屈羣策以共圖，奚至無寸功之可論！與其待一朝之患，始出於茲；孰若折千里之衝，早爲之所。若任人而疑，疑人而任，則聞事不實，實事不聞。何怪草野之私言，動違槐棘之成筭。日月逝矣，風雨萃之。無謂天變不足慮，人言不足從；庶幾君子有所恃，小人有所畏。恭惟某官堪輿間氣，社稷世臣。砥柱不移，回平原黃河之決；終風且曠，洗咸池白日之光。力調更化琴瑟之弦，復享和戎金石之樂。如將道古今而譽德，亦可紀簡策以垂功。然太師維垣，輔隆興不滿一歲；今西平有子，相嘉定行且十年。此非門戶之私榮，實負乾坤之重寄。用藥莫先於無病，止車當在於未奔。相亦惟終，邦其無斁。如某者拙由地稟，狷不時宜。獨竊考治亂之原，知當謹幾微之會。貧賤不能以達志，憂患又從而熏心。昔在服中，欲上范文正之書而無路；今來闕下，願作石徂徠之頌而難言。薦之吾相，皆欲令主金耀之書〔一〕；謀及乃心，則姑願應銅梁之辟。等勤大播，盍進小忠！敢輸肺腑之微誠，盡告腹心之元老。一毫有補，萬坐亦甘。平津之招賢有三，惜難受汲生之戇；洛陽之太息者六，實欲全周勃之功。《梅亭先生四六標

〔二〕皆：原作「者」，據四庫本改。

## 上鄭參政昭先啓

干祿選曹，未遂斗升之食；修容政府，率須四六之文。循例之常，非頌則禱。然古者執可殺之贊，而今則獻無用之言。反欺闇人，謂有己見。輒輟贊山譽斗之佞，移爲滴露增海之忠。某聞夷夏貴賤，名位不同；南北動息，機緘相繫。兩庭分而漢室弱，五胡擾而晉事多。嘗試攷古以驗今，恐當制治于未亂。然而內備外禦之計，墮在文恬武嬉之中。民力中乾，邦儲內滲。以人材則弗競，以士氣則不揚。將多庸人，軍半虛籍。縱無敵國之外患，已非盛世之遠圖。設有赤白囊之馳，必貽赭黃繖之慮。天大地大，託之真無敵之儒；人謀鬼謀，當爲不可勝之備。無非事者，必有先焉。折衝樽俎之間，固貴矯情而鎮物；銷患廟堂之上，要須從衆而廣謀。徹去私情，力行實政。培植根本，振刷精神。大勢既張，何事弗立？當機不發，雖悔莫追。執政之猶股肱，相尊等耳；憂國之如饑渴，公早圖之。恭惟某官學本六經，氣鍾五緯。涵今茹古，胸藏有本之源泉；揭德振華，身作不清之玉雪。自其不辭小官於州縣之日，已知可以大受爲社稷之臣。人交惜其用遲，帝已嗟於見晚。致身兩社，倒指六年。自生民以來，未有盛於夫子；任天下之重，時則有若阿衡。三台色齊，萬物氣吐。惟保我子孫黎民之衆，則格于皇天上帝之心。如某者鹿鹿無奇，魚魚何筭，謬塵一第，濫底百僚。憔悴之吟湘濱，

孰爲之地；嗟吁而攀蜀道，竟失所天。既銜弗洎之悲，漫作爲貧之仕。適之謂材，堪之謂力，不足乎揚；薦之吾相，致之吾君，皆非所冀。但願王者之佐，每先天下而憂。儀圖之莫助之，斐然僭躐；其進也與退也，惟所指撝。《梅亭先生四六標準》卷一。又見《啓雋類函》卷二三。

### 上曾樞密從龍啓

讀《阿房》之賦，早累殊知；投光範之書，今無他覲。特以門墻之舊，得觀鼎鼐之新。欲輸愚慮之千，往抵賀錢之萬。譬諸大海，豈有待而增加；然在細流，固不嫌於傾寫。某聞交鄰有道，寢兵固帝王之功；制勝無形，銷患在廟堂之上。今犬羊之交噬，久蚌鷸以相持。殘虜儻甦，怒將移於水蟹；新酋稍偪，殃易及於池魚。至如歸附之民，亦是紛爭之釁。戰守和之未決，難察察言；兵食信之何先，宜事事備。今徒懲創已往之失，遂致闊略方來之憂。本惡張皇，事反流於怠弛；初求鎮靜，弊乃至於蔽蒙。最是民困易搖，仍覺兵虛必潰。言之唇腐，識者心寒。城非不高，池非不深，險誰與守；饑者欲食，勞者欲息，怨豈在明。藉令有效死之民，亦未見決勝之將。外憂縱緩，內蠹已多。願察積薪厝火之形，亟爲徹桑未雨之計。通民氣於士氣，參天心於人心。收拾羣材〔二〕，恢張衆志。戒牧守之伎刻，斥將帥之驕殘。亟厚邦儲，速蒐軍實。無非事者，綱既舉則目張；不早圖之，枝未害而本撥。和羹固異於濟水，同舟況迫於遇風。公輔居兩社之間，相尊等耳；大臣不四方之慮，人望謂何！

恭惟某官恭懿而惠和，弘深而肅括。榮進素定，夙瞻魁下之曰台；昭晰無疑，豈待日中之見斗。信儒者有益於國，見天之將任是人。未嘗揚己以取名，殆欲格王而正事。自參宥密，益懋弼諧。古所謂鄰哉之臣，人將責賢者之備。誠能歸草茅之公議，置在本朝；從而散廊廟之泰和，達之薄海。此真漢相矣，豈憂匈奴哉！上將恨無官以酬公，公亦可有辭于永世。如某者，戇由氣稟，拙不時宜。頃因場屋之文，特蒙偉視；繼修竿牘之敬，又沐賞音。回回州縣之塵，落落功名之夢。本謂伯樂之既顧，羣馬可空；寧知烏獲之難逢，匹雛莫舉。竊料黑頭之宰相，亦憐白脚之門生。然願廣萬間以庇寒，詎敢私斗升之活涸。捲珠簾於未老，勿疑驚燕之呢喃；令江水兮安流，庶遂閑鷗之浩蕩。《梅亭先生四六標準》卷一。又見《啓雋類函》卷二四，《宋四六選》卷一〇。

〔二〕材：原作「林」，據四庫本改。

### 見趙茶馬彥綰啓

全篇用茶馬事

訪火井於臨邛，偶逃水厄；望星槎於仙漢，行拜月題。尉江湖渴夢之深，瞻原隰華鑣之沃。伏念某地寒而根淺，年運而骨高。斟酌胸中，固欠可人之風味；局促轅下，粗知範我之馳驅。與其包裹供權倖之鑽，不若蹭蹬任風塵之老。況乏揮毫之百斛，固應病醵之十年。懶問蓬萊羣仙之司，遂叱邛徠

九折之馭。其甘如薺，豈必衆嘗；言刈其萑，願爲君御。恭惟某官雲龍氣局，天驥風標。架屋桃源，三椀澆五千之卷；乘輶棘道，一雄將十萬之雌。却笑前丁後蔡之籠加，安得超范軒轅之繳繞。加臭味而厚賓客，漫令策免褐之功；畫骨相而遺毛皮，諒必察驪黃之外。如某者不持圭璧，未洗袴袍，特窘城南晏食之謀，遂入冀北暮取之數。味已輸於第一，價敢望於倍三？草茶無賴空有名，敢妄希於湔拔；塞馬未必不爲福，或可備於走趨。《梅亭先生四六標準》卷二。又見《翰苑新書》續集卷六。

### 上魏運使了翁啓

聞宇宙之大名，如瞻喬嶽；抱江湖之渴夢，今在下風。乏紹介以爲容，修辭誠而求見。某聞士之任重，固不止獨善其身；儒者道高，先當知有貴於己。若靡然斷趾以適履，必至於舐痔以求車。操行既卑，國家何賴？有能卷舒之際，不爲燥濕所移，如蘇文忠之違熙、豐，亦不苟同於元祐；若劉忠肅之惡章、蔡，然非強附於伊川。是名蜀珍，可重趙鼎。觀公氣象，視古等倫。茲故賦明月烏鵲之詩，亟欲快景星鳳凰之睹。恭惟某官眼高四海，胸著千年。漢相有真，宜居蕭、曹、丙吉之冠；鄭公所願，蓋在稷、契、臯陶之良。當炙手可熱之時，凜掉頭不住之節。長卿甫還於巴路，元濟已叛於蔡城。神山可巢，固自薄蓬萊而不即；攬槍未落，必欲借荆楚以同功。雖卒成孺子之名，然已立懦夫之志。一麾而出，十暑于茲，回視獨對三千字之人，誰肯甘頓十九年之刃！萬牛不能回丘山之重，四牡

又復勤原隰之馳。要路在前，聊養韓忠獻之器；榮進素定，何必王文正之門。然海內所以屬望於公，蓋天下尚有可爲之事。幸昌其志，以濟斯民。惟功名當久遠之看，則富貴乃緒餘之事。如某者居貧甚肆，從仕難任。大汗漫九垓之期〔二〕，分甘控地；逐侏儒一囊之俸，豈必鑽天！乃遠隨黃鵠之梯，蓋願事碧鷄之使。雖神索於大巫之側，當氣蘇於君子之前。嗟遠道胡爲來哉，幸將在此；居是邦事其賢者，儻或許之。《梅亭先生四六標準》卷二。又見《翰苑新書》續集卷六。

〔二〕大：原作「夫」，據四庫本改。

### 上任中書希夷啓

披雲漢之天章，夙見舍人之樣；勒山林之俗駕，來瞻學士之真。極知大匠之門，難飭小夫之牘，顧無藉手，輒用引吭。竊聞師儒并世之難，類有今古殊時之歎。韓昌黎之於太白，漫夜夢以晝思；陳後山之於大蘇，恨江空而歲晚。今有文章之伯，實在邦域之中。公求士甚士之求公，既聞命矣；後視今猶今之視昔，盍往拜之。伏念某氣懦弗張，骨凡難換。一科十年之不補，愧在無聞；半通五兩之甚甘，止於爲養。曾幾何日，竟失所天。陷皆腐膺，僅能逃死；磨肌戛骨，奚暇送窮。祥琴翕忽以成聲，塵甑睢盱而望賜。心口相語，但欲從小宰之銓；面目可憎，未敢作大鈞之問。惟是忍見賢之渴，

所當修覲德之恭。或聞庸下之姓名，已辱暗中之摸索。逢人必項斯之說，幾於神比而天同；伴直難浩然之呼，特以職親而地禁。仰高山之景行，感流水之賞音。樂莫樂兮相知，安有又傲翰林之理；見所見而後去，姑慰不願封侯之心。恭惟某官學冠儒纓，道航聖瀆。家故雄於四蜀，誰敢齒於諸任？騎鯨暫駐於九龍，振鬣遂暗於萬馬。周情孔思，心傳先聖之不傳；宋艷斑香，文到古人之未到。久於詳試，昨乃遄歸。士則快於睹先，帝已嗟於見晚。能典朕禮，咨伯直清；肯從吾兒，煩君調護。玉堂草罷，又吟紅藥之翻；金匱紬餘，還對紫薇之伴。彼智效一官而不足，此身兼數器而有餘。人望一條之冰，其容已肅；公傍九霄之月，所樂不存。豈非爲天子之私人，實持公議；行且作清廟之近弼，尤佩遠憂。今外夷訐阻之時，正中國圖回之日。天地亦大矣，保邦當在於未危；人物方眇然，求才不嫌於太廣。與其待倉猝而市三年之艾，不若及間暇而滋九畹之蘭。時來爲之，天下幸甚。某貌無可贊，輒誦所聞。幽桂遺榛菅，底敢累犯嚴之口；江梅託桃李，但欲薰白潔之香。《梅亭先生四六標準》卷二。又見《宋四六選》卷二〇。

### 上吳宣撫獵啓

祭主簿之竈，揆分已庠；升侍郎之階，見賢有耀。末之藉手，率爾修辭。竊以平生識元魯山，便無他憾；於人見歐陽子，乃謂奇逢。三復「師儒并世難」之詩，再歌「生世何用早」之句。江濤如

此，孰能百斛而獨扛；人物眇然，誰可一洗乎萬古！疑山川之沉寂，恐宇宙之沉寥。適我願兮，在此行矣。恭惟某官肝膽一劍，精神五兵。言行擇君子之中庸，德業得賢人之久大。涕唾富貴，談笑功名。蜀道天高，久已放龜而縱鶴；長沙地褊，不妨狎鷺而馴鷗。新詔祿於壽宮，表眷懷於宣室。今天下尚有可爲之事，無競維人；凡海內所謂不獲之夫，豈勝其衆！能風霆於庶物，必霖雨於四方。天將大任是人，恐不免耳；道之將行也命，孰能止之？某鹿鹿無庸，狙狙有志。半生拙學，已不計班賁之崇庠；一世偉人，所願觀道德於前後。騷騷忍渴，貿貿望塵。然李生之從事湖南，知會計當而已矣；果吳公之召置門下，豈遙增擊而去之。《梅亭先生四六標準》卷二。

### 上曾運使槃啓

一行作吏，俗莫俗於簿書；六轡觀風，華孰華於禮樂！恃在鎔之所鑄，忘躍冶之不祥。斐然修辭，持此微福。伏念某材庠莫亢，質窳無奇。長鑱掘黃獨之苗，只傷地脉；短檠喧綠幕之讀，徒損天和。苦無計以養親，遂強顏而干祿。一科不補，漫得雉於喝盧；五技已窮，欲屠龍而單產。騷屑倚門之望，卑陬祭竈之謀。趨鎗閣前之鈴，僅逃箠楚；倚賴天涯之釣，大隔波濤。我有二天，今既數月。幸樓臺之近水，盍桃李之託根？薰南豐之香，人爭出其門下；認西江之派，我未免於鄉人。試伸仰首之鳴，庸卜終臭之遇。恭惟某官眼高四海，筆落九天。惟其有之，種種文清之似；由來遠矣，源源忠

恕之傳。宜供奉於軒墀，顧驅馳於原隰。無波古井，浸秀水之芙蓉；有脚陽春，轉光風於蘭蕙。雲開衡嶽，星聚壽沙。治不收聲，各使安其田里；民無遺便，皆自得於湖山。六條遠愴於風稜，百吏莫逃於水鏡。尚念某頃嘗執贄，頗辱賞音。無地置錫，慙處囊之非穎；留渴待井，愧汲綆之不脩。與其索大寒之裘，不若乞來年之麪。涓人買死馬首，亦繫招徠；上天不生鶴翎，盍歸啄抱？歸投之切，敷叙奚殫。《梅亭先生四六標準》卷二。

### 上董制置居誼啓

四年再累於大鈞，非言可謝；萬里重瞻於小隊，有喜難名。竊聞沒階之趨，又須銜袖之贄。獵較固難於違俗，效顰安得而成妍！伏念某意廣才疏，名浮實淺。諸公過聽，雖欲挽之振鷺之羣；一飽難諳，敢望富於屠羊之肆？徒感招徠之厚，遂忘跋履之勞。經瞿塘灩澦之危，寸心欲折；上梁山桂林之峻，雙脚已低。不自意全，得至公側。就新懦而悼前猛，詎應寄斂退於趨營；酬知己而效小忠，或可因蹉跎而束縛。茲蓋伏遇某官求士爲國，與物爲春。網羅蜀珍，既厚楓柞枏櫨之蓄；收拾鄭璞，欲置璆鐵銀鏤之間。況如鄉里之小兒，乃是門牆之舊物。撰書詞，具馬幣，既加繾綣之誠；防瘴癘，養形神，仍委駢蕃之況。肺腑固知於銘德，頂踵何足以酬知！某敢不思稱使令，圖惟忠益？在元戎所自辟於天子，豈欲收蛇雀之恩；惟先生無圖利於大夫，庶或盡犬雞之報。《梅亭先生四六標準》卷二。

## 上李侍郎直啓

捧從事之檄，假道不專；升侍郎之階，見賢有便。闕然藉手，率爾修辭。恭惟某官心契九秋，文焰萬丈。二螭坳處，非仁義不陳於王前；五鳳樓中，有言語必妙於天下。方餘色石，忽觸佞山。遂橫野水之舟，歸屹中流之柱。道之將行也命，孰能止之；天將大任是人，恐不免耳。暫輟北門之鑰，來分東梓之符。棠棣之華，固已生光於五馬；棟梁之器，詎應回首於萬牛！會乘閭闔之風，亟對罍罍之月。某久於竊蔭，甫此望塵。異人異書，不但慰望梅之渴；同姓同業，尚或希拔茹之征。《梅亭先生四六標準》卷二。

## 見李提刑至啓

系成紀之望，敢論繼別之宗；受月湖之知，抑有同門之契。假道得見賢之便，修辭爲執贄之先。恭惟某官一世儒宗，三朝壽俊。田里之無愁嘆，幾森畫戟之香；原隰之有光華，仍揭繡衣之節。使登表著，丕究猷爲。豈惟朝廷賴有德之尊，抑使海宇蒙不知之潤。不謂解彭門之組，便欲挂神武之冠。正恐蒲輪之迎，難遂橘鰕之隱，即觀詔下，入對席前。某久於傾心，方此望履。雖吾宗之老孫子，未

知所裁；然是邦之賢大夫，或與之進。《梅亭先生四六標準》卷二。

### 上梁運使綸啓

手捫參井，冒希入幙之賓；身近斗牛，喜見乘槎之使。竊循禮例，再具贅緘。伏念某不自力田，乃謀耕祿。長風引去，固應違汗漫之期；平地尚多，亦可逐侏儒之俸。必欲勇乘灩澦之象，幾何不餒巫峽之魚？百丈牽江，失勢頓成於千丈；萬夫拱手，納溝知耻於匹夫。不自意全，僅以身免。汨俱其出，粗見平生忠信之功；痛定而思，可爲行險僥倖之戒。召驚魂而復幹，企英節以修容。營吻無奇，汗顏有覩。恭惟某官盛名如畫，和氣猶春。四牡勤原隰之咨，三鑽巴火；萬牛回丘山之重，共託蘇天。人但知河內借寇之情，誰能識關中留蕭之意！邊陲既靜，足稱幕下之冰壺；吏道當澄，尚託胸中之水鏡。特恐魚鳧之國，難稽龍馬之圖。會當紀日月之常，亟入聽星辰之履。尚念某不辭險遠，求備走趨。使臣之載馳載驅，或小留於斧繡；辟客之且喜且懼，尚迄託於帡幪。《梅亭先生四六標準》卷二。

### 代上安撫啓

去民畝而就吏，夙歸坯冶之中；聞仁政而受塵，今在帡幪之下。久瑩瑩而在疚，難僕僕而望塵。

逮茲祥除，敢以贅謁。恭惟某官直方而大，智勇且仁。應西山之石移，果崑崗之玉出。識其小者，數虎榜之十年；誰其似之，扛龍文之百斛。付榮進於素定，屢勇退於急流。怡然野水之孤舟，屹若頽波之砥柱。於皇更化，副帝登庸，彌綸兩社之間，弼亮萬機之務。騰身跨汗漫，豈料羣兒之愚；濯足歌滄浪，少警衆人之醉。假泰階六符之照，措長沙千里之平。少留蔽芾之甘棠，庸展切磋之淇奧。公歸無所，即有衮衣繡裳之詩；我儀圖之，請繼濃墨大字之頌。伏念某名在屬籍，實則寒儒。朝齏暮鹽，長兀窮年之燈火；夏絃春誦，恐孤傳世之詩書。方小丈夫偕計之時，適大參政登朝之日。對硯中龍蛇之影，遙識璇魁；接天邊鴻鴈之行，偶聯金榜。所恨拘貴賤之分，未由觀道德於前。天惠仁侯，曉行湘水。赤舄几几，雖嘗再拜於車塵；素冠纓纓，何敢數干於閭吏！賴廩人之繼粟，活孝子於寢苦。幸周踰月之期，敢廢披雲之敬！十年不調，或欲爲再命之圖；一氣轉鈞，願更使匹夫之被。《梅亭先生四六標準》卷二。

## 代見丞相啓

代朱提幹

齒塵埃之下吏，夙感大恩；拜雲漢之上台，輒裁小牘。戴德有丘山之重，修辭無月露之工。斐然搖毫，滂若流汗。伏念某妄庸晚進，艱苦早孤。念昔先人，固嘗拜龍虎之榜；不腆後嗣，何敢吐蝸蚓之科！然徒用外家之恩，始得塵下士之列。頂踵實歸於陶鑄，肺肝嘗切於鏤銘。甘辭曹掾之優，聊適

步兵之隱。經禮三百，亦嘗偕計吏之行；進士五千，獨未中太常之第。猶蒙藏疾，獲遂養痾。侵尋二考之書，濩落再命之計。然念長伯樂之廐，苟不自鳴；縱或抱和氏之珍，誰其見賞！敢伸九頓首之請，併祈一轉手之仁。恭惟某官直大以方，清和而任。時則有若伊陟，實繼阿衡之覺先；公其惟時成周，足邁伯禽之拜後。積十六載更絃之化〔一〕，收七十城憑軾之功。營東豳西，煩整頓乾坤之手；燕南越北，知扶持宗社之心。方將恢萬世之基，益廣開衆正之路。有如門下桃李之數，或堪籠中參朮之儲。是能容之，非敢望也。尚念某難留冰幕，盍返糟丘？一氣之轉洪鈞，儻拜成終之賜；萬間之庇寒士，敢忘報國之心？《梅亭先生四六標準》卷二。

〔一〕十：原作「卜」，據四庫本改。

## 代上丞相啓

代趙催綱誦夫

綴京幕之下僚，茫無操挾；瞻宰衡之上相，敬布依歸。惟其恃我公之如昔賢，故敢提孤生而進門下。蓋臯陶之弼舜，以翕受爲規模；至伊尹之佐湯，以旁招爲事業。下至蕭、曹、丙、魏之於漢，以及房、杜、姚、宋之在唐，皆因收拾四海之材，用能輔成一代之治，載在信史，是爲元勳。至如先正越王之忠，實開孝宗隆興之業。張子公服其汲引之量，沈德和愧其錄用之言。不惟國以得士而昌，亦

是家有達賢之後。故國非謂喬木，實倚世臣；成績紀于太常，益光先烈。恭惟某官忠貫日月，誠塞天淵，溫乎得聖人之和，毅若任天下之重。人見伯禽之拜後，依然無驕士之風；誰知孔鯉之異聞，得之自趨庭之日。垂紳正笏，不動聲色；強本折衝，自得精神。齊城既入於地官，周寶乃歸於天府。然且厚根闢店楔之蓄，幾於無毫髮絲粟之遺。是乃傳禹、稷之心，豈但接韋、平之武！伏念某強名屬籍，本實寒儒。既無長吉之文章，又乏更生之學問。幼年筆硯，燈無太喜之花；繼世簪裳，袍已半枯之葉。一尉南昌而奚補，再丞廣信以徒勞。雖亦蒙臺府之吹噓，然終厄銓曹之選調。茲贅員於冰漕，實隸役於日畿。幸逢大匠之鈞陶，誰非躍冶；正恐無言之桃李，下自成蹊。敢因三吐哺之餘，輒伸九頓首之懇。譬諸草木，安能酬雨露之恩；刈爲薪芻，亦是報乾坤之造。《梅亭先生四六標準》卷二。

## 代上丞相啓

代鄭司理

觸五嶺之熱，叨李掾以終更；企六符之光，趨槐庭而執贄。既快鳳凰景星之睹，輒謀烏鵲明月之依。修辭斐然，犯分愧甚。伏念某簪裳墜緒，場屋老生。再鼓而衰，已蹉跎於壯志；三獻不刖，乃塵綴於末科。初無進取之狂，粗識簡書之畏。味「我自愛桐鄉」之句，謾試弓刀；誦「人誰送臨賀」之詩，往司狴狴。粗知勿誤于庶獄，初無可折之片言。歲厄閏年，良動故人之念；天憐孤迹，偶逃新鬼之羣。竊聞大鈞之無垠，雖占小善而必錄。譬猶草木，雨露無甘苦之分；雖在江湖，潢潦願涓塵之

助。恭惟某官道先民覺，忠結主知。聖朝之相頻頻，已過中書十四秋之數；《閼宮》之詩奕奕，方開異姓五百年之封。無敵知真儒之功，可久見賢人之德。問鄧禹而披輿地，蓋將膺萬國之貢珍；得伊尹以格皇天，詎止俘三朶之寶玉！惟有邦有家，九德咸事；則無怠無荒，四夷來王。豈以洵故官冗耶，願善鄭以勸來者。尚念某固望斗升之活，亦希尺寸之垂。猶泥在鈞，猶金在鎔，是全託一陶之造；若川作舟，若旱作雨，諒欲遂萬物之宜。《梅亭先生四六標準》卷二。

# 全宋文卷七二六七

李 劉 三

## 謝董侍郎居誼舉狀啓

隨驃騎之幕，濫備執鞭；剡公車之章，遽蒙推轂。心感恩於破白，面抱愧而發紅。伏念某稟生多艱，從宦尤拙。貴人令其出門下，既不善於走趨；大夫羅而致幕中，亦倍勤於收拾。豈謂半年之內，復爲千里之行。治法征謀，紛紛未定；幕膺檄筆，錄錄無奇。然白日實照其精誠，則赤雲可占於勝氣。況值匈奴百年之運，必復《春秋》九世之讎。飀犀札而咤犂旄，在此行矣；封龍額而獵麟脚，竊有望焉。曾未輸橫草之勞，何遽辱采蘋之薦！乏吳下阿蒙之學，顧曰淹該；無江南子布之詞，反云典麗。裨益之功甚寡，獎予之實何多！茲蓋伏遇某官以社稷臣，爲詩書帥。孤忠可貫於日月，至誠足達於天淵。一龜一琴，人皆望清獻之出；萬牛萬甕，賊必待崇文之擒。佇觀十乘之行，大作三軍之氣。繫單于之頸，慰祖宗在天之靈；犁匈奴之庭，爲蠻夷猾夏之戒。于以侈旂常之績，歸而策鼎鼎之勳。

凡在紅蓮綠水之間，必入赤箭青芝之用。某敢不力磨其鈍，圖稱所蒙？插羽銘山，敢衍文章之小技；冶金伐石，願歌竹帛之大功。《梅亭先生四六標準》卷三。又見《翰苑新書》續集卷三〇，《八代四六全書》卷一二、一四，《宋四六選》卷一八。

### 謝魏運使了翁舉狀啓

據地承顏，非有豚蹄之祝；爲天啓齒，乃蒙蟲臂之收。勞軍將之打門，發函書而驚坐。難道今人之不古，但虞吾黨之累公。伏念某於道無聞，甚愚不肖。每思名教之樂地，何必事功；亦知富貴之浮雲，不如貧賤。徒緣一第之末〔二〕，彊爲三釜之謀。中罹弗泊之悲，甚悔未信之仕。以風爲解，遂回蓬島之船；幹流而遷，徑泛瞿唐之水。既元戎所自辟於天子，非先生敢圖利於大夫。綴綿城雪嶺之觀，未容黔突；則天水祁山之役，濫佐青油。方深國事之憂，遑復身謀之恤。車輪四角，何敢累推轂之人；夏屋萬間，亦莫認捲簾之處。敢謂誠心之傾倒，竟煩強箭之吹噓。茲蓋伏遇某官學者泰山，國之元氣。年不可及，寧妨待天下之清；時來則爲，終必得聖人之任。引扁舟於蓬島，閱十暑於岷山。人疑魁枕參首之淹，公無瓶居井眉之悔。卿自用卿法，吾親屬吾思。駭聞渡瀘之行，倏罹陟屺之變。故者無失其故，未能致唁於生芻〔三〕；誅之不可勝誅，敢望噓枯於死草！忽辱遺我雙魚之寵，見貽「駕彼四牡」之章。學落質凡，顧謂識高而韻邃；氣凋力腐，反云才贍而意新。近功缺然，遠業安

在！初不敢冀緇衣之改，何爲過蒙華袞之褒？師魯之從事陝西，容有知之而弗薦；永叔之退居潁上〔三〕，乃虞賢者之不聞。所忻吾道之有歸，豈獨小人之受賜。某不知所報，當勉其頑。氣象未可攀，但感幽桂榛菅之薦；歲月坐成晚，尚託江梅桃李之香。《梅亭先生四六標準》卷三。又見《翰苑新書》續集卷三〇，《啓雋類函》卷九四。

〔二〕末：原缺，據《翰苑新書》補。

〔三〕末：原作「夫」，據右引改。

〔三〕穎：原作「穎」，據右引改。

### 謝鄒運使孟卿舉狀啓

王事靡盬，未敢懷歸；使臣見知，忽叨論薦。況沐成終之賜，尤銜引重之恩。伏念某蠢蠢隨行，狙狙何算。少始知學，亦有立功立言之心；壯不如人，已作爲貧爲養之仕。偏親弗泊，百念頓消。漢庭諸公，漫惜斯人之憔悴；魯國男子，自知吾意之蹉跎。引舡既遠於蓬萊，鼓枻試觀於灩澦。沐浴而戒行李，人謂斯何；饑渴之歌《采薇》，歲亦陽止。雖連收乘矢之發，恐未免一簣之虧。豈無他人，欲令出其門下；不有君子，寧可棄之道傍。茲蒙四牡之章，遂足五紆之數。在繡衣六條之察，定匪徇私；然華袞一字之褒，却疑過實。蓋經邦本諸政事，而緯國取於文章。游、夏、求、賜之異科，雖孔

門而難備；董、賈、龔、黃之殊傳，在漢世而罕全。自視歉然〔一〕，前言戲耳。士固伸於知己，蓋非搖尾而後憐；德不待於成身，却合銘心而自厲。茲蓋伏遇某官人今而心古，行峻而氣平。分閫乘輅，欲轍環於四海；揚金斂璞，真鑑別於九流。尚煩入蜀之星，來卜擒胡之月。遂見山平劍閣，浪靜瞿塘。劉闢就誅，昌黎上元和之頌；子璋授首，少陵形敬定之功。既飲至而策勳，復重臨而領郡〔二〕。子午之奇可出，但當飽戊己之屯；甲寅之報未來，何以寬庚癸之呼？尚屈餽餉關中之手，且圖轉輸渭上之功。諒思人物之渺然，僅有征夫之邇止。劍外之官易冷，聊借吹噓；幕中之辯非傾，謾加收錄。某敢不稍鐫嬾習〔三〕，謹佩味言？號門生而知恩，例欲自同於蛇雀；報國士之遇我，誓當小異於馬牛。

《梅亭先生四六標準》卷三。又見《翰苑新書》續集卷三〇。

〔一〕歉：原缺，據《翰苑新書》補。

〔二〕「遂見」至「領郡」，原無，據四庫本補。

〔三〕某：原作「其」，據右引改。

### 謝衛參帥涇舉關陞啓

小子狂簡之成章，無能爲役；大鈞坱圠而播物，有味其言。幸辱備於使令，亦足謂之遭遇。不應論薦，便累吹噓。伏念某受質亡奇，望世亦狹。童而強學，粗知萬物之皆塵；壯不如人，縱得一科而

何補！舍對白抽黃之業，爲出朱入墨之謀。人言棲枳之官，決無鸞鳳；渠知求芻之志，固異馬牛。不圖賈子之泛湘，偶際召公之分陝。望塵雅拜，孰非夾道以疾馳；敷衽陳詞，獨念此君之小異。令以竿牘小夫之智，效於詩書元帥之前。一年于茲，五技窮矣。可以止則止，方願返於屠羊；莫之爲而爲，駭忽勞於薦鶡。亟嘗輸款，願且避賢。豈期刺史之天，決爲將軍之地。識字有數，敢當淹博之稱？了事亦癡，寧有疏通之實？非相國賜之大禮之過，詎至是耶；使天下洋然動于然來，其必由此。古之所以求士，今者於是見公。恭惟某官身佩安危，力關造化。兒童之誦君實，久佚丘園；夷狄之問潞公，暫司管鑰。察湖南之從事，欲冀北之空羣。雖有絲麻，且揚糠粃。意者恥匹夫之不獲，欲其收多士以攸奔。無以我公，亟展伊周之業；豈惟委吏，得專文武之功！某既累公知，寧當自棄？少留東閣，難掩人言魏勃之庸；更遶南枝，或備臣客馬周之對。《梅亭先生四六標準》卷三。又見《翰苑新書》續集卷三。

### 謝曾運使槃舉關陞啓

墨綬主書，苦乏曳裾之譽；繡衣察吏，忽承推轂之言。況下考之甫書，曾微勞之未效，便辱吹噓之送，允爲特達之知。伏念某何足控搏，不堪位置。抱鉏犁而餓空谷，乃無端以讀書；裹章服而揖上官，還不習於爲吏。解后六條之察，吉蠲一瓣之香。祝甌窶而操豚蹄，不夸而狹；見丸彈而求鶚炙，

匪躁斯狂。不謂蘇天，尚爲李地。燈花夜報，奏藁朝馳。誦說云乎，顧謂文章之典雅；會計而已，反稱政術之疏通。難當一字之褒，乃辱八珍之犒。小草之有遠志，但欲深根；老芋之爲茯神，誰欺精鑑！伏遇某官家傳忠恕，嫡嗣文清。洊疇剖竹之庸，繼著握蘭之望。濡轡而馳原隰，疑若小然；聽履而上星辰，恐不免耳。尚念斗升之囁嚼，若爲分寸之躋攀。目其貌，耳其言，雖乏同進之交譽；知其主，信其客，姑令從事以流聲。鶚薦一飛，馬價三倍。某雖無以報，敢辱所知？始與筆楚辭，儻遂少陵脫身之願；尚煩左右芻，請歌昌黎薦牘之詩。《梅亭先生四六標準》卷三。又見《翰苑新書》續集卷三〇。

### 謝林提舉行知舉關陞啓

抱會計之簿書，安知鼇釣；瞻光華之禮樂，忽拜鶚書。曾微扳援之緣，何自聽聞之誤！伏念某性徒是古，學不前人。尋墜緒之茫茫，我之懷矣；踵常途之役役，誰者念之！坐違汗漫之期，遂逐侏儒之飽。主簿四十，亦知鄧禹之笑人；公車三千，豈乏鄭莊之薦士〔二〕？未有不求而得者，吾非惡此而逃之。馬失之瘦，士失之貧，其來已久；牂生於奧，鶉生於突，彼各有由。甘心妄校尉之行間，絕意諸貴人之門下。忽繡斧之間俗，如緇衣之好賢。察之進旅之間，寵以關陞之剡。妄庸人耳，顧稱履行之端詳；誦說云乎，反謂詞章之典雅。一字已榮於華袞，八音何有於爰居！其求士甚士之求公，公無愧古；不即人而人自即我，我則覲顏。伏遇某官歛經濟材，攬澄清轡。衆人皆醉，揩醒眼以旁觀；萬

物走圓，改方心而不忍。念天地之大矣，懼人物之眇然。顧以毛髮絲粟之長，悉在權度錙銖之內。有如齷齪，亦與吹噓。惟今之謀人念不到此，雖古之膚使何以加諸！某敢不策不肖身，爲必報計？馬價既增於三倍，驢技更勉於一鳴。大夫薦人，與之大夫，固無是事；國士遇我，報以國士，惟既厥心。

《梅亭先生四六標準》卷三。又見《翰苑新書》續集卷三〇。

〔二〕豈：原作「登」，據四庫本改。

### 謝衛參帥涇特薦啓

周公還贄，僅收三士之材；毛遂備賢，輒在一人之數。不求而獲，其得也榮。切惟范蜀公之封章，七輩皆爲名勝；呂文靖之賓客，三朝賴其儀刑。殆勵相國家之功，自旁招俊乂而始。然主擇客，客擇主，亦各有宜；故公求士，士求公，苦難相值。裴晉公於韓愈至公，僅使之就閑；歐陽子於聖俞素交，乃忘於推薦。況在疏賤，何與品題！某殖學多荒，賦姿不穎。偶綴一科之底，強爲三釜之謀。入墨出朱，職甚安於祭竈；依紅泛綠，夢不到於轅門。敢圖前茅，采及下菲。迨今數月，無補報於絲毫；未始一言，乞躋攀於分寸。小人屬饜而已，非惡此而逃之；大鈞坱圠無垠，果何修而得此？欲使塵埃之吏，進爲館學之儲。受德者不待成身，感知而已；盡己者謂之確論，揣分謂何。伏遇某官以社

稷臣，爲詩書帥。傳說之輔台德，宜楫巨川；君陳之和厥終，暫藩王室。式篤《緇衣》之好，庸爲夾袋之藏。故令駑才，亦玷鶚表。某敢不激昂大節，感刻異知？諸侯薦人，與之諸侯，固無是理；國士遇我，報以國士，請事斯言。《梅亭先生四六標準》卷三。又見《翰苑新書》續集卷三〇。

### 謝曾安撫從龍特薦啓

伏蒙鈞慈露章特薦者。竊以儀曹論秀，舊累殊知；帥閫舉能，今叨亞選。負留連之藻鑑，辱根柢於朽株。施重人輕，感深言淺。伏念某不堪位置，何足控搏。少而恥有道之賤貧，冒焉干祿；壯欲行所知之學問，愚不適時。今難望不龜之封，聊爾監無蟹之郡。由貳攝長，無儋石之儲晏然；粗廉且平，信蠻貊之邦行矣。初無詞藻，何有聲名。周公欺我哉，還贄僅收於三士；韓愈亦人耳，願忠豈後於百官。濫吹其間，循涯而懼。茲蓋伏遇某官爽邦良弼，命世元臣，暫勤分竹於武安，共僊聽麻於文德。曉行夜醉，已開南嶽之雲；暮捲朝飛，又作西山之雨。雖自湖入海，是亦東歸之兆；然望魁與台，亟還北落之樞。庶不戰可屈於人兵，見用儒無敵於天下。一莊荒甚，亦思向花木之陽；半刺芬然，詎意入蘋蘩之薦。維昔武侯之一表，實同《說命》之三篇。首焉推向寵之淑均，繼則舉費禕之忠實。今以二難并之美，併於一不肖之身，自視欷然，公言過矣。然士固伸於知己，則德豈待於成身。諸侯薦人，與之諸侯，久無是事；國士遇我，報以國士，當厲乃心。某敢不剡礪鈍頑，鞭磨庸惰？號

門生而不知恩者非人也，詎敢弭忘；視匹夫不獲其所者若推之，更祈終惠。其爲感槩，罔既鋪敘。

《梅亭先生四六標準》卷三。又見《翰苑新書》續集卷三〇。

### 謝林寺丞行知特薦啓

素韞御祥，夢空懷於故宇；繡衣薦士，選猶及於陳人。睽離恍隔於累年，屯蹇既濱於九死，乃蒙記憶，尚送吹噓。始而驚疑，終則慙懼。人棄而已獨取，此心定異於常情；今無而古則聞，茲事實關於世道。非言可謝，於禮敢違？伏念某命固不猶，材亦無似。湘濱憔悴，安得自高；蜀道嘻噓，固爲親屈。彼蒼有罰，莫白此心。棘人樂樂，勞心忉忉，幸而終制；達官紛紛，諸公衮衮，誰實恤孤！忽聞一節之趨，嘗及十夫之獻。漫令廁九人之後，材難不其然；至謂冠一路之賢，吾斯未能信。豈固察驪黃之外，憐其困牛皂之同。人謂斯何，公言過矣。舊游門下，既已玷一株之桃；今去籠中，乃猶取三年之艾。恩淪於髓，媿溢其肝。茲蓋伏遇某官德與春和，氣如秋杳。方淳熙之雜然並進，固不乏於時材；惟簡肅之老而愈剛，實見稱於聖主。今賢者識其大者，蓋有之是以似之。不然再轉而爲丞，誰能三已而無愠？徧持使蕩〔一〕，始入郎闈。君不行兮夷猶，羌難得而覩縷。廣帥之重，唐制已然。上弄印以選賢，公聞命而就道。何恙弗已，盡興則歸。得之傳聞，似恐昔疾而今愈；恬於出處，豈非人醉而我醒？然天下之所少者非材，則海濱之來歸者有日。勸相我國，謹簡乃僚，勉令進進不已之人，

皆動于于然來之意。某敢不請事斯語，力勉其頑？德不待於成身，豈但叙柳河東之感；士固伸於知己，自當發韓昌黎之狂。《梅亭先生四六標準》卷三。又見《翰苑新書》續集卷三〇，《啓雋類函》卷七八。

〔二〕蕩：原作「盪」，據四庫本改。

### 謝瀘帥楊尚書汝明啓

屬城受察，已感芘身；帥闔簡僚，更叨舉首。得固榮於券外，愧有玷於牘端。嘗觀七篇之包羅，頗考五人之名數。齊王爲都之知，罪惟孔距心；獻子取友之難，忘必樂正子。使下駟或當於上駟，則後魚或誚於前魚。矧某不才，舉世所鄙。坐力田之傷地脉，迄不逢年；欲養生以息天黥，未能絕粒。得郡豈嫌於如斗，蹊田適值於奪牛。有土此有財，貧於近鹽；改井不改邑，窮乃無錐。不幸千里之旱可哀，竟無斗升之水以活。蒙袂弗勝其貿貿，納溝寢覺其纍纍。救火暇問大人，只得焦頭而爛額；無麵欲爲巧婦，但知剗肉以醫瘡。思饑實自於已饑，忍痛難思於方痛。非惡其聲也，實關鄉人孺子之心；何誕之節兮，固賴方伯連帥之惠。鶴膝蜂腰，尚未全復；牛溲馬渤，何足兼收？此蓋伏遇某官德與春融，氣如秋杳。閭闔之開黃道，夙高北闕之星辰；斧鉞之下青冥，暫養南山之霧雨。七年可即戎矣，九戩以公歸兮。觀察急於賦，刺史私於民，洞知委折；今夕飲者恩，來日按者法，未忍舉行。閔

其存活數千之羸，寵以治平第一之薦。然饑饉扎瘡之甫定，熙洽謂何；且文詞學問之久荒，博深安在！尚書拔十得五矣，孝廉聞一知幾耶？德不待於成身，士固伸於知己。某敢不懲羹吹沸，求牧與芻！諸侯失國，託於諸侯，無使饑餓於吾土；國士遇我，報以國士，敢忘佩服於斯言？銜荷惟深，敷宣罔既。《梅亭先生四六標準》卷三。又見《永樂大典》卷一八四〇三。

### 代謝衛參帥啓

浮食畫墁，又占芙蓉之幕；飛章推轂，遂依桃李之門。請裁小子狂簡之章，少謝大鈞塊圯之賜。伏念某地寒無挾，天巧亦慳。膽落穹廬，莫繼忠宣之衣鉢；力扛洪鼎，又慙文惠之箕裘。徒藉義方，獲沾世祿。雖幸挂名於秋賦，未能得隽於春闈。盤旋州縣之勞，祇慄簡書之畏。偶終墨綬，獲近碧幢。適泰階六符之光，擁元戎十乘之寄。生匠石之園，長伯樂之廐，固可卜其終身；挹浮丘之袂，拍洪崖之肩，復自憐其凡骨。聊作斗升之活，敢希分寸之攀？況西山行地之仙有八百輩，而旌陽同日之舉僅十二人，不應妄庸，亦預推薦。茲蓋伏遇某官三朝元老，四海真儒。魁下兩星，付榮進於素定；胸中五色，補造化而不言。靡辭三命之滋共，要歷四方之維翰。自洪移福，瓣香續派於南豐；由登入京，夾道寄聲於司馬。閩閩休歌於來暮，吳儂莫切於去思。陝而東，陝而西，方欲弘周、召之化；洛之南，洛之北，務多收溫、石之材。包荒得尚于中行，采菲何嫌於下體？致茲孤進，亦累一陶。某敢

不退自激昂，勉圖報稱？滕王閣之合賓佐，既辱異知；翹材館之招賢人，應無棄物。《梅亭先生四六標準》卷三。又見《永樂大典》卷一八四〇三。

## 代謝帥座啓

契家子弟謝合尖

塵埃委吏，夙依夏屋之萬間；造化全功，遂拜春風之一紙。受知襃積，懷感輪囷。竊以山巨源之念遺孤，吾聞語矣；柳子厚之記先友，誰實圖之！非遲遲於救死之八珍，則淺淺於蘇枯之一溉。有如念故人之子，擢之於筦庫之中。成始成終，不進不止。以此稱於天下，豈當求之今人？伏念某窺管識卑，挈瓶知小。備太史牛馬之走，終覺駑庸；讀先人科斗之藏，卒無象似。羌爲貧而出仕，窘將母之不遑。倚門之望既深，對床之歡亦廢。雞鶩爭食，難舒狷者之懷；烏鵲無枝，漸作歸歟之計。豈謂荆潭之裴垕，首求漣穀之石洪。總角卽今，憐其進拜於床下；厥齒長矣，不應曳尾於塗中。假之寵靈，長其光價。遂從數月，卒獲四章。譬如爲山，實易虧於一簣；志在流水，誰能寫之五弦！忽逢公車之交，遂合浮圖之穎。父書是讀，果何有於家聲；兒事已癡，豈真明於吏治？伏讀八字，足華一生。卵而翼之，所謂如天之福我；顏之厚矣，未知何地以報公。此蓋伏遇某官藩屏重湖，準繩百吏。塊圯播物，大鈞運於無垠；追琢成章，小子至於有造。憐宣孟之無後，撫叔敖以如生。褒華袞之一言，器蟠木於萬乘。遂令長往之興，亦入旁招之儲。重惟此恩，將何以謝！某敢不恪共爾位，惟既厥心？我有

二天，已幸廁七十家之舉；士更三日，猶希與八百吏之除。《梅亭先生四六標準》卷三。又見《永樂大典》卷一八四〇三。

### 代謝茶漕司啓

需次糟丘，敢圖內舉；贅員油幕，使效裏言。昉茲服役之初，敢廢修辭之敬？竊惟中興重藩宣之寄，故於機事置書局之官。當建炎羽檄之交，實許陪於贊畫；迨紹興韃橐而後，始無預於文移。雖曰閑曹，然亦異數。如某者志雖自好，學未知方。爲箕爲裘，亦自勉家傳之業；不狩不獵，居然承世祿之恩。未敢荒筆硯之耕，然已負懷綳之愧。一行作吏，甚安筦庫之卑；萬里侍親，忽有從軍之命。猥容浮食，使典內籌。幸雖出於天然，恐有爲之地者。恭惟某官氣資凝遠，風調浚明。黃鍾爲宮，散作人間之和氣；大玉不琢，中藏天下之至文。肯爲入蜀之星，實卜擒胡之月。周爰咨度，暫煩四牡之馳；薄言旋歸，即護六飛之馭。凡叨氣類，例沐吹噓。致令疵賤之蹤，獲隸走趨之數。某敢不靖共爾位，洗濯其心？詩禮聞於過庭，敬修可願；孝友施於有政，增益未能。《梅亭先生四六標準》卷三。又見

《永樂大典》卷一八四〇三。

### 代謝茶使與合尖啓

綴玉鈴之冷幕，已迫踐更；飛金節之薦函，偶成合穎。功莫崇於引重，惠無大於成終。涓吉日以修辭，順下風而請謝。竊惟選舉既弊，授受俱難。相易則從之輕，已發蘇老泉之嘆；用決者恨其早，可考黃山谷之詩。君驕士而士亦驕君，主擇客而客或擇主。故達官多寡助之恨，而志士無苟合之期。兩不相逢，一至此極。況如大正，可謂小知。緬思舊學之碑，有慙元獻；不傍貴人之戶，却似小山。第恐荒簪笏之家，未免厲布韋之業。螯鹽十載於太學，僅竊末科；草茅一介之狂言，幾投大僇。甫息浮湘之柅，冒隨諭蜀之車。錄錄無奇，安有幕中之辯；沾沾自喜，若爲席上之珍。偶蒙諸臺，共剡乘矢。爲山九仞，極知一簣之虧；撞鍾千鈞，此豈寸莛之力！誰其從臾，辱此吹噓。樂莫樂兮相知，何敢急於自銜；遲又遲而又久，諒欲察其所安。好不改於緇衣，褒果踰於華袞。退惟內樸，反稱凝重之姿；正媿中乾，何取純深之學！殆假點睛之筆，俾舐換骨之丹。人訝其通籍之階，宜淹而速；自恐負親民之寄，雖寵若驚。此蓋伏遇某官風鑑精明，天機沉邃。透遲苞栩，盍周道之遄歸；蔽芾甘棠，殆召公之是似。峻東壁圖書之領，專西秦樵牧之司。相馬舉肥，恐小駟有足乘之理；煎茶有味，思大匠無可棄之材。欲令轅下之駒，謾備籠中之物。故雖弄印，迄使在鎔。某敢不謹佩此恩，力鞭其鈍？公車薦士，諒不收私報之情；直道事人，持此答曲成之造。《梅亭先生四六標準》卷三。又見《八代四六全書》。

代董侍郎謝史丞相啓

六年百謫，託大造以全生；一旦異恩，錄微勞而贖過。盡復官階之舊，仍沾祠廩之新。毫髮不出於他人，頂踵皆歸於化地。伏念某夙無操挾，積有僥逾。州縣常才，既躡從甘泉之橐；藩垣重寄，更濫分益部之符。指心願報於寵光，量力終牽於分量。體廟謨安靜之意，何敢動兵；承宣司減汰之餘，又難增戍。然畫地而守之策〔二〕，亦無日不討諸人。會殘虜欲竄身於三秦，聚重兵專垂涎於四蜀。計我師之籍無八萬人，分邊面之屯幾二千里。上藉朝廷之威德，下憑將士之忠誠。首殄渠魁，既奏皂郊之一鼓；繼殲羣醜，不留蟠冢之隻輪。偶興元偏帥殞於挑兵，致散關諸卒潰而挺盜。雖在韋臯去鎮之後，難逃孔明貶秩之辜。投畀囚山，甘作浯溪之老；適逢沛澤，遂叨汝水之歸。茲遇飛龍之御天，曲念病駒之屬地。錄其尺寸，踦許復於雁門；活以斗升，涸足蘇於鮒轍。孰主張是，遂登濟茲！此蓋伏遇某官柱石九筵，綱維八極。談笑洗咸池之日，從容封函谷之泥。博陸之益戶萬七千，詎足報伊周之烈；汾陽之書考二十四，自應徧齊晉之功。方藏疾以匿瑕，務厲世而磨鈍。復其官爲子孫之計，見此恩乃父母之心。某敢不仰佩殊私，益磨晚節？誘我松桂，未敢勒北山之移；收之桑榆，庶幾補東隅之失。《梅亭先生四六標準》卷三。又見《永樂大典》卷一八四〇三，《八代四六全書》卷一一。

〔二〕畫：原作「盡」，據四庫本改。

### 代陳帥機元勳謝衛參帥啓

細書成文，蒐實材於公舉；大鈞播物，挈冗吏以名聞。雖嘗備於使令，初無堪於選錄。況受及瓜之代，難徼采菲之恩。不謂三人之占，乃使匹夫之被，一陶異甚，再省矍然。伏念某頑疏之資，浮沉於世。塵容俗狀，果何有於詳華；綿力薄材，豈真能於強濟！門蔭只宜於平進，闕僚自合其宣勞。粗奉文書，無可言之功狀；非有方略，難曲盡於事宜。是真常鱗凡介之匹儔，何計乘鴈雙鳬之多少！矧入幕之日淺，而歸袖之風披。三匝彷徨，不識捲簾之意；一封覲縷，忽聞推轂之言。得之駭然，望不及此。既非請謁而得，是謂特達之知。公求士甚，士求公，久無是事；子生孫復，孫生子，難報此恩。伏遇某官直大而方，清和且任。與人不求備，此心即孔孟之心；乃言底可行，所論合禹臯之論。暫《甘棠》之美召，即《淇澳》之相周。雖俊父始入於旁招，而巧拙或容於雜進。遂令遯尾之客，亦入需頭之章。某敢不銘刻鴻私，鞭磨鴛鴦？藉使百無逢於世，亦有一回顧之榮。指心圖報於品題，滕口難論於報效。然稱於天下曰知己，今者非耶；使遇以國士報衆人，天厭之矣。《梅亭先生四六標準》卷三。又

見《永樂大典》卷一八四〇三。

## 代章監倉謝衛安撫瑑啓

下士代耕之祿，僅守積倉；上臣事君以人，忽騰薦積。憐其出自於幽谷，使之陟彼之高岡。愧在廬前，感從隗始。切以筦庫七十家之舉，古道久衰；法筵第一義之觀，今聞尤聳。有嚴十乘，所部九州。鳳翼龍鱗，孰不希於攀援；牛溲馬渤，皆有望於蓄藏。及下車之云初，乃推轂於綦賤。其爲銜戟，實倍等夷。伏念某質竊亡奇，材庫莫抗。服箱以走，渠憐滿脰之黃鍾；按劍無因，誰肯先容於白璧！強折腰於爲米，真眯目於簸糠。今蒙需章，可使升秩。父書是讀，果何有於家傳；兒事已癡，豈真堪於世用？一字之褒已過，兩喜之溢何多！伏遇某官以社稷臣，爲詩書帥。與人不求備，收毛髮絲粟之微；嘉善矜不能，無絲麻蒯菅之間。有如頑頓，首辱甄陶。九戩之魚，鱗魴即遄歸於周室；千里之馬，騏驥會交獻於燕庭。某敢不增所未能，修其可願？嘗爲委吏，已蒙葑菲之收；真彼周行，尚幸蒹葭之采。《梅亭先生四六標準》卷三。又見《永樂大典》卷一八四〇三。

## 代趙撫屬汝楫謝衛安撫啓

溝水流行〔二〕，久汙芙蓉之幕；岸花飛送，漸違桃李之蹊。重感眷留，倍深銜戀。更裁四六，少

謝萬分。伏念某再省妄庸，一何僥倖。當大參政十乘啓行之日，適小丈夫三年垂滿之時。惟其樂莫樂兮相知，是以遲之遲而又久。敷施翕受，更無假於先容；前輓後推，真不遺於餘力。居然穿縞之末，迄成合穎之謀。感溢瓶罍，功歸爐冶。乃瞻衡宇，情已迫於忻奔；及告油幢，恩數勤於盼睞。謫將滿百〔二〕，辭不免多。今蒙慨然，允爲幸甚。鷗鵬水擊，強希萬里之圖；烏鵲月明，采結一枝之戀。恭惟某官東郊道洽，西陝化成。展長沙千里之平，民無遺便；對宣室半夜之問，王曰遄歸。凡今日毛髮絲粟之才，皆他時構櫨侏儒之用。欲作大鈞之問，又虞小器之盈。敢陳攄謝之詞，更致依投之悃。常擬報一飯，柰何回首於南山；可以觀四方，自此馳神於東閣。《梅亭先生四六標準》卷三。又見《永樂大典》卷一八四〇三。

〔二〕水：原作「木」，據四庫本改。

〔二〕百：原作「可」，據右引改。

### 代趙撫屬汝楫上提刑啓

油幕綴員，漸迫終更之候；繡衣察吏，鼎來剡奏之章。初非光明俊偉之材，又無假借扳援之勢。古之所以薦士，今者於是見公。伏念某名爲宗支，實本土檢。恥懷綳之簪笏，恐受衆疑；隨韋布之縑

細，偶叨一第。慨念勉、峴、程、回之術業，終愧毛、原、周、召之等夷。何以亢身，莫如殖學。方以此自厲於己，何敢輕受知於人？細桷大杗，壹冥心於輪扁；長箋短檠，肯請命於子公？來事元戎，實叨末屬。適鼠竊狗偷之盜，蕩搖我疆；奪鳥飛魚泳之驩，劬勞于野。濫承渙渥，許減常貧。然風憲之一削不圓，則天門之九關難扣。解后《行露》之聽，寅緣宿霧之披。甫及褰帷，遽蒙推轂。既不爲有力負舟而走，又不生無因按劍之疑。伯氏壘，仲氏簾，安得齊名之實；臺中評，幕中辯，初何贊畫之功！猥借溢言，特加吹送。犍爲之磬十六，大似無心而得之；公車之牘三千，誰有不求而至者！內則感國士之遇我，外則賀天下之有公。輪囷在肝，緘封於髓。伏遇某官人今而道古，內介而外通。嘉善矜不能，所學皆孔、孟之學；舉直錯諸枉，此心同伊、傅之心。駢駢六轡之載馳，落落萬物之吐氣。有懷鴛鴦之序，及識鵲鳩之原。參以旦評，慨然露奏。振雲天之高誼，策塵土之孤蹤。暴公子之薦不疑，昔聞其語；楊湖南之信陳子，今媿斯言。某敢不深自佩銘，痛加砥礪？謝恩私室，敢矜小技之文章；不辱公門，願勉大閑之節誼。《梅亭先生四六標準》卷三。

### 代趙撫屬上衛參帥求合尖啓

汝楫

一官頂踵，冒假借之深恩；三沐肺肝，乞品題之終惠。恃在有容之大，忘其取數之多。伏念某雖出天潢，初無地望。燈花何喜，一科不補於遺餘；袍葉半枯，萬事已甘於濩落。浪爾依芙蓉之幕下，

誰其采薜荔於水中。適逢先十乘於偃藩，遂得底百僚而隸役。不虞一見，便辱異知。識元方而用季方，久無此事；謀石子而羅溫子，不曰非才。借以齒牙，付之羽翼。知我莫如鮑叔，逢人必說項斯。遂令虧簣之山，迄作合尖之塔。惟是過屠而大嚼，難忘見麴以流涎。兼幸生匠石之園，託根未正；縱欲附翹材之館，張本已疏。豈無列薦之貪，亦有十科之目。或蒙送上，亶謂成終。大鈞無垠，拔士不遺於餘力；小子有造，歸恩豈在於他門！恭惟某官以社稷臣，爲詩書帥。喬嶽之蓄雲泄霧，人蒙潤而不知；滄海之包乾括坤，物何歸而不得。尚念碧油之屬，欲舐丹竈之餘。縹緲孤鴻，漸恐回頭之斷漏；差池歸燕，寧能絕望於捲簾。幸從昌黎弟子之貪，徑寘陸氏門生之列。茅茹以其征吉，今朝已免於西曹；桃李悉在公門，他日尚希於東閣。《梅亭先生四六標準》卷三。

### 代陳縣尉愷上衛參帥求舉啓

酸寒漂尉，古須強箭之吹噓；憔悴湘濱，今累大鈞之塊圯。百無操挾，萬有狂愚。然而恃大參政之寬洪，必不責小丈夫之躁妄。切以三吐哺三握髮而下士，周公豈欺我哉；一舉手一投足之乞憐，韓愈抑亦人耳。況幸在犀甲熊旂之下，乃無與絺苧雞壅之中。恐虛此生，何用於世！是以頃者之詣府，敢於冒焉而呈身。溫乎其和可知，既蒙異顧；粲然有文相接，實激懦衷。惟是下考之垂成，猶冀上天之吹送。懼捲簾之或晚，忘躍冶之非祥。伏念某鹿鹿亡庸，狙狙何取。砥節礪行，不能窺前輩之藩

籬；種學績文，且未識古人之糟粕。半生一第，寸祿八年。茅舍聽雞，猶是儒酸之氣味；竹弓射鴨，安知吏隱之風流！然粗覺無媿於心，幸以此不惡於下。慨念一寒之迹，若爲再命之階？得拜馬前，已遂執鞭之願；無爲牛後，遂興見彈之思。然記碧油之幢，頗辱黃金之諾。以其時則可矣，敢不長鳴；異乎人之求歟，真成自鬻。伏遇某官直方且大，清任而和。公路垂紳，即正槐廷之面；侯方賜履，暫爲蘭畹之滋。遇民猶兒，求士如渴。東山瓜苦，共思零雨之遄歸；南國棠甘，未若敷天之純被。顧以根闌店楔之細，皆在毛髮絲粟之中。欲善鄭來，請從隗始。某敢不激昂駑鈍，報稱鴻私？桃李悉在公門，既感東風之鼓舞；葑菲無以下體，尚幾秋露之均沾。《梅亭先生四六標準》卷三。

### 代趙縣丞善倪上撫州林守洽求舉啓

贊長官之雨，不善避嫌；戴刺史之天，夙蒙假蔭。惟是斗升之活，若爲分寸之躋？流涎久動於麴車，病顙輒希於箕秣。印刑果否，治躍可乎？切以甯戚之歌，黷明之言，雖賢不免；匠石之園，伯樂之廐，所係尤深。既辱在於使令，且已叨於識察，將以知己稱於天下，乃使勤子至於他人。縱欲冥心，何以藉口！伏念某號爲宗姓，實則儒生。束髮所期，豈念祖宗之簪笏；摘髭不力，竟慙伯仲之墳簞。怵於食貧，遂爾諾仕。一行作吏，已徒勞州縣之間；再轉爲丞，真覺出簿尉之下。顧惟蹇拙，粗守公勤。不利走趨，寧免長官之罵；尚能拜起，孰非太守之恩。試以代庖，幾於環轍。莽誰欺於揆

牧，復攝事於子男。柰何五章，漠無寸援。得不得之有命，當安造物之鑪錘；樂莫樂兮相知，更傍誰家之門戶？伏遇某官眼高四海，氣蓋諸公。千佛姓名，早宜登於文石；三神步武，晚猶會於郎星。載馳子子之旗，有偉皇皇之轡。胡然歛惠，復此專城。公不嫌旋馬於蟻封，士則嘆烹雞於牛鼎。雙旌屬爾，五袴暖然。謝康樂之文章，尚餘此地；顏平原之氣節，如見其人。竊窺帥屬之文〔二〕，可見察吏之意。不知庸下，還入選中。既旁無蟠木之容，姑且作大鈞之問。盡枿去牙角，雖無種學之泓澄；託根借恩光，或許孤芳之皎潔。《梅亭先生四六標準》卷三。

〔二〕屬：原缺，據四庫本補。

# 全宋文卷七二六八

李 劉 四

## 代黃主簿夢得上樓倉觀求合尖啓

瞻使槎於霄漢，無地修容；抗簿領之塵埃，以身得察。聞高標之戍削，絕末俗之夤緣。遂忍恥以自鳴，望微恩於回顧。切以爲山九仞，正虞一簣之虧；持綆百尋，斯動三途之望。故功莫崇於引重，而恩無大於成終。必以爲無益而舍之，則未有不求而得者。伏念某崎嶇百戰，濩落一科。棲枳棘之叢中，但合出朱而入墨；拏芙蓉兮木末，安知泛綠以依紅。偶效役於轅門，遂贅貲於幕府。文書堆枿，真成俗吏之爲；獄訟如絲，粗了癡兒之事。兩蒙連率，交剡公車。惟是《緇衣》之三章，尚須華袞之一字。月明繞樹，自憐烏鵲之何依；海上問津，或謂斗牛之可訪。惟是夙蒙於廉察，未嘗得效於使令，冒然有言，可謂不韙。然苟以平昌之言足信，則或知尹公之取必端。徑援筆以點睛，當勒銘於刻骨。恭惟某官盛名如畫，和氣猶春。自其甲進士之科，即合庚佐王之學。百川既倒，屹砥柱之固存；

萬木盡僵，凜嶺松之獨秀。由曲臺之議禮，謂直筆以記言。居然偏城，歛此大惠。田里之無愁嘆，有偉民庸；原隰而有光華，亟將使指。福星所照，旱魃已消。然設有膠東三萬戶之流民，必將丐江西斗升水而活我。尚煩周度，爲此曲防。然後遄四牡之歸，于以扈六飛之馭。思天地之大矣，念人物之眇然。欲善鄭來，請從隗始。主簿能令公喜，今謂斯何；使者或不汝容，信乎命矣。《梅亭先生四六標準》卷三。

### 代回楊評事洪之謝求薦啓

具一鶚之表，方有待焉；遺雙魚之書，何其駛也。不能辭璧，又愧報瓊。恭惟某官騰茂蜚英，閎中肆外。十事九律，備知小大之情；千條萬端，未容上下其手。見何晚也，愛莫助之。儻寬食麩之期，敢愛拔茅之力？此亦公舉，安用謝爲？某報國無功，知賢不早。翱亦云審知足下矣，豈復寘疑；起在此敢勤他人乎，更祈加察。《梅亭先生四六標準》卷三。

### 回資官王縣尉昌大謝舉狀啓

某謹簡乃僚，因剡公車之牘；冥升在上，詎收私室之恩！從而謝焉，非所望也。伏惟某官器能瓌

碩，趣造端溫。紫電神鋒，夙志屠龍之學；青冥強箭，暫閑射鴨之弓。今大夫羅而置幕中，宜諸公爭令出門下。亦意飛黃之去，何憂破白之難。勤子至它人乎，輒復吹噓而送上；見我有此客否，定皆摸索於暗中。某過辱貽箋，良高陳誼。蘋蘩可薦，其何恨行潦之濱；桃李不言，度即有成蹊之日。《梅亭先生四六標準》卷三。

### 回郭僉判仲洪謝舉狀啓

謹簡乃僚，輒效吹噓之送；非相爲賜，何勤駢儷之詞。銜袖鳴謙，開緘擊節。恭惟某官器資凝遠，文獻靖共。大夫不均我獨賢，游子男於四國；陛下用少臣已老，尚賓客於諸侯。所聞止一簣之虧，然久閱千帆之過。陟彼北山而憂父母，慕有切於終身；失之東隅而收桑榆，恩冀沾於錫命。有嘉懇款，合命那融。用是采焦尾之桐，初非有揆鼻之木。觀其主觀所爲主，幸可免勢利之嘲；簡厥修簡其不修，願不負品題之意。《梅亭先生四六標準》卷三。

### 回成副將謝舉狀啓

行三軍則誰與，正賴戎昭；舉一人焉拔尤，亦維世選。何勤私謝，更以文爲！恭惟某官揚歷甚

詳，慷慨自許。執干戈衛社稷，克稱其家；安邊境立功名，不聞亦式。是堪勇往，爰以名聞。某獲共扞城，敢忘推轂？霸陵醉尉呵李廣，不足爲懷；成都猛將有花卿，正須努力。《梅亭先生四六標準》卷三。又見《啓雋類函》卷一〇〇。

### 回史郡僉謝提刑舉狀啓

使家選衆，所舉惟賢；記室修辭，何爲至我？自合卷還於鯨錦，又疑已費於麝煤。伏惟某官揆材不貲，藏器有用。暫作糟丘之主，屈爲冰幕之賓。奮迅驥程，何慮缺書馬之一；飛騰鶚表，便當足鳴鹿之三。是爲特達之知，豈俟吹噓之送。某誤勤稱謝，但切負慚。同僚未嘗聞知人，遐不謂矣；貪天之功以爲己，渠敢爾耶！《梅亭先生四六標準》卷三。

### 代回楊評事洪之許舉狀啓

助國薦賢，我已慙於不武；飛牋陳誼，公何富於斯文。進而三熏，敢不重拜！恭惟某官居官能大，折獄惟良。廣夏萬間，徒啓乏才之歎；《陽春》一曲，反成寡和之音。頃珠璧之暗投，恨衣裘之晚索。深恐遠井之待，有孤時夜之求。汔濟云初，踐盟敢後？子若無言幾失子，況又崔、李之繼至交。

說耶；君家所有更贈君，無忘孔、孟之養氣傳道者。某粗緣然諾，洊辱詞華。得古磬於犍爲，君言過矣；獻天球於清廟，予日望之。《梅亭先生四六標準》卷三。

### 代回高承直不倚謝舉啓

奉一札以推賢，徒得君重；合衆言而剡奏，安用謝爲？貽賤惠然，爲禮過矣。恭惟某官蜚英戚畹，策隼儒林。翠竹碧梧，籍甚名家之秀；紅蓮綠水，藹然入幕之賓〔一〕。國人口賢然後用之，君子之道焉可誣也。某與箝紙尾，甚覩面顏。遣介奉咫尺書，良感渠渠之意；今子使萬里外，敢懷惻惻之憐。《梅亭先生四六標準》卷三。

〔一〕賓：原作「聲」，據四庫本改。

### 代回危教授稹謝列薦啓

及第經年，未脫選調，入京注受幾一年，而未得闕。

舉爾所知，不如鄉人之善者；於我乎館，今爲有力者奪之。隨衆笑而笑焉，非所謝而謝也。恭惟某官早收名第，獨振妙聲。坐廣文之氈，似成一十四考；待公車之詔，行及三百六旬。所賴金玉之

相，不改簞瓢之樂。昔三人占而汝則逆，用靜爲宜；今八音諧而人以和，來儀可必。某甚腐於力，徒味其言。苟文若之不進不休，於予媿甚；吾夫子之可久可速，惟君裁之。《梅亭先生四六標準》卷三。

代回崇仁潘知縣方謝舉啓

代何月湖

比剡需章，聊紀陟明之績；鼎來異櫝，顧捐投暗之疑。受言藏之，無可謝者。恭惟某官刃有餘地，琴不下堂。君子學道則愛人，計望風而成俗；小人難事而易說，肯違道以近名！作新鴟泮之好音，餘事虹隄之奇觀。是爲實茂，當以名聞。某推轂力綿，投簪心棘。潘令君之桃李，度已成陰；何將軍之山林，惟當託蔭。《梅亭先生四六標準》卷三。

代回涂察推岑啓

求舉未允

通家講好，托年契以爲多；助國薦賢，惜歲貢之無幾。裘不供於晚索，璧仍負於暗投。所幸在邦域之中，必能察形骸之外。恭惟某官槐根之芷，蘭茁其芽。俊逸叅軍，已露囊中之穎；逍遙嘉客，竟歸幕府之羅。乃今懷黃拖紫之人，半是泛綠依紅之客。寧須畫餅，更助譟旗！某有味其言，甚腐於力。請待來年之麪，時則易然；恐及往戍之瓜，風斯下矣。《梅亭先生四六標準》卷三。

## 謝劉閣學光祖舉節操方正可備獻納科啓

遠客從軍，自分塵埃之內；近臣薦士，許司雨露之邊。以仞墻則未窺，且尺牘之不貢。敢謂暗中之摸索，忽蒙送上以吹噓！此難求之今人，斯可稱曰知己。竊以爲臣止於敬，皆有陳善閉邪之心；事君致其身，豈無明目張膽之志！自方正爲賢良之號，而獻納歸侍從之班。視嘉言罔伏之時，無不諫亦入之意。然元祐十科之創建，不落第三；至紹興五載之選掄，以此居一。蓋象龍亦有致雨之理，而存羊實餘愛禮之心，儻非其人，難稱此意。如某者學未聞道，年不後人。好論古今，未離舉子之習氣；儻說得失，不過處士之大言。本浪爲錦城雪嶺之觀，乃輒與祁山天水之役。空有幕中之辯，竟無堂上之奇。誰誤聽聞，忽蒙論薦。我於辭命則不能也，謾稱春藻之葩；人之彥聖其心好之，浪許秋竿之節。平生失在小丈夫之悻，廼今亦有大君子之知。所可貴者遇大賢，韓子所以賀侯喜；不待求而後施德，柳侯於是感崔卿。不謂古心，復見今世。茲蓋伏遇某官四朝壽俊，一世儒真。本本元元，所學皆周孔之學；孜孜汲汲，此心即禹稷之心。胸中風月之無邊，筆下源泉之不擇。使天下之大老二，盡歸乎來；則匈奴之長技三，亦何所措！方居家而爲善，思報國之以人。若爲控地之飛，亦入牋天之剡。某敢不圖惟報稱，益自激昂？待以國士，待以衆人，何敢作廁中之報；不負天子，不負所學，庶免爲門下之羞。《梅亭先生四六標準》卷四。

### 謝李參政壁舉獻納科啓

塵纓解縛，方將發興於雲山；宗袞垂褒，欲使司存於雨露。喜固多於溢美，耻乃在於過情。其殆無私之私，豈容不德其德！竊以士無賢不肖，均欲希一世之知；德不孤有鄰，亦樂道諸人之善。蓋近來仕進之徑，或罕由薦舉之門<sup>（一）</sup>。心肯命通，底勞介紹；言甘幣重，自有寅緣。宗臣之考十科，本爲何事；冢宰之計羣吏，不出此途。遂令牋天之章，僅作畫地之餅。然某所見，與衆則殊。樂莫樂兮相知，止願出大賢之門下；得不得之有命，寧須商小利於楮中！矧如不腆之蹤，可謂所持者狹。識字有數，學何有於多聞；了事亦癡，才豈周於庶務。質不足以望粹然之器，文不足以窺作者之藩。宜諸公臺省之登，任此士江湖之落。莽誰欺於鑑裁，羌忽累於明揚。方正乃賢良之科<sup>（二）</sup>，必名門而後稱；獻納蓋侍從之事，豈俗吏之能爲？況去國十三年之餘，閱人多矣，今起家二千石之薦，舉世觀焉。不應凡材，猥玷異目。此蓋伏遇某官清朝良弼，名世真儒。鍊色石以補天，親揮九日；觸佞山而還里，坐閱一星。甫尋川路之風煙，適值岡巒之烽火。內嚴殄捕，外示招懷。賊憚崇文之名，若杵投臼；民誦西平之子，惟我有臣。俊父宜在於旁招，巧拙猥容於雜進。有如庸下，亦備數中。某敢不勉自激昂，圖惟稱塞？有吏才，更世事，愧非臨川老子之倫；絕當世，追古人，敢忘眉山端明之薦！

〔一〕或：原作「蓋」，據四庫本改。

〔二〕科：原作「稱」，據右引改。

### 謝任尚書希夷舉著述科啓

上命公以納言，甫膺隆委；公報上而薦士，宜首異材。是何濡滯出畫之人，辱此吹噓上天之賜！名充著述，實發兢慙。某聞簡厥修簡其不修，古不謂之恩地；觀其主觀其所主，近反類於市區。然而推賢揚善之盛心，乃是輔世長民之元氣。眇然一世，知此幾人？司馬公請建十科，本爲何事；崔祐甫盡除羣吏，不假此途。謾勤爲天啓齒之勞，間有畫地作餅之笑。如僕所見，與衆則殊。蓋伯牙之絕朱弦，特爲知者；如虞卿之取白璧，是有命焉。第令收名定價於大君子之門，何必商功計利於賤丈夫之隴？況歐陽公不能挽聖俞之達，而東坡老亦難拔方叔之窮。物固假於氣噓，命實通於心肯。況某無狀，觸事多畸。荷鋤而耕寬閑，只傷地脉；乘槎而游汗漫，又犯天河。無端讀書，有時爲養。既痛三千鐘之弗泊，又瀕四五十之無聞。小材不離於小官，已知安分；大慙或謂之大好，人自過情。馴致誤執事之知，欲令備弟子之列。先唱之矣，又唱之矣，肯引去蓬島之風船；昔謂斯何，今謂斯何，却回作瞿唐之煙棹。旁觀千丈之落，自計三寸之存。心不同兮媒勞，委禽勿強；射有似乎君子，正鵠是求。敢圖進退之間，偶合高明之見。徑持典麗，舉及妄庸。皇帝曰嘻，往贊碧幢之帥；翰林爲主，入

言墨客之卿。不以昧於時宜爲俗儒，是可稱於天下曰知己。茲蓋伏遇某官眼高四海，胸著千年。盛之白玉堂，辭足以鼓天下之動；拜于青瑣闥，學足以格君心之非。龍墀引聽履之星辰，鶴禁賓重離之日月。是固見耐官之器，孰能窺憂世之心！大厦非一木之枝，故椳闈店楔與構櫨而並蓄；小市無千金之藥，故芝苓參朮合薑桂以兼收。急求燭武則無以重朝廷，近捨皇甫則無以勸嚴穴。雖隻字片言之無用，亦三光五嶽之所關。不忍棄捐，力加收拾。何其久也，必有以也，知己在於遣中；我儀圖之，愛莫助之，亦漫爲之言上。感知而已，勿謝得乎！某敢不圖稱所蒙，力鞭其後？舍文章之小技，勉節義之大閑。孔明之栢四十圍，香葉試尋於鸞鳳；任公之竿五十犗，大鈎會掣於鯨鯢。《梅亭先生四六標準》卷四。

### 代虞制參謝劉閣學光祖舉科目啓

梧幕綴貪，曾微寸善；荷囊薦士，猥玷異科。予之豈以爲私，受者未能無愧。蓋知襴而稱獻納，嘗聞摩詰之詩；若依劉而增感傷，已發仲宣之賦。殆主擇客則客亦擇主，使官求人則人不求官。自甘桃李之不言，誰識蘋蘩之可薦？矧如剛簡，藉是迂疏。山東山西，不能世將相之業；水南水北，居然仕賓客之聯。雖學問粗知德性之尊，然英華恐非和順之發。蛙拘墟而局促，何所見聞；燕巢幕以徘徊，若爲材識？徒以固窮之力，頗知尚志之功。反觀寸心，粗識無邊之風月；洞視萬古，略知不廢之

江河。所願就有道而正焉，未得事大夫之賢者。曾撫衣之不敏，已推轂以見收。元祐宗臣之立十科，本爲何事；紹興宰相之計羣吏，尚出此途。今徒有存羊之名，或者發畫餅之嘆。然受德者不待成身而拜賜，柳子厚固已言之；既有知今又欲識路而疾驅，韓退之亦安取此！所感大矣，無謝得乎？此蓋伏遇某官道純粹精，德直方大。羽翼孔、孟，學傳先聖之不傳；黼黻卿、雲，文到古人之未到。碩果何嫌於不食，匏瓜自得於含章。人之爲言何得焉，特祝承明廬之三入；天之未喪斯文也，故應靈光殿之獨存。時來爲之，民生幸甚。豈謂誠心之傾倒，肯收孤迹之沈冥。得於不求，亦可自賀。某敢不佩所品題，銘之衷曲？歲月坐成晚，且熏坡老之香；江湖永相忘，更勉後山之報。《梅亭先生四六標準》卷四。

### 謝曾尚書喚舉著述科啓

裁小子而成章，亡能爲役；觀近臣而爲主，有味其言。予之豈以爲私，受者未能免愧。切以十科薦士，著述難堪；八坐舉賢，銓綜尤重。唐文章之錄，登者幾人；晉人物之甄，拔於一字。使品題之太過，恐稱塞之易孤。伏念某命固不猶，才亦無似。萬卷未供於啜飲，一科何補於遺餘？結柳送窮，仍覺語言之無味；剖瓜乞巧，不堪豪傑之跪呈。雖庚桑久役於老聃，然毛遂無聞於趙勝。不圖科薦，特辱名聞。惟才薰班、馬之香，乃名秀發；非學探舒、向之海，莫號淵深。至求英詞，能配古作，自

李、杜、韓、柳之不出，殆歐、蘇、陳、黃爲庶幾。何者妄庸，得此獎拂！前言戲耳，不待智者而後知；小子識之，則欲假之而自厲。考古人之所佩，仰盛德之安窮。非盡讀三萬軸之牙籤，難仰答十六枚之古磬。恭惟某官國之喬木，學者泰山。公方引韋世康而告休，士皆知杜如晦之必相。平生五色線，豈皖織女之襄；向來一瓣香，不廢嫡孫之行。滿期開閣，早與捲簾。某敢不仰體鴻鈞，俯鞭駑鈍？著作前列之餘事，豈足酬知；節誼天下之大閑，持此誓報。《梅亭先生四六標準》卷四。

### 謝趙尚書汝述舉可備著述科啓

小子成章，無可薦揚之實；近臣爲主，猥騰典麗之褒。未嘗敢請於墻藩，乃辱徑收之篋櫝。感知而已，懷愧柰何。切以一字拔人，今古稱山公之啓；十科舉士，兒童誦司馬之賢。幸猶愛禮以存羊，誰復按圖而索駿。著作雖前列之餘事，文學亦先聖之末科。珠玉不補於饑寒，豈堪混泥塗之辱；干羽無取於戰陣，猶足備宗廟之容。有如一藝之不庸，亦是匹夫之弗獲。昔趙尚書垂德於不報，柳侯嘗感其收撫之恩；至李從事因文而得交，韓子又念其饑寒之聚。不圖今日，復見古人。如某者蠢蠢隨行，狙狙何取，徒守寒素之氣習，尚持文墨之生涯。居於大江之濱，甘見笑於獯獯；行乎劍閣之險，幸偶脫於豺狼。既銜三釜弗泊之悲，又罹二子更死之禍。兩髦已雪，百念俱冰。學業實負其初心，精深安在；詞華甚慙於大手，炳蔚謂何！今屢爲丞相而言，蓋甚愧丈人之厚。枚臯之窮且忍，何敢躁耶；孟

郊之久無成，會且歸矣。不虞科薦，又累甄收。伏遇某官氣杳秋天，愛深冬日。作納言之喉舌，惟山甫克舉之；用夾輔之股肱，則周公其人也。長慮却顧，爲根本之計；兼收並蓄，無葑菲之遺。凡今傳羽翼而飛，誰非借齒牙之助？尚念朝廷半老儒之日，無棄文章一小技之人。必令綢繆於束芻，廉耻缺矣；故雖參差之苻菜，左右芼之。某敢不勉自激昂，圖爲稱塞？上不負天子，下不負所學，日監在兹；待之以國士，報之以衆人，天厭之矣。《梅亭先生四六標準》卷四。

### 謝成都帥黃侍郎疇若舉科目啓

旅床爭席，夢難蜀道之登；軍將打門，驚報襴書之至。世固有十科之薦士，公獨能萬里而舉人。愧在其肝，感深於髓。伏念某至愚不肖，素賤且貧。無端讀書，遂奪耕田之樂；有時爲養，不供啜菽之權。猛思萬物之皆塵，彌覺一科之不補。汗漫卓蹕，欲尋墜緒之茫茫；勃窣嬾跚，尚踵常途之役役。雖大慙必謂大好，然小材不離小官。安得自高，聊復爾耳；能令公喜，定未必然。行奉湘水之芙蓉，誰托江梅之桃李。今作禁門鍵，要須百年幾見之人；君如雙井茶，真副衆口一償之願。顧持著述，猥舉妄庸。經學無游、夏之源，修明安在；文詞乏屈、宋之艷，秀發謂何！然經品題，敢自暴棄？孰云畫餅，初無益於饑腸；如入太倉，亦莫不有飽意。伏遇某官斗牛間氣，奎壁清躔。筆裁霧而縫雲，不作人間煙火之語；身馭風而騎氣，直依天上日月之光。倦持上雍之囊，出草諭巴之檄。雪山

增重，天府益腴。斯人乃德星，頓釋冕旒之西顧；用汝作霖雨，共觀袞繡之東歸。諒勸相於國家，先旁招於俊乂。兼收馬淳，曲抱鶴翎。仰盛德之安窮，望夫人兮已遠。主簿乃有分職，縱欲福以難功；侍郎非通神明，曷不祈而得施？某敢不謹佩恩意，自鞭古心？諸侯薦人，與之諸侯，寧有是事；國士遇我，報以國士，請誦斯言。《梅亭先生四六標準》卷四。

### 代趙撫屬汝楫謝衛參帥啓

百舍治任，已問征夫之前路；十科取士，又勞播物之大鈞。頂踵知恩，肺肝懷感。切以賓筵有秩，古歌衛武之功；藩翰多賢，舊說湖南之客。今已時移而事異，誰堪德舉以言揚。況如日夕之牛羊，會且歸矣；相彼月明之烏鵲，愛莫助之。又勤科薦之榮，允謂陶成之厚。伏念某一寒無挾，百拙有餘。偶躡末科，非有宗英之禮樂；來依大府，適逢元帥之詩書。假以三能之光，借以九鼎之重。從骨而肉，如翼斯飛。肅肅宵征，久馳心於魏闕；遲遲晝出，終戀德於膺門。果蒙吹噓，薦以科目。取其材術，固無師友之淵源；旌以勤勞，是亦塵埃之職分。政事之可觀安在，館閣之稱選謂何。強名器采之詳華，浪應文章之典麗。前言戲耳，不待智者而後知；小子識之，敢不假茲而自勵！伏遇某官清廟一柱，泰階六符。虛己受人，不厭《蒙》再三之瀆；承天載物，真得《坤》六二之方。暫爲召畢之保釐，聊續荆潭之唱和。牛溲馬渤，隨所用以兼收；蟲臂鼠肝，不以微而見棄。故令庸下，亦在數

中。某敢不增所未能，求爲可貴？著作前輩之餘事，不足酬知；節誼天下之大閑，持此誓報。《梅亭先生四六標準》卷四。

### 代回舒尉謝科目啓

從臣十科之薦，一歲三人；牧夫庶獄之難，千變萬狀。茲以盡公而舉，又何私謝之爲！恭惟某官遠抱甚都，賢勞已久。居然前跋而後寔，誰其右挈以左提。今歸幕下之羅，定脫囊中之穎。比來科選，擬用名聞。深疑詐木鶴之仙，豈復尋蕉鹿之夢？然此本畫地之餅，何以假爲；果能受去聖之斤，徑當削入。不然時夜之早計，無乃明月而暗投。某疾讀來函，病頓去枕。家君作宰，好吟孤鶩之齊飛；客食加餐，持報雙魚之遠遺。《梅亭先生四六標準》卷四。

### 謝中書舍人曾從龍啓

五芒色正，夙瞻柱史之躔；一刺字漫，始見舍人之樣。仰高山而景行，感流水之知音。由其願一識之未償，是以身十返而不悔。切惟去民就吏，牛堪未始謝於門；負業歸家，齊皞亦不非其上。惟是筆硯荒涼之業，實受鑪錘特達之知。說《戰場文》，人還迷於五色；讀《刑賞論》，公放出於一頭。若

揆門生坐主之常，當辨國士衆人之報。伏念某學未至古，年不後人。少也好脩，強記輒數千字；長而無述，覓舉凡二十年。雖有道則耻賤貧，亦無心於圖富貴。可堪親老，又着儒冠而忍羞；寧試有司，不願君門之徑入。冒陳三策，略吐寸衷。自知明主可爲忠言，特恐貴人不喜生語。頭顱自揣，口吻益悲。卒猛吐其狂愚，竟僂說於得失。不謂暗中之摸索，遂蒙送上之吹噓。既有「詞意皆精妙」之褒，復加「筆力可敬服」之語。喘竹筒於儕輩，增紙價於京朝。人亦有言，衣鉢恐成於故事；我則無勇，鼓旗空噪於後塵。既經品題，敢自暴棄！遺餘不補，十年任韓子之窮；名節苟全，一第真魯山之溷。身未可許人也，猶欲與後死之斯文；子亦來見我乎，政恐事先生之有罪。伏遇某官求士爲國，事君以人。言動必書，今立二螭頭而和墨汁；榮進素定，寧止四龍首之至黃扉！切聞滿籠之參芝，豈少一株之桃李？然勸相國家之業，自旁招俊父而基。公求士甚士之求公，會須連茹；子絕長非長者絕子，自合負荆。某一莊未荒，萬間是芘。向來瓣香之敬，真爲南豐；此去翹材之延，願觀東閣。《梅亭先生四六標準》卷四。又見《啓雋類函》卷五〇，《宋四六選》卷一八。

### 謝宗縣尉炳啓

薦書下士，徼君子之異知；奏記中涓，缺門生之庸敬。抑馬周實淹於逆旅，非牛堪敢傲於有司。末之負荆，遐不削櫝。恭惟某官眼高四海，筆落九天。繙十二經，尤有取太平之典；對三千字，謂當

冠秀士之羣。馬小殿於及門，鰲固安於戴石。孜孜甘旨，屈爲孟東野之官；懇懇忠精，方抱梅南昌之節。淒其風木，越在塊苫。諒朝祥之琴成聲，則暮召之蓋相望。某頃偕鄉計，嘗累公知。由庶士而登司徒，不知恩者非人也；去民畝而就吏祿，豈進謝則爲私乎！顧迷京洛之塵，實隔蓬萊之水。故者無失爲故，乃不知儼然衰經之中；誅之不可勝誅，自當即麾之門牆之外。顧勤一介，先枉雙魚。既倒植之可慙，復暗投而失報。青衫短笏，漸從矮屋以著身；紫磨真金，尚負洪鑪之定價。然已長伯樂之厩，敢逐荒陸氏之莊！某無以報恩，期於強學。其行己若有愧於道，何以文爲；雖無報而不辱其門，請從今始。《梅亭先生四六標準》卷四。又見《啓雋類函》卷五〇。

# 全宋文卷七二六九

李 劉五

帥到任謝任參政啓 代鄒給事

輿轎隄嶺，方營三徑之謀；鼓枻浮湘，又玷十連之寄。在相國知之至矣，殆鄉人善者好之。昉泣事之云初，豈修辭其敢後。恭惟某官人今而心古，氣勁而貌和。學問淵源，得尊主庇民之道；緒餘土苴，爲開物成務之才。自翊輔於天樞，迄規恢於土宇。晉參大政，益播壯猷。天將降任是人，庸釋高、文之宿憤；予惟克邁乃訓，共觀周、召之同心。某分闡罔功，歸田已幸，敢意躋班於延閣，更令承惠於价藩！惟是清淑扶輿之區，尚多愁恨嘆息之俗，鼠窮已甚，蚊負奚堪！必先達之士爲之前焉，既感裏言之賜；有刺史之榮無其難者，尚祈終惠之私。《梅亭先生四六標準》卷五。

## 帥到任謝鄭參政啓

代鄒給事

籲天還印，甫辭五嶺之炎；易地剖符，遽得三湘之勝。將母固諧於安便，拊躬但愧於叨逾。冒再僂而弗俞，知一陶之有自。恭惟某官才弘而毅，器博以周。駿假無言，贊一日萬機之運；柔嘉維則，聳六服羣辟之瞻。人固料代何之用參，上亦知安劉之必勃。兩地碧雲之暫駐，既厚仔肩；九天黃道之安行，亟膺顙面。某守藩弗績，席蔭終更。所願歸田，徑返林鳥之哺；敢期易鎮，竟爲檣燕之留。惟一重一掩，號淳古之江山；而《九辨》《九歌》，餘芬香之草木。豈小材之能任，由大造之曲成。謂國小不足回旋，此豈爲我輩而設；使政平而無愁嘆，庶不爲門下之羞。《梅亭先生四六標準》卷五。又見

《永樂大典》卷一八四〇三，《啓雋類函》卷二八。

## 太守到任謝丞相啓

權武岡軍

竊以邊郡負丞，愧何功於涉筆；中朝改牧，命以次而設麾。雖時暫以從權，亦日虞於非據。重感大造陶鎔之賜，敢廢小吏竿牘之恭！伏念某全抱迂疏，倍勤拉拭。廣文轅軻，既保全茅屋之歸；半刺翱翔，又減縮葵丘之代。無蟹易嫌於監郡，不龜敢望於封侯！方圖下考之書，恪布中涓之謝。日君乏

使，故侯攬轡以疾驅；夜枕不安，新尹懷章而未上。勤廟堂之軫念，慮獄市之擾姦。姑令副貳之車，且護方寸之印。鶉兮胡瞻於不獵，馬也詎可以守閭。正使五日京兆之間，亦有千里宅生之寄。科瑣邊吏，非蒙真漢相之知；申畫郊圻，安得假齊王之命！茲者伏遇某官得聖之任，爲帝者師。萬億年敬天之休，豈止書郭中令之考；五百歲名世者出，蓋欲傳孟軻氏之宗。更新紹定之初元，遴選神爵之良吏。謂友邦必立之亞旅，正欲充虛；幸督郵未逐於聾丞，不妨借聽。雖小人乘器，終於必奪；然大鈞播物，允矣無垠。某敢不三思而行，一日必葺？雖慙尸祝，越尊俎而代庖人之勞；當籍吏民，封府庫以待將軍之至。《梅亭先生四六標準》卷五。又見《翰苑新書》續集卷三二，《永樂大典》卷一八四〇三。

### 榮州到任謝丞相啓

佐黔巫之東鄙，甘半刺之翱翔。守巴夔之南榮，累一陶之坯冶。幕府十年之未久，角巾兩火之可逃。間關半期，辛苦萬狀。甫茲領事，率爾裁牋。伏念某才不瘡人，學徒泥古。招諸生於館下，幾毀于隨；處別駕之治中，無材可展。姑俟及瓜之代，式遄行李之歸。敢圖分銅獸之符，猥使展石龜之郡。惟和義之僻壤，實光廟之潛藩。升軍開府，獨未沾恩；視邦選侯，率多就近。蓋民田歲租止五千石，而公使年計僅六百緡。財匪鬼輸，全仰作鹹之潤；郡資井養，詎堪竭澤之漁！比緣花破於皂胥，今遂草薶而赤立。欲俾尋常之外，頓增十萬之輸。數罟入池，寧保四郊之無擾；强弩射市，但嗟薄命

之先穿。上下交征，公私可痛。弗獲於上，不可治矣；欲加之罪，其無辭乎！恭惟某官師保萬民，弼亮四世。天欲吾君，繼壽皇之聖；帝賚我公，紹忠定之勳。禹以功，皋以謨，適全絕德；絳之果，霍之勇，抑又餘收。不惟垂紳正笏而措泰山之安，且復守志厲操而抗浮雲之節。勤勞二紀，無寸晷之敢休；懇避三公，至累年而不受。戒謹恐懼之如此，熾昌耆艾以固然。周公仰而思之，不迷勤教；伊尹聖之任也，尤務旁招。肆令愚儒，來效凋郡。尚念某進退維谷，兢戰履冰。思庶民所以安，恐有負十行之賜；得一事可自罷，庶幾免百謫之盈。輒修謝上之緘，併控由中之悃（二）。《梅亭先生四六標準》卷五。又見《翰苑新書》續集卷三二，《永樂大典》卷一八四〇三，《八代四六全書》卷一一。

〔二〕由：原作「申」，據四庫本改。

## 太守謝史丞相啓

眉州到任

伏以乘榮隱之障，方幸終更；分通義之符，濫叨詳試。適值寶賢而觀國，又令主試於坤文。既徹棘圍，遂趨瓜戍。伏念某賦資蹇淺，觸事坎艱。學術荒卑，弗知深造之以道；技能謏薄，又非適用之謂才。出幕十年，一登文石；奉祠三載，半刺武岡。曾未滿秩之間，倏奉專城之寵。跨犍犂之微，命與仇謀；求牛羊之芻，心勞政拙。得以理去，不自意全。丙穴維舟，徑欲歸耕於谷口；庚書傳置，顧

令改牧於峨眉。惟是四蜀之封疆，重在三蘇之鄉國。然好文而慕權勢，至今餘西漢之風；其事守如古君臣，近世異北塘之記。比緣兵潰，轉覺民流。厥既獻賢能之書，甫及理愁恨之嘆。伋去誰守，猶幸滴博之雲收；超願乞歸，孰念玉關之人老。茲蓋伏遇某官箕裘輔弼，社角君臣，精神峻喬嶽之瞻，談笑回狂瀾之倒。大鈞播物，實細別於九流；直柄當權，亦曲成於萬物。有念一寒之蹇剥，已成十暑之睽離。更以一麾，試之再鼓。某敢不謹固封守，宣布中和？前江陵後弘農，詎能及劉昆之政；治南陽如上蔡，仰在中召父之規。感悚惟深，敷陳罔既。《梅亭先生四六標準》卷五。

### 榮州到任謝桂制置啓

假守三榮，叨塵統部。牽江萬里，既見吏民。比嘗奏記以徹名，復敢修辭而謝上。惟和義之斗絕，實夜郎之奎隈。事簡地偏，舊稱道院；吏貪俗悍，今類法場。蓋一歲止五千石之經租，而諸司近八十萬之折估。郡資井養，財匪鬼輸。屬因權攝之多，馴至綱維之敗。壯哉雀鼠，公肆侵牟；翩彼鴟鵂，交騰喧噪。致連帥括三井之羨，爲屬縣代兩稅之輸。上關閭制之聽聞，下籍吏胥之專擅。去其螟螣，始云歛此以錫民；信及豚魚，今則改之而備塞。莫非王事，均是邦財。黔其廬，赭其垣，正足爲參元之喜；馬若羊，金若粟，初何與張奐之家。不才之某，嘗仕於蜀，亦知風寒之數處，何止日費於千金。與其捐潤下之鹹，徒滋它族；孰若助攻苦之淡，以張吾軍。然一郡四邑之間，有百孔千瘡之

費。得斗勺之水斯活矣，庶逃涸轍之枯；無尺寸之膚不愛焉，實恐剝牀之及。恭惟某官弘深而肅括，簡要而清通。後勁中權，文武作萬邦之憲；外鎮內附，精神折千里之衝。定不奪牛於蹊田，但欲捕蝗之害稼。有憐薄命，值雷轟薦福之碑；或辱寬征，使乳復零陵之穴。乞從舊額，以惠疲甿。某敢不祇適寬條，布宣隆指？修慘怛忠利之實，銷愁恨嘆息之聲。可以言未可以言歟，亦恃有仁人之在上；哀之命不哀之命也，更惟恕躁者之多辭。歸倚惟深，敷宣罔既。《梅亭先生四六標準》卷五。又見《永樂大典》卷一八四〇三。

### 通判到任謝參政啓

宣、薛

滿神園之祠，廩無繼粟；贊夫夷之長，戍偶及瓜。題輿佐岳以安能，伐輻實河之有愧。輒裁小牘，少謝大鈞。伏念某全抱迂疏，平沉庸俗。徒有黽俛六九年之歎，尚何扶搖三萬里之圖。頃由掌故之官，猥分齒胄之教。大風有隧，俄然電掃以雷驅；古井無波，幸爾水清而石見。特畀治中之任，俾從方外之游。維時都梁之區，乃昔槃瓠之境。歲租仰於永、邵，峒窟接於辰、沅。元和遣兵，惡其置魁而立伍；崇寧升郡，猶未建牧而立參。蓋一歲止萬石之租，而四郊無百金之子。然而事簡，鴈鷺之左右亦稀；況已食浮，螃蟹之有無何計。儻水火不交於百姓，則風月亦足以平分。此蓋伏遇某官弼亮天功，平章人品。謂柳子而在臺省，未必如司馬之可傳；使趙溫而果丈夫，又何患郡丞之能伏。況黔

東嘯呼之已靖，有湖南清絕之可親。使自謀之，何以過此！某敢不謹脩厥職，勉既厥心？思曹王蹕騎之功，無羞宗派；哦杜老化鯢之句，更問詞源。《梅亭先生四六標準》卷五。又見《永樂大典》卷一八四〇三。

### 通判到任謝葛簽樞啓

誨館下之諸生，夙蒙采菲；補黔中之上佐〔二〕，茲遂及瓜。揣弱念以易盈，撫窮途而致感。伏念某學不聞道，才無瘡人。負米爲親，飽固悲於弗泊；析薪無子，賤亦覺其有涯。顧平生竊祿以代耕，乃三歲賣文而求活。頃申以柳易播之請，遂忘得隴望蜀之嫌。愧在其肝，悵莫追於駟馬；言提其耳，甘束味於孤雄。既待牧羝，詎容展驥。茲出回天之力，竟諧縮地之謀。鮑叔不以我爲貪，傷哉資也；伊尹耻匹夫不獲，真若推之。公豈謂長史之有材，僕固感國士之遇我。茲蓋伏遇某官爽邦良弼，輔世真儒。欲立立人，所學實資於孔、孟；匪求求我，此心脗合於義、文。然韓魏公自恨用明允之太遲，而歐陽子亦愧知聖俞而不薦。雖昔何如今，今何如昔；願公之求士，甚士之求公。庶皆有突兀大夏之驩，斯不但屬饜小人之腹。某敢不俯安雌伏，仰任鳶飛？文儒申申，詎能繼巫幡之公綽；武岡矯矯，尚及見江左之夷吾。《梅亭先生四六標準》卷五。又見《永樂大典》卷一八四〇三，《啓雋類函》卷五五，《八代四六全書》卷一一。

〔二〕上：原作「止」，據四庫本改。

### 通判到任謝臺諫啓

李、趙、留、梁、汪

別洛下之諸生，久歸來於茅屋；補黔中之上佐，偶及代於葵丘。既滌籀以服勤，盍濡毫而貢謝。伏念某地寒寡挾，天巧素慳。鹵莽而耕，鹵莽而耘，已慙學落；鼓噪以入，鼓噪以出，更愧名浮。頃從文學掌故之聯，蠟綴國子先生之後。經筵之嘲未發，謗篋之惡已盈。鄉人不善者惡之，成是貝錦；相國之賜也大矣，止於甌臠。荏苒三年，僥倖貳郡。軫之旁，鶉之尾，不惟非螃蟹之宮；丹之穴，犀之顛，近又築鯨鯢之觀。然以非材之典午，固在協恭而同寅。水火弗與百姓交，寧須餞別；風月不用一錢買，何必平分。茲蓋伏遇某官道格君心，識通治體。進務閑邪而陳善，退思激濁以揚清。天豁露繁，南嶽要聞於鳴鳳；冰清霜潔，北臺自肅於棲烏。姑試治中，且游方外。某敢不修其可願，勉爾遁思？聾且何傷，正欲不聞於黜陟；噤不得用，又當且止於吟哦。《梅亭先生四六標準》卷五。又見《啓雋類函》卷八〇，《八代四六全書》卷一一。

### 除兩浙運幹謝趙尚書汝述啓

舐淮南之丹，久辱青冥之送；涸江西之轍，仍爲綠水之依。非公實與之主張，此事亦幾於濩落。既祇賤役，盍控謝牋。恭惟某官北海脩身，東平樂善。禮樂三雍之對，卓爾不羣；文章萬丈之光，飄然無敵。密勿星辰之履，彌縫天地之爐。當江濤如此之時，思烝徒楫之計。汲引不遺於片善，繫維長恐其遐心。潤物之澤無聲，既優既渥；推轂之言有味，不進不休。斷度收羅，欲細栴大宋之各得；又負偃植，將震風凌雨而後知。能令此意之常存，豈獨于今之受賜。如某無用，所向多艱，未能茹商嶺之芝，還復索長安之米。誰其知者，公獨惻然。本欲化鯢以爲鵬，不料喝盧而成雉。然感恩固在於知己，則受德豈待於成身。但令古路之未荒，敢恨吾廬之獨破！愈幸甚三爲屬吏矣，相國知之；起在此勤至他人乎，執事責也。《梅亭先生四六標準》卷五。

### 代石僉判孝理到任謝丞相啓

絃歌學道，偶得代於瓜期；造化爲工，俾充員於蓮幕。待闕之日既淺，陪京之地甚雄。偏親有就養之驩，數口無啼饑之苦。孰主張是，遂濟登茲。命出大鈞鑪錘之功，敢廢小夫竿牘之敬？伏念某粗

勤家學，尚缺世科，揆材僅可以粗供，涉世敢萌於厚望！惟宵人之乃祖乃父，與先生則非故非親。辱收夾袋之姓名，力加論薦；凡今懷綳之簪笏，實出挈提。家世受知己四十年，兄弟感恩非一二數。茲偶償百里之債，亦欲干半刺之除。然而母老家貧，難需久次；矧是望輕資淺，當避勝流。適聞僉椽之虛，輒致緘詞之請。亟蒙中入，非有裏言。尋承繼粟繼肉之頒，又沐載笑載色之遇。由衷所請，如響之從。人或謂分寸之躋攀，何其廉也；自不翅三百之距踴，惟恐失之。捧檄而歸，倚門亦喜。伏遇某官相邦哲輔，經國元勳。喬木有臣，既世襲格天之業；泰山若厲，將代膺裂地之封。惟元老克壯其猷，故人兵不戰而屈。寧王遺寶，復還受命之符；匈奴奉珍，行納稱藩之款。諒深綢繆牖戶之計，不廢收蓄構櫨之材。有如龍蟠虎踞之邦，豈但魚泳鳥飛之樂，因其粗更於民事，使之往贊於藩條。某敢不滌濯其心，靖共爾位？石生羅致於幕下，已叨從欲之仁；越王胎養於國中，終冀亢身之賜。《梅亭先生四六標準》卷五。又見《永樂大典》卷一八四〇三。

### 幕官到任謝丞相啓

掃曹相之門，慙非齊俊；趨嚴公之幕，已次蜀都。仰銜坯冶之陶，退整韋弦之佩。輒干涓史，肅布謝牋。伏念某麻薄無堪，嶽崎可笑。弱於材，腐於力，絕知天巧之慳；加其膏，希其光，又覺己功之淺。徒緣稽古之力，未忘及物之心。然既更憂患之嘗，亦漸失賤貧之耻。漢庭諸老，誤欲招之使

來；魯國一男，何所恃而敢傲！豈謂沒階之進，游勤吐哺之勞。誨之以先正之規模，未嘗忘虜；勉之以中權之謨畫，莫若審機。趣令沐浴以宵行，不容濡滯於晝出。南浮江漢，既聞克敵之聲；西望岷峨，僅獻養威之策。只今疆場，粗立藩籬。要恃吾有以待之，則雖來無能爲也。維是受禕、允之任，居然乏羣、博之材。大鈞塊圯以無垠，寧忍匹夫之求備；小枝卷曲而不中，徒勞巧匠之旁觀。每念食浮，倍成顏厚。此蓋伏遇某官直方而大，智勇且仁。王曰惟爾君陳，率由舊典；時則有若伊陟，克對保衡。積十年調鼎之功，成四海覆盂之勢。豈謂魚潰之虜，尚爲鼠竊之謀。未煩十乘之啓行，已使隻輪之不返。破竹數刃之後，當無留難；取果旬日之間，不妨持重。願徇金城之略，勿貪石堡之功。周公方且膺之，勝於天定；昆夷維其喙矣，必以地降。如某者戰野非長，銘山猶勇。觀我奇士，極知東閣之多賢；裕乃父功，只頌西平之有子。《梅亭先生四六標準》卷五。又見《啓雋類函》卷二七。

### 代回鄒泉州應龍到任啓

執草東臺，憩棠南國。言求諸道，駁正之氣凜然；惠歛一州，牧御之材裕矣。恭惟某官弘深而肅括，明允而篤誠。魁下三台，付榮進於素定；胸中五色，肯噤默以求容！名滿四海而守之以謙，忠結兩宮而退然不恃。露門晚講，緝熙日月之光明；天禁夕趨，鼓舞風雷之號令。甚念含飴之樂（二），力抗陳情之章。萬牛挽之首不回，六鰲去而山爲重。前驅畫戟，出鎮清源。海道無虞，雖京師蒙九里之

潤；天子有詔，則刺史乃三公之儲。某夙托同寮，尤深贊慶。燭之武老矣，無能爲矣，一力謀歸；仲山甫舉之，愛莫助之，萬祈自重。《梅亭先生四六標準》卷五。

〔二〕甚：原缺，據四庫本補。

## 代回史吉州定之到任啓

選侯相閱，作牧价藩。除目初傳，道路知其辨治；建牙伊始，氣色益以精明。恭惟某官材應時須，美由世濟。疏廣與受，早承給侍之恩；謝安有玄，當是後來之慶。有華分竹，俶載戍瓜。幹白粲之連檣，驅紅旗而破賊。帶牛佩犢，漫游魑魅之魂；鋒蝟斧螳，佇築鯢鯨之觀。印金斗大，詔璽星馳。某快睹未先，賀成已後。烹魚拜貺，良深藏弃之榮；插羽奏功，預卜遄歸之慶。《梅亭先生四六標準》卷五。

## 代回張建昌嵩到任啓

入覲本朝，出藩支郡。朱幡皂蓋，分竹使之半符；碧澗紅泉，壯麻源之三谷。雙旌戾止，五袴煖

然。恭惟某官濟美篤誠，受材膚敏。神俊一鳴之表，萬馬皆瘖；躊躇四顧之間，全牛自解。需章交上，渙渥留中。忽願奏於民庸，遽勇收於朝蹟。江湄閩徼，盱爲佳麗之邦；顏記謝詩，公有按行之便。無嫌斗絕〔一〕，會即升遷。某漸欲投簪，歸聽擊柝。有山房三萬軸之私積，託在部封；願刺史二千石之公餘，賜之覆護。《梅亭先生四六標準》卷五。

〔一〕斗：原作「十」，據四庫本改。

### 代回楊贛州長孺到任啓

坐分龜組，卧護虎城。世選爾勞，上固望象賢之嫩；皇揆余度，公肯孤熊夢之邦！建牙有初，交口相慶。恭惟某官麋珠果腹，珮璐潤身。素所自期，豈止二中而四下；見於歷試，真覺一洗而萬空。甫畢素冠，聿來朱紱。即家以拜，得郡也榮。清水在壺，決不作繭絲之計；丹砂點鐵，復何憂薤本之強。若作霖雨則無咨怨之民，如臨父母則有慘怛之愛。惠而好我，更以贈君。願觀清白之子孫，大慰華顛之父老。崆峒日麗，姑暫歌桂子之香；閭闔天開，即歸報麥岐之熟。某罔功分閫，有幸卜鄰。屬州之得陽公，同業也，同道也；便道而至滕閣，爲記之，爲賦之。《梅亭先生四六標準》卷五。

# 太守解任謝丞相啓

權武岡軍

補上佐以罔功，叨書下考；攝邊城而非據，又遂合符。虔控謝於大鈞，併修辭於小櫝。伏念某至愚不肖，多病早衰。壯不如人，紛兩髦之已雪；老而無子，寒百念以成冰。徒依突兀之萬間，尚獲翱翔於半刺。夜聽統如之五鼓，頗似官蛙；曉聞欸乃之一聲，便如野鹿。偶挈瓶之缺守，暫越俎以代庖。敢言田里便無於歎愁，似覺蠻貊可行其忠信。淺有蒲蓮，深有葭葦；小不虺蜥，大不鯨鯢。胡瞻爾庭，人固疑其鶉突；此非子坐，自亦愧於象環。幸新尹之鼎來，許陳人之退屏。竹齋藥竈，尚堪清風明月之分；桂棹蘭舟，已夢秋水長天之共。滿秩雖無於多日，庇身尚假於一雲。恭惟某官直大以方，清和而任。天以寧皇同符於孝廟，帝賚我公濟美於越王。繼今文子文孫，宜用汝而作霖雨；乃立太師太傅，真於我而如浮雲。竟回渙汗之揚，可見謙撝之確。邴侯病瘡，合從陰德以受封；富公年高，固有本朝之故事。諒益耻匹夫之不獲，必思遂萬物以攸宜。尚念某何足控搏，不堪位置。鷄壅也，豕苓也，亦嘗累藥籠之收；鼠肝乎，蟲臂乎，斯固在化鑪之運。其爲頌僊，罔既編摩。《梅亭先生

四六標準》卷五。又見《翰苑新書》續集卷三二。

### 代林提管岳謝五府啓

抱管榷之文書，真成爲米；守踐更之歲月，有幸及瓜。帡幪曲免於震凌，川藪密藏其汙疾。孰主張是，遂濟登茲。良勞大造之鈞陶，敢廢小夫之竿牘？某箕裘有緒，筆硯不靈。勃窣盤跚，僅脫身於選弃；欹崎歷落，姑策足於縣灘。盍求泥軼之榮，却落銅官之冗。聚鐵成錯，未能羨泉府之泉；鋪糟獨醒，豈善會酒人之酒。冒依行缺，聊復坐曹。二親高年，一則以喜而一則以懼；三釜微祿，時乎爲養而時乎爲貧。誰爲元帥之謀，載復步兵之餽。歲縻月費，不共桂玉之爨炊；冬煖年登，未辦布荆之包裹。有懷覲省，屢願汰歸。日食太倉之陳，亦皆帝力；人言長安之樂，豈爲我曹！不自意全，遂得善罷。伏遇某官彌綸天緯，涵養人材。根闌店楔各得宜，與其進也；風雨霜露無非教，栽者培之。福遂及於容容，考亦書於下下。某自非木石，亦有肺腸。烏獲力足爲，氣足施，維其時矣；伯樂過不睨，遇不顧，亦有命焉。《梅亭先生四六標準》卷五。又見《永樂大典》卷一八四〇三，《八代四六全書》卷一一。

# 全宋文卷七二七〇

李 劉 六

## 代董侍郎居誼回聶制置子述啓

聯鑣北闕，不得同父母之邦；分閩西垂，茲又託子孫之契。頓足欲舞，盥手修辭。恭惟某官節凜松筠，識高著蔡。有謀猷則順于外，孰窺省闈之功；非仁義不陳於前，親結冕旒之眷。茲峻登瀛之步，載馳諭蜀之車。騎火照山紅，奏功伊邇〔一〕；雪嶺界天白，借重方深。佇展壯猷，進膺顯冊。某久於蚊負，甚矣鼠窮。糠粃在前，安得有告新之政；山藪藏疾，尚或希議故之恩。《梅亭先生四六標準》卷六。又見《翰苑新書》續集卷三三。

〔一〕伊：原作「易」，據四庫本改。

### 通項運使寅孫啓

星臨玉壘，冰解金城。王人之上諸侯，宜復次地官之屬；使臣之拜五善，乃肯來天府之雄。江漢頓清，岷峨增重。恭惟某官忠爲國許，學富家傳。聖門服七歲之師，兵法擅萬人之敵。矧在鯉趨之日，已聞禽拜之風。筆鋒萬馬之交奔，才刃千牛之立解。廉而不劌，出幕府之十年；直哉惟清，典容臺之三禮。出登郡最，入庀郎闈。旋爲一節之趨，盡司六路之餉。生財有道，立武足兵。爰趣覲於嚴宸，謂亟登於禁甬。師旅因之饑饉，天顧在西；禮樂遠而光華，水焉得北。爰進木天之直，重尋蓬雪之游。歷井捫參，昔既依蓮於綠水；張箕舒翼，今將轉粟於青天。寧須漕輶之淹，即報賦輿之總。月升金掌，天近玉京。某一介無它，八年于外。何幸故人之至，可容老我之歸。糠粃揚前，愧無補庚癸之諾；樵蘇爨後，知可飽戊己之營。願及戍瓜，亟戒行李。遣信使諭蜀道，已騰父老之驩；與將軍皆楚人，亦有子孫之託。其爲欣幸，罔既編摩。《梅亭先生四六標準》卷六。

### 通眉州趙開國希濬啓

魯、衛弟兄之政，班固後於先茅；召杜父母之歌，揚更慙於前粃。肅迎千騎，敬遣雙魚。恭惟某

官卓爾不羣，飄然無敵。更生寶苑，蘊金淵玉海之奇；長吉錦囊，挾陣馬風檣之逸。三峽洊依於綠水，連鑣決勝於赤雲。寰內五等之侯，洊揚已徧；腰間六國之印，滌濯方新。今得蟆頤，大似雞肋。然四蜀衣冠之郡，宜煩禮樂之英；在三蘇翰墨之場，合著文章之守。尚念黎侯之晚賦，無爲叔度之暮來。千里之駒，原隰每懷於靡及；九罭之鱗，朝廷何患其不知。某夙託門朋，連依鄰蔭，豈料託子孫之契，又將合郡國之符。綈袍戀戀，願見故人；步履村村，久誇新尹。恐鞭其後，俾營斜谷之木牛；幸疾其驅，式慰并州之竹馬。其爲忻幸，罔既敷宣。《梅亭先生四六標準》卷六。又見《啓雋類函》卷九七，《宋四六選》卷二一。

### 通徐架閣天麟啓

隨冠蓋於京華，昔焉託契；主文書於几閣，今乃爲寮。偶因越尊俎而代庖人之勞，又可封府庫以待將軍之至。不容禮緩，敢用書先。恭惟某官南州高士之家，西園先生之子。通介寧隨世俗，不煩孟德之疑；名位豈肯卑微，真符釋氏之送。蔚然三館之望，已在八年之前。誰令甲科，亦補文學之掌故；聊復庚約，即是翰林之主人。某偶獲交龜，真成附驥。合而離，離而合，詎知有聯事之期；同自異，異自同，又當廣結交之句。《梅亭先生四六標準》卷六。

## 通魏府判鉅啓

李膺非昔，自應陪澤畔之大夫；魏相有孫，顧亦補黔中之上佐。將託交龜之契，盍修致鯉之恭。恭惟某官家本黃扉，心如白屋。風烈挺挺，稱故國之世臣；領袖堂堂，成外家之宅相。聞塤箎之伯仲，皆規矩於高曾。白眉最良，黑頭必貴。顧屈閭閻風之步，來監巫水之州。此地之峻嶺崇岡，昔罕羣賢之至；同坐之清風明月，近方別駕之添。公胡爲乎來哉，民何修而得此。但恐傍觚稜之月，難久淹緹屏之星。不俟突黔，即迎泥紫。某一寒竊祿，再暑負丞。北山久笑於驚猿，南岳忻迎於鳴鳳。半載之期非遠，尺書之貢敢稽？願察來何暮之謠，及瓜而代；庶幾推不去之令，接浙而行。《梅亭先生四六

標準》卷六。

## 通武岡權通判譚知錄良弼啓

湘濱試吏，綴寮案於元昆；黔鄙轉丞，附交承於貴介。既共飲玻璃之水，又並馳琬琰之山。託契良多，修辭敢後？恭惟某官魯沂華胄，虞學高流。所謂傑然，摘領不難於取第；式相好矣，因心尤篤於友兄。屈從樾蔭之清，良見棣華之厚。茲借糾曹之望，式隆監郡之權。行矣章交，亟其圭覲。某里

閭晚出，閤閱早凋。昨倚席之不才，投閑乃分；茲題輿之有命，佐治何能。所幸規矩之陳前，可容瓦石之在後。友一鄉之善，舊正賴於告新；歌別駕之功，今敢希於勝昔！《梅亭先生四六標準》卷六。

### 通李制機元龍啓

望太白於岷峨，知登上佐；辭石洪之漣穀，來託底寮。漫期飛逐於溟鴻，敢耻棄餘之竹馬。斐裁手畢，敬控心期。恭惟某官飛譽隱絃，揆材良實。大科異等，一翁二季之相望；鉅典雄編，三史六經之可亞。君陳父祖，固存世績；越公兒郎，信有家風。滿腹精神，燭照數計而龜卜；撐腸文字，日光玉潔而蛟翔。若爲碧落之功名，淹此青油之談笑。辟書薦墨，一飛皆可以冲天；檄筆幕謀，三進顧遲於及雷。諒惟中幄，正借前籌。斟酌損益，必盡忠言；治法征謀，抑有主出。竊聞機筦，徑即州麾。君薄淮陽耶，寧更迂朱幡之駕；誰踰仲卿者，會即趨丹掖之班。某無挾而窮，不殖以落。上青天而仰脅，頃逢三峽之倒流；瞻白日於舉頭，還望九門而却走。偶文翁剖符之再駐，許于思棄甲而復來。舊政既幸於告新，大事又忻於從長。豈無他人，不如同姓，後先兩託於交承；既見君子，庶幾有臧，蚤夜一期於規誨。《梅亭先生四六標準》卷六。

### 通吳運幹彬啓

登畿入幕，濫同賓客之聯；授印合符，將託子孫之契。恐以我而爲簡，敢修辭而立誠。恭惟某官學業醇明，器資凝遠。長卿凌雲之氣，入室何難；興公擲地之聲，摩空有素。自來歸於韶石，謂徑上於瀛州，顧煩上界之官，更贊中都之漕。駕輕車就夷路，聊養脩名；入太學招諸生，請觀近比。某不堪索米，又復泛蓮。敢圖解后之間，適有交承之好。隴西李博與處者，所敬惟賢；河南吳公嘗學焉，自今以始。《梅亭先生四六標準》卷六。

### 通兩浙林運幹良顯啓

湖船一笑，夙傾解后之心；冰幕同僚，強附交承之契。望筍輿而來止，飭竿牘而斐然。恭惟某官秀出三山，譽騰四海。摩空作賦，能瘖萬馬之聲；發策決科，卓踞六鼇之首。采魯芹於泮水，燃楚竹於清湘。藉未爲國子之先生，亦合入文學之掌故。顧屈清廟之器，來贊皇華之光。飄氣凌雲，寧肯久依於綠水；舉頭見日，便應直上於青霄。某拆襪短材，濫巾末屬。偶然承乏，遂供越俎之勞；正爾失真，久抱佩環之愧。屬聞行李之問道，喜至捲書而欲狂。江漢以濯之，豈但慰懷賢之渴；草木吾味

也，庶幾安承教之私。《梅亭先生四六標準》卷六。

### 通潭州劉教授時可啓

祭孫寶之竈，既竭吾財；倚仲尼之墻，此非子坐。懷哉解去，賢者鼎來。是雖期會之偶然，強曰  
交承亦可也。恭惟某官學有源本，行無瑕疵。自題千佛之姓名，宜展三神之步武。居官能大，何嫌枳  
棘之棲；匪我求蒙，思樂藻芹之采。槃槃潭府，犖犖楚材。人非生知之，其必由學；教亦多術矣，先  
致其知。道本諸身，士速哉肖。舞雩沂水，共觀夫子之循循；發軔天津，即繼諸公之袞袞。某強顏越  
俎，矯首望塵。佩有若之環，此難久假；叱王尊之馭，所冀疾驅。《梅亭先生四六標準》卷六。又見《啓雋  
類函》卷一〇七。

### 通善化盧縣丞補之啓

請鄰祭竈，不知枳棘之棲；越俎代庖，定匪竹松之對。懷哉解去，賢者鼎來。請從臭味之同，試  
論踐更之代。恭惟某官胸蟠萬卷，學綜九流。人見千佛之名經，有垂涎者；渠知一第之溷子，真摘領  
然。惟其具大受之規模，故不辭小官於州縣。九年考績，再轉爲丞，亟辭禹穴之雲煙，來慰湘江之草

木。守經據古，寧肯破崖岸而爲文；騰實飛聲，會即登瀛洲而入直。某非據而據，時行則行。顛倒衣裳，公豈嫌於李下；簸揚糠粃，我真愧於盧前。幸叱馭而疾驅，即裹章而送上。子生孫，孫生子，且強負於交承；余負丞丞，負余，姑別容於商榷。《梅亭先生四六標準》卷六。又見《啓雋類函》卷一〇六。

### 代魏兵部了翁除編修檢討謝丞相啓

郎省真除，叨綴夏官之屬；史闡假寵，仍紬東觀之書。曾微共二之材，況冒兼三之寄。一陶厚甚，重拜悚然。竊以兵書之在史家，近分四種；文事之有武備，古號二塗。故長檜大劍雖有毛錐之嘲，而亂臣賊子難免麟筆之懼。欲兼美職，宜屬全材。如某者見謂迂疏，貌無操挾。少徒志科名之苟得，壯始知事業之無窮。頃因去蓬島之船，甘回泛瞿唐之棹。既徧塵於藩閫，亦洊駕於輶軒。州縣十七年，詎日期年之去國；水陸八千里，寧論千里而見王。敢圖三朝之會同，倏蒙一札之收召。義難俟駕，禮合造朝。甫入覲於朵雲，遄進班於列宿。載惟文昌之務，尤嚴武部之司。蓋五材民並用之，古無去兵之理；而多壘士之耻也，今當整旅之時。矧不崇朝之間，兼綴編年之職。昔揚雄經歲餘之待詔，僅試郎員；至韓愈願年老而著書，尚辭史事。蛙固難於語海，蚊詎可以負山！恭惟某官柱石九筵，權衡庶彙。合臯陶，合稷契，天知許國之心；若伊陟，若巫賢，人仰傳家之學。調十五載更絃之化，收七十城憑軾之功。雖當百志之惟熙，益思九德之咸事。必欲與天地以相似，不容委人物以眇

然。猥挈孤蹤，亦污高選。某敢不勉思厥職，惟既乃心？乏姚崇奏決之材，恐空塵於戎部；成魏收直筆之願，當圖勉於策書。《梅亭先生四六標準》卷七。又見《翰苑新書》續集卷三四，《啓雋類函》卷二七。

### 代鍾監丞震除秘書省著作佐郎謝丞相啓

涉筆膠庠，正覺丞哉之負；濫竽冊府，復叨儒者之榮。蛻凡骨於高明，聳危肝而感激。切以圖書之府，實通天上之星辰；英雋所躋，不受人間之風日。未能免俗，何自爲郎。左太冲之賦三都，始求此職；岑文本之奏二頌，乃稱是官。况黃道日月之明，值紫皇春秋之富。鏘韶鈞而蔚虎鳳，邁漢九流；充棟宇而汗馬牛，過唐四庫。職固鄰於書蠹，名亦近於郎烏，是爲清資，宜擢素望。伏念某楚狂一介，鄭重半生。世科不補於遺餘，家學僅安於淡泊。三仕甘廣文之冷，若將終焉；一朝拔從事之尤，聊復爾耳。敢意大鈞之播，真無鈍鑛之遺。因其就須入之章，華之以不次之擢。籍田之芟載柞，既沐三熏；博士之冗不治，更榮再轉。但欲乞治中而去，詎敢窺廣內之藏！蓬弱風波，敢望接三神之武；螯鹽朝暮，初無送五鬼之文。忽從米廩之間，驟綴蘭臺之屬。孰主張是，遂濟登茲。伏遇某官命世真儒，爽邦哲輔。載萬物以坤元之厚，飪百度於鼎寶之和。李贊皇五十四歲而相君，其年如父；王文正一十八載之當國，惟德之符。方宏翕受之規，益廣旁招之路。有憐冗散，亦玷超遷。某敢不讀未見之書，求多聞之友？總一百三家之略，益深稽古之功；撫五三載籍之遺，或上得賢之頌。《梅亭先生

四六標準》卷七。又見《翰苑新書》續集卷三四。

### 代江淮陳制幹韓除監丞謝丞相啓

烏幕充貲，方驟通於閨籍；雉工列屬，更躡造於朝紳。不三閱月之間，乃兩承天之寵。感恩踰分，拊己增慙。切惟國朝立法之至公，人材循序而後進。欲其脫選，必限以六考而舉以五貲；至若轉丞，非內之列院則外之諸郡。縱有特頒之殊渥，亦難盡越於常規。蓋須得百年幾見之人，乃可稱一歲九遷之命。詎容異數，猥及凡材。如某者稟質顓蒙，賦材迂滯。蚤記教忠之訓，未知造道之方。摘句分章，粗耻空談而無用；陳力就列，豈敢大言以爲欺。容貌不能以勝衣，智略何有於湊輻。適英主際中興之運，而遺黎懷內附之思，遂令白面之書生，往贊碧幢之元帥。雖戎政無能爲役，然君命寧敢辭難！齊人歸疆，正可閔離離之黍；周行多士，詎容伐坎坎之檀。敢圖稟議之來，游沐超遷之寵。甫離七階之選，遽參貳監之聯。家人蓋有嚴君，昔居是職；癡兒未了公事，乃世此官。既材能不及於中庸，又名實未孚於上下，挈提至此，稱塞謂何！恭惟某官命世宗工，爽邦碩輔。積十五年秉鈞之績，成七十城憑軾之功。謂明王立政惟人，當廣開於塗轍；而宰相代天理物，難純用於規繩。將收度外之材，用作邊隅之氣。必使蒙臯比以出，姑爲買馬首之謀。故略等夷，特加簡拔。某敢不仰銜恩意，退激懦衷？指心誓報於寵靈，臨事益思於忠力。得人朝廷，得人幕下，無愧石洪、溫造之流；遇我國

士，遇我衆人，明辨中行、智伯之報。《梅亭先生四六標準》卷七。又見《翰苑新書》續集卷三四。

### 除國子錄謝丞相啓

金耀庀司，愧乏主書之最；璧流選屬，叨升糾事之聯。非有清資而致然，夫何素望之及此！一陶厚甚，三省矍然。切以化民成俗由學乎，其來已古；授業傳道解惑也，必惟其賢。況風化之本原，尤國人之矜式。雖居小職，亦選鉅儒。在元祐間實用張橫渠之輩，至紹聖末亦取游建安之流。此豈庸虛，所能稱塞！伏念某稟姿苦窳，殖學疏蕪。小人可以小知，無廣大高明之見；大慙謂之大好，乃瑣碎俳偶之辭。矧至四五十之無聞，重感三千鍾之弗泊。兩鬢已雪，百念皆冰。敢意登畿，獲齒筦庫！陳人無用，苟安掌故之蹤；名士滿前，詎堪首善之職！忽蒙分席，莫遂循墻。有先達者爲之前，尚恐後生之可畏；占小善者必以錄，益知大播之無垠。伏遇某官柱石九筵，權衡百度。粉米山藻之色，別繪以袞章；鹽梅水火之味，殊飪之鼎實。雖當青衿刺學之後，不替緇衣好賢之心。有憐蠹魚之專，俾致螟蛉之祝。天位與共天職，是豈出王公之私；人患好爲人師，特恐犯聖賢之戒。某敢不益磨行檢，加飭禮維。懲創孝先之晝眠，追隨昌黎之晨入。命汝教胄，豈徒教小技之文章；匪我求蒙，願勉求放心之學問。《梅亭先生四六標準》卷七。又見《翰苑新書》續集卷三四。

### 除國子錄謝執政啓

抱關金耀，已汙掌故之科；分席璜宮，初乏知新之學。進非有德，遷不以勞。永言小善必錄之由，全出大鈞無垠之造。所感厚甚，無謝可乎？切以太學風化之本原，其來已古；大夫國人所矜式，必立之師。故雖尾僚，亦關首善。道出羲皇而過屈、宋，猶曰於我何有哉；文規姚姒而逮《莊》、《騷》，尚聞有笑于列者。不善螟蛉蜾蠃之祝，寧無驪駒狗曲之嘲。伏念某學不知方，仕未能信。呻其佔畢，缺師友之淵源；著之話言，皆童孺之糠粃。冒昧登畿之綬，追隨筦庫之家。甲第梁肉之紛紛，豈爲我設；窮年膏油之兀兀，反教人爲。敢意成均，獲齒糾錄。居然從國子先生之後，何以報王公大人之知！伏遇某官該輔天功，奮庸人望。收斂攻教，恐駑馬有十駕之材；搜攬流離，謂鱗魴皆九戩之選。亦既招諸生而立館下，不嫌養萬鍾而教國中。憐其役役之常，課以循循之誘。某敢不益磨行檢，謹飭廉隅？孝先晝眠，正恐嘲師之無筭；昌黎晨入，詎應詰匠以爲楹。《梅亭先生四六標準》卷七。又見

## 除國錄謝給舍臺諫啓

補文學掌故之官，何心高位；崇京師首善之化，乃尾下僚。是名清資，非有素望。躡進金闥之秩，仍依璧水之流。三省疏庸，一何僥冒！切以成均合國之子弟，爰立之師；簡書畏我之友朋，必歸之錄。官曹雖小，職任不輕。在元祐間則伊川、橫渠其選，至紹聖後則建安、龜山之流。今雖乏人，何爲至我！伏念某志雖語上，材不逮中。幼而學之，亦欲垂竹帛之尺寸；齒之長矣，初未離溝瀆之尋常。甘心此士之江湖，絕意真人之官府。敢意主文書於几閣，又獲陪冠帶於橋門。鄭虔無氈，亦懼官長之罵；邊韶有笥，尚貽弟子之嘲。顧敢招諸生以來前，亦恃有仁人之在上。伏遇某官綱維國論，管攝文盟。存先覺覺後之心，推欲立立人之學，雖當青衿挑闥之後，不改緇衣館粲之誠。念聖人之及萬民，亦惟養士；思君子之有三樂，無若育材。故宮商執爨之桐，以規矩登場之木。某敢不靖共爾位，滌濯其心？業精于勤，荒于嬉，固當檢押；學行之上，言之次，尤願琢磨。《梅亭先生四六標準》卷七。

## 除國錄謝葛祭酒洪啓

掌故無文學之實，正覺覲顏；首善蓋風化之原，猥容箝尾。環顧其中，未見可者；先達之士（二），

爲之前焉。忻然小官之不辭，樂在君子之易事。切以授業傳道解惑也，既立之師；同寅協恭和衷哉，必率其屬。思昔呂正獻長成均之日，實舉張橫渠居正錄之官。今茲尋墜緒之茫茫，詎宜用餘子之碌碌。阜螽草蟲，非得其類；奔蜂蠹蠋，難奏爾庸。如某者鹿鹿凡材，魚魚末學。賦資蹇淺，迷高明廣大之天淵；涉世坎艱，多患難賤貧之日月。漫焉未能信之仕，淒其不足畏之年。茲由几閣之文書，躡綴橋門之冠帶。出羲皇，過屈宋，猶曰儒術於我何有哉；規姚姒，逮莊騷，尚聞諸生有笑于列者。況無所挾，何恃而前！亦惟親大司函丈之間，可以習小雅隸三之業。伏遇某官以耆壽俊，爲社稷臣。天下之達尊三，公難他遜；君子之所教五，帝曰汝諧。資自治治人之準繩，垂先覺覺後之渠護。天之高也，星辰之遠也，今幸立弟子之行；陽以暴之，江漢以濯之，初何畏官長之罵。某敢不尊其瞻視，審所步趨？商財賄之有無，計班賞之崇庠，遐不謂矣；觀道德於前後，聽教誨於左右，願卒成之。《梅亭先生四六標準》卷七。

〔一〕士：原作「上」，據四庫本改。

## 除國錄回諸州啓

掌故金耀，已愧曠瘝；首善璧流，誤叨糾錄。載省吹噓之自，一歸披拂之仁。恭惟某官以欲立立

人之心，推先覺覺後之學，黼黻溝中之斷，宮商爨下之焦。致茲一寒之蹤，分此獨冷之席。某未由面謝，先辱手牋，有感輪囷，無詞稱塞。《梅亭先生四六標準》卷七。

### 除架閣謝丞相啓

十年出幕，迷舊跡於新蹊；一氣轉鈞，納陳人於故府。拔之喧囂倥偬之役，賦以棲遲偃仰之間。蛻凡骨以漸輕，聳危肝而知感。切以周九職之任，既重司書；唐六典之分，已存掌故。至若版曹之籍，專之金耀之藏。在昔時特曰筦庫之官，至聖世則爲儲材之地。栽培拱把，備震風凌雨之帡幪；追琢璵璠，供方澤圓丘之琮璧。豈應庸下，偶玷選中！伏念某質竊無奇，學落不殖。少時磊隗，尚抱風雲之壯懷；中歲蹉跎，稍除湖海之豪氣。漫焉未能信之仕，已是不足畏之年。生辰挹斗而揚箕，竟失餘而得少；奴星結柳而送鬼，柰驅去以復還。周行萬里之關山，復累一陶之坯冶。馬伏轅而蜷局，直爲仰秣之謀；燕巢幕以差池，猥沐捲簾之顧。南宮攷藝，濫廁使令；東閣望塵，曾微懇禱。忽使接紳綏之武，遽令司几閣之文。蠅頭牛腰，姑備朝廷之遺忘；鼠牙雀角，僅防吏胥之謾欺。白日青春，了無公事；黃簾綠幕，宛是儒生。非大鈞妙播物之仁，則小人無得興之理。茲蓋伏遇某官經邦碩德，濟世元勳。竊窺堯、舜君民之心，豈數韋、平父子之業。寶鼎九廟以衣裳之會，金城四方於樽俎之前。玄齡入相二十三年，求賢則如一日；吉甫薦士三千餘輩，流澤蓋在異時。顧慙孤賤之蹤，亦綴收羅之

數。某敢不溫尋宿學，討理初心？商財賄，計班貲，恐孤德懋懋官之意；厲廉耻，行禮義，圖報先覺覺後之恩。《梅亭先生四六標準》卷七。又見《翰苑新書》續集卷三四，《八代四六全書》卷二六。

# 全宋文卷七二七一

李 劉 七

## 除架閣謝五府臺諫侍從啓

賓冰漕之筵，正虞謫滿；主地官之度，猥玷恩除。有憐鞅掌之勞，少佚筋骸之束。此大鈞侍從「大造」妙播物之巧，然小人有乘器之慚。切惟周設司書，既任版圖之職；漢立掌故，實崇文學之流。馴至皇朝，率儲清望。元豐設庫，已重此官；紹興正名，益艱其選。況三司併歸民曹之後，以獨員專庀金耀之藏。英俊聚于闕庭，多由此出；文書盈于几閣，初不爾煩。士當利吾器以俟時，上亦溉其根而食實。詎容瓠落，獲預茹連！伏念某意廣才疏，名浮味薄。韓子四十八以後，轉負初心；柳侯五六從以來，無爲朝士。矧可憎之面目，仍不利於走趨。從軍無分寸之功，失勢幾千丈之落。燕巢于幕，固非丹穴之羽毛；蛙拘於墟，亦豈青冥之脚手。孰爲之地，有隕自天。拔之輶軒咨度之餘，付以按牘文書之寄。開門羅雀，得驪鼠不食之倉；充棟汗牛，皆鴈鷺所籍之紙。或容暇日，稍理陳編。此流俗所謂寂寞之濱，而愚儒則爲藏修之計。伏遇樞密弼諧兵柄，參輔政機。強本朝以折千里之衝，舉明主

以建萬世之策。綢繆牖戶，收又負偃植之材；絺繡衣裳，辨藻火黼黻之色。肆令謏聞之士，亦入旁招之儲。某敢不跼伏寬閑，溫尋廢忘？歐永叔之辨曲直，或得於陳桉之觀；魏弱翁之條便宜，亦願助故事之奏。《梅亭先生四六標準》卷七。

### 代陳架閣登謝丞相啓

贊使指於計臺，曾微素望；主吏文於民部，猥玷清流。未論分寸之躋攀，且遂斗升之饒嚼。少安三釜，實感一陶。惟天朝嚴法令之藏，不遺片紙；而地官專版圖之掌，又異他曹。凡財貨之本末源流，與夫家之施舍戒令，悉從閣束，特設司存。故凡守金耀之門，多以儲玉班之彥。汗牛充棟，雖同鴈鷺之生涯；待兔守株，或綴鴛鴦之步武。欲諧衆口，必取譽髦。如某者才不脩人，學徒是古。崎嶇一第，志其目而中眉；奔走四方，困於心而衡慮。亦念聖賢之所立，底須爵位而後傳。彼正己而不求於人，此言何謂；然居下而不獲於上，吾道難行。冒焉爲東閣之趨，志在便南陔之養。索長安之米，衆固揶揄；對昆明之荷，再逢搖落。敢意篤豚魚之信，不肯遺蟣蝨之微。竟挈陳人，俾洿故府。雀角鼠牙之案牘，善而藏之；牛溲馬渤之階梯，庶其在此。伏遇某官乾坤間氣，社稷世臣，寸心結人主之知，一力任天下之重。使宅百揆，久著經邦論道之功；茲惟三孤，始膺貳公洪化之寄。文武萬邦而爲憲，精神千里而折衝。章章已見於歸疆，汲汲不忘於求士。殆欲市燕人之駿，故先揖越國之蛙。知某

親老家貧，難以待三年之艾；憐某身勤事左，無使虧一簣之山。姑令守几閣之文書，庶或備朝廷之遺忘。某敢不靖共爾位，增益未能？芽甲根荄，固已累洪鈞之一氣；根闌店楔，尚希託廣厦之萬間。

《梅亭先生四六標準》卷七。

### 代舒架閣佑除藉田令謝丞相啓

故府抱書，安分百僚之底；新畬載耜，庀司千畝之間。絲綸始拜於王言，耕鑿詎忘於帝力。頂踵出生成之造，肺肝深銘鏤之私。竊惟周立甸師，漢爲田令，中古不常於廢置，本朝獨厚於優崇。端拱親耕，猶附九農正之末〔二〕；元祐著令，已班五監簿之前。用爲羽儀，須清流而後畀；取諸閥閱，必素望之已高。如某者學既粃糠，才尤蕪穢。早荒家訓，不自策力田之科；晚藉世資，乃就食代耕之祿。一官漫尉，再轉負丞。會逢除吏八百之恩，偶玷筦庫七十之數。心雖同於白水，夢不到於青雲。適金耀之虛員，濫角巾而承乏。小人屬饜而已，既慙地位之高；大鈞塊北無垠，更陟天田之峻。束吏文於高閣，習容典於曲臺。矧當大享之丁辰，聿嚴裸鬯；其在先農之乙地，正給粢盛。使之參保介之間，于以聞籩豆之事。漸階閨籍，可齒朝紳。載柞載芟，何敢耻有道之穀；不稼不穡，所愧取無功之禾。伏遇某官柱石九筵，權衡百辟。明堂以序五位，遙觀四海之會同；少保茲惟三孤，實任兩儀之寅亮。謂臺閣之儀，正須子弟；庶宗廟之器，可交神明。丕戴八窗四達之儀，式講三公五推之典。肆令

駑鈍，猥備駿奔。某敢不滌濯其心，靖共爾位？誕后稷之稼有相，當益虔農正之司〔二〕；帥甸師之屬而耕，尚終託天官之造。《梅亭先生四六標準》卷七。

〔二〕末：原作「本」，據四庫本改。

〔三〕農：原作「晨」，據右引改。

### 代舒架閣除藉田令謝五府侍從啓

故府綴員，粗謹吏文之守；容臺列屬，叨陞帝藉之司。跼綸綍之王言，齒簪紳於京秩。寵踰望表，愧溢情涯。惟漢家田令之官，實周制甸師之職。歷代不常於廢置，本朝獨厚於優崇。元祐定班，蓋在五監簿之上；端拱歲事，猶附九農正之中。馴至中興，始歸宗伯。禮樂以俟君子，惟寅又欲其惟清；籩豆則有司存，弗仕則幾於弗問。豈圖庸下，偶玷選中。如某者，同前《謝丞相啓》。伏遇某官當世真儒，斯民先覺。文武爲萬邦之憲，精神折千里之衝。朝夕輔台，有猷必告于我后；夙夜基命，不戰可屈於人兵。方將厚鹽梅黼黻之功，諒必廣芝朮參苓之蓄。肆令駑鈍，猥效駿奔。某敢不欽乃攸司，修其可願。八政一食，勤身敢怠於共齋；三公五推，拭目尚觀於載耜。《梅亭先生四六標準》卷七。

## 代范文思應鈴謝史丞相啓

試邑三年，乏民庸之善狀；入京一月，玷工尹之異除。身未登光範之門，夢弗到文石之陛，非求而得，何德以堪！竊以半面之異孟嘉，非相求於未面；一言而得駸蔑，亦幾失於無言。次焉須左右之譽褒，否則出公卿之論薦。今者絕蚍蜉之援，驟而綴鵷鷺之行。是爲特達之知，未有報酬之計。伏念某一愚自信，三仕無庸。初隱弓刀，不敢學上書之尉；繼逃麴蘖，偶叨舉筦庫之家。當父母喜懼之年，效子男附庸之役。取田疇而伍，早知有殺之之歌；聞弦歌之聲，晚乃多莞爾之笑。偶成善罷，安有去思！身未可以許人，仕有時乎爲養。已干小宰，題治中別駕之輿；敢問大鈞，錄時文思索之量。誰實吹噓而送上，遽蒙摸索於暗中。天生五材，古豈容於一闕；國有六職，今未廢於百工。然宮室苑囿有無增，且律度量衡之已正。惟服食器用，間屬尚方；在梓匠輪輿，率多居肆。是雖虛轄，盍得實材。猶泥猶金，固豈逃於陶冶；不稼不穡，果胡取於困廩！雖銜卵翼肉骨之恩，實負血指汗顏之愧。茲蓋伏遇某官鹽梅家學，袞冕世臣。一柱擎天，獨扶千萬間之廣廈；三槐蔭地，詎數十八載之中書。每翕受以敷施，務兼收而並蓄。惟是其所非，非其所是，既杜閉羣枉之門；故求者不予，予者不求，以恢洪志士之氣。某敢不仰思識拔，誓竭縻捐？赤水無心，詎敢作還珠之語；白雲在目，願終憐負米之情。《梅亭先生四六標準》卷七。

代衛運幹樸除太社令謝丞相啓

計幕終更，方俟通班之命；容臺置屬，遽叨司社之除。非鈞播之無垠，知爨餘之必棄。恩淪骨髓，感鏤肺肝。切惟太祝奉禮之攸司，實與正字校書而相埒。禮樂自天子出，義先郊社之明；籩豆則有司存，職在典章之習。非取簪紳之素望，必先閥閱之清流。庶存子諒之心，克贊寅清之職。詎應庸下，遽玷選中！伏念某累舉無成，孤蹤何取。三仕庇身於內幕，無足策名；一官主畫於外臺，僅知守法。惟是日畿之奔走，實多風浪之侵陵。獨憑卵翼之恩，曲全羈迹；盡出齒牙之賜，遂足薦章。既可脫離選調之灘，便使屬饜小人之腹。適值糟糠之在褥，小稽松菊之迎門。除書有隕以自天，愧汗滂流而至地。身如病鶴，詎容陪鵷鷺之行；技止黔驢，何足玷麒麟之楨！此大丞相所謂采葑之意，在小丈夫則懷據蒺之慚。摩頂放踵而知恩，糜骨捐軀而難報。伏遇某官棟桴九廟，坯冶萬殊。少保茲惟三孤，獨任兩儀之寅亮；冢宰掌建六典，並收四海之賢能。惟俊乂宜在於旁招，何巧拙亦容於雜進！曲念一門之父子，甚如異姓之弟兄。輔翼之，振德之，不遺餘力；吹噓是，披拂是，倍費元功。憐某在伯仲之間，獨補選階之冗；恐某試子男之邑，未閑吏道之師。必令致曲以有成，不忍徑麾之使去。天生地育，尚難回霜雪之餘；嶽峻海深，何嘗假涓塵之助！受知如此，揣分謂何。某敢不退省內愆，甘求外補。成終成始，得蒙亟屏之四方；使過使功，猶願少殫於一得。《梅亭先生四六標準》卷七。

## 代董惠州居誼除鼓院謝丞相啓

負丞支郡，冒分千里之符；承命本朝，俾典四方之軌。恩逾望外，愧溢情涯。切惟聖王量能授官，寧無差擇；君子居易俟命，惟有靖共。傳明戒於鄙夫，史大書於巧宦。苟睥睨孔鸞之集，皆覬覦雞犬之仙。材固難全，官亦有限。牛溲馬渤，雖待用於醫師；蟲臂鼠肝，盍冥心於造化。如某者材真樗散，性實棗昏。科名不補於遺餘，塵俗敢辭於抗走！楚萍試邑，僅逃製錦之傷；古栝佐州，濫竊代庖之譽。冒然乘障，許以造朝。既得郡於南交，漸理裝而西返。常鱗凡介之儔匹，自分泥沙；雙鳬乘鴈之去來，何心渤澥。顧惟椎鈍，乃辱甄收。其求士甚士之求公，寥寥斯道；不即人而人自即我，愧此恩。伏遇某官忠結主知，道先民覺。大鈞播物，惟隨器以剴裁；直柄當權，肯徇情而俯仰！察某乏蟻子之援，知某無鶚炙之求，特使啞鍾，入司路鼓。爰鴈聞樂，不勝疑駭之情；罔象得珠，殆匪經營之力。某敢不仰承殊渥，勉策孤蹤？守虎豹之關，無使君門之壅；達猓豚之訟，必思民瘼之通。

《梅亭先生四六標準》卷七。

### 代回鄒泉州應龍賀新除啓

夏辟三千，參聯弗績；冬官六十，攝長何庸。非帡幪實免其震凌，則川藪密藏其汙疾。恭惟某官儒者給事，王之蓋臣。海水簸弄明月珠，茲亦奇矣；曉漏追隨青瑣闥，誰其似之。曲爲蟠木之容，未許槁梧之暝。然以挂冠之歲月，居然曳履於星辰。恐噴人言，誰俯予美。欲乞骸骨而去，更借齒牙之餘。某視蔭可驚，託根自喜。望崦嵫而勿迫，漸爲歷吉日之謀；驅豐隆以寄聲，敢致登閭風之祝。

《梅亭先生四六標準》卷七。

### 代回諸路賀新除啓

旅小宰之班，深慚久假；渙大昕之號，猥遂爲真。雖參筆橐之華，實懼瓶罍之溢。未遑摧謝，先辱飛牋。鏘然韶鈞，杳默咸池之奏；粲若藻火，扶持夜燎之光。徒深篋衍之藏，莫效檐榆之報。《梅

亭先生四六標準》卷七。

## 代回衆官賀新除啓

攝事貳卿，閱時無補；蒙恩進律，滿歲爲真。曾巽謝之未遑，辱謙撝之先及。燁然駢麗，寵此畸涼。牘制有嚴，不克視施而爲報；襟期甚厚，惟當永矢以勿諼。《梅亭先生四六標準》卷七。

## 代潭州鄒帥應龍謝丞相啓

守藩灘水，莫奏膚公；分閩湘流，又承嘉惠。仍進璧奎之直，益華翼軫之旁。知勤洪造之甄陶，敢廢小夫之竿牘？恭惟某官乾坤間氣，社稷世臣。一日萬機，殫輔贊彌縫之力；九州四海，知親附鎮撫之心。故齊人章章，有侵疆之歸；而魏地糾糾，方樂郊之適。非用儒無敵於天下，何不戰可屈於人兵？惟公克成厥終，永息四夷之警；俾予從欲以治，允爲萬世之功。況方中二十四考之書，詎容專五三六經之美。某久違東閣，幸宅南交，徒以奉萱草之親，難於戀梅花之外。所祈便養，徑歸綿上之田；亦欲投閑，稍養漳濱之疾。豈意大鈞之塊圯，復容小袖之回旋。爵祿兩崇，敢但襲荆潭之唱和；中和並布，庶無傷衡嶽之扶輿。《梅亭先生四六標準》卷八。

## 除成都漕到任謝史丞相啓

伏以再命典州，愧偏城之玩愒；六條遣使，玷本道之轉輸。不由推轂之功，全出轉鈞之賜。恩隆頂踵，感激肺肝。竊以益部夙繫使星，星詎知其隕石；成都舊稱陸海，海烏料其揚塵。蓋自利路之荒殘，尋至潼川之剽掠。督責惟深於西道，劬勞良慘於北山〔一〕。巧婦尸之，尚難責無麵之餅；老農墮甚，若爲取不稼之禾。伏念某多病不材，至愚極陋。少年躁妄，夏蟲語冰而不知；中歲險艱，吳牛見月以猶喘。進既乏大雞之效，退已孤鷗鷺之盟。天宇浮眉，尚青眼逢迎之舊；雪山到面，驚白頭彼此之新。比聞驪駕之虛，大有鸚書之薦。蜀人題柱，頗榮弩矢之前驅；吳客思尊，恐負樵蘇之後爨。駭采封於下體，孰蟠木之先容。人則擇官，官則擇人，上恩異甚〔二〕；用者不才，才者不用，外議謂何！此蓋伏遇某官柱石九筵，權衡六幕。熙帝載使宅百揆，燮和歷二紀之間；立太傅茲惟三公，辭遜閱十年之久。蓋欲復文武之境，然後受周畢之封。帝王出萬全，率由先正舊典之式；春秋大一統，迄還寧人有指之疆。率土莫非王臣，皇天既中；中國始由孤棘，出正顓槐。窺於我如浮雲之心，豈貪富貴；有迨天未陰雨之責，尚克綢繆。眷言黑水之惟梁，正窘青天之轉粟。飛芻既急，刻楮尤艱。知其熟魚鳧之游，念其無虺蜺之援，特加識察，俾效馳驅。某敢不思廣咨諏，力圖任負？三十鍾致一石，無敢辭難；百畝分食九人，亦當加念。惟知黽勉，皇恤鴛庸。流馬木牛，儻可息民而休士；豢龜籠

鶴，終希置散以投閑。《梅亭先生四六標準》卷八。又見《翰苑新書》續集卷三五。

〔二〕劬：原作「郇」，據四庫本改。

〔三〕甚：原作「其」，據右引改。

## 除成都漕謝政府啓

連四千石之任，蔑聞蜀郡之歌；餽十萬竈之屯，仍玷益州之分。由支郡馳驅於本路，恐短材蹙蹙於長塗。令先甲以惟行，命重申而莫避。竊以雲門陸澤，夙稱要害之膏腴；石棧天梯，素忌吮磨之牙血。六步七伐，周不愆於庸蜀；十鍾一石，漢實敞於西南。兵不寓農，今益異古，三逢單闕之歲，壹無強禦之人。萬夫莫當之劍關，跋跋奔走；五百餘里之石穴，綽綽去來。戰不因糧，敗必仇餉。剜心醫眼，忍能閉眼而不醫；推髓剥膚，安有曼膚之可剥。此際把天隅之繡，何術流地上之錢。伏念某不材之人，無用於世。教胄乏祝螟之效，監州無展驥之功。三暑熨侯，分終身之不齒；一寒瓦屋，甘俛目以爲眉。未能消愁嘆之聲，更冀玷禮樂之遣。依蓮而泛綠水，況當傍籌邊之樓；轉粟而上青天，又可訪支機之石。然造幣則刻楮難於刻玉，調夫則鑄人重於鑄金。刈葵已覺其傷根，緩步又難於拯溺。跋胡蹙尾，劓目鉢心。昧於一來，瞠若四顧。恭惟某官基命兩社，棟國九筵。太微三光，風霆闕流形

之用；洪鈞一氣，雨露無甘苦之分。己欲立而立人，道先覺以覺後。謂江漢朝宗于海，必導岷而導嶓；當荆益跨有之時，欲保吳則保蜀。重載必歸於牛負，畏塗何止於鳥飛。雲深憐滴博之邊，冰解思先零之漕。乾矣嘆矣，遇人之艱難矣；輔之翼之，又從而振德之。某敢不盡力鞠躬，愛人節用？安危之意注將相，使臣弗敢與聞；錢穀之問至廟堂，君子惟能通志。《梅亭先生四六標準》卷八。

### 除成都漕謝侍從啓

無中和之歌，轉上聞於太學；有禮樂之雅，獲下拜於少城。十年出幕之孤鴻，萬里題橋之駟馬。超遷寵甚，稱塞闕然。靖循表選之由，定出裏言之賜。竊以收蜀而給轉漕，史稱蕭何之功；諭巴以擅運輸，文見相如之檄。非天府前腴而後瘠，殆雪山昔重而今輕。萬甕萬牛，窘韋臯之去鎮；一琴一鶴，欠清獻之乘輅。況從漢棧之囂闐，不見秦兵之耐戰。益州疲敝，民不聊生；劍閣崢嶸，君誰與守。飛鳥桃蟲，當亟懲於後患；木牛流馬，詎宜付之庸人！如某者志本熊熊，才終鹿鹿。滿頭素髮，意本蕭條；眯目黃塵，法當憔悴。進絺芩於館下，以冗見治；希驥足於治中，無才可展。火焰生於兩角，月影轉於半輪。雖游擁於雙旌，悄無聞於五袴。適承驪駕之缺，驟蒙龍節之盼。求者不予而予者不待求〔二〕，此恩厚甚；食以足兵而兵不足於食，茲事奈何！冒哀籲而弗回，恐顛躋之難免。茲蓋伏遇某官國之元氣，學者泰山。惓惓先天下之憂，卓卓得聖人之任。論思獻納，精神折千里之衝；諷度

詢謀〔二〕，采訪遴十道之選〔三〕。萬里東溟之隔，導江河以朝漢；十年北風之涼，閔岷峨之悽愴。行行且止，避御史難歷井以捫參；皇皇者華，遣使臣且翕箕而挹斗。某敢不問民疾苦，察吏否臧？寧損食以節衣，無剥廬而豐屋。戍蓬婆之雪，謹操蘇武之節旄；跂織女之星，徐問張騫之機石。《梅亭先生四六標準》卷八。

〔二〕予：原作「子」，據四庫本改。

〔三〕諷：原作「取」，據右引改。

〔三〕遴十道：原作「十道遴」，據右引乙。

### 除成都漕謝檢正都司啓〔二〕

分江鄉之符，偶綴益州之分；出澤國之節，就令周道之馳。輕孤熟路之車，大乏生財之道。循墻莫避，叱馭知慚。竊以中和布宣，金馬亦煩於遣使；疲敝危急，木牛尚困於餽師。蓋窘十餘鍾一石之輸，頗仰三百萬斛穀之糴。比既失丘山之暴暴，乃專責原隰之皇皇。琴鶴清規，或又似劈琴而煮鶴；繭絲拙計，今不待成繭而取絲。委之鴛庸，何以黽勉！伏念某秉心抗直，涉世迂疏。綿力薄材，位合居於人下；虛悲空警，憂乃犯於衆先。甘以狂愚，老於廢棄。慨一寒之去國，驚十暑之浮家。晨入太學而招諸生，投閑乃分；夜發清溪而向三峽，假守非才。方弄月於峨眉，遽觀風於海眼。誦詩授政，

敢曰使四方而不能；咨諏爲謀〔二〕，是當拜五善以求獲。此蓋伏遇檢正云「司存雨露，身逼雲霄」。檢詳云「彌綸省闈，弼亮廟廊」。編修云「司存雨露，感會風雲」。詳定云「變和帝載，翊贊天樞」。左右史云「身為國史，君舉必書」。推轂多有味之言，蒙霧獲不知之潤〔三〕。謂吳、蜀相爲唇齒，當廣咨諏；得信、布以任爪牙，亦資餽餉。有可福虛危之次，諒多憚參井之捫。病駒弗稱於文羈，老馬或諳於故路。藐然外服，假以裏言。乘白露以采葭，俾青天之轉粟。某敢不愛人節用，盡力鞠躬？勉千里之羸糧，甘三年之刻楮。然公車實無希於暮召，但錦城能不願於早還〔四〕？四牡還歸而苞栩載飛，且謹成西山之雪；萬象皆春而孤槎自客〔五〕，何因近南斗之星！《梅亭先生四六標準》卷八。

〔一〕除：原作「徐」，據四庫本改。

〔二〕諏：原作「難」，據右引改。

〔三〕獲：原無，據右引補。

〔四〕但：原作「任」，據右引改。

〔五〕而：原作「面」，據右引改。

### 除成都漕謝李制置啓

守江鄉之符，正慙玩愒；出澤國之節，濫備將輸。亟控需章，冀回渙汗。茲奉大元帥之承制，必

欲小行人之疾驅，冒昧滌紅，凌兢布白。伏念某百無操挾，獨有迂疏。學無所成，空敝精神於蹇淺；仕未能信，僅存肝膽之輪囷。立館下招諸生，一鳴輒斥；坐堂上稱太守，再鼓已衰。獨感吾選韓厥之知，皇顧孰殺子產之怨。止須書考，力乞投閑，敢圖清朝，驟畀漕事！惟成都夙稱陸海，海已近於揚塵；而益部舊號使星，星今同於隕石。熬波無潤，刻楮難成。百畝食九人，寧忍奪金於白晝；十鍾致一石，尤難轉粟於青天。此豈庸駑，所能黽勉！聞將軍之令，不聞天子之詔，敢不膝行；急觀察於賦，與急刺史於民，尚祈指教。恭惟某官識弘且毅，氣直以方，學廣而聞多，才全而業鉅。光猗蘭之葉，世載其英；勁前茅之權，帝嘉乃績。受任危難之際，折衝談笑之間。夷虜膽寒，士民心服。薦吳起，薦西門豹，悉送吹噓；咨向寵，咨郭攸之，尤加摸索。有如蹙蹙，亦俾驅馳。某敢不恪奉六條，圖拜五善？維駒維騏，維駟維駟，敢自怠於鞭策；我任我輦，我車我牛，願少寬於轡策。其爲頌猷，罔既敷宣。《梅亭先生四六標準》卷八。

### 謝黃制副賀除成都漕啓

某受容察於偏城，正虞謫滿；畀將輸於一道，安得誤除！知必出於流言，廼遽蒙於涇記。蠅雖貪於附驥，犬不足以續貂。使萬一如傳聞，當再三而懇避。區區之懇，續續以陳。比羞蘋蘩，甚愧施輕而報重（一）；茲奉竿牘，不覺情過而禮踰。百感稠重，尺牋勃窣，亟具申稟，仰乞丙原。《梅亭先生四

六標準》卷八。

〔二〕甚：原作「其」，據四庫本改。

### 謝順慶李知府賀除成都漕啓

某蕭然塵土，殊乏郡庸。聞之道塗，謂有使命，知流言之難信，省孤跡之不堪。正使誤除，亦當請免，敢圖采聽，便辱品題！某有感簸揚，實無被受。不稼蔑取禾之理，負乘惟致寇之憂。先布尺牋，少攄寸悃，嗣規申控，敢幸丙原。《梅亭先生四六標準》卷八。

### 代羅制機堽改除太守謝史丞相啓

假守漢源，冒控陳情之請；改麾晉嶺，實諧便養之謀〔一〕。寬庭闡萬里之懷，出坯冶一陶之力。福如天而徼受，感無地以寄言。伏念某殖學疏蕪，賦材蹇淺。詩書門戶，所求無忝於父兄；塵土簪裳，其實徒勞於州縣。倚閩山而製邑，攀蜀道以籌邊。過灩澦百牢之關，甚安蓮幕；叱邛徠九折之坂，忽冒竹符。惟此沈黎，界在雪嶺。綏懷六詔，安有奇功；荏苒二年，僅無乏事。起家至二千石，

萬有餘榮；倚門有九十親，一則以懼。敢謂洪鈞之轉，復容畫戟之森。許邛笮之還轅，指衡湘而易組。蓋范史之傳循吏，僅十數人；如桂陽之有治聲，乃二三輩。尚詭圖於後效，期力企於前修。有民人焉，有社稷焉，姑俟及瓜之戍；孰主張是，孰綱維是，俾全啜菽之驩！揆厥所元，亶知其自。恭惟某官名垂宇宙，力負乾坤。作室而厥子肯堂，有偉相門之相；若金而用汝作礪，是維功令之功。談笑却萊人之兵，答係制單于之命。陰陽和而在內附，何難外撫於四夷；上下交而其志同，尤欲曲成於萬物。故如椎鈍〔二〕，亦預甄收。某敢不刻骨藏恩，指心誓報？乃瞻衡宇，快林鳥反哺之情，當走京師，窺槐龍顙面之拜。《梅亭先生四六標準》卷八。又見《啓雋類函》卷二九。

〔二〕謀：原作「諸」，據四庫本改。

〔三〕如：原作「知」，據右引改。

### 代董通判居誼除知惠州謝丞相啓

佐州東輔，偶計日以合符；乞郡南荒，忽何天之從欲。雖云小壘，亦出大鈞。請裁狂簡之章，少答生成之造。伏念某蠹書淺學，鴈塔末科。自役俗吏之塵，始習癡兒之了。依蓮何有，薦屢剡於公車；種秫既登，政偶安於田里。冒昧題輿之座，聊息吾黥；解后越俎之庖，偶調衆口。煩需章之交

上，冀渙渥之留中。人豈不自知耶，小才未容於大用；仕者行其義也，分憂亦所以近君。輒從五嶺之間，乞乘一障而去。蹒蹒儀鳳，鷁自分於退飛；跼跼墮鳶，馬何辭於後殿。鵝城斗大，鰐穴淵深。飽惠州之飯，讀淵明之詩，茲亦奇矣；使渤海之民，沾宣帝之化，所願學焉。恭惟某官佐王經邦，量能授職。雖馬渤牛溲，兼收並蓄，何所不容；然蠅營狗苟，驅去復來，奚其爲政。凡干內補，悉與外除。求仁得仁，我則異於是；以德報德，公其許之歟！某尚遠戍期，敢忘政學。一麾乃出守，孰非大丞相之恩；庶民所以安，願課良刺史之效。《梅亭先生四六標準》卷八。又見《永樂大典》卷一八四〇三。

# 全宋文卷七二七二

李 劉 八

## 除武岡通判謝丞相啓

散人細滿，干續食於本朝；宰物曲成，特轉丞於支郡。詎能希展足之驥，賴未廢病顙之駒。愧溢情顏，感踰分願。伏念某平沉庸俗，全抱拙疏。骨相既屯，乏雲雷經綸之學；丘園自賁，非河漢黼黻之文。猥蒙養士之仁，濫綴教胄之屬。經笥之嘲未發，謗篋之惡已盈。先生學雖勤，言雖多，譽難酬毀；相國禮之過，知之至，罪上從疑。俾奉叢祠，實爲寬典。掘雲而破嶸嶸，歸尋黃獨之苗；乘月而弄潺湲，飽飲紅泉之水。倏三周於歲籥，冒一問於化甄。茲蒙天恩，俾貳斗壘。都梁樂土，巫水舊嶠。崇寧拔縣而升軍，甫百餘歲；嘉定握僉而置倅，方一二員。及瓜之戍雖遙，種漆之謀有待。威爲龍蛇，恩爲赤子，當贊郡條；小不虺蜮，大不鯨鯢，仰憑國力。恭惟某官得聖之任，爲帝者師。父子繼世三公，邁史丹仕漢朝之績；明良慶會六字，紹越王輔孝廟之勳。鹽梅水火，鼎實惟和；粉米絺繡，袞章亦別。存竹頭於舸艦，拾桐尾而宮商。念椎鈍之無他，嘆陸沈之已久。日月出矣，時雨降

矣，將令萬物之得宜；江漢濯之，秋陽暴之，寧忍匹夫之不獲！因其素出於門下，使之姑試於治中。某敢不滌濯其心，靖共爾位？思稱屏星之重，圖爲杯水之清〔一〕。魚尾既頽，詎敢急斗升於東海；烏頭可白，儻或憐三匝於南枝。《梅亭先生四六標準》卷八。

〔一〕清：原作「消」，據四庫本改。

### 除武岡通判謝宣參政繒啓

祝釐秩滿，干續食於大鈞；宥過恩深，俾轉丞於小壘。得逾券外，愧溢情涯。伏念某全蹈拙疏，見謂庸俗。乾愁漫解，初非了事之癡；虛警空悲，直坐信書之誤。偶蒙光範，擢糾成均。韓愈乏赤箭之材，徒勞晨入；鄭虔荒蒼苔之屋，端合早歸。獲領叢祠，允爲寬典。青精可飯，居然乏大藥之資；黃獨無苗，聊爾託長鑱之寄。三年于此，百念蕭然。誰爲推轂之言，忽有題輿之命。青袍朝士之最困，遽借牙緋；黃紙除書之無名，特加齒錄。雖尚俟數年之戍，亦強名半刺之官。伏遇某官弼亮天功，辨章人物，贊一氣洪鈞之橐籥，覃萬間廣廈之帡幪。天地爲鑪，造化爲工，力扶公道；江漢以濯，秋陽以暴，洞見物情。閔其嘗誨館下之諸生，使之姑試治中之別駕。初無驥足之可展，姑見牛溲之不遺。某敢不銘骨鏤心，洗腸滌胃？七年之病，三年之艾，未容急祿以代耕；百畝之田，五畝之

桑，且合力農而報國。《梅亭先生四六標準》卷八。

### 除武岡通判謝葛僉書洪啓

奉祠秩滿，學干祿於天朝；起廢恩深，轉爲丞於斗壘。自匪推當時之轂，何由題仲舉之輿。拜渥自天，歸恩有地。伏念某材真無似，命亦不猶。糞壤孤豚，初豈願犧於太廟；榆枋斥鷃，抑難附鳳於高岡。弗能藏畔以自埋，猥取入朝之見嫉。館下之誨言未既，粗免嘲師；臺中之評品爲傾，渠能原毀。兩年雲卧，百念冰消。負米爲身飽，只增於多感；析薪無子賤，亦覺其有涯。任諸公臺省之登，甘此士江湖之落。獨嘗侍夫子之履舄，頗辱知小人之肺肝。方通國稱匡章之非，乃逢人說項斯之善。士固伸於知己，况受殊知；身未可以許人，詎容弗許。伏遇某官四朝元老，一代真儒。自治治人，所學皆周孔之學；先覺覺後，斯民即堯舜之民。從容取日於虞淵，談笑作霖於商野。耆壽俊在服，精神真足以折衝；敕寧武圖功，夙夜密陪於基命。獨念江濤之如此，深思人物之眇然。與其倚信於詐忠，不若收羅於戇直。留何蕃於太學，昔誰從祭酒之言；處士元以治中，今端出將軍之力。有惑在此，無謝得乎？某敢不銘鏤殊私，激昂晚節？且忍饑而待麪，無乞酒以厭漿。不利走趨，梅福難班於文石；尚能拜起，李臯願蹕於武岡。《梅亭先生四六標準》卷八。

〔二〕品：原作「以」，據四庫本改。

### 代衛太社樸除袁州通判謝丞相啓

微恩改秩，誼難社下之留；乞闕養親，許待治中之次。川藪密藏其汙疾，帡幪曲免其震凌。終始生成，後先超躡。全出大鈞塊坳之造，請陳小子狂簡之章。伏念某天巧素慳，地寒寡挾。父書是讀，願載續於世科；門蔭可羞，空屢偕於計吏。崎嶇三仕，蹉跎七階。獨蒙公相之憫憐，不翅子姪之覆育。燕巢于幕，方欣得近於樓臺；魚潛淵，敢望上汙於池沼！乃辱綴太常之屬，亟令脫小宰之銓。計校平生，擢髮固難於數罪；躋攀分寸，吹毛宜速於求疵。牽牛自分於奪牛，失馬敢期於得馬！適嚴君之引疾，從神圉而祝釐。懷眷戀庭闈之情，欲甘啜菽；願出宰山水之縣，少僎及瓜。忽蒙一陶之仁，超陞半刺之任。宜春多勝，蓋具見韓昌黎之詩；爾袁得賢，亦足考李泰伯之記。詎應伐輻，猥玷題輿。拔之沸湯烈火之中，分以清風明月之寄。子來幾日，我有二天。伏遇某官心契禹臯，道侔伊呂。書汾陽二十四考，事方半於古人；取河朔一百餘州，功已高於今日。璇璣密運而屢躋豐稔，寶玉來歸而重見泰平。時惟萬世永賴之功，尚恥一夫不被其澤。老老幼幼皆重費於保全，子子孫孫將若爲而報稱！某敢不銘恩鏤膺，圖報誓心？肉骨之，卵翼之，可坐須於泥軼；吹噓是，披拂是，尚終托於化爐。《梅亭先生四六標準》卷八。

## 除兩浙運幹謝丞相啓

掃門執贄，冒干相國之知；得闕登畿，俾贊使家之畫。免待及瓜之次，足寬索米之憂。頓令小人之屬饜，實感大鈞之塊圯。伏念某學落不殖，器窳無奇。一科玷鄉老之賓，三仕作諸侯之客。鉢心擢胃，僅成抽黃對白之文；歷井捫參，安識泛綠依紅之樂！既脫岷峨之險，復罹羸博之悲。兩年甫謁於選曹，百拙難營於近祿。獨蒙三握髮之遇，許垂一舉手之恩。嚴、徐奮飛，共勸枚臯之且忍；韓、張嗟悼，或疑東野之無成。適聞掾屬之虛，實在神臯之近，冒爲冶躍，便辱陶成。滿腹飲河，止冀斗升之水；舉頭見日，乃依尺五之天。祿足代耕，政堪學製。十年出幕，或笑未了公事之癡；三命循牆，可無不入帝城之恨。孰披拂是，遂濟登茲。恭維某官坤厚承天，謙平稱物。作典寶于浮寶之日，共知出伊尹之功；書得玉於竊玉之餘，益足表魯公之德。不然肅謹底貢之舉，曷在君奭爲保之餘。帝于一二日之幾，誕敷文德；公其億萬年之敬，肅將祇歡。必令四夷之來王，亦惟九德之咸事。賜之大，禮之過，知之至，豈終捐已爨之桐；視所以，觀所由，察所安，姑使作向陽之木。所慙小物，亦累曲成。某敢不欽乃攸司，事從其長？合東西而瞻使節，思漕波尺地之通；敬蚤夜以從祝規，俟洪鈞一氣之轉。《梅亭先生四六標準》卷八。

除兩浙運幹謝俞樞密應符啓〔二〕

十年幕府，公事未了於癡兒；千里邦畿，幹譽又思於傖父。不失依蓮之職，足寬索米之憂。一陶甚恩，三沐以謝。恭惟某官基命夙夜，勩相國家。收寧武圖功，茂轉同寅之略；任舊人共政，共期先甲之孚。迓寧王遺寶之休，受匈奴奉珍之賀。俾予從欲以治，玄圭何足以告功；惟公克成厥終，大器益思於自治。昆夷喙矣，烝徒楫之。思無競之惟人，圖有辭於永世。伏念某百無象似，獨有鴛庸，已知咋舌以悔狂，無敢刺口而論事。詎意贊木牛之運，乃猶用芻狗之陳。城南巷窮，漫曰去天之尺五；江西轍涸，亦惟乞水于斗升。然或蒙二三執政之知，猶可備八百除吏之數。小技卷曲而不中，詎應詰匠氏而杙楹；大鈞塊圯以無垠，儻或陶河濱之苦窳。否則安倉庫之氏，亦願甘盆盎之中。客燕差池，曾辱捲簾之顧；病駒局促，更希膏鬣之恩。《梅亭先生四六標準》卷八。

〔二〕符：原缺，據四庫本補。本書卷七二七九李劉一五有俞應符。

## 代衛機宜樸謝史丞相啓

偕計吏於外臺，未能拾紫；司閑曹於內幕，乃使奉親。拔之墨水之餘，付以青氈之舊。請裁小牘，少謝大鈞。惟國家重謀帥之權，故子弟許主書之辟。豈惟機事，宜有司存，亦將培德以蓄材，欲使象賢而趾美。當建炎多壘之日，實等諮謀；洎紹興偃革以來，始逃僉擬。似若取禾於不稼，然當肯播於厥菑。如某者百拙無堪，一愚自信，耻襲懷綳之簪笏，妄希弓冶之箕裘。豈知下俚之音，不中儀曹之度。能門有矜式也，獨無公貺之科；有司豈枉我哉，姑利齊生之器。欲返邯鄲之步，更爲湘水之行。適是親闈，既移他鎮，姑求筦庫之節，以慰倚門之思。敢意甄收，曲加器使，猥從新府，復得舊除。畫棟朝雲，此非吾事；短檠夜雨，姑與心謀。不勞奔走於顏行，賸可周旋於膝下。碧幢整暇，更無可奉之文書；綵服雍容，此外何求於造化。茲蓋伏遇某官道先民覺，忠結主知。嶽立八年，淵澄百揆。收公道於廟堂之上，用必惟人；散泰和於宇宙之間，動無棄物。遂令太史牛馬之走，來觀旌陽雞犬之飛。某敢不增所未能，求爲可貴？孝友施政，當思令德之君陳；法令爲師，肯作無能之薛惠。

《梅亭先生四六標準》卷八。

### 代衛機宜樸謝陳憲天宜啓

贅員内幕，漫爲寸祿之謀；受察外臺，忝預一人之數。可無竿牘，自達姓名？伏念某學未知方，仕非能信。伸其咕嗶，頗不後于衆人；觀我朵頤，終未聞於大道。屠龍有志，畫虎何功。爨無欲清，遂強隨於計吏；貨不中度，竟見出於儀曹。姑求筦庫之官，以慰倚門之望。敢圖申令，復使主書！臺皇枕夷夏之交，有嚴屏翰；庭戶得湖山之外，亦簡文書。姑從容膝下之權，且增益胸中之學。幸孰大此，端有由然。恭維某官器宇浚明，風猷凝遠。自其不辭小官於州縣，已具可以大受之規模。暨宅牧於南交，果馳聲於北闕。帝念江右，俗近嶺陬，非得持斧之繡衣，莫戢弄兵之赤子。濡轡甫驅於駱馬，埋輪已讐於豺狼。翠羽浮雲，便作絳官之想；紅旗破賊，即觀黃紙之除。某有愧伐檀之官，莫施橫草之力，尚微餘芘，惠及閑曹。子弟亦何預人，聊復爾耳；孝友是亦爲政，幸卒教之。《梅亭先生四六標準》卷八。

### 代衛機宜謝樓提舉啓

起語同前

恭維某官昭代儒宗，清朝壽俊。精神洒落，光風霽月之標；翰墨淋漓，貯霧含雲之筆。自三年之

博士，盍旬月以封侯。行莫爲乎王留，去孰如於公猛。兩幡焜耀，久游康樂之城；六轡委遲，遂訪右軍之宅。散積倉於南畝，蘇涸轍於西江。皇華寧久於馳驅，清切即司於獻納。《梅亭先生四六標準》卷八。

### 代衛機宜謝陳太守啓

起語同前

恭維某官天韻浚明，風猷膚碩。早參諸彥，孰如棠棣之華；徧閱後生，不起積薪之歎。民庸既茂，朝績亦高。居然專城，尚此歛惠。田疇之成，子產既永歌之；朝廷之知，弱翁行且召矣。《梅亭先生四六標準》卷八。

### 代王支鹽謝丞相定辟差啓

投光範之書，方委身於鑪錘；從英蕩之辟，許效役于牢盆〔二〕。既無待闕之淹，又有便家之樂。小人屬饜，足以行矣；大鈞缺圯，於是見之。伏念某赤城迂儒，白屋賤士。壯歲從獨湖之學，難強附於同門；中年題慈恩之名，偶適逢於當軸。然雖生三台之下，未及望六符之光。供簿四方，師友粗稱其願慤；貳令一邑，台府過謂之廉勤。其如通籍之章，難及守株之士。百拙自安於到部，諸公或勸其

干堂。馬渤牛溲，妄作兼收之想；龜毛兔角，理無速就之期。姑安轅下齷齪之蹤，往守海瀕廣斥之權。頗聞此職，本亦在遴選之中；偶遂爾私，茲端出曲成之賜。感恩厚甚，無謝可乎？伏遇某官世濟王勳，家傳相業。從容而飪百度，談笑而羈四夷。斷度收羅，細桷大宋之各得；滌濯剗礫，精金頑礫之自分。每隨物以賦形，常量能而授職。憐其乏汎水依紅之質，姑且贊熬波出素之司。庶羨地征，無棄天產。某敢不謹司倉廩，平用權衡？舉膠鬲於魚鹽之中，敢妄希於尺寸；活禦寇於鮒轍之內，當知感于斗升。《梅亭先生四六標準》卷八。又見《永樂大典》卷一八四〇三。

〔二〕許：原作「設」，據四庫本改。

### 回諸郡賀除成都漕啓

弄半輪之月，正慚俛目以爲眉；觀一道之風，猥使強顏而將指。蕭然疲役，畏此簡書。未敢驅六轡之絲，已蒙褒一字之袞。恭惟某官溫恭爲德，豈弟宜民，飛紫馬之英聲，奉黃龍之寬詔。平生無襦今五袴，已騰蜀郡之歌；勉勵增秩賜千金，即拜漢庭之璽。有憐濩落，俾效轉輸。自非送上之吹噓，安得暗中之摸索。某終慙非據，亟已引辭。投以木瓜，愧乏衛人之厚報；集於苞栩，但深周道之懷歸。《梅亭先生四六標準》卷八。

## 回諸郡通判賀除成都漕啓

守藩支郡，曾微牧御之才；出節本朝，忽冒轉輸之委。方免章之需報，辱慶牘之鼎來。或承之差，不知所賀。伏惟某官材優世濟，學本躬行。宜澤珮以登朝，暫題輿而佐嶽。車蓋一丈，詎容緹屏之淹；風月平分，行膺佩刀之贈。某自惟骯髒，曷稱馳驅。流馬木牛，冀別選管簫之亞；湖魚藪獸，願亟歸濠濮之間。徒勤繭幅之貽，莫效貂蟬之報。《梅亭先生四六標準》卷八。

## 回諸郡教授賀除成都漕啓

對月半輪，愧無治狀；觀風一道，忽玷恩除。已控懇辭，力祈俞允。敢意三鱣之席，見貽雙鯉之書。伏惟某官夙挾天葩，早收地芥。朋來游、夏，共師夫子之循循；道出羲、黃，詎羨諸公之衮衮。堂下不嫌於繫馬，海中即佇於掣鯨。即題千佛之名，徑上三神之島。某自憐芻狗，詎稱木牛。美人琅玕，良感草木之吾味；愛我藥石，幸毋金玉乎爾音。《梅亭先生四六標準》卷八。

### 回諸司屬官賀除成都漕啓

再乘一障，慙無牧養之功；分察六條，猥被將輸之命。已力申於巽避，何誤辱以謙施！伏惟某官仕與學優，美由世濟。羅而致幕下，便覺羣空；錐之處囊中，即觀穎脫。鴻儀有漸，鵬怒斯飛。某已控需章，丐還節傳。集于苞栩，籲天但切於懷歸；投以木瓜，厚誼更慚于匪報。《梅亭先生四六標準》卷八。

### 再辟制幹入蜀謝丞相啓

遮日而走長安，幾穿破履；登天而攀蜀道，忽得舊氈。知塊圯之無垠，難趑趄而不進。輒修贄見，併吐謝衷。伏念某骯髒亡奇，睢盱有志。一科不補，墮身溝瀆之尋常；萬物皆塵，妄意簡編之尺寸。繇頃年之從辟，抵中道而遭艱。跨海涉湖，痛尤未定；捫參歷井，夢不敢尋。故因祥除，甘就部闕。適於西清之衆論，許爲東閣而一言，遂令索米之人，或動乞漿之興。鬻璞而售乾璞，誰適爲容；翹材以待大材，汝非所及。猶賴益州之元德，尚思吳下之阿蒙。羅而致之，兆足行矣。幾葬魚腹，固嘗回孝子之車；又過羊腸，益合叱忠臣之馭。切聞殿西之顧，頗及雲南之師，要是四蜀之可憂，殆匪

一端而遽止。雖托重固在詩書之帥，然拔尤宜得文武之才。置諸鄒、枚之間，蓋有裨、允之任。豈應庸下，可在選中！伏遇某官身佩安危，功存開濟。獨揮九日，再爲天地以立心；八荒一雲，復令山澤之通氣。行政如彼其久，樂不存焉；當今捨我其誰，聖之任也。粵從更化，專務調元。三階既平，元首有股肱之喜；五胡方擾，中國無疥癬之憂。然欲折千里之衝，是必開衆正之路。得人朝廷，得人幕下，寧有重輕；誠死城郭，誠死封疆，要加儲養。如有所試，俾勉此行。某敢不體認一陶，攀緣九折？堪其事者謂之力，藉莫酬相國之知；遠而使之觀其忠，詎敢作衆人之報！《梅亭先生四六標準》卷九。又見《翰苑新書》續集卷三五，《永樂大典》卷一八四〇三，《啓雋類函》卷三一。

### 謝董制置居誼辟充成都撫幹啓

簿領抗塵，自分湘濱之憔悴；帥幢辟屬，許令蜀道之攀緣。初無待於懇祈，便力爲之振拔。請裁四六，少謝萬分。切觀我宋帥蜀之臣，無若後趙前張之懿。忠定之薦辟，必方廉恬退之人；清獻之奏揚〔二〕，皆骨鯁敢言之士。欲濟其美，在簡乃僚。伏念某殖學不豐，聞道尤淺。怵於爲養，強營三釜之謀；拙不適時，竟墮一科之底。謂屠龍之可學，又畫虎之不成。孫寶安得自高，且棲矮屋；王珣能令公喜，偶傍轅門。其實出朱入墨之材，終非泛綠依紅之器。駭從臣之出牧，指尊選以見招。我猶未免鄉人，固應累陶鎔之造；翁真善幹國事，何至須斗筭之材。聞已牋閭闔之風，欲共泛瞿塘之水。成

都萬事好，每歌誰能委珪幣之詩；長沙千里平，恐發忍著主衣裳之笑。進退維谷，傴僂循墻。及見文移，不容控避。鮑叔真能知我，他復誰知；政身未可許人，盍爲公許。恭惟某官含弘光大，明允篤誠，親結冕旒，進儀筆橐，晝日三接而天心默契，終歲九遷而人望尚奢。一節使燕，言面無幾微之見；三刀夢益，氣色歸號令之明。欲擇幕賓，必先朝彥。況幾兩幾駟而出，定多驥尾之攀；何一琴一龜之餘，亦取鶴翎之短。以識字有數爲敏瞻淹該之學，以多言數窮爲貫穿通達之材，自視歉然，公言過矣。然已入朝取良馬之數，難更作夕避長蛇之疑。某敢不澡雪此心，鞭磨所學？銘諸肺腑，惟國士遇之，國士報之；借以齒牙，乃執事事也，執事責也。縱使盡無用於世，亦將求不辱其門。舉李生何辭，當謹佩愛直之贈；爲董公從事，豈但陪合樂之嬉。《梅亭先生四六標準》卷九。又見《永樂大典》卷一八四〇三。

〔二〕揚：原作「惕」，據四庫本改。

### 代趙主簿希坡謝衛參帥辟撫屬啓

黃綬抗塵，幸蒙恩而受代；碧幢率屬，辱剡奏以充員。雖未占天問之果酬，豈不假人言而後得。頂踵皆歸於特達，肺肝倍激於輪囷。伏念某名爲皇宗，實本素士。先人存趾，嘗首列於儒科；元舅拊頭，謂必成於宅相。遭家多難，欲仕無津。躡屨擔簦，輕別家園之松菊；懷鉛抱槧，甘依學舍之藿

鹽。偶爾登名，漫而試吏。會計而已，初無出位之思；名實未加，濫竊代庖之譽。不堪位置，何足控搏。泰階六符，忽擁旌麾而至；明堂一柱，不遺庀楔之微。曲假存全，屢令任使。及瓜而代，詎希東閣之留；繞木何依，空結南枝之戀。不圖裁鑑，忽辱薦揚。錐之處囊中，初無見穎；羅而致幕下，欲使空羣。重惟蟣蝨之官，匱乏虬蟉之援。一齊衆楚，豈能回莊岳之音；九舜十堯，不敢望隆冬之穀。知賢而舉，惟斷乃成。縱寄牋閭闔之風，未知利鈍；然銘心泰華之石，豈易銷磨！伏遇某官四海真儒，三朝舊弼。文章有斐〔一〕，再見武公之賢；招選無遺，一洗將軍之陋。自元戎十乘之啓，至長沙千里之平。苟有寸長，悉入大鈞之播；不遺餘力，復收小子之狂。欲令奔走於顏行，力借吹噓而送上。萬一所請或不見却，尋常之恩豈可並言。某敢不銘佩異知，激昂晚節？將母來諗，身雖未可以許人；懷德惟寧，士固必伸於知己。《梅亭先生四六標準》卷九。又見《永樂大典》卷一八四〇三。

〔一〕斐：原缺，據四庫本補。

### 代盧尉仲雋謝諸司辟知資興縣啓

箠楚塵埃之徼福，偶幸代更；繭絲保障之謀人，猥勤特辟。戴使天之私覆，循材地以中慙。惟義柳據楚之上流，而資興號晉之古縣。數百年瓦礫之迹，猶有劫灰；五六載鋒鏑之餘，肇稱新邑。俗多

鼠嘯，財欠鬼輸。欲其賣劍以買牛，相與抱孫而歌犢，是在撫字之職，宜得通練之材。歷數部封，何限囊中之穎；豈期庸委，遂蒙送上之噓。雖未占天問之果酬，然敢不星言而夙駕！伏念某起於寒遠，持是空疏。三年飲墜露於湘濱，一念繞落霞於滕閣。下車攘臂，敢嬰搏虎之嘲；學道愛人，難奉割雞之笑。不虞製錦，輒使代庖。此蓋伏遇某官大鈞無垠，小善必錄。耻納溝不被其澤，欲惠遠黔；出推轂有味之言，不遺寒素。或者封囊之露，許還假印之真。借以聲光，寬其轡策。某敢不力摩凋俗，盡布教條？不鄙夷其民，當使烏言夷面之俗；事慈惠之帥，如在熊旂金節之前。《梅亭先生四六標準》卷九。又見《永樂大典》卷一八四〇三。

### 謝李侍郎稟舉白代啓

玉堂圖舊，趣四輩以來宣；寶閣冠班，舉匹夫而爲代。止流言於智者，發涇記而信然。感固感於相知，慙則慙於不稱。竊以伯禹固遜于后稷，曷嘗稽首于殳斨；宣尼謂不如顏淵，何與及肩之子貢。蓋惟善能舉其類，然擬人必以其倫。未聞取原隰馳驅之夫，謂可備軒墀供奉之數。鳳兮巢閣，方將揚覽德之輝；馬也守閭，正恐累知人之鑑。伏念某欽崎萬狀，拓落一官。器窳識凡，安能超卓；學荒術陋，何有深醇。當先皇之末年，教胄子者數月。一鳴輒斥，刺天不羨於羣飛；四國于宣，見雪幸逃於衆吠。十暑貫岷山之葛，一寒仍范叔之袍。乏四騏四駱之咨諏，端方烏有；無一鶴一龜之風采，澄按

何功〔二〕。豈謂我家侍郎之賢，曲念吾宗孫子之老。惟學士學先王之道，況敷文敷國典之華。兩命以起知章，足爲光寵；一字之拔叔夜，却恐粗疏。德不待於成身，士固伸於知己。此蓋伏遇某官四朝元老，一世真儒。奉命任危難之間，固國還封疆之界。南人不復反矣，東山以公歸兮。然神旗戟纛，既久長於魏師；則光祿金紫，當即封於晉國。走卒知司馬，顧今領嵩陽崇福之宮；胡兒問大蘇，亦知起元祐眉山之學。宜煩泥檢，來趣脂車。幸舍人之治裝，副天子之虛佇。帝乃誕敷文德，正藉臣鄰；王惟圖任舊人，適登丞弼。藉令念小草之有遠志，何至引老芋而替伏神。某敢不銜佩異知，磨礪晚節？集賢以待侍讀，固使臣不敢與聞；征夫豈不懷歸，願君子惟能通志。《梅亭先生四六標準》卷九。

〔二〕澄：原作「登」，據四庫本改。

### 代回董惠州居誼謝舉自代啓

咨垂共工，自當申稽首之遜；舉康自代，得無笑炙背之疏。銜袖惠然，開緘愧甚。恭惟某官有致遠之器，無欲速之心。屢薦不入官，姑取一麾而去；三宿而出晝，無勤千里之迫。難進易退我不如，見賢不薦誰當耻。聊復爾耳，止或尼之。某欲爲王留，徒得君重。得隴望蜀，戲已驗於前言；召鄒延枚，客正觀於末至。《梅亭先生四六標準》卷九。

代回倪告院千里謝舉自代啓

稟令推賢，得公爲重；袖箋委貺，陳義甚高。文則其文，謝非所謝。恭惟某官學有源本，行無瑕疵。委蛇結綠之珍，是宜廟序；騰踏飛黃之駿，而伏鹽車。使在論思獻納之班，必有輔贊彌縫之益。某濫持荷橐，謬廁李官。守正奉公，實不如於戴胄；明刑弼教，義當遜於臯陶。不謂高情，猶勤私謝。惠而好我，皆藹如仁義之言；更以贈君，願力蹈中庸之正。《梅亭先生四六標準》卷九。

# 全宋文卷七二七三

李 劉 九

## 賀黃制置伯固賜金帶啓

分閭疇庸，錫鞶疏寵。三品百鍊，焜煌內府之盼；萬釘九環，褒表中權之勁。不勤使請，彌覺道存。恭惟某官追琢其相，柔惠以直。言忠信，行篤敬，學素得於書紳；極高明，道中庸，強何虞於枉革。上嘉羊祜輕裘之緩，欲厲田單仗鍤之橫，肆分紫磨之真，昭示黃河之信。爲兵餽之何不受，從革作辛；匪伊垂之則有餘，在師中吉。向來衆口之鑠，曾不累月而銷。賜爾通天，略吐胸中之十萬；用汝作礪，便看腰下之兩重。某聳聽夫揚，阻陪旅賀。寬營平先零之漕，倘免裹屍；賜贊皇于闐之珍，尚祈拭目。《梅亭先生四六標準》卷九。又見《翰苑新書》續集卷三七，《啓雋類函》卷六三，《宋四六選》卷一五。

### 賀魏侍郎了翁賜金帶啓

賜璽褒賢，橫金增秩。書盈于閣，進思緯國之文華；帶錫之輦，昭示立朝之賓客。登庸有漸，賚爾非常。恭惟某官根柢六經，光芒五緯。忠信篤敬，學素得於書紳；高明中庸，強何關於衽革。一笑微生於偃月，十年良耻於倚冰。上應念徙薪之言，人望還采薇之帥。姑盼芝檢，仍進松班。申錫九環〔二〕，誰曰有常而循故；庚金百鍊，式彰從革之作新。垂則有餘，服無不斲。裊躡麟趾，不由郿塢之貯儲；鳳閣鸞臺，端屬趙家之世界。無勤使請，更覺道存。橫安平之金，不難破狄；解武侯之帶，寧久渡瀘。袞以公歸，礪資汝作。某聳聞郵報，切賀厦成。兩赤重黃，自異佩茝蘭之葉；千紅萬紫，寧能對松柏之柯。頌詠惟深，敷宣罔既。《梅亭先生四六標準》卷九。

〔二〕環：原作「鑲」，據四庫本改。

### 代回嗣秀王師揆謝賜玉帶啓

揚庭渙號，分寶展親。追琢其章，璀璨簪紳之長；溫潤而澤，彰施袞繡之光。恭惟某官德濬璿

源，望儲琳館。合宮薦瑞，恪陪主邸之恭；御府闡珍，寧假玉人之琢。萬釘錯落，六服焜煌。某未能造朝，猶稽走賀。揚休屹立，更勤珠璧之投；病骨難堪，莫辦瓊瑶之報。《梅亭先生四六標準》卷九。又見《啓雋類函》卷一四。

### 賀綿州高知府定子赴召啓

疇庸廉水，奏計甘泉。駕朱兩轡，去載屹頽波之柱；奉尺一詔，茲辰趨文石之塗。用人如斯，通國幸甚。恭惟某官參旗孕秀，井絡載英。師友卿、雲，黼黻交輝於河漢；伯仲伊、呂，羽毛盍在於雲霄。言從磊落之州，茂著蕃宣之最。適貔貅之狼狽，委鴻鴈於犬羊。一人之情，千萬人之情，親援桴而立鼓；百步而止，五十步而止，紛棄甲以曳兵。公獨作張睢陽之守城，上不識顏平原之何狀。茲令四輩，趣覲九宸。此行登仙，富貴乃緒餘之事；惟公懋德，功名留久遠之看。某屯蹇百罹，睽離半世。玷征夫之濡轡，幸君子之得輿。有德進則朝廷尊，既聞耳矣；所任賢則功施普，當拭目焉。《梅

亭先生四六標準》卷九。

### 回諸處賀召命啓

匹雛無力，久動歸去來兮之思；四牡何功，誤叨詣行在所之命。方切循孔墻之避，未皇謝鄭轂之推。敢意雲箋，先馳霧驛。恭惟某官璽書增秩，斧繡生輝，德既厚於蘇枯，道仍隆於拔茹。噓是拂是，起死草之華風；繫之維之，憐生芻之空谷。齒牙所借，羽翼斯成。顧某欲拜威顏，既慙膂力。不能者止，詎堪再傍於九關；兆足以行，或許退專於一壑。徒勤褒飭，但愧感藏。《梅亭先生四六標準》卷九。

### 謝趙制置彥呐安總領癸仲賀辭召不允啓

漕冰未解，敢希全璧之歸；戍雪將更，誤玷予環之寵。偃僂再三而引避，威顏咫尺之難違。此非左右之先容，孰與吹噓而送上！伏念某志隨學落，氣與年凋。虛警空悲，皆信書而成誤；乾愁漫解，覺行道之猶非。自再泝於岷江，已九鑕於巴火。奉法循理，柰倡矣而莫隨；節用愛人，愧行之之未盡。每覺匹雛之無力，敢言四牡之有功！招大夫以旌，豈爲我設；越小臣諸節，亦厠旁招。未敢隨召駟之塵，但乞返屠羊之肆。詎期異櫝，莫返渙揚。此蓋制置某官以禮樂英，爲詩書帥。十七年干城之

底績，數百戰尊俎之折衝。迄厲二矛重弓之威，俾無疋馬隻輪之返。草尺書而招贊普，聞已請降；獎三軍而定中原，即觀奏凱。每借齒牙之餘論，不遺毛髮之謫材。致茲無用之人，亦有罔功之奏。此蓋總領某官世濟膚公，家傳遠略。卿月高升於金掌，陣雲連捷於玉關。智運木牛，師不憂於左次；權兼茗駿，貢爭效於右牽。佇積勲庸，徑登齔假。每借齒牙之重，不遺毛毳之微，致此湮淪，許令敷奏。某敢不益加黽勉，復策駑庸？雖無治聲，塞海內寡二之間；願陳民隱，當雲中第一之歌。《梅亭先生四六標準》卷九。又見《永樂大典》卷一八四〇三。

### 謝利路高提刑稼賀辭召不允啓

冰漕終更，誤玷予環之寵；露章未允，難從俟駕之私。退循頂踵之歸，皆出齒牙之借。至勤下問，尤佩高情。恭惟某官胸著千年，材兼數器。人或劫劫而不足，公獨恢恢乎有餘。繫之維之，惟恐生芻之空谷；噓是拂是，能吹死草之華風。德既厚於蘇枯，道亦隆於拔茹。致茲頑鈍，亦預招徠。某敢違威顏，既愆膺力。不能者止，詎堪再傍於九關；兆足以行，或可退休於一壑。《梅亭先生四六標準》卷九。

賀董侍郎居誼進職啓〔二〕 雜學除學士

制垣晉秩，寶閣升班。諭蜀良勞，勉徇假留之願〔三〕；登瀛固寵，況加真拜之榮。綸綍載揚，紳綏交慶。恭惟某官清如秋刷，和若春陽。雲夢胸寬，平吞一百八盤而無險；天風背厚，獨負三十六郡而有餘。三年有成，萬物吐氣。不見賈誼，固深半夜之思；願借寇君，難抑庶民之請。仍魚鳧之開國，峻龍馬之負圖。一札細行，增井鉞參旗之重；三謨大訓，貫奎文璧府之華。歡動兩衙，瞻寒西賊〔三〕。學士象八節，不過二歲之少留；刺史入三公，便在五雲之多處。何限麒麟之畫，滿期龜鶴之還。某何足控搏，游蒙料理。白水魚竿之入暮，竟作退飛；青天鳥道之撫膺，又勤羅致。與其徒索長安之米，不如來賦灩澦之堆。直爲文翁再剖符，兆足行矣；安得仙人九節杖，亟往從之。《梅亭先生四六標準》卷一〇。

〔二〕「侍」，原作「待」；「居誼」，原缺。據四庫本改補。

〔三〕願：原作「國」，據右引改。

〔三〕瞻：原作「瞻」，據右引改。

## 賀陳提刑天宜進職啓

懋賞外臺，升班中秘。激西江之水，已驗澄清；貫東壁之星，有光臨照。恭惟某官載揚淑問，誕受嘉師。方當攬轡之初，適有跳梁之寇。無煩獮薶，竟折萌芽。爲赤子，爲龍蛇，各安汝迹；不鯨鯢，不虺蜥，時乃之功。簡于楓陛之知，華以蓬山之直。雲煙縹緲，暫煩俯章貢之流；朝夕論思，行即遂承明之謁。某切聞成命，輒布賀緘。何敬非刑，諒益謹五辭之聽；有功則悅，行將勞四牡之還。

《梅亭先生四六標準》卷一〇。

## 代回趙茶馬彥綰謝進職啓

寶儲進直，璽命諭留。經河緯洛之文書，官由人重；控蜀通秦之樞牧，功以久成。何更爲哉，其有試矣。恭惟某官天潢擢秀，奕葉飛英。禮樂遠而光華，遄車言邁；忠信行於蠻貊〔二〕，思馬斯臧。茲膺因任之榮，仍拜加恩之寵。歲九遷其自此，晝三接以必然。某越在師屯，例蒙異謝。翦白鹿坡前之草，中夜枕戈；對碧雞坊裏之花，何時樽酒。《梅亭先生四六標準》卷一〇。

〔二〕蠻：原作「變」，據四庫本改。

### 代董侍郎轉官謝三府啓

守關山之戍，愧乏殊勳；序歲月之勞，猥升華秩。無功報上，有愧積中。伏念某一出西垂，六逢朔易。惟是窮日之力，粗守封疆；不敢貪天之功，輒僥爵賞。茲蒙恩紀，俯錄年勞。揆厥所元，豈無其自。恭惟某官翼扶萬化，器使羣工。天地爲爐，每曲成於萬物；山藪藏疾，豈求備於一夫。致此孤蹤，亦叨異數。誓殫駑力，仰荅鴻休。《梅亭先生四六標準》卷一〇。又見《翰苑新書》續集卷三八。

### 轉朝請郎謝黃侍郎伯固啓

荒服輦輸，何益樵蘇之後；副郎銖積，叨升糠粃之前。曾微入奏之功，僅守年勞之叙。然於疏拙，亦是僥踰。自昔就第之侯，號奉朝請；本朝雜端之職，頃視班聯。自官制正名之餘，寄員郎前行之祿。遙瞻粉省，知隔幾塵；近視土山，不容一蹴。顧某無似，知命不猶。載馳載驅，曾何裨於苞栩；不稼不穡，亦胡取於廩禾。偶成鑽員外之天，誰實爲將軍之地。茲蓋伏遇某官以大司馬，爲冠軍侯。養民以致賢人，開誠而布公道。河以南皆爲晉土，爭擊楫以渡江；陝而東主之周公〔二〕，且徹桑

於未雨。藉腹中之兵甲，戍塞上之金湯。燕人悅則取之，昆夷維其喙矣。猶念獼猴騎土牛之鈍，欲試奔蜂化藿蠋之奇。下至斗量，尚叨寸進。某所慙骯髒，不足控搏。吾愛吾廬，詎敢希於軒冕；我任我輦，願少緩於鞭笞。《梅亭先生四六標準》卷一〇。

〔二〕陝：原作「挾」，據四庫本改。

### 轉朝請郎謝監司啓

內服輦輸，何益樵蘇之後；外郎銖積，叨升糠粃之前。曾微日奏之功，僅守年勞之次。然於庸譴，亦是僥逾。自昔就第之侯，號奉朝請；本朝橫榻之任，實視班聯。其爲員外之前行，蓋在官制之改後。遙瞻粉省，知隔幾塵；仰視土山，詎容一蹴。顧某無似，知命不猶。水馬之走徒勞，自甘退舍；土牛之騎宜鈍，何敢着鞭。偶成鑽員外之天，誰實爲將軍之地。茲蓋伏遇某官仁深引類，義重噓枯。憐其剪籠中之翎，假之羽翼；憫其困轅下之輓，借以齒牙。既費挈提，又加獎勞。愧無成績，可書日月之常；尚託餘庥，歸守煙霞之痼。《梅亭先生四六標準》卷一〇。

### 回趙司戶等賀轉官啓

斗壘藏瘝，曾微歲最；天朝懋賞，俾叙年勞。是爲平進之常，難講同寮之謝。敢圖高誼，見畀屬辭。恭惟某官義篤官聯，情親事契。胥保惠，胥教誨，有味其言；孰披拂，孰吹噓，不愛其力。有憐邊賞，躡綴外郎。笑猴騎土牛之蹤，真成鈍滯；觀雀化水蛤之變，要是沈淪。或承之差，不知所賀。某未能辟穀，久已思尊。士夫爭磨勘而殺人，幸容苟免；將軍以告身而易醉，行可丐歸。《梅亭先生四六標準》卷一〇。

### 改官謝丞相啓

璧水綴員，已抱罔功之愧；金閨登籍，復叨寓祿之恩。此聖世優職事之常，而愚儒無功狀之實，全出鑪錘之造，敢忘竿牘之恭？切以祿至宣德之階，雖八品秩；俗羨通班之寵，號再登科。舉必五員，職須六考。貳卿爲之進卷，萬乘至於臨軒。使百里或九十之差，則分寸有千丈之落。幸獲通於班筭，又免待於成瓜，惟甄異於庭紳，許帶行於職組。以此刈薪於翹楚，斯亮天功；如其不稼以取禾，曷孚人望！如某者起於素賤，加以朱愚，自安鸞鳩斥鷃之棲，亦乏蚍蜉蟻子之援。隨材官蹶張之後，

不自意全；補文學掌故之聯，已逾分願。感大鈞無垠之播物，欲小子有造於成人。進之東膠，告於南面。如絲如綸而如紵，有隕自天；在沚在陵而在阿，孰爲之地。伏遇某官坤厚載物，鼎亨養賢。耻一夫之納溝中，欲得其所；招諸生而立館下，恐毀於隨。故雖糾錄之曹，亦假超遷之渥。某敢不修其可願，欽乃攸司？卑者止高者流，當益厲六館之仁勇；直而溫寬而栗，庶可助九德之敷施。《梅亭先生四六標準》卷一〇。

### 改官謝喬司業行簡啓

同第七卷《除國錄謝葛祭酒啓》頭

伏遇某官道航聖瀆，材棟儒林。左史讀五典三墳，蓋將倚相；國子學九德六舞，暫假司成。當江濤如此之時，軫根本眇然之慮。欲作成於六館，以表厲於四方。有濯者淵，不嫌葭葦之衆；言刈其楚，蓋爲薪樵之儲。況素出於門墻，尤願承其模範。某敢不尊其瞻視，識所步趨？雖藻火粉米之不同，貴賤位矣；儻蘋蘩錡釜之可薦，左右芼之。《梅亭先生四六標準》卷一〇。

### 回劉教授大川謝舉改官啓

綴曲江之題，知賢已久；玷直指之寄，察士爲先。方蹶蹠於循墻，遂蹉跎於削牘。有來巽謝，良

仞謙光。伏惟某官行有宮庭，文爲輦輦。吹更生之藜杖，孰非鴻寶之書；栽夢得之桃花，不作大鈞之問。淹回如此，靜退恬然。茲雖騰一鶚之章，恨未足五紆之數。某蟆頤無政，龍節非材。下車而舉慈明，豈種私門之桃李；築臺而招郭隗，欲開公道之荆榛。惟慙程力之綿，更辱摛文之綺。《梅亭先生四

六標準》卷一〇。

### 賀瀘帥楊尚書汝明進職奉祠啓

元帥賢勞，清都均逸。文昌八座，昔倡九牧以阜民；幕府十年，今解伍符而還里。顯拜綠綈之寵，峻加紫殿之班。歸哉歸哉，幸甚幸甚。恭惟某官柔嘉維則，從容以和。節槩抗岷峨之橫，淵源深江漢之濯。高塵迅步，不受人間風日之塵；緩轡徐驅，徑曳天上星辰之履。五月瀘溪之入，九鑕巴火之新。大國十連，民無遺便；細書一札，王曰遄歸。乃思晝行之榮，欲就晚賦之樂。日出而作，皆言倦飛則知還；夜行不休，誰作急流之勇退。偉公高節，立我懦夫。孔戡耳目未覺衰，力控二宜之疏；溫公肺腸爲己有，暫營獨樂之謀。況幾兩幾駟，羨巨源之歸；而一壥一區，足子雲之樂。南方已定，足可從赤松之游；東征是皇，尚當爲蒼生而起。某夙蒙異顧，輒布賀忱。既羨公未老而得閑，又愧我每懷之靡及。挹浮丘之使，尚願執鞭；登黎侯之樓，或蒙援筆。《梅亭先生四六標準》卷一〇。

## 賀李侍郎進秩敷文閣學士提舉嵩山崇福宮啓

《杕杜》勞還，《崧高》均逸。大行臺之保大，載續武功；真學士之拜真，誕敷文德。有偉急流之退，式觀晚節之香。恭惟某官博極羣書，洞視萬古。用之禮義，講唐虞於細氈；詰爾戎兵，撻秦楚之堅甲。昔者狂瀾之倒，屹然暢轂之堅。遠楊邇昭，外鎮內撫，盡護諸將，不聳一塵。王曰遄歸，將運籌帷幄之內；我戍未定，且收身矢石之間。學士象四時，光祿正二品。祝釐太室，真聞呼萬歲之三；詔祿禁廬，又可襲六藝而七。班接西京之鸞鶴，歡騰北墅之龜魚。名與身而孰親，事隨憂而共減。起視當世，允謂全人。某聳聞除書，亟裁斐語。起溫公於崇福，不無願公入相之人；迎老子於函關，且致爲我著書之請。《梅亭先生四六標準》卷一〇。

## 賀安觀文丙除節使開府宮觀啓

代董制置

元老求閑，清朝疏寵。齋壇授鉞，新大將之威儀；揆路影纓，等上公之體貌。仍峻竹宮之領，用華梓里之歸。綸綍載揚，紳綏胥慶。恭惟某官材弘且毅，器博而周。所守匪親，化爲豺狼，頃幾失劍門之壯；無禮於君，誅如鳥雀，公迄回沔水之朝。是爲非常之功，宜受不次之賞。况尅復四州於談

笑，而撫摩八載之瘡痍。若時登庸，遂典樞機之貳；聞命就道，又成藩屏之留。方深虛佇之思，忽控養恬之請。橐兜戟纛，儼十乘以啓行；衡統紘紼，視三階而命秩。仍從神圉，以佚安期。是爲地上之仙，何愧山中之相。向也雲無心而出岫，今則水有時乎回淵。惟出入將相之榮，雖聖賢而難必；至功名終始之際，尤今古之罕全。貫一節於行藏，知百年之壽考。從容甲第，寧肯甘田宅之汙；笑傲午橋，自可窮園林之勝。某聳聞盛事，敬仰高風。季鷹思吳，亦欲爲適志之舉；司馬還蜀，何當效負弩之迎。《梅亭先生四六標準》卷一〇。又見《八代四六全書》卷一〇。

### 代秘丞林郎中夢英謝丞相得祠祿啓

老而妄動，自速煩言；罪以疑輕，尚沾微祿。重惟疏謬，倍費保全。戴洪造之難名，撫孤蹤而增感。伏念某狷弗諧世，戇獨愈人。少而耻有道之賤貧，妄希干祿；壯始悟不義之富貴，亦足辱身。固嘗把江海之麾，惟不願冰山之倚。甫違繒繳，便入林泉。食神圉之祠凡五六任，頓屠坦之刃幾十九年。自量叔夜之不堪，任笑仲連之強作。毋友不如己者，乃師教之；以義強委重焉，則君命也。自屠羊之反肆，即殺馬而毀車。誰誤聽聞，忽加拔擢！念士非其招而往，孔子奚取焉；苟傲無所恃而行，韓愈亦人耳。抗辭有罪，引疾爲欺。冒然扶憊以奉承，識者逆憂其顛沛。清班難僭，顧再轉而爲丞；素行久愆，非一鳴而輒斥。既云欺世，安所避刑？竊鉄無往而非疑，聚鐵不容於鑄錯。乍賢乍佞，身

已變於三期；僞行僞言，誅何逃於七日！投荒已幸，續食謂何。豈老芋之似茯神，元非罔市；而遠志之爲小草，失在出山。無墜諸淵，姑予之釜。譽而召，毀而去，聖則何心；吉之先，動之微，汝曾不悟。致勤大播，如此曲成。伏遇某官謙虛受人，坤厚載物。謂士非梁冀之賓客，謾與招徠；至人言盧杞之姦邪，固難覆護。怒猶疑其溢惡，殺寧失之不經。疾雷震霆，於物無存全之理；蓋天容地，乃今知寅亮之功。見大德之好生，豈匹夫之受賜！某仰銜厚施，已迫頽齡。斗升之活波臣，固貪舊物；七十而致君事，正在新年。與其身後重作僞之愆，不若生前瀝祈哀之悃。澗愧林慙之無盡，悔不可追；鍾鳴漏盡而不休，行將焉入。得反初服，實出大鈞。小人之過必文，何嗟及矣；君子之愛以德，願卒成之。《梅亭先生四六標準》卷一〇。又見《永樂大典》卷一八四〇三。

### 代李制機大有得祠謝丞相啓

幕府效愚，猥蒙重劾；公朝宥過，特畀真祠。感無地以寄言，德如天而難論。伏念某才固無似，命亦不猶。門戶百年，難問庭前之雀；科名二紀，真同竿上之魚。幸且安百里之子男，誰使作諸侯之賓客。既叨贊畫，安敢隱情！堂上之兵，未可屈人於不戰；幕中之辯，真乃以我而爲傾。怒因水蟹之移，殃竟池魚之及。言如綸綍，固疑乍佞以乍賢；法猶權衡，寧免則筆而則削。奪其兩秩，倏已期年。適逢肆眚之恩，輒動問鈞之請。賜之大，知之至，前感已多；閔其窮，察其愚，茲恩尤厚。過蒙

復玷，特賜祝釐。疾雷震霆，於物無存全之理；祥風甘雨，乃今有覆露之功。恭惟某官社稷世臣，鼎彝家學。以一二日萬幾之無曠，乃十五年獨力而有餘。得伊尹以格皇天，亦既俘三醜之寶玉；問鄧禹而披輿地，行將膺萬國之貢珍。諒欲四海之會同，益思九德之咸事。矧惟孤迹，夙累一陶，茲加拉拭之仁，殆有發生之漸。某敢不銘心圖報，沒齒銜恩？桃李盡在公門，豈終使一株之慘淡；葑菲無以下體，尚希發寸草之華滋。《梅亭先生四六標準》卷一〇。又見《永樂大典》卷一八四〇三，《啓雋類函》卷三二。

### 回李致政坤載啓

聯事少城，一星終矣；懷章仁里，數月于茲。未皇致擁篲之恭，猥先辱踵門之見。恭惟某官盤根仙種，發藻儒英。夷惠可否之間，夙播仲元之譽；達榮前後之舉，莫回令伯之高。終難縮手於袖間，竟出摘髭於頷下。一第直涵子，終嫌識路之疾驅；再轉不負丞，甘作急流之勇退。尋橘中之四皓，見林下之一人。致爲臣而歸，良可厚近古之俗；從邦君其上，尚爲賦遠景之樓。某爲長於斯，得人焉耳。車幾兩，馬幾駟，孰不羨楊侯之賢；薤一本，水一盂，更願聞任棠之誨。《梅亭先生四六標準》卷一〇。

## 回彭致政琛謝致政壬仲啓

一經教子，人服義方；五福錫民，天頒仁爵。未皇走慶，先沐陳箋。伏惟某官典刑老成，魁壘耆艾。漢庭用少，功名雖恨於蹉跎；周王作人，壽考固同於飛躍。蔚秋蘭之流馥，忻春草之隨袍。貴老爲近於親，式稱綵衣之養；乞言以成其祿，會聞黃髮之詢。某及交阿戎，還識叔夜。壽胥與試，此何與魯侯之功；盍歸乎來，行即顯文王之世。《梅亭先生四六標準》卷一〇。

# 全宋文卷七二七四

李 劉一〇

代林運幹良顯謝丞相啓

書考求文字

干大播於一陶，俾登畿幕；積小成於三考，獲進選階。頂踵歸塊圯之功，肝膽極輪囷之感。敢因摧謝，更叙依歸。伏念某材無脩人，學未聞道。半世寒窗之燈火，中年太學之蠶鹽。篆刻雕蟲，覺兔毛之欲禿；銜枚戰蟻，偶雞口之先鳴。遂采魯芹，出燃楚竹。未滿戍瓜之代，忽纏家棘之悲。隙駒之制易終，林鳥之哺益切。上書光範，初無蟠木之先容；得闕長安，乃辱采葑於下體。謁來半載，何有寸勞。夏屋督工，粗逃曠敗；春闈考士，獲廁使令。及大庭聞魁三之傳，則本房有簋貳之數。然雖有依紅之樂，尚未霑破白之章。七十偏親，一則以喜，一則以懼；斗升微祿，時乎爲養，時乎爲貧。茫然寸步之謀，甚矣分陰之惜。鼠肝蟲臂，固難躁進以妄圖；馬渤牛溲，或恐兼收而並蓄。恭惟某官鼎彝家學，衮冕世臣。撫五辰於泰階之平，載萬物以坤元之厚。復文武之境，已昭元老之壯猶；歸鄆瀆之田，足見真儒之已效。然益旁招於俊父，欲令聚在於闕庭。故凡絲粟之材，未始蒯菅之棄。尚念某

亢身無策，仰首自鳴。桃李成蹊，自合安不言之分；樓臺近水，詎能忘先得之情。《梅亭先生四六標準》卷一一。又見《永樂大典》卷一八四〇三，《啓雋類函》卷三二。

### 代察判徐愿謝史丞相啓

得五紙文字

補京兆之椽，曾微贊畫之長；交公車之章，茲拜成終之賜。自匪載驅於四牡，何由一發而五紆。毫髮不假之他門，頂踵皆歸於化治。有言雖淺，進謝敢稽？伏念某才乏線長，力尤綿薄。十年太學，身嘗百甕之蠶；一第集英，袍已半霜之葉。昨終素鞵，重累洪鈞。泛綠依紅，猥使近長安之日；草玄尚白，誰肯賤閭闔之風。始焉一鶚之飛，繼以乘鴈之集。再而衰，三而竭，孰與點睛；二之下，四之中，正須合穎。況當百里九十之半，更覺分寸千丈之強。忽蒙雷電下取之勞，遂有埃風上征之路。何物不由於洪造，此身獨拜於全功。茲蓋伏遇某官八柱世臣，三槐家學。方當鯉趨過庭之際，已傳虎拜稽首之心。更化十六年，無匹夫不被其澤；闢國數千里，復寧王有指之疆。益閎翕受之規，丕廣旁招之意。里仁爲美，似憐桑梓之偶同；舉能其官，特取蘋蘩之可薦。感一力挈提之厚，增寸心銘鏤之私。某敢不勉自激昂，圖惟報稱？雞犬舐鼎，難更干點化之功；鰥鼠飲河，當自詭承流之效。感藏不盡，敷述奚殫。《梅亭先生四六標準》卷一一。又見《永樂大典》卷一八四〇三，《啓雋類函》卷三二。

代吳省倉貶謝丞相啓

縮次

貧累清時，許守漢倉之粟；老須遠次，忽臨齊戍之瓜。此恩夙出於大鈞，於義宜伸於小牘。伏念某身勤事左，意廣才疏。家世占寶唐之濱，學問皆環溪之訓。少而有志，頗欲就博習修潔之科；壯則無奇，亦屢玷德行道藝之貢。歲不我與，命與仇謀。烏帽黃塵，凡五排於禮部；青衫白首，又兩進於計臺。終然蹉跎，成此遲暮。漫作兵厨之隱，聊爲簿竈之依。青天鳥道之拊膺，雖嘗奏辟；白水魚竿之入幕，何敢疾驅。如此頭顱，淒然脚色，奚敢作堂除之夢，猶難干京局之除。時方張更化之弦，公實權造化之柄，冒爲冶躍，便辱甄收。使守九年之儲，令待四政之闕。植梨橘柚，大非老人所種之宜；構櫨侏儒，偶在宰相兼收之列。聊裝鋪席，歸老林泉。不謂俟河之清，乃成縮地之脉。洛中親舊，書傳犬耳之黃；吳下官曹，事報烏頭之白。僮奴欣怪，里巷驚疑。高下在心，只合避賢者之路；進退維谷，反恐負相國之知。尚堪一行，不遠千里。然非恃無垠之塊北，亦寧免將進而趑趄！恭惟某官清任以和，直方而大。手麾九日，太陽行黃道之中；坐鎮八年，微物出洪鈞之播。雖風霆不言流形之利，然天地能照許國之心。外撫四夷，內熙百度，收毛髮絲粟之細，入竹頭木屑之藏。晉卿之舉七十家，不遺筦庫；祐甫之除八百吏，皆是舊知。冒焉而來，恃此無恐。某敢不靖共爾位，洗濯其心？却日揮戈，收效在桑榆之景；涓辰擁篲，奉身歸桃李之門。《梅亭先生四六標準》卷一一。又見《永樂大典》

代饒運幹誼謝史丞相啓 改任

幹茗事於番禺，妄求易地；贊漕輸於湘浦，竟辱回天。俾依青草之湖，庶免黃茅之瘴。此恩渥甚，何感猶之。伏念某樸學無奇，散材不腆。踏槐半世，幾隨兔目之黃；采藻十年，似守烏頭之白。偶叨終秩，未及問鈞。五嶺聞其皆炎，初無去志；諸公憐其獨冷，誤有辟書。元戎欲處之油幢之中，真宰遂寘之茗寮之末。等勤大播，徑合疾驅。惟是孤瑩之蹤，寸勇尺懦；實聞疫癘之地，十室九空。率爾陳情，期於避禍。媒身無策，難空冀北之士夫；換骨有方，乃綴湖南之賓客。獲避飛鳶之跼，姑從檣燕之留。茲蓋伏遇某官秉國之鈞，熙帝之載。更政化當更之琴瑟，續聖賢難續之鼎彝。益贊禹而格苗，誕布舞干之化；尹相湯而伐夏，迄垂典寶之書。然猶耻溝中之推，必欲濟天下之溺。印趣銷而趣刻，足昭從善之仁；衣改造而改爲，益表好賢之意。某敢不敬其可願，欽乃攸司？綠水紅蓮，已感移栽之惠；青芝赤箭，尚希並蓄之恩。《梅亭先生四六標準》卷一一。又見《永樂大典》卷一八四〇三。

代李總幹伯長改任謝史丞相啓

回馬首於鹽亭，不良擇地；護鼠牙於粟庾，有渥自天。當趑趄將進之間，拜垓北無垠之賜。謫焉孤賤，辱此一陶。竊惟京口之積倉，實切邊頭之仰哺。總司創闕，裹糧兼坐甲之司；堂選掄材，弄印致閱時之久。蓋戰德戰謀之際，惟去兵去食之難。爲米折腰，雖不離於祿仕；簸糠眯目，易有誤於軍須。必爲官而擇人，庶因能而任職。伏念某一寒無挾，百拙有餘。伯父取之庭階，補以京秩；弟兄習乎弓冶，志在世科。偶尺寸之蹉跎，漫斗升之囓嚼。中嬰家難，復詣吏銓。煮海爲鹽，妄欲供富媼之役；無麵作餅，或謂非巧婦之能。况當避嫌，不免易闕。自笑鮎魚之上竹，何翅羝羊之觸藩。一指之不若人，猥勤伯氏之請；匹夫之失其所，亦關造物之憐。迄蒙倉庫氏之除，全出光範門之造。恭惟某官鼎彝家學，社稷世臣。巫賢之繼巫咸，不但底王家之父；伊陟之紹伊尹，真足格上帝之心。雖九德敷施，均不遐遺，而一門小大，尤蒙器使。烏鵲遶樹，真同撼木之蚍蜉；牛羊求芻，乃肯發機於驥鼠。某敢不修其可願，欽乃攸司？錢穀甲兵問於廟堂，當識士大夫之職；棖闌店楔成其室屋，無忘明宰相之功。《梅亭先生四六標準》卷一一。

## 謝丞相書考啓

補上佐於黔巘，偶書下考；貢空函於黃閣，莫報實恩。偶暫攝於竹符，尤倍希於樾蔭。忘其喋喋，布此惓惓。伏念某殖學疏蕪，涉道短淺。青泥盤足，每思範我之馳驅；白雪滿頭，寧復初心之邂逅。進乏犬雞之效，退從鹿豕之遊。辱坯冶之一陶，俾翱翔於半刺。牂牁爲徼，雖非監螃蟹之州；盤瓠見容，偶免築鯨鯢之觀。竹齋藥竈，不礙雲山；芰製荷衣，無邊風月。適挈瓶之缺守，又越俎而代庖。胡瞻爾庭，人固疑其鶉突；此非子坐，自亦愧於象環。所祈新尹之疾驅，庶遂陳人之退屏。明年今日，固可歸三逕之荒；凌雨震風，尚合假萬間之茆。恭惟某官得聖之任，爲帝者師。衡紱紘紼，增鼎鉉九九之重；箕裘弓冶，協泰階兩兩之符。行由絕席之尊，徑陟維垣之峻。人主職論一相，具瞻槐面之專；太傅府有三才，詎棄竹頭之細。所祈全度，非冀超遷。某敢不補拙以勤，謹終如始？深懲往轍，躋分寸而落千丈之強；雖踵常塗，視九十爲行百里之半。其爲歸倚，罔既敷宣。《梅亭先生四六標準》卷一一。又見《永樂大典》卷一八四〇三。

謝魏侍郎了翁爲先祖先父作墓誌啓

先美無傳，凜負子孫之責；幽鑄有託，蔚爲祖考之光。屬拘柱後之文，莫布堂下之武。敬裁儷啓，恪布謝悰。竊惟隧刻罕見於先秦之前，墓碑似昉於後漢之末。正而斃斯亦已矣，身將隱焉用文之。如郭林宗尚可免伯喈之愧，若陶元亮又何待延年之辭。降逮李唐，最崇韓、柳。韓銘正曜，定非諛墓以攫金；柳表文通，亦豈遺人之矻石。蓋覺良工之獨苦，有憐沒世而不稱，發其幽光，時乃天道。重惟先祖父之學，不事今科第之謀。一門千餘指之肅雍，是亦爲政；九流百三家之貫穿，止以潤身。不徒稱鄉里之善人，實有得名教之樂地。維廉、藺固不羨曹蜍之無恙，然夷、齊要是得夫子而益彰。恭惟某官有德立言，以文貫道。粹若出六經之正，凜然寒五緯之芒。搴芙蓉而賦詩，洞識陰陽之消長；傍梅花而讀《易》，詎忘天地之彌綸。頗哀墜緒之茫茫，恐與常流而泯泯。既取贊皇之實錄，以誌楚金；復叙奕城之世家，就銘明允。仍加篆書八分之賜，俾免不稱三服之羞。一門存亡，百世感激。某敢不昭告屏攝，表刻墓埏？儻得保首領從九京之遊，庶無泚面目達中心之愧。微薄不以廢其禮，何足爲碑板之酬；夙夜無忝爾所生，用此爲師門之報。其爲感鏤，罔既鋪敘。《梅亭先生四六標準》

## 謝衛參政涇差校正書籍啓

小材出位，願歸朱墨之勾稽；大府量能，留備丹鉛之點勘。少振塵埃之冗，倍勤坯冶之陶。竊以三館文書，固遴雋正編摩之選；諸侯賓客，率多獄訟財賦之司。寧有伺候公卿之門，更容休息篇籍之囿。憐韓愈之非職，俾就閑官；期呂蒙之讀書，非爲博士。沫濡鮒轍，啄抱鶴翎，使養是氣而塞天地之間，將和其聲以鳴國家之盛。知花於見根之始，乞漿有得酒之恩。求之古人，亶在今日。伏念某少諧平側，長識偏傍，不深石室之紬，僅曉金根之讀。遺經獨抱，未辨豕渡河之三；良史博觀，粗知馬與尾而五。有時北窗高卧之夢，頗思東觀未見之書。三神渺在於海中，五鬼難驅於坐上。插架三萬軸，但當守鄴侯之書；家集二百篇，幸皆是撫州之寫。然作吏此事便廢。亦有命焉；惟投閑乃分之宜，傷哉貧也。久留戲下，宜在遣中。遽冒小朝廷之除，使策行秘書之職。茲蓋伏遇某官榮分湘閩，並用楚材。義負偃植，各安所施，耻匹夫之弗獲；根闌店楔，惟器是適，無一藝之不庸。試黃閣之規模，收碧油之人物。至如狂簡之小子，亦勞塊北之大鈞。某敢不祇此簡書，呻其佔畢？珥貂分陝，已收下體之菲葑；給札登瀛，願備一株之桃李。《梅亭先生四六標準》卷一一。

代袁子固謝縣宰啓 寬假

箠楚之下，何求知難全璧；縲紲之中，非罪迄就罰金。敢不持咫尺之書，少謝寬一分之賜！惟越人之相攻擊，蓋其俗然；而長安之羣殺傷，各有主者。況已過都而歷塊，誠難被髮以纓冠。儒者好高，未免爲役而耻役；隸也不力，又可與言而不言。但催科未動是閑人，豈期會不報爲大政。所謂行人失者，乃使吾身親之。方入聞言偃之弦，忽使受曾參之杖。主人讀未知主人罪也，自怪其頑；天下寶當爲天下惜之，誰興此念！惟體膚受之父母，而衣冠耻在國家。馬遷腐刑，何面上先人之墓；孫臏刖足，快心蹶上將之軍。故滕公釋韓信之囚，而小白解夷吾之縛，知其不可復續，所以寧失不經。向使當時淫及善人，安得異日報以國士！如某者詩書門戶，燈火生涯。小杖則受，大杖則走<sup>(一)</sup>，非其職矣；千乘之邑，百乘之賦，切願學焉。惟是受滕一廛，敢辭于役；然且去齊三宿，難疾其驅。偶鄰境之胥戕，坐家人之失告。鶴非有祿，徒以鶴警之失期；鴈或不鳴，要亦鴈奴之有罪。不虞投足，卒禍及身，業已逮於桁楊，勢難逃於榱楚。自度受李日知之杖，又當變余安道之名。然使撻之市朝，得無傷於冠帶！無小人，無君子，宜玉石之俱焚；有里胥，有大夫，乞薰蕕之是辨<sup>(二)</sup>。伏遇某官堯族俊德，周家懿親，粹然麟角之祥，屈此牛刀之試。謂重士所以重國，要當體朝廷長育之心；知察獄先於察情，又豈容胥吏上下其手！況開設學校，方將馴化於鴟梟；則愛惜人才，何忍鞭笞於鸞鳳！致此

纓餘之棄，亦從金作之刑。某敢不策髀肉之功名，勉皮膚之學問？痛懲臨難之苟免，益思學道以愛人。儻許國之可期，當措刑於不試〔三〕。自此不復贖矣，安用以撻記之。鞭甯越而立威名，既知免於東海；出鄒陽而爲上客，尚有望於梁園。《梅亭先生四六標準》卷一一。

〔二〕「小杖」至「則走」，原缺，據四庫本補。

〔三〕本句原缺，據右引補。

〔三〕試：原作「式」，據右引改。

### 謝曹直學賀雨啓

伏以和巴歌之二闕，遏雲足繼於謳青；贈唐律之七言，喜雨宛同於醉白。莫辦雙金之報，徒深十襲之藏。《梅亭先生四六標準》卷一一。

### 謝曹直學喜雨詩啓

伏以瘴我以旱，良窘望雲；有志乎民，辱書喜雨。徒切誦清風之穆，未遑和白雪之高。《梅亭先生四六標準》卷一一。

### 回平江府沈侍郎送酒啓

杓斡龍躔，日又賓於暘谷；香凝燕寢，地孰勝於蘇州。矧惟荷橐之賢，宜介椒盤之祉。恭惟某官德參陰鷺，道配陽休。奉行寬大之書，繭絲免矣；宣布中和之樂，襦袴煖然。諒報政於吳門，即歸班於魏闕。某一寒寡與，獨冷何辭。猶幸太歲之在申，例容乞酒；遙祝壽星之出丙，莫遂稱觴。《梅亭先生四六標準》卷一一。

### 回岳總領珂送酒賀正啓

天躔回甲，聿新曆數之盼；歲紀在申，將應酒泉之讖。時維膚使，日進堪祺。恭惟某官德配陽休，功多陰鷺。漕下冰解，師有宿飽之期；掌上月升，日佇辰猷之告。聊暫紆於羔袖，即徑上於雞翹。某家本一寒，官宜獨冷。窮年兀兀，只自慙廩粟之糜；清夜沉沉，賴肯續燈花之酌。《梅亭先生四六標準》卷一一。

## 回新都廖宰子材送酒及石榴啓

伏蒙郇翰，寵賁陶籬。餉以乘壺，定有可人之味；侑之碩果，中存多子之祥。續歡伯之風流，洗醋兒之酸楚。已從竹葉，獲觀令尹之清；尚想榴皮，可頌中書之考。《梅亭先生四六標準》卷一一。

## 代回安撫趙尚書送物啓 一

共六尺之輿，同寅良幸；分丈二之組，先甲已頒。悵遂告違，顧勤亟餽。惠而好我，慚取數之孔多；却之不恭，敢下拜而登受。區區衷謝，續續面陳。《梅亭先生四六標準》卷一一。

## 代回安撫趙尚書送物啓 二

一麾出守，漸可解維；同官爲寮，蒙加折俎。維多維旨，且感且慚。敢貢記室之辭，少致兵厨之謝。《梅亭先生四六標準》卷一一。

### 代回趙京尹餞送啓

已辭軒陛，漸理舳舻，更勤加餽之稠重，采芻大寮之篤叙。既醉既飽，腹不勝其屬饜；載忻載奔，面無由而控謝。《梅亭先生四六標準》卷一一。

### 代回臨安府七夕送物啓

抱拙終身，倦乞犬牙之巧；未能免俗，頗安犢鼻之貧。臺餽鼎來，尹釐意厚。酒醪醇壹，況加雞柘之甘；餼餌馨香，仍儻螺甲之旨。備此四美，跂彼七襄。莫宣銜戢之私，但劇嚅嚅之感。《梅亭先生四六標準》卷一一。

### 回蹇學諭賀得粟九穗啓

一莖九穗，昔嘗疑司馬之諛；異壟同榮，今顧辱昌黎之頌。雖君子之政不以物怪，然太師於詩可見民風，要非于祥而于仁，恨弗以規而以頌。民曰太守，太守不有，何敢當儒館之歌；秀升司馬，司

馬辨材，請以旅天子之命。《梅亭先生四六標準》卷一一。

### 回李僉判賀瑞粟啓

某導九穗於漢庖，此真偶爾；歌五言之唐律，何德當之。不敢續貂，恐譏集鵲。唐叔之得同穎，安敢望周公之歸；劍南之進嘉禾，亦難上柳子之表。姑藏佳句，以俟豐年。《梅亭先生四六標準》卷一。

### 回王監酒提督修城啓

伏以三里之城，不修則壞，一日必葺，欲罷不能。擬煩督戊巳之屯，相與營甲戌之築。龍見而畢，不妨節用以使民；隼射于墉，亦可待時而藏器。《梅亭先生四六標準》卷一一。

### 代回運使賀雪啓

黃雲紀瑞，肇新魯觀之書；白雪效祥，遄應梁園之賦。能令公喜，不在我先。恭惟某官德配陽

和，氣排冬凜。有功使臣歌《四牡》，兼此二難；省事天公厭兩回，併成一賀。方圖面慶，又辱手牋，不成報章，尚幾幸察。《梅亭先生四六標準》卷一一。

### 回陳術士啓

某適勤枉顧，寵畀儷箋，不但知五行之精，抑又窺多文之富。其爲感佩，罔既報酬。《梅亭先生四六標準》卷一一。

# 全宋文卷七二七五

李 劉 二

謝張秘校晉臣投詩啓

並代月湖

蒙以契家之舊，贈之佳句之新。昔人三百篇，世寡和矣；古詩十九首，君突過之。但深巾笥之藏，莫效檐榆之報。《梅亭先生四六標準》卷一二。

謝汪秘校莘惠詩啓

方味大篇，又饗長句。冠切雲，佩明月，正自不凡；濟白水，登閬風，居然相導。恭惟某官抱負奇志，屈摺壯圖。文采離離，猶可和其聲而鳴國家之盛；詩律坎坎，何至虛其腹而藏天地之愁。子亦來見我歟，僕未有可師者。參橫月落，不堪喚夢於羅浮；目擊道存，何必相期於汗漫。區區衷曲，續續面陳。《梅亭先生四六標準》卷一二。

謝監鎮陸子適惠詩啓

今早特勤，古風見畀。句有家法，信他日之聞詩；老無喜機，羨故人之有子。恭惟某官爽貫眉目，清入肝脾。昌黎門庭，未免金根之誤；杜陵衣鉢，僅存玉案之吟。郎君於此勉之，放翁爲不亡矣。某幸蒙委重，愧乏報嘉。欲俎豆予，我久周旋寧作我；願金玉汝，君家所有更贈君。《梅亭先生四六標準》卷一二。

謝林秘校季熊投詩啓

伏勤枉顧，寵惠名篇。曾前惠之未酬，已厚章之洊至。雪巢有子，不孤珠玉之編；月湖無詩，可作瓊瑤之報。聊以數語，寫此寸誠。《梅亭先生四六標準》卷一二。

謝盛登仕夢弼長書啓

寵示長牋，就貽大冊。非至篤好，何能多如是耶；所謂立言，亦甚似而幾矣。愧乏檐榆之報，徒

華巾笥之藏。《梅亭先生四六標準》卷一二。

### 謝許新恩裕惠詩啓

茲勤佳句，良感高情。或疑年使之年，此事可念；以吾老及人老，何力可施。徒參患脚之禪，莫救旋渦之佛。《梅亭先生四六標準》卷一二。

### 謝蘇秘教丙啓

杜門具奏，方此乞骸，叩戶論詩，失於倒屣。恭惟某官長材素蘊，餘事清吟。觀秋月之兩章，羨春雲之多態。天未喪斯文也，復聞永嘉之音；子亦來見我乎，應認江西之派。某亦聿既耄，兆足以行。贈我綺琴，乏雙南之報答；乞君霞珮，請萬里以頡頏。《梅亭先生四六標準》卷一二。

### 謝程監丞準啓

荐勤真蹟，加貺名篇。對秋月之兩章，仰春雲之多態。爲施厚矣，無謝可乎？恭惟某官一世典

刑，三朝壽隽。雖老子婆娑，自安於橘穎；然此翁矍鑠，猶可以蒲輪。誰知幽桂之遺榛菅，坐令積雪之困桃李。咀冰嚼玉，戲刻畫於無鹽；洗醖傾樽，巧噤吟於唐舉。惠而好我，何以報公。某久倚長松，竟成小草。借君詩而消永夜，自不成眠；期吾王之召將軍，更宜善飯。《梅亭先生四六標準》卷一二。

### 謝朱新恩遜投書啓

比辱訪存，特勤書況。雖過情之可耻，然荷意則甚勤。恭惟某官學踵乃翁，氣吞餘子。襟懷磊落，不專紙上之蟲魚；談笑從容，遂蹙草中之狐兔。當季康子患盜之日，正班定遠封侯之時。乃援古人，以方我輩。一之爲甚，四者難并。人豈不自知耶，今願竊有復也。殺賊奴，取金印，何待明年；縛單于，寘藁街，更期他日。《梅亭先生四六標準》卷一二。

### 謝吉州楊司理彭年惠詩啓

比勤三顧，寵惠六詩，巧刻畫於無鹽，力扶持於夜燎。不知所報，當贈以言。恭惟某官自策英躔，宜收名第。青衫白首，氣碑兀而未降；丹筆墨曹，翅翩翩而方展。不謂睡龍之寶，猥加羅雀之

門。御盃酒，接慇懃，且承至止；遣一介，奉咫尺，更幸亮之。《梅亭先生四六標準》卷一二。

### 謝周秘校噩之惠梅詩啓

叢桂移文，問周倫之好在；官梅動興，笑何遜之重來。非吾之故人耶，所見者今我也。恭惟某官城市大隱，山澤真癯。拍洪崖，挹浮丘，疑遊八極；召鄒生，延枚叟，又客諸侯。茲辱顧存，未遑迎肅。終然不可口，過勤黃山谷之詩；殊不類其人，殆似宋廣平之賦。某甚安斗食，焉用鼎羹。月落參橫，荷喚起羅浮之夢；水邊雪後，願更續和靖之篇。《梅亭先生四六標準》卷一二。又見《翰苑新書》續集卷四〇。

### 謝會稽趙宰善韞啓

委刺見臨，袖書爲贄，惟是事契之有素，豈假文字而後明。恭惟某官仕有長材，政多善狀。製劍池，釀丹井，久樂林居；探禹穴，上會稽，猶須瓜戍。雖淵明不辭五斗之屈，然士元豈是百里之材！兆足以行，改之爲貴。某緬懷先契，幸及英游。主司疑則辨之，此情可亮；相國知之至矣，何說之云。《梅亭先生四六標準》卷一二。

### 謝石秘校巖啓

比勤下顧，寵示高文。贈盈把之瓊瑤，拜嘉已腆；列成編之鍾磬，取數何多。恭惟某官水北名聲，山西家世。耻懷紉之簪笏，服韋布之縑紉。脩父機、雲，欲上規於姚、姒；衙官屈、宋，肯平到於陰、何！藉少低建隆之功勳，足可備慶曆之諫諍。公等安在，吾道非耶！遺我明珠，皆照骨而映驪目〔一〕；乞君飛佩，會刺手而拔鯨牙。某得非所蒙，願竊有復。文章小技，計已空處士之羣；節誼大閑，願不替純臣之教。《梅亭先生四六標準》卷一二。

〔一〕「照」，原作「映」；「映」，原作「睡」。據四庫本改。

### 回劉進士日起惠書及封事藁啓

代月湖作

惠以長書，將之奏藁。一介而言天下，古亦有之；十漸之當帝心，人誰辦此！恭惟某人山澤志士，畎畝忠臣。范希文之居憂，不忘國計；張齊賢之獻策，會即面陳。某久已語離，忽勤言贈。吾愧之，不敢恨也，徒抱朝饑；公安在，何見晚耶，佇觀暮召。《梅亭先生四六標準》卷一二。

代回謝秘校耘投詩啓 代衛參

寵投短刺，就貺長篇。梨非飮坐之珍，豈能抵玉；桃匪蟠枝之實，敢辱報瓊！至於濁醪，亦如惡札，不敢咏酌君之語，乃先辱起予之詩。占此奉酬，察之良幸。《梅亭先生四六標準》卷一二。

回吳教授投啓和詩啓

伏勤巧思，見和拙詩。細窺秋月之兩章，備見春雲之多態。迫斯可以見矣，敢疑識面之遲；忠焉能勿誨乎，安用過情之譽。《梅亭先生四六標準》卷一二。

代回朱上舍中有啓

餉以新詩，儻之舊藁，蕭然四立之壁，得此兼乘之珠。藏弄爲榮（一），不知所報。恭惟某人胸蟠古學，手挾天章，茲遙賦於高唐，已洗空於下蔡。詳味三四篇之健語，載觀十九首之遺音，失餘子於牛毛，發寒光於驪目。惠而好我，雋甚逼人。某愛莫助之，顏之厚矣。開張篋笥，諒無須津筏之求；

劃豁垠崖，所願見琳琅之取。《梅亭先生四六標準》卷一二。

〔二〕弄：原作「去」，據四庫本改。

### 回前蘄春陳尉格惠詩啓

昨日伏勤，古風見惠，論交既久，陳誼甚高。恭惟某官服襲典刑，緒餘翰墨。太丘遺愛，多池上之鳳毛；季方難爲，蓋眼中之犀角。猶憐綠水紅蓮之舊客，曾陪碧梧翠竹之英游，春容大篇，刻畫老醜。如猛起約世故之句，顧不偉歟；抑擇術無小用之言，猶相憶否！王何必假，更爲綵棒之淹；儒果用真，會復青氈之舊。某過勤投壁，莫辦報瓊。登樓而憶侍郎，既無及矣；指廳而坐縣尉，何幸見之。《梅亭先生四六標準》卷一二。

### 回張上舍端道啓

博我以文，竊承嘉惠；愛人以德，何至溢言。請以屬辭，報其盛意。恭惟某官勇高六館，學綜九流。觀其崇論欲議之間，眇然深思長慮之計。以道相盥，茲意甚深。覺民之先，此言何爲至我；任士

之重，所有更以贈君。某有幸納交，願安承教。凡是俎豆予之意，固已拜嘉；亦有金玉汝之情，尚幾見亮。《梅亭先生四六標準》卷一二。

### 回羅省元啓

垂琳琅於金薤，得所未曾；報瓊琚以木瓜，闕然無有。敢修儷語，略謝盛心。恭惟某官蘭菊之家，梗枿其質。一經接踵，不難俯拾於紫青；萬卷蟠胸，安得長嘲於玄白。時來爲耳，人謂斯何。有來秋月之兩章，足見春雲之多態。然下有千歲苓之意，雖東坡尚不敢當；至向來一瓣香之恭，惟南豐乃爲無愧。某自知不武，難與斯文。借聽於聾，求道於盲，正恐無益於賢者；加膏而光，養根而實，其敢有愛於言乎！《梅亭先生四六標準》卷一二。

### 回熊省元蒙正投贈啓〔二〕

漫刺下臨，極慰仰高之想；屬辭光賁，能無投暗之疑？恭惟某官學富家傳，美宜世濟。桑弧有志，豈徒糊口於四方；篳路何憂，蓋將友士於千乘。茲沐檐榆之贈，但深巾衍之藏。某德愧多涼，官甘獨冷。厚意慰蹙然之喜，何敢或忘；虛名誤賢者之來，不知所報。《梅亭先生四六標準》卷一二。

〔二〕蒙正：原缺，據四庫本補。

## 回徐殿幹暄投四六啓

登畿入幕，榮不揜慚。趨隅撫衣，幸堪親教。甫諧望履，遄辱鳴謙。藹然仁義之言，既聞之矣；豈以筋力之禮，望長者哉！重勤四六之貽，莫效萬分之報。輒裁狂簡，少謝高明。《梅亭先生四六標準》卷一二。

## 代回張秘校子賢惠詩啓

比勤謁入，尋辱詩來，良深感荷之情，敢虛往復之義？恭惟某官湖海豪氣，風雲壯懷。諫批逆鱗，昔嘗長太息者六；工歌鳴鹿，今將肆宵雅之三。得句驚人，以文博我。卿言大好，能無夜光暗投之疑；民可小康，當在朝奏暮召之後。《梅亭先生四六標準》卷一二。

## 回吳判院玘惠詩啓

榮被新除，寵貽佳句。脫身枳棘，來監公子之倉；回首芙蓉，寧戀假王之印？我厭朝班之綴，公方故步之尋。判院不比尋常，惟當拭目；山莊元無呵殿，更望垂情。《梅亭先生四六標準》卷一二。

## 回屈學正投書詩啓

丞哉負余，余負丞哉，殊乏吟哦之伴；長者絕子，子絕長者，抑何交際之遲。振履鼎來，鳴謙泰過。恭惟某官莫敖華胄，正則故家。宗派西江，識快閣千山之大；僑居東鄙，開遠軒三尺之明。茲終素韞之祥，行奉丹墀之對。龍飛九五，庚桑盍早於贏糧；鵬擊三千，子木何勞於衷甲。茲蒙布武，見賁雄文，加之仁義之七篇，華此蓬蒿之三徑。不知所報，藏去爲榮。某爲州治中，在疆域內〔二〕。固恨何相見之晚也，猶欲就有道而正焉。友其士之仁，子若無言幾失子；文以氣爲主，君家所有更贈君。《梅亭先生四六標準》卷一二。

〔二〕疆域內：原缺，據四庫本補。

### 回呂將仕啓

某伏蒙紆顧，寵賁長牋。未先睹於景星，幸茲小尉；辱暗投之明月，復此大慚。但深篋笥之藏，莫效瓊英之報。《梅亭先生四六標準》卷一二。

### 回衆官袖啓

伏蒙銜袖，見賁儷牋。合璧連珠，於粲光芒之正；編鍾列磬，了非世俗之音。良欽墨妙以筆精，但覺禮踰而情過。兩喜而多溢美，曷克堪任；七襄不成報章，但深愧負。《梅亭先生四六標準》卷一二。

### 回官員學職袖啓

洊承厚意，疊貺儷牋。墨妙筆精，仰窺瞻麗；禮踰情過，洊極感慚。嘗修造謝之恭，僅奉留名之命。惟息肩之方始，覺脫腕之頗勞。七襄不成報章，良孤隆施；兩喜之多溢美，仰懼瀆辭。《梅亭先生

## 回學職士人啓

茲蒙盛刺，見賁屬辭，竊窺四六之工，良重再三之嘆。亟嘗造謝，僅辱留名。退深巾衍之藏，莫效檐榆之報。《梅亭先生四六標準》卷一二。

## 回景省元啓

夙勤臨顧，見賁儷牋。偶缺肅迎，退深誦味。辱引前賢之跡，俾爲後學之師。佩意甚勤，拊躬曷稱！尚規晤語，敬布謝忱。《梅亭先生四六標準》卷一二。

## 回宗子與銓啓

伏勤屢顧，見畀屬辭，極欽著語之工，但重過情之愧。恭惟某人天潢濯秀，風調軼羣。上方重歆、向之材，錫之蕃庶；君宜勉賀、白之學，副此簡求。佇觀千里之駒，亟振九苞之鳳。某濫膺郡寄，幸託里仁。承焚林竭澤之餘，若爲共理；有拔薤置水之警，切幸告忠。《梅亭先生四六標準》卷一二。

## 回王省元啓

屣履迎門，喜接雙鳧之舄；文書銜袖，辱摘孤鶩之詞。既見異人，頓忘九折。恭惟某人譚高玉塵，材擅瓊杯。逃狗曲之譏，暫且謝諸生而還舍；依鹿鳴之樂，行當頌聖主之得賢。結襪以須，彈冠伊邇。某十年出幕，兩焰生巾。甚苦月攘一雞之征，無復人生五馬之貴。乏李膺之模楷，誤辱肯臨；範王良之馳驅，當圖請益。《梅亭先生四六標準》卷一二。

## 回李叔璋啓

伏蒙銜袖，寵賁駢珠。知爲河北之相家，且接江西之宗派。欣逢若士，何啻似人！惟是過情之褒，殆非望賜之意。它人不如同姓，願聞拔薤之規；終日雖則七襄，莫稱投桃之報。《梅亭先生四六標準》卷一二。

## 回合同王將仕啓

茲蒙寵顧，見畀雄文，竊窺四六之工，良重再三之感。恭惟某官人門具美，地位夙高。淹回筦榷之卑，培益事功之會。某過勤獎予，彌切兢慙。徒勞篋笥之藏，莫效檐榆之報。《梅亭先生四六標準》卷一二。

## 回王進士啓

伏蒙紆顧，寵賁長書，味藹如仁義之言，知賢者深遠之慮。宿蠹正難於驟革，頽瀾未易以亟回，苟有祝規，更希忠告。區區衷曲，續續面陳。《梅亭先生四六標準》卷一二。

## 回黃將仕啓

伏蒙下顧，損賁長篇，知宗派之由來，信家風之不墜。見似人而喜，真足慰蓬藿之逃；和此君之題，會更洗箏琶之俗。《梅亭先生四六標準》卷一二。

# 全宋文卷七二七六

李 劉 一二

## 回王進士啓

茲佩高情，見貽佳句。歌刺史之頌，愧非西京二千石之良；繫諸侯之風，乃合《召南》十四篇之數。報於何有，藏以爲榮。《梅亭先生四六標準》卷一二。

## 回楊貢士啓

伏以樂正論士而升之，未皇請益；公等何見之晚也，忽辱鳴謙。非所宜蒙，願竊有復。恭惟某官詞章炳蔚，器度端溫。得意狗監之官，肯輕進取；子雲《羽獵》之賦，行有吹噓。試觀屬辭比事之文，足見發策決科之學。某濫分守印，獲託士鄉。非浮橋之魚，迫斯可以見矣；哀涸轍之鮒，忠焉能勿誨乎！《梅亭先生四六標準》卷一二。

## 回蘇秘校材啓

吳、蜀萬里，夙知益者之多聞；蘇、李五言，良愧倡焉而寡和。近古之三信在，得名之雙謂何。地下日月光，應察驥箱之服；江空歲年晚，誰爲馬口之銜。《梅亭先生四六標準》卷一二。

## 回史機宜大異啓

一門三秀，未見長公之波濤；七言五章，始窺幼婦之機杼。喜故人之有子，爲老成以賦詩。但深巾衍之藏，莫效瓊瑤之報。《梅亭先生四六標準》卷一二。

## 回程秘校以南啓

辨蘆菰之獄，夙知纘陰鷺之功；謁薤本之規，未及望陽休之色。有勤枉駕，更賁屬辭。伏惟某人德裕乃身，世濟其美。待時藏器，冠蜀都沈冥之珍；它日趨庭，實漢朝方正之學。若爲公等之見晚，真覺我輩之厚顏。某未皇款門，先辱傾蓋。自衛尉將軍之宿契，是可通家；藉翰林墨客以報章，別圖

問政。《梅亭先生四六標準》卷一二。

### 回見任官袖賀啓

承流支郡，曾微牧御之方；出節本朝，誤被將輸之命。已伸免牘，亟奉俞音。敢圖銜袖之書，特枉編鍾之奏。恭惟某官風猷俊茂，天韻碩膚。齒牙秋露之甘，手筆春雲之藹。噓物以氣，可回燕谷之溫；贈人以言，何翅楚珩之重。遂令載馳載驅之任，猥及不狩不獵之夫。某畏此簡書，蕭然疲役。某水某丘某樹，願歸遂於釣遊；我任我輦我車，希別謀於咨度。《梅亭先生四六標準》卷一二。

### 回史秘校公誨獻策啓

迷日五色，智良愧於失人；置水一盂，惠足占於好我。屬辭爲教，陳誼益高。恭惟某人直哉史魚，飄然司馬。遐想六王畢之作，必無萬物茁之疑。大樂正詔王升諸，宜登春講；諸弟子隨臣久矣，竟坐冬烘。敢謂愛忘，不加督過。有來論事，益見憂時。言言非無益之談，鑿鑿皆可行之策。顧恨挈瓶之守，不敢越畔而思。前茅中權，今皆鄉人之善者；積薪上寢，自可纓冠而救之。幸疾其驅，且忠以告。某一麾乃出，再鼓而衰。磨牙殺人，未覺早還家之非計；泣涕陳策，何待夜前席而後言。《梅

亭先生四六標準》卷一二。

### 回楊普州伯雨袖詩啓

千古在前萬古後，僕安知栗陸之書；六字常語一字難，公真得栢梁之體。所慙佳句，適重愧情。恭惟某官氣抗岷峨，文濯江漢。子雲河東之賦，天自吹噓；伯起關西之聲，家傳清白。所居民富，而畏人知。行登鵷鷺之班，安用蚍蜉之援。金鑾論事之語，何至我哉；鈞天無人之悲，今召君矣。《梅亭先生四六標準》卷一二。

### 回趙進士大正啓

伏辱郇公之翰，知爲韓國之家。社稷世臣，自合襲山河之爵；箕裘夙學，亦應簞俊造之班。茲窺筆下之雲煙，可見胸中之湖海。願安承教，不成報章。《梅亭先生四六標準》卷一二。

謝得解啓 丁卯

仰破屋而抱遺經，噴會心之無幾；裹粗繒而隨舉子，嘻免俗之未能。解后吾味之偶同，摸索此君之小異。欲棄雞肋，復美羊腔。人驚喝盧得雉之危，我抱志目中眉之愧。嘗謂選舉所以籠豪傑，安知亦足銷豪傑之心；場屋謂之興賢能，或者疑爲老賢能之術。士任重而道遠，辰去速而來遲。鄧高密願效尺寸之心，笑人寂寂；褚彥回少過三十之念，使己囂囂。蓋欲乘感會之風雲，豈堪送瀟灑之日月。如某至愚不肖，甚賤且貧。每懷萬物皆塵土之思，頗念吾道非曠野之物。年當五歲，日記萬言，實希蹤楊文公之辭章，復妄意晏元獻之科目。莫能送上，安得熱中！付甲子於泥塗，逐庚癸之饑渴。君門不可以徑入，法當從試於有司；夜光屢失之暗投，或是晚成之大器。雖杜陵許身稷、契之意，誰肯信之；然草廬自比管、樂之心，恐不免爾。吟高軒過，羅胸謾詫於星芒；說古戰場，過眼還迷於日色。五隨秋試，例困冬烘。翦翎觀百鳥之翔，回首覺萬牛之重。無能辨璞，只合更刀。脫漢賦，辭楚騷，雖依依而未忍；觀魯史，知周典，幸歷歷之可明。技癢爲之，途窮甚矣。求田問舍，已破除湖海之豪；應舉覓官，又勒回山林之駕。或謂餘勇，猶足先登，及工歌鹿鳴之三，乃夢踐飛翼之八。芳杜厚顏，薜荔蒙耻，願一洗之；菰蔬盈室，荃蕙爲茅，由來久矣。要之借汝腹中過耳，又何山人跨下慙乎。鵬怒而飛，鷺匿則擊，是亦細事，無足多言。唯是吾皇頒詔舉賢之時，實以今日多事得人爲急。

裴晉公之解韋釋布，正淮西盜起之時；韓魏公之發策決科，乃天聖日升之始。有益於國，無競維人。感人物之眇然，嘆江濤之如此。四郊多壘，士之耻也；萬里長城，國有人乎。宜拔實才，入充歲貢，不應庸下，亦在選中。伏遇某官持刑明允，已清碧草之扉；畫諾從容，復入紅蓮之幕。茲獲聯於薦送，何謬及於單微！云云。某敢不高束三傳，精研一經？思游、夏不能措之辭，條舒、蕢所未陳之策。謹按直筆，猶足誅未死之姦諛；稍遂初心，誓不忘平生之溫飽。《梅亭先生四六標準》卷一三。

### 縣補魁中謝縣令啓

聖經賢傳，指未究於數千；遂序黨庠，首辱推於第一。其細已甚，不足乎揚。然累土乃九層之階，故積律自一黍而起。況是萬家之縣，利用百篇之書，由鄉校以發聲，粲仕途之接武。至如直筆，見謂孤經，前輩罕用此以下帷，後學遂束之於高閣。豈知數百世盛衰之監，具在萬八千褒貶之言。孫弘慙而謝鄉人，丈夫淺矣；仲舒衰然爲舉首，吾道非耶。某甲志無奇，丁年逾邁。無端讀書，已墮左計；登高能賦，更負悔心。手縱敏於八義，眼易迷於五色。造化無功於筆補，瑕疵皆得而毛吹。用是息黥，倦於取則。蠹書叢只，麟史在焉，遂偷白日之閑，竊考素王之旨。筆則筆，削則削，頗知齊、晉正譎之情；信傳信，疑傳疑，仍見公、穀婉裁之趣。亦創通於大義，豈盡達於微言。長恐畫虎之不成，必至屠龍之無用。自惟鑄錯，孰與訂頑。屬聞君子之弦歌，將興春誦；咸謂有司之衡鑑，莫遯秋

毫。聊爾逢場，豈其定霸。萋菲貝錦，果聞其後；播揚糠粃，不意在前。謂我不堪，於公何有！伏遇某官以魯禽父，作楚縣公。妙割無雞牛，民自得於桁楊之外；空弦落狐兔，士亦慙於櫝楚之威。有懷桑椹之好音，還舉棘闈之故事。且從隗始，以善鄭來。某敢狃近功，遂忘遠業？玉川破屋而已矣，當益抱於遺經；武城得人焉耳乎，請僭陳於故事。西府先生之在吾泮，賸有菁莪；東閣郎君之稱其家，可無桃李。胡不招諸生而立館下，從而養弟子以教國中。盡拔十得五之功，必有濟以上；酬以一當千之夢，寧謂秦無人。《梅亭先生四六標準》卷一三。

### 謝成都解頭劉省元應起啓〔一〕

制春秋之義，傑出妙齡；貢鄉曲之英，裒爲舉首。未遑贊慶，過辱修辭。恭惟某人青藜故家，碧梧雋質。被孟母三遷之教，獨抱遺經；當陶舒二八之年，創通大義。遂魁里選，行冠臚傳。某何預升賢，亦蒙異謝。愧游、夏一辭之莫措，但知頂戴於名經；慕回、路二子之與言，更冀潛心於大業。

《梅亭先生四六標準》卷一三。

〔一〕起：四庫本作「龍」。

## 謝成都解元五十一人啓

恭審論秀貢英，策名偕計。少城百重列隧，自應炳井絡之靈；後賢五十一人，夙已載華陽之志。茲應元年明先聖之詔，式副吾皇紹烈祖之期。伏惟某人屹自岷峨，濯以江漢。相如七經之授，不專靡麗之辭；子雲四賦之工，蓋有湛深之思。茲並登於天府，聞允愜於月評。某未遂納交，過勤委贄。客星入斗，恐當回八月之槎；魁首枕參，尚及窺五雲之瑞。《梅亭先生四六標準》卷一三。

## 回臨安江解頭克家啓

遺經究終始，指洞識於數千；考官敢瑕疵，擢宜居於第一。雖知有無德無怨之語，然可道不公不明之嘲。何煩摘文，更加摧謝。恭惟某人傳家忠孝，餘事文章。安夏攘夷，聊復道桓、文之事；發凡言例，又能措游、夏之詞。空萬馬以皆瘖，戴六鰲而爲首。其義則竊取矣，幸不辱天府之書；盡心將親覽焉，尚幸聽雲門之奏。某慙無識鑑，濫主文衡。掣鯨鯢於碧海之中，僅塞直鈎之責；對龍蛇於丹墀之下，願無曲學以言。《梅亭先生四六標準》卷一三。

### 謝解頭景簡文啓

屢入澤宮，聞夙擅《春秋》之學；褒爲舉首，喜可塞月旦之評。有勤屬辭，良高陳誼。伏惟某官學濟世美，教自母慈。景子君臣之大倫，久於舒究；仲尼筆削之微意，何止創通。當再進再却之餘，厲萬選萬中之技。楚雖有玉，正恐在三獻之餘；秦豈無人，其誓告羣言之首。某濫叨勸駕，愧闕贈鞭。先十二以犒師，已窺肯綮；擊三千而徙海，尚見扶搖。《梅亭先生四六標準》卷一三。

### 謝衆解元啓

貢郡國之英，濫修歲貢；詢鄉曲之譽，喜協月評。何勤屬辭，特枉抒謝。伏惟某人學窮根柢（二），文識波瀾。插架五千，耻爲無用之蠹；累棋十二，迄承若掇之蜩。張焱省元用百篇坦然之書，占七人作者之列。高拱辰省元茲提麟筆之孤，上應鳳苞之九。句龍道省元茲策彫蟲之工，竟登乘鴈之數。有司論秀，免不公不明之嘲；國家急賢，望斯謀斯猷之入。某過勤委贄，何與提衡。三魁天下之儒，在加意耳；五靈王者之瑞，尚寓目焉。《梅亭先生四六標準》卷一三。

〔二〕人：原作「官」，據四庫本改。

## 回陳上舍伯鳳啓

相如入室，蜀賦自工；張叔詣京，漢都增重。有勤曳履，且辱鳴謙。恭惟某人江漢載英，岷峨擢秀。子昂始高蹈，信有雲仍；季方難爲兄，夙高月旦。比者齊魯之賦，粲然虞夏之庠。志目中眉，屈居曰俊曰造之冠；擢角拔齒，粗免不公不明之嘲。茲蒙四六之貽，良重再三之愧。某頃從化闈，獲讀《阿房》。吹河東以上天，幸窺吐鳳；圖天南而擊海，更願培鵬。《梅亭先生四六標準》卷一三。

## 回水丘先輩袞謝解啓

考其行藝，恐遺天府之賢；擇乎中庸，偶協月評之望。所謂得子之是賴，少道有司之不明。敢圖謙撝，更加異謝。恭惟某人殖學有裕，掞才不貲。曲禮三千，得恭儉莊敬之教；重言十七，非瑣碎排偶之詞。茲歌鳴鹿之三，遂賦良馬之四。強學待問，不難得祿以得名；正心脩身，諒必踐言而踐行。某摩挲俗眼，邂逅譽髦。何勤纚履之臨，更垂銜袖之贈。洗風塵之袍袴，愧少緩於報章；對日月之衮衣，願更思於長策。《梅亭先生四六標準》卷一三。

### 回趙先輩子直謝解啓

登于天府，正恐負賢能之書；采之月評，幸不失鄉曲之譽。何勤私謝，更費雄文。恭惟某人學深百篇，氣蓋諸子。不但勤簡編之燈火，蓋亦富師友之淵源。浩乎沛然，久已喧京師之價；論其秀者，固應拔俊造之羣。茲歌《鹿鳴》之三，果空鷺鳥之百。某濫竽計吏，冒主文盟。考十七之重言，幸逃迷眼；勉三千之獨對，更望盡心。《梅亭先生四六標準》卷一三。

### 回武岡新舉蕭漢龍啓

詢鄉曲之譽，未遂承顏；獻賢能之書，忻聞舉首。有來委質，益仞鳴謙。恭惟某官巫水之英，斗山其秀。深灝灝噩噩之學，究明明穆穆之源。呂侯之辟三千，既知奧義；蕭何之功第一，宜稱名家。幸益窮上世之遺書，庶亟對皇帝之清問。某濫叨涉筆，何與提衡。聞東海生之名，喜先鳴於雞口；養北宮黝之勇，願拭目於龍頭。《梅亭先生四六標準》卷一三。

## 回新舉王道明啓

采芹論秀，夙聞能賦之聲；撤棘登名，果中賢書之選。未皇走賀，猶辱謝牋。恭惟某官家學有源，鄉評甚膺。擬《靈光》之作，久負逸材；奏《混成》之篇，行占遠器。茲步漢南之獨，遂空冀北之羣。鵬擊三千，更觀變化；龍飛九五，亟快依乘。某不武之資，斯文何與。一第溷子，未足見志士之榮；三釜及親，願以爲執事者勉。《梅亭先生四六標準》卷一三。

## 回免舉士人謝啓

樂正論秀而升諸，得時則駕；公等何見之晚也，博我以文。鳴謙尊光，擊節降嘆。恭惟某官舊穿楊葉，新躡桂叢。鵬怒而飛九萬里，風斯在下；龍潛以躍三千字，日固未斜。惟時懋哉，遐不謂矣。某已稽掃榻，偶失迎門。子來見我乎，良感贈言之繾綣；吾亦欲東耳，尚容拭目於騰驤。《梅亭先生四

六標準》卷一三。

### 回免解杜省元啓

論定秀士之賢者，久欲納交；不見諸侯若小然，茲勤委贄。文既工於儷六，雅復許之肄三。恭惟某官句似少陵，學如元凱。牧之能賦，宜高擢於唐科；子夏直言，盍亟登於漢殿。公等安在，主上喟然。從先生者七十人，有勤私淑；搏扶搖而九萬里，會即高騫。有如骹骹之文，何辱簸揚之巧。某聿來和義，深願友仁。一話一言，固已可觀於奇崛；三熏三沐，尚圖續款於清揚。《梅亭先生四六標準》卷一三。

### 回試官袖啓

某伏以獻賢能之書，有嚴春貢；登文章之錄，來主夏盟。既爲國以得人，更以文而博我。恭惟某官學探宏奧，味別澠淄。夜几跋紅，寧慮三條之燭盡；寒窗穿碧，豈容五色之眼迷。提玉尺以裁雲，倒珠胎之貫月。搜《阿房》之賦，料亦焦心；論石渠之經，諒多拔角。《春秋》十二，已歸此日之權衡；禮樂三千，何惜當年之衣鉢。某茲承撤棘，幸遂識荆。思饑蠹蝕葉之聲，悵難尋於舊夢；寫饕蝨濕薪之景，尚願聽於新篇。《梅亭先生四六標準》卷一三。又見《啓雋類函》卷四九。

## 回王省元胄謝取中啓

觀《春秋》之林，潛心久矣；登文章之錄，爲首褒然。足愜公言，何勤私謝。恭惟某官深於蓄德，餘以績文。束五傳而抱遺經，獨明大義；外四夷而內中夏，洞究微言。果以海內寡二之才，出當天下第一之選。義則竊取矣，可道有司之不明；來不亦樂乎，更幸斯文之未喪。至如榮進之素定，何待抗聲而自陳。某偶綴蝨官，預窺麟筆。求珠而徑寸先得，自賀其遭；跂織而七襄不成，未知所報。

《梅亭先生四六標準》卷一三。

# 全宋文卷七二七七

李 劉 一三

## 回何釋褐大主啓

中的璇魁，解韋壁省。十九年無全牛之刃，頓見異材；九萬里運化鵬之程，實開遠業。恭惟某官學有源委，行無瑕疵。曲禮三千，富春誦夏弦之學；圜橋億萬，高月書季攷之功。果收傑出之科，亟被非常之渥。榮進素定，無負明天子之殊知；要路在前，自有鄉先生之近比。某濫叨倚席，例沐投瓊。壽知武故厚之，敢爲諛語；堅於愈同業也，敬誦祝規。《梅亭先生四六標準》卷一三。又見《啓雋類函》卷一五。

## 回郭正奏應王正奏已之啓

策名外省，趣對中宸。三卯風塵，率聚五星於十月；六丁雷電，迄搏六翮于九霄。得賢之稱，通

國以懌。恭惟某人箕裘家學，圭璧鄉評。讀百篇科斗之文，夙研奧義；及重闡慈烏之哺，遂擢巍科。某人夙堅雅操，獨抱遺經。瀘水七禽，轉蓬不嫌於地遠；沅江九肋，擢桂遂破於天荒。諒加強學待問之功，式究正主庇民之蘊。某誤蒙渙號，濫主坤文。穎人稱之曰門生，既聞耳矣；仲舒褒然爲舉首，尚拭目焉。占謝惟深，敷宣罔既。《梅亭先生四六標準》卷一三。

### 回嘉定張正奏庚仲啓〔二〕

奏賦蜀都，登名漢殿。西望太白，固疑有沉冥之珍；東越玉津，乃今得曄曄之秀。公言甚愜，私謝何塵。恭惟某人岷峨之英，江漢以濯。學皆齊、魯，箕裘殆張叔之家；文麗卿、雲，鼓吹有平子之作。嘉魚固出於丙穴，顧兔迄變於卯年。鼓三級以先登，及雙親之未老。龍墀之對三千字，更幸勉之；健爲之磬十六枚，自此升矣。某幾迷五色，幸放一頭。吟饕蝨濕薪之詩，何幸快風塵之洗；轉走馬看花之句，願亟乘天地之寬。《梅亭先生四六標準》卷一三。

〔二〕張：四庫本作「王」。

### 回辛正奏守謙張正奏東寅啓

摘藻奏名，集英趣對。毛穎對於卯地，開蟾蜍入月之祥；雲夢吞於子虛，展駟馬題橋之志。恭惟某人玉津毓秀，磬水蜚聲。辛云周太史之雲仍，宜箴王闕；魏佐治之風烈，盍引帝裾。張云遙遙張叔之家，學固同於齊魯；巖巖孟陽之裔，銘遠綴於岷嶓。遂掃三峽千人之軍，上輔五星十月之聚。九萬里風斯下，已開鵬海之程；三千字日未斜，無負龍墀之問。某謁來石郭，獲讀《阿房》。說古戰場，幸免眼迷於日色；吟《高軒過》，尚幾手決於天章。《梅亭先生四六標準》卷一三。

### 回類元唐正奏應龍啓

學者發凡言例，多違舊章；大夫精心致思，裒爲舉首。幸公言之惟允，何私謝之敢當。恭惟某人大江炳靈，通泉噴薄。能賦如勒，夙擅詞章；學《易》於都，更深經術。究遺經於獨抱，會大義於創通。文成數萬指數千，首先鳴於雞口；臣書第一無第二，今徑躡於龍頭。惟功名留久遠之看，即溫飽非生平之志。察牛堪之意，既不違俗而取名；知顧郎之恩，更期蓄力而秉志。某初微風鑑，濫佐星堂。青袍白紵之糊名，已多迷於方叔；紫磨黃金之定價，願無負於長公。《梅亭先生四六標準》卷一三。

又見《啓雋類函》卷五一。

## 回郭正奏佺啓

闕郭公之疑，昔嘗恐《春秋》之罪我；道齊桓之事，今始論秀造而告王。愧余五色之眼迷，遲公十年之身到。恭惟某人岷峨世載，江漢淵回。塾林宗之巾，夫子步亦夫子；老汾陽之考，中書乃不中書。信大器之晚成，嫌脩門之徑入。秋風退鷁，坐觀巴火之九鑕；春浪化龍，始透禹門之三級。願培鵬背，徑跨鰲頭。某濫佐星堂，安知風鑑。束之高閣，知無用公、穀、左氏之文；造在大庭，尚聳聽晁、董、公孫之策。《梅亭先生四六標準》卷一三。

## 回曹正奏啓 一

策名上第，趣對中宸。司徒論秀而升諸，幾迷五色；公等何見之晚也，亟放一頭。幸愜公言，何勤私謝。恭惟某人振鐸昭穆，子建波瀾。列仙甚癯，聞素甘於蓼藿；良工獨苦，善致養於棘薪。茲遂一鳴以驚人，式副三遷之教子。曹交假館，所謂求之有餘師；仲舒造庭，佇見褒然爲舉首。某謁來五壘，得讀《阿房》。青衫當綵衣，至羨封人之有母；丹墀攄素蘊，更觀讜論之告君。《梅亭先生四六標

準》卷一三。

## 回曹正奏啓 二

二年滿戍，鷁回首以東歸；再命作州，螭朵頤而西顧。有勤賀語，祇發愧情。恭惟某人春藻吐葩，秋竿秉節。一第溷子，聊償戀闕之丹心；三釜及親，足慰在堂之白髮。猥承妙製，見遺陳人。某藏去爲榮，已知所賀。踟躕五馬，良慙出谷以遷喬；縹緲孤鴻，但願送江而入海。《梅亭先生四六標準》卷一三。

## 回王正奏正寅啓

一第直溷子耳，安用謝爲；幾日來見我乎，更勤言贈。爲之三復，佩此一謙。恭惟某人世載其英，學優則仕。紫電將軍之庫，尚有典刑；紅帶宣義之家，豈其苗裔。一奏河東之賦〔一〕，載空冀北之羣〔二〕。某偶佐文衡，獲觀筆陣。於我無怨亦無德，但吟坡老之詩；有司以公不以情，愧乏昌黎之序。《梅亭先生四六標準》卷一三。

〔二〕一：原缺，據四庫本補。

〔二〕載：原缺，據右引補。

## 回張正奏申之啓

策名外省，趣對中宸。知我者《春秋》，罪我者《春秋》，幸已酬俯拾之芥；先進於禮樂，後進於禮樂，安知非居上之薪。恭惟某人家傳一編，胸藏三篋。遺經獨抱，精於措游；夏之詞；大義創通，較若辨桓、文之事。迄膺衆選，進以言揚。某偶綴文闡，獲觀筆陣。辨棟梁於七年之後，幸免遺材；器根柢於萬乘之前，更觀拔萃。《梅亭先生四六標準》卷一三。

## 回特奏名李學正鳴鳳啓

謝策登名，拜恩諾仕。公等何見晚也，而迷其邦；論定然後官之，其有所試。伏惟某人負材瓌特，蓄學淵深。太白有文章之光，宜早登於唐殿；仲元豈華藻之力，顧久滯於蜀都。有來桑榆之收，不孤芹藻之采。富貴必從勤苦得，少酬鐵硯之勞；功名亦在老大時，行對蒲輪之召。某未皇走慶，猥沐貽賤。春草隨袍，等是天公之雨露；秋竿有節，相期歲晚之冰霜。《梅亭先生四六標準》卷一三。

### 回王特奏相悟啓

顯膺恩紀，榮筵儒科。東隅而收桑榆，雖負心期之壯；北山之有桮杓，足爲眉壽之光。恭惟某人波瀾老成，魁壘耆艾。如尊乃勇，合爲叱馭之忠臣；薦褒有材，宜即運籌於聖主。何踞鞍之矍鑠，始奮袖以低昂。亮無恨青衫之枯，行即膺紅帶之寵。某未皇贊慶，猥沐貽箋。拔薤而規龐參，願聞忠告；裹蒲而迎枚乘，尚見詔除。《梅亭先生四六標準》卷一三。

### 回特奏侯新恩曾榮啓

偕計該恩，登名筮仕。半世就舉選，良忻叔起之未衰；朝廷少舊臣，更喜君房之肯出。伏惟某人抱材膚碩，蓄學弘深。風翮大鵬，本有垂雲之翼；天閑老驥，不爭暮日之塗。器固大於晚成，召亟膺於朝奏。魏有隱士，實由年德之高；漢迎太公，亦籍老成之力。某未皇謁賀，猥沐貽牋。愧無乖崖翁，屈留賢者；近識峨眉老，尚問政焉。《梅亭先生四六標準》卷一三。

## 代胡侍郎謝朝士賀生日啓

生我劬勞，撫六弧而增感；俾爾耆艾，捧連璧以知慚。恭惟某官厚德噓枯，高詞發藻。五十之年過二，應憐坡老之衰；三萬之日無多，欲擬茶山之老。華其斑白，飾以青黃。人情欲壽欲安，知所蒙矣；君子善頌善禱，何以報之！《梅亭先生四六標準》卷一四。

## 代謝朝士已下啓

五十之年過二，孰記衰顏；什伍之星有三，猥勤善頌。顧方思罔極之德，何敢當不類之歌。簸弄明珠，藏但深於十襲；噓呵凍筆，報有愧於七襄。《梅亭先生四六標準》卷一四。

## 謝黃侍郎伯固生日詩啓

絳縣老人之生甲，擁翠節以知慚；黃絹幼婦之受辛，感碧幢之委重。愧踰垣之莫避，且返璧之未能。恭惟某官帷幄近臣，詩書元帥。憐生我勞瘁之旦，有愴蒿莪；歌俾爾耆艾之詩，使堅松柏。勞以

春天之尊酒，副之秋月之兩章。殆念苞栩憩棠之陰，曷稱飛芻刻楮之役。某平頭六十，關慮萬千。思玉局老之養生，安得還鄉而騎鵠；從金華仙而學道，或蒙叱石以爲羊。《梅亭先生四六標準》卷一四。又見《宋四六選》卷一九。

### 謝魏侍郎了翁生日詩啓

久生不學，蹇蒲柳之先零；初度無能，困樵蘇之後爨。過辱兩章之秋月，見期千載之春風。留歸壓於魚舟，難捲還於鯨錦。恭惟某官拍肩諸老，畜眼一人。天不殛民，將謀及詩書之帥；人能棟道，恐宜在條理之科。閔六十服戎之夫，窘千里餽糧之役。我辰安在，敢祈牛斗之能神；夫子言之，或免蠹菌之俱腐。某屬有國故，且無親存，方茲疚懷於劬勞，只得痛謝於頌禱。先生與之言則對，參乎奚避席之疑；小子何莫學夫詩，武也請卒章之受。《梅亭先生四六標準》卷一四。

### 謝諸處監司賀生日啓

我年六一，真成薄頹景於西山；春餘半分，未許託老人於南極。茲屆劬勞之旦，敢當褒借之詞！恭惟提刑云六轡澄清，十行炳煥。運使云斧鑠光輝，珠璣咳唾。賢者告以善，揆亡菑亡害之初；愛之

欲其生，有爾熾爾昌之詠。所愧泥塗之絳甲，要非光焰之白庚。某有味其言，不知所賀。君子謂之善頌，相期食蛤以踞龜；使臣不敢與聞，但願放牛而歸馬。《梅亭先生四六標準》卷一四。

### 謝都大賀生日詩啓

匪莪伊蔚，正緬思罔極之天；以蘿施松，辱許共後凋之歲。然頭白走雪山之戍，覺鬢青負寶蓋之峰。幸聯公子之婚姻，見假長庚之光焰。恭惟某官粃糠團鳳，轡策翔麟。一雄將十萬之雌，識神駿於驪黃之外；六經佐三尺之法，辨澠淄於兔褐之中。眷此陳人，寵其初度。正欲歸耕於劍外〔二〕，詎思入對於延英。某有味其言，不知所報，絳縣老人之生甲，花六十以既周；黃絹幼婦之受辛，椿八千其安用。《梅亭先生四六標準》卷一四。

〔二〕劍外：原缺，據四庫本補。

### 謝都大賀生日詞啓

皇揆余度，已勤溢美之言；子與人歌，更作新涼之賀。輒駢四六，仰謝再三。恭惟某官學廣文

多，筆精墨妙。歌鍾二肆，和諧魏絳之聲；駉牝三千，教習開元之舞。寬望秋先零之念，賦陽春寡和之章。某重拜珍投，宛成珠貫。贈以綠綺，愧莫報於雙南；寫之烏絲，惟謹藏於十襲。《梅亭先生四六標準》卷一四。

### 謝呂提刑壽詩啓

泥塗絳老，正自疑甲子之年；霄漢繡衣，猶記揆庚寅之度。鼎來好語，賁飾孤生。恭惟某官高誼薄雲，長毫裁霧。舊游楚地，未寒車馬笠之盟；今戴蘇天，尚念斗牛箕之宿。雙節併風而幪雨，兩章對月以偕星。某遠守石龜，深慚玉燕。報德罔極，劬勞但感於《蓼莪》；有功見知，勞來請歌於《杕杜》。《梅亭先生四六標準》卷一四。

### 謝提刑啓

蕭艾賤生，桑蓬初度。但切劬勞之感，敢當頌禱之勤？恭惟某官盛德噓枯，高文發藻，旣旌厚意，又藏多儀。區區私情，拳拳戢佩。《梅亭先生四六標準》卷一四。

## 謝呂運使賀生日啓

霄漢繡衣，遷轉木牛之運；瓊瑤錦段，寵光芻狗之陳。揆初度以何榮，受徽言而增愧。恭惟某官脩名揭日，高誼薄雲。篤車馬笠之盟，不挾貴，不挾長；問斗牛箕之宿，無以名，無以懷。七言撮白玉之舟，一字重黃金之價。某身方受察，心已懷歸。使臣必諮於周，惠而好我；人情莫不欲壽，更以贈君。《梅亭先生四六標準》卷一四。

## 謝生日投詩啓

代何月湖

彼其之子，鵜積愧於在梁；我生之辰，牛豈神於奮角。茲勤善頌，徒發愧情。恭惟某官藻掞天庭，句穿月脇。憐絳人之甲子，混在泥塗；記孟陬之庚寅，眷焉遲暮。特華其老，相贈以言。某取數既多，餘年無幾。欲報罔極之德，已廢《蓼莪》；敢當不類之歌，請辭《假樂》。《梅亭先生四六標準》卷一四。

### 代謝生日投詞啓

皇覽揆余初度，漫扈江蘿；子欲養親不存，但悲風木。茲勤妙語，徒發愧情。恭惟某官脫時世粧，續古樂府。溫柔重厚，有二雅之正言；婉麗清新，無六朝之俳體。惠而好我，何以報公。某愧乏辰猷，空踰亥首。聽陽春之寡和，爲調彌高；享肆夏之升歌，請拜其細。《梅亭先生四六標準》卷一四。

### 普謝見任官賀生日詩詞啓

伏以小人不知紀年，恍近平頭之六十；君子爲善頌禱，仰勤厚意之再三。受言藏之，有感多矣。恭惟某官英詞漱潤，盛德噓枯。愛之欲其生，忘泥塗之爲辱；賢者告以善，任牛斗之不神。所慙雌甲之辰，難擬長庚之夢。某未能返璧，又乏報瓊。三嘆而音有遺，良服朱弦之疏越；千歲而眉無害，還祈黃髮之壽胥。《梅亭先生四六標準》卷一四。

## 謝學職十四人投詩賀生日啓

伏以《召南》之詩十四，固足繫騶虞之風；魯侯之歲萬千，何以當《泮宮》之頌。良見維桑與梓之敬，然增匪莪伊蔚之思。伏惟某人學士岷峨之英，江漢以濯。他年事業，半雲閣之功臣；此日詞章，倍建安之才子。憐香山艷陽之過九，信眉山近古之有三。勁氣芳詞，高文大冊。序所爲作者之意，陳誼尤高；相接以粲然之文，過情是耻。某薈然蒲柳，感此桑蓬。人情莫不欲壽欲安，生則烏可已也；君子謂之善頌善禱，忠焉能勿誨乎。《梅亭先生四六標準》卷一四。

## 謝潼川提刑謝太博賀生日啓

伏以問甲辰之雄木，既遄譏度之載驅；守癸亥之犍爲，真覺棲遲之萬狀。猶蒙佳句，見貺陳人。恭惟某官高義薄雲，英詞組霧。牛頭衮衮，詎止隨世界之花；象耳耽耽，猶記生池塘之草。曲憐苦李，承藉甘棠。皇揆余降庚寅，紛吾有此；我與君皆丙子，欲並生哉。某獲守蕭規，敢當唐律。思其人，愛其樹，何如對秋月之兩章；誦其詩，讀其書，安得共春天之尊酒。《梅亭先生四六標準》卷一四。

謝鄉官寄居士人賀生日詩啓

伏以匪莪伊蒿，增劬勞勞瘁之感；維桑與梓，辱熾昌昌大之詞。何以報木瓜之三，用是光蓬矢之六。恭惟某官噓枯意厚，發藻才雄。半百過九年，笑白傅艷陽之已老；分寸落千丈，憐韓公牛斗之不神。贈汝好辭，揆余初度。某安知燕喜，但笑龍鍾。一唱三嘆而音有遺，難和朱弦之疏越；萬有千歲而眉無害，還祈黃髮之壽胥。《梅亭先生四六標準》卷一四。

謝潼川知府趙監丞賀生日詩啓

伏以男子始生，有負大人占之之夢；我辰安在，敢當先生長者之褒？有愧徽言，莫酬隆眷。恭惟某官爲善最樂，大雅不羣。發更生寶苑之書，浩如淵海；出長吉錦囊之句，迅若風檣。有憐桃李之一株，重感桑蓬之六矢。吹以七言之律，重於雙璧之貽。某夙荷甄收，竟成椎鈍。老人無一子，誰知絳甲之泥塗；仙官勅六丁，長倚白庚之光焰。《梅亭先生四六標準》卷一四。

# 全宋文卷七二七八

李 劉 一四

## 謝列郡太守以上賀生日啓

小劫六十之風雨，齒邁二齡；大川三百之波濤，心驚萬里。揆余初而增感，俾爾壽以何居。恭惟某官云云河漢淵海，富卿、雲、舒、向之儲；月露風煙，陋盧、駱、王、楊之作。憐絳縣老人之生甲，贈黃絹幼婦之受辛。某仕則慕君，老當佚我。不俟駕固將朝也，良感徽言；射以弧受乃負之，敢忘幼志！《梅亭先生四六標準》卷一四。

## 謝通判以下賀生日啓

六十二歲之樂，愧無白鶴之新居；萬里幾年之歸，孰念碧雞之老客？皇揆余度，何及公言。伏惟某官盛德噓枯，英文掞藻。念苞栩之使，雖叨四牡之還；感《蓼莪》之詩，無復三牲之養。煖於布

帛，贈以襜褕。某六轡既均，二節以走。夙興夜寐，亦希無忝於所生；日邁月征，尚祈不諫之亦入。  
《梅亭先生四六標準》卷一四。

謝王制參等八員賀生日啓

王制參翊、丁制機鎔、蒲制機仲乙、楊制幹異、陳制幹

噲、宋制幹拱、王撫幹三桂、王鈐幹澥。

四方有志，愧孤負於桑蓬；八公同辰，辱褒期於樛櫟。固辭不獲，厚意何居！恭惟某官合志同方，集思廣益。依紅泛綠，培懷黃拖紫之程；取白媲青，忘看朱成碧之醜。揆余初度，贈汝好詞。某返璧未能，報瓊焉有。觀我生之進退，真成維谷之差；俾爾壽而熾昌，曷副如岡之頌！  
《梅亭先生四六標準》卷一四。

謝丁制置黼壽詞啓〔二〕

轉粟青天之上，賤詞來謝於青天；射蓬白雪之邊，度曲敢當於白雪！有美朝中之措，見貽方外之游。恭惟某官遼鶴高標，庖牛餘刃。春風楊柳之句，宜拍紅牙；夜月梧桐之篇，何關白髮。某既聞耳矣。又寓目焉。適有高峰緣雲之行，別圖公堂披霧之謝。  
《梅亭先生四六標準》卷一四。

〔二〕補：原缺，據四庫本補。

## 謝丁制置賀壽詩啓

塵外花村，已辱春風之一曲；雪邊蓬矢，又勤秋月之兩章。拜君貺以何多，揆余初而增感。恭惟某官詩書元帥，翰墨宗工。歷井捫參，憐長庚之伴月；簸箕挹斗，笑韓子之生辰。既貽一倡之三，復畀七言之二。拊躬感槩，拜賜駢蕃。某政爾避喧，又蒙委重。自爲青城客，愧擬住之未能；贈我翠織成，欲捲還而安敢。《梅亭先生四六標準》卷一四。

## 回賀生日啓 戊子

生我勞悴，揆初度以增悲；俾爾熾昌，受徽言而重愧。嘗已戒門而辭璧，猶蒙擲地以鏗金。恭惟某官厚德噓枯，英文發藻。憐香山花前之歲，正可閑行；吟老坡月下之風，不妨同坐。特捐妙語，見寵孤蹤。某自笑朱愚，老爲黔佐。問昌黎之南斗，乘除難挹於酒漿；歌靈均之東皇，偃蹇謾陳於竽瑟。《梅亭先生四六標準》卷一四。

## 回武官賀生日啓

勞我以生，却青雲於垂上；愛人以德，歌白雪以彌高。感及爾同僚之私，增揆余初度之愧。恭惟某官共武之服，克壯其猶。談笑詞鋒，足當八面；緒餘筆陣，亦掃千軍。有憐桑弧蓬矢之辰，見致松茂竹苞之祝。某不能返璧，又乏報瓊。人情欲壽欲安，尚徼餘芘；君子善頌善禱，但耻過情。《梅亭先生四六標準》卷一四。

## 代回曾運使啓

生我劬勞，廢蓼莪而興感；俾爾耆艾，攬茹蕙以增慚。敢圖高情，見畀妙語！恭惟某官文得家法，句通古人。憐牛斗之不神，了無善狀；因參辰之相比，借以餘光。摘藻粲然，噓枯厚甚〔二〕。某不知所賀，藏弄爲榮〔二〕。八千爲春，盡自□□之□；五十而慕，但激終身之思。《梅亭先生四六標準》卷一四。

〔一〕噓枯：原缺，據四庫本補。

〔二〕弄：原作「去」，據右引改。

## 代回安撫趙尚書師宰賀生日啓

蒲柳既凋，又屆始生之旦；蓼莪罔極，滋深弗洎之思。特達高情，勤渠下問，置慚無所，懷感有之。恭惟某官曳履公餘，鳴謙私惠。憐絳人之甲子，混在泥塗；記孟陬之庚寅，撫其遲暮。函牋甚寵，臺餽孔殷。某祇佩眷存，但深銜戢。取公竹馬，愧請謝之未能；投我木桃，復報章之不稱。《梅亭先生四六標準》卷一四。

## 代回衆官賀生日啓

皇揆余以初度，內美闕然；牛與斗兮不神，善名安在。過勤妙語，祇發愧情。恭惟某官嬉笑文章，遊戲翰墨。摩娑銅狄，欲相許以久長；刻畫無鹽，殊不知其老醜。此意厚甚，而我謂何！某返璧未能，報瓊無有。此乃相親重道，拜而受之；何敢當不類歌，顏之厚矣。《梅亭先生四六標準》卷一四。

### 代回道士賀生日啓

勞我以生，能嬰兒之除滌；游方之外，笑老子之婆娑。佳句惠然，私情媿甚。恭惟某人簸弄明月，頡頏飛霞。指石鼎於爐中，便成聯句；用榴皮於壁上，豈不中書。見畀名章，有光初度。某偶差一念，獻笑諸公。飲馬麾蛟，望崦嵫而勿迫；踞龜食蛤，與汗漫以相期。《梅亭先生四六標準》卷一四。

又見《宋四六選》卷一九。

### 代回僧賀生日啓

拖泥帶水，若爲還我之未生；賞月吟風，更愧情人之相訪。恭惟某人句中有眼，筆下無痕。應憐生朝，認本來之面目；雖脫死籍，當自揣於頭顱。特贈以言，足華其老。某似僧有髮，在俗得禪。庵外松枝，覺歲華之難數；庭前栢樹，或祖意之少分。《梅亭先生四六標準》卷一四。

## 回張縣尉煥啓

五十學《易》，闕然觀我之生；七步成章，厚甚揆余之度。顧切劬勞之感，敢當頌禱之私！恭惟某官簪笏名家，弓刀小隱。擬姑熟之十詠，肯爲東野之酸；師廬陵之諸賢，尚接江西之派。值分鄰燭，見貺門弧。某德既多涼，官仍獨冷。弟子有笑于列者，雖未見治；鄉人皆好之何如，莫知所報。

《梅亭先生四六標準》卷一四。

## 回同官預賀壽詩啓

生我勞瘁，隔彌月之實訐；俾爾熾昌，荷祈年之孔夙。感高情之見厚，豈善頌之敢當！恭惟某官義篤官聯，禮隆僚好。憐絳縣老人之辱，越在泥塗；加黃絹幼婦之辭，寵其遲暮。及差科之未動，勞朋友之先施。某既感且慚，罔知所報。人生不滿百，孰非欲壽而欲安；天下達尊三，各願彌高而彌邵。《梅亭先生四六標準》卷一四。

回鄉官上壽啓 庚寅

伏以我生之辰，與王瓜而同日；物出於甲，柰雌木之非材。何勤黃絹幼婦之辭，更爲絳縣老人之祝。恭惟某官英文發藻，厚德噓枯。五十七之歸遲，每憐白傅；二千石之強直，俯念朱卿。假以徽言，寵其初度。某不知所賀，藏弄爲榮。吾黨小子之斐然，乏瓊琚之效報；是邦大夫之賢者，希藥石以相生。《梅亭先生四六標準》卷一四。

回謝同官投詩啓

五十七之歸遲，愧見唐人之句；萬有千之無害，敢當魯頌之歌！何勤黃絹幼婦之辭，更爲蒼顏太守之祝。恭惟某官薄雲高誼，翻水成文。及爾同寮，喜參辰之相比；揆余初度，笑牛斗之不神。贈以徽言，極其善頌。某自憐雌甲，難問長庚。匪莪伊蒿，但感劬勞之罔極；有杖之杜，敢希守衛之勤歸。《梅亭先生四六標準》卷一四。

## 回士人投生日詩啓

生我劬勞，曾莫報昊天之德；俾爾昌熾，詎敢當《泮水》之詩？有勤黃絹之辭，但重朱紘之歎。伏惟某官文如翻水，思若涌泉。憐白傅五十七之齡，已遲歸計；比絳人三分一之數，大似疑年。贈以微言，寵其初度。某不知所賀，藏弄爲榮〔二〕。愛之欲其生，倍有加於布帛；施不求其報，愧莫辨於瓊琚。《梅亭先生四六標準》卷一四。

〔二〕弄：原作「去」，據四庫本改。

## 回三江文將仕啓

誦白傅五十七之詩，已遲歸計；辱魯侯萬有千之頌，俾試壽胥。愧非所蒙，願竊有復。恭惟某官瑰辭發藻，瓊翰噓枯。贈汝好辭，磨厲桑蓬之意；揆余初度，堅凝松柏之心。得非愛之欲其生，所謂友以久其道。某自憐單獨，倍感劬勞。維摩想日邊之朝，難陪雄甲；謫仙尋夜郎之夢，且伴長庚。

《梅亭先生四六標準》卷一四。

### 回學職二十四人投詩啓

香山五十七歲，嘆歸計之已遲；凌煙二十四賢，忘歌詩之不類。揆余初度，懷我好音。伏惟某官氣應歲躔，才堪郎省。比周家八士之數，價喜倍三；較《魯頌》四篇之文，數幾用六。冠以鱣堂之序，寵茲鯉饋之辰。小人不知紀年，自甘雌甲；君子善爲頌禱，誤擬長庚。列磬編鍾，舂金撼玉。某自慚一喙，莫辨七襄。孰殺子產，吾其與之，幸可免輿人之誦；守得陽公，民又賢也，所希篤同業之盟。《梅亭先生四六標準》卷一四。

### 回同官上壽詩詞啓

揆余初度，終身惟切於慕親；及爾同寮，君子顧多於善頌。過情可耻，佩意亦勤。伏惟某官義篤官聯，材雄筆陣。憐白傅五十七之感，歸計已遲；比絳人三分一之年，輿人何筭。既加膏沃，復借品題。某自顧衰殘，難當獎予。加桑弧於蓬矢之六，空走四方；報綺琴以南金之雙，僅憑尺牘。《梅亭先生四六標準》卷一四。

## 回衆官賀生日詩啓 癸巳

遽伯六十之年，重感劬勞於初度；魯侯萬千之頌，難當褒拂之徽言。無容屣履以迎門，正恐文書之銜袖。拜珠璣之終惠，列鍾磬以成編。恭惟某官直氣抗峨，英詞倒峽。濯錦江之錦，洗空黃絹之絲；撫琴臺之琴，高掩朱絃之瑟。厚同官爲僚之誼，忘歌詩必類之言。使臣弗敢與聞，固以王宅憂之故；人情莫不欲壽，且懷祝矯舉之差。某莫報七襄，但藏十襲。今日之受非也，璧恐暗於投人；忠告而善道之，石尚期於生我。其爲感佩，罔既敷陳。《梅亭先生四六標準》卷一四。

## 回諸廳屬官賀生日五十人啓

生我劬勞，永負綵衣七旬之養；俾爾耆艾，敢當錦瑟五十之絃。良感同僚之盡心，曷稱高文之大冊！恭惟某官文濯江漢，筆抗岷峨。四摞二分，洞包犧大衍之數；三章九旨，合《公羊外傳》之篇。有憐揆初，寵貽善頌。考華陽之志，復見三州之後賢；享穆叔之歌，敢忘五善之重拜！某捲還不敏，藏弄爲榮（一）。蠶曰外孫，固荷假長庚之光焰；桑弧男子，已甘付雌甲於泥塗。《梅亭先生四六標準》卷一四。

〔二〕弄：原作「去」，據四庫本改。

### 回魏制幹賀生日啓

老瞻南極，違入丁出丙之躔；詩夢西堂，愧換甲生申之句。有勤親誼，見畀英詞。恭惟某官挺有祖風，卓爲人鑑。老者人所敬，爲近於親；愛之欲其生，俾昌而熾。對兩章之秋月，藹多態之春雲。某倚玉知慙，報瓊何有。沈香吟芍藥之調，詎敢與聞；遠志有當歸之心，尚希愛助。《梅亭先生四六標準》卷一四。

### 回黃侍郎伯固賀生日啓

白鶴新居，有頽景六十一之嘆；碧雞老客，無廣廈千萬間之思。敢意達尊，特形善頌！恭惟某官疇庸參井，趣覲房心。草蟲阜螽之勞還，自天子所；木牛流馬之積困，哀我人斯。有憐花甲之周，曲借蠶辛之妙。某未知淑後，況敢揆初？錦城早還，徒仰羨夏官之典午；清溪夜發，或思伴秋月之長庚。《梅亭先生四六標準》卷一四。

## 回魏機宜賀生日啓

糟糠之堂，偶當初度；芙蓉之褥，猥辱英詞。非所宜蒙，願竊有復。恭惟某官句穿月脇，筆挾天庭。借泛霞之光，轉而白雪；攬浣溪之水，寫以烏絲。所愧瓦磚之床，曷副珠璣之詠。但深十襲，莫效七襄。《梅亭先生四六標準》卷一四。

## 爲顯孫通魏宅問名啓

了翁

言念二星分野，適並舍於魚鳧；兩家提孩，許問津於烏鵲。仰甘棠之有笏，愧苦李之無蹊。熟固在於地同，合殆由於天作。茲者伏承某官小娘子周旋《內則》，夙閑十七之《少儀》；而某大學生位長孫某溫習《中庸》，詎達三千之《曲禮》。況未策贊皇之名第，乃竊附公子之婚姻。亦惟陪萬里之游，因得合二姓之好。卜妻占八世，克協鳳飛之和；勸郎勤六經，實望雞鳴之戒。《梅亭先生四六標準》卷一四。

### 爲顯孫通魏宅納采啓

言念納采問名，嘉禮寧嫌於重請；居敬行簡，省事固厭於兩回。不敢虛拘，敬將厚意。必河之魴，必河之鯉，亦惟采藻以采蘋；言秣其馬，言秣其駒，更冀刈萋而刈楚。菲儀不腆，別楮是陳。

《梅亭先生四六標準》卷一四。

### 請媒書

言念析薪匪斧，曷諧二姓之驩；釣絲伊緡，良借一言之重。況以葭莖之契，獲聯榛棗之昏。遂孫枝攀附之榮，皆媒葉往來之助。《梅亭先生四六標準》卷一四。

### 請期書

十月在策，交月夙契於丙辰；五日爲期，吉日又符於庚午。宜其孫子，宴爾室家。敢修一介之尺書，拱俟八鸞之百兩。《梅亭先生四六標準》卷一四。

## 代姜寺丞注回史丞相府定親書

相門出相，方託身槐棘之陰；丞壁負丞，敢妄意松蘿之附！蒙以貴而下賤，聘不腆之若人。徼福甚榮，省心知愧。恭承某官階蘭堪佩，足繼史魚之風；而某女潤藻可湘，粗閑姜鯉之教。屈禮絕百僚之重，令好合二姓之驩。君子不弛其親，已敬佩魯公之訓；公侯必復其始，願益綿魏國之封。《梅亭先生四六標準》卷一四。

## 賀丞相除少師啓

巽避公槐，升魁師棘。萬世策定，盍徑躋萬石之班；三台色齊，乃退位三孤之長。寸心如此，千載無之。恭惟某官厚大而裕和，端凝而洪毅。周拜乎前，魯拜乎後，邁韋、平父子之榮；陟格于帝，尹格于天，續堯舜君民之業。自開禧之末，一麾九日；相嘉定之治，十有七年。於我如浮雲，心本游於淡泊；用汝作霖雨，身爰佩於安危。既難挽鼎湖之龍，乃力洗咸池之日。周勃之誅呂迎代，尚觀望於軍情；霍光之擁昭立宣，幾動搖於庭議。未有獨運於掌上，不煩執事之顏行。爲天下得人，與生民立極。導憑几之命而晏然仍几，輔垂簾之政而遄已徹簾。三邊絕赤白之囊，萬國布黃朱之乘。風雷屏

息，日月重光。宜神聖建道德之師，見輔弼爲社稷之寶。比播維垣之命，允孚巖石之瞻。乃執撝謙，力回成渙。弗敢基命定命，正倚弼諧；若曰父師少師，何拘等級。姑冠班於洪化，即顙面以經邦。坤載物而承天，蓋得下裳之吉；鼎以木而巽火，實存上鉉之虛。九重尊李泌以先生，四海戴子儀爲尚父。黃河如帶山如礪，豈惟難拒於公珪；青櫺有洞石有窗，恐合紹開於王社。某夙勤坏冶，自抵簡書，泥塗久隔於朝紳，夢寐尚隨於賀臆。輒憑魯繭之素，恭布燕雀之私。亮天地而弼一人，諒益基無窮之聞；理陰陽而遂萬物，尚祈澤不獲之夫。《梅亭先生四六標準》卷一五。又見《翰苑新書》續集卷一，《永樂大典》卷九一八。

### 代董侍郎賀丞相除少師啓

巽避公槐，升魁孤棘。奮庸而宅百揆，輔茂陵十八載之隆平；寅亮而弼一人，開寶慶億萬年之晏粲。明良交際，動植均驩。恭惟某官德鉅材全，器閎用博，累世躬行於忠孝，四朝身佩於安危。河決平原，力挽百川而注海；風搖夏屋，獨高一柱之擎天。盡返齊疆，全歸趙璧。金甌閑暇，從容作商野之霖；玉几導揚，談笑取虞淵之日。與生民而立極，爲天下以得人。九夷八蠻服整頓乾坤之手，兩宮二聖知扶持社稷之心。肆疇巖石之瞻，亟出維垣之命。甫揚成渙，遽執撝謙。重違再命三命之共，甫轉父師少師之拜。元圭袞冕，上猶恨無官以酬公；夏篆通旂，公豈以辭榮而邀上。惟楓陛比隆於皇

祖，則茅封仰紹於先王。西平有子我有臣，垂光簡冊；周公拜前魯拜後，濟美鼎彝。某自分泥塗，夙蒙甄冶。毫釐千里，既自投丹筆之書；首尾八年，未易復白圭之玷。茲復坦明之制，但增踴躍之私。黃麻之似六經，自此尚觀於蕃錫；洪鈞之轉一氣，更祈俯振於餘生。《梅亭先生四六標準》卷一五。又見《永樂大典》卷九一八。

## 賀史丞相除太傅啓

成都運司作

師臣巽命，帝傅升班。七十從心，公亦何心於極品；三千同德，獨高崇德之紹勳。叶朱衣介幘之祥，增黃耳玉鉉之重。竊以傅者傅之德義，不惟其官惟其人；臣哉臣作股肱，罕有是父有是子。若西京厚王陵之寵，及東都旌卓茂之年，雖加衡紱以鞶纓，俱匪箕裘之鼎鼐。於皇孝廟，舊學越王，當淳熙丙午之壽上皇，以正月戊子而進亞父。今專槐之正位，有喬木之世臣。父子一家，兩兩齊三台之色；君臣千載，重重聚四紀之間。賁然綠綈之新，復此青氈之舊。恭惟某官清和而任，直大以方。禹以功，皋以謨，適全絕德；絳之果，霍之勇，難擬脩能。無敵知儒者之真，可久見賢人之德。一柱障黃河之決，兩手洗白日之光。三登二十七年，萬機幾千百變。內除狗鼠（二），旋安鴻鴈之居；外殄犬羊，顯築鯨鯢之觀。風震雨凌而棟梁自吉，火炎水潤而鼎寶各調。蓋享天心，非要人爵。陶侃之指紋貫徹，猶三遜以滋高；丁固之松夢留連，甘十年之不調。上念慈闈之訓，日思元老之功。無官酬公，

維師尚父，猶堅謙抑，力反渙揚。姑隆絕席之班，式舉載輿之典。虹明帶玉，龜顧印金，備袞冕之上儀，增衣冠之盛事。改容而禮，論道以經。平淮用八千兵，更酬謝傅蒼生之志；辭齊封三萬戶，會尋留侯黃石之盟。某久累播鈞，遐瞻巖石，聳聽上卷之一命，阻陪潭府之三才。斐然成章，是以有慶。乘雪邊之節傳，無因拜壽杖之尊；窺天上之階符，願長輔化樞之運。《梅亭先生四六標準》卷一五。又見《翰苑新書》續集卷一，《八代四六全書》卷八，《宋四六選》卷一一。

〔二〕內：原作「丙」，據四庫本改。

### 賀史丞相除太傅啓

顯拜師臣，榮躋帝傅。聖人惟能饗帝，復歸美於重闈；太宰以禮佐王，併加恩於一命。實清廟之盛典，非元老之私榮。昔周家既立三事之官，在成王尤遴仲父之選。始命姬旦，以其師保萬民；繼用畢高，以其弼亮四世。自茲以往，稱此惟艱。若西京之遷王陵，與東都之寵鄧禹，雖稱異數，實飾虛文。惟我孝廟之盛時，夙敬越王之舊學。奉卮爲壽，驩既洽於兩宮；絕席隆師，秩爰登於一品。疇昔鯉趨於學禮，只今虎拜以揚休。千載君臣，聚見四十年之內；一家父子，併成二萬石之榮。與國咸休，生民未有〔二〕。恭惟某官鼎彝家學，柱石世臣。惟說總百官，力贊事神之勿黷；暨湯有一德，首

明立愛之惟親。相儀南至之郊，歲敬東朝之冊。克禋克祀，敷皇極而錫厥庶民；得祿得名，受介福而于其王母。二難具美，三遜滋高。既力避於維垣，亦何辭於命袞。日月如璧，映玉佩之魚垂；天地爲鑪，鑄金章而龜顧。一相主乎內，幾年淹九棘之班；三公惟其人，今日正專槐之面。是固舊物青氈之赤舄，尤覺明公黃閣之黑頭。行開茅土之封，式對山河之誓。某夙勤甄錄，聳聽郵音，雖箝尾在虺蜮之區，然馳心賀燕雀之厦。宣麻綴文德之聽，身隔重湖；揲著考武岡之占，公宜百祿。《梅亭先生四六標準》卷一五。又見《翰苑新書》續集卷一。

〔二〕未：原作「自」，據四庫本改。

### 賀史丞相除少傅啓〔二〕

雄麻渙命，孤棘升班。相堯之功，已書二十八載之半；弘周之化，始介三公九卿之間。取之甚廉，簡在則厚。恭惟某官直方而大，智勇且仁。海晏河清，藉整頓乾坤之手；天明地察，鑑經綸社稷之心。奏琴瑟改絃之功，贊匕鬯主器之決。進律固加於有德，酬公真恨於無官。矧如拔去凶邪，收《洪範》福威之柄；且復芟夷煩亂，整素王筆削之功。是皆非常之元，宜受不次之賞。猶且固辭於專面，姑令明陟於貳公。惟時亞保之官，蓋古司空之選。若稽漢制，專司萬乘之宴私；其在周官，實任

兩儀之寅亮。聊丕昭於蕃錫，豈盡荅於元勳。昔魏王再相於淳熙，首升此職；故高宗獨稱於德壽，謂無幾人。馴正師垣，宏開壽域，尚式周公之猷訓；惟其有之，是以似之，以觀文王之景光。心乎愛矣，遐不謂矣。某忻逢盛典，倍激懽悰。歌芘士之詩，敢忘燕雀之賀夏；作得賢之頌，或憐蟋蟀之吟秋。《梅亭先生四六標準》卷一五。又見《翰苑新書》續集卷一。

〔二〕史：原缺，據四庫本補。

### 代任參政希夷賀丞相除少傅啓

冊命元勳，序升孤傅。三少特揖，雖均爲貳公之官；四夷咸賓，見時乃萬世之績。君臣叶慶，朝野交驩。恭惟某官明允而篤誠，洪深而肅括。調政化不調之琴瑟，續古今難續之鼎彝。中書十五秋，得賢人可久之德；關國數百里，復寧王有指之疆。迄今大寶之還，詎止小球之受。蓋帝王盛德之必頌，獨頌獻琛；而《春秋》常事之不書，特書得玉。然皆出魯公之力，庸並垂周室之休。敢圖古風，復見今日。宜亟正專槐之面，乃姑循次棘之階。功臣封爵山河，聿觀繼世；少傅寅亮天地，詎足酬庸！某全託一陶，獲歸三徑。龜魚竊新亭之蔭，亦有肺腸；燕雀賀大夏之成，恨無羽翼。《梅亭先生四

# 賀史丞相父太師魏王追封越王啓

代任樞密希夷

加冊元勳，配祠清廟。考十八侯定位之次，惟蕭蓋侑於祭廷；應五百年異姓之封，於越肇開於封土。遂吾相顯親之願，彰我皇念舊之恩。宗社同休，華夷胥懌。恭惟先正大丞相文惠師王始終三紀，師保萬民。湯於伊尹蓋學而臣之，克同一德；舜舉皋陶不仁者遠矣，允協重華。宜侑食以匹休，曾易名之未稱。思股肱於甘露，想形貌於凌煙。一卷之書必立師，矧實先朝之舊學；七世之廟可觀德，誰踰列祖之老臣。徹彼土疆，儼爾籩豆。惟冒丕單稱德，峻加茅胙之分；茲予大亨先王，永配椒馨之薦。丕昭異數，夙掩前聞。伏遇少保樞使大丞相國公克享天心，善繼人志。故國非謂喬木，蓋倚世臣；成績紀于太常，以昭先烈。用宏茲賁，曰篤不忘。某世沐殊恩，身逢盛事。屬嬰美疢，莫陪東閣之賓；疇允大邦，切頌西平之子。《梅亭先生四六標準》卷一五。又見《翰苑新書》續集卷一，《啓雋類函》卷一九，《八代四六全書》卷九。

# 全宋文卷七二七九

李 劉 一五

賀鄭參政清之除右相兼樞使進光祿大夫啓 成都運司作

登庸舊學，揆序元台。能自得師，謹厥終而唯始；爰立作相，置諸右以輔台。兼總鈞樞，屹隆柱石。恭惟某官兩儀間氣，四海真儒。淡乎如列仙之癯，傑然乃萬夫之特。鼈鹽太學，四賦接古詩之流；芹藻泮宮，三峽避詞源之水。領袖貫九經之庫，範模徧雙宇之宮。虎觀螭坳，司存雨露；麟臺鰲禁，鼓舞風雷。杞人憂天，馭方危於六馬；虞淵取日，功卓冠於五龍。學焉而後臣之，政不足與間也。況苞苴賄賂獨不入沂公之門，且鼎鼎樓臺抑未聞寇相之第。衆浩然其歸重，公持此以安歸。天下無如召公，久當相成王之左；生民未有夫子，今乃得伊尹之時。然萬世永賴乃可謂功，使匹夫不獲焉能無耻！予惟克邁乃訓，千載一時；天之降任是人，百年幾見。萬國魚頭，正有關於己任；十年鳳池，亦何足爲公榮。見伊、呂而失蕭、曹，則知管、晏之卑矣；濟英、衛而遜王、魏，此豈房、杜之細耶！願荷棟桴，力光竹帛。某一寒戍雪，十暑飲冰。昔周旋康成之間，夙親氈坐；且班次巨君之

下，實認履聲。今聞宣黃麻之六經，適尚盤青泥之九折。《緇衣》三章，知不遺於寸善；洪鈞一氣，亦何間於八荒。子獻相國書乎，往愬底虞於逢怒；君遣使臣禮也，終更願聽其亟還。《梅亭先生四六標準》卷一五。又見《翰苑新書》續集卷一。

### 賀丞相明堂慶壽并冊皇后禮成平淮寇奏捷啓

邦慶頻仍，王勳赫奕。事天明，事母孝，新周南正始之基；有文德，有武功，策召公平夷之績。一相主內，四夷具瞻。恭惟某官氣塞乾坤，心貫日月。大鈞播物，風霆不顯其流形；直柄當權，水火共成於正味。無妄式遄於勿藥，有孚信利於涉川。理身理國，厥既兩全；治內治外，粲然兼舉。肅雍顯相而於穆清廟，涓選休成而爰熙紫壇。太姒嗣徽音，正九重之寶冊；王母受介福，奉萬歲之玉卮。豈謂孽臣之姦驕，敢負湛恩之汪濊！楚氛甚惡，動兵邦域之中；漢相有真，折衝尊俎之上。薄言討伐，亟遂殄殲。南方之強歟，北方之強歟，風移俗易；東夷之人也，西夷之人也，氣奪膽寒。風聲鶴唳，不但平淮；雪夜鵝鳴，更觀擒蔡。信君子不戰戰必勝，知人臣無將將則誅。非能人百而已千，疇見兼三而施四！輔成帝略，悉出廟謨。近使觀其知，煩使觀其能，曾不陳於聲色；無事用之禮，有事用之戰，悉顯奏於膚公。非無敵用儒者之真，孰自任以天下之重！黃河如帶山如礪，疇高蕭相之功；西平有子我有臣，請繼柳侯之雅。某久違光範，逖守夜郎。揆分雖一蟻之微，聞喜極六鼇之抃。燕雀

賀夏，豈惟免風雨之憂；鴻鴈賓秋，更乞遂江湖之樂。《梅亭先生四六標準》卷一五。又見《宋四六選》卷一五。

## 上史丞相啓

從辟出蜀

西去而辭大臣，誤辱再三之命；東征而勞歸士，竟無分寸之功。顧忘百謫之盈，猶冒一慙之忍。斐裁狂簡，忸布鬱陶。伏念某意廣才疏，身勤事左。飢來驅我，遂違吾斯未能信之防；年不後人，已落無聞不足畏之境。徒守童烏之氣習，未忘子墨之生涯。滿七除二之跳踉，誠覺語言之無味；駢四儷六之吟哢，底堪豪傑之跪呈。間或小慙小好之逢，迄難大言大利之望。相國禮之過矣，昔嘗伏光範之門；大夫羅而致之，乃使入河陽之幕。路經灩澦，鬢已雙蓬；身入褒斜，命危一葉。既乏先登搢旗之績，何逃相收連坐之刑！然而聖主不加誅，復令因任；此非元戎所自辟，殆出密庸。會既建宣威之牙，始獲捧從事之檄。西曹地忍，幸不汝疵；東閣天寬，理難自絕。惟受性酷好學問，迂哉韓子之謀；矧報國獨惟文章，悲矣柳侯之志。顧且甘敗鼓渤澥之比，至欲效朽株芝菌之祥。有如萬不及於古人，其他百無用於今世。天之未喪斯文也，儻或容小道之觀；人之爲言胡得焉，盍勉作大鈞之問。恭惟某官道濟四海，勳塞兩儀。續古今難續之鼎彝，調政化不調之琴瑟。屹承天之一柱，回障海之百川。業業兢兢，贊一日萬機而無曠；湯湯蕩蕩，作十有三載而乃同。適茲殘羯之餘，尚爲困獸之鬪。

非用儒無敵於天下，何不戰可屈於人兵！齊歸侵疆，寧須憑軾之力；魏適樂土，曾無傳檄之勞。我適克至今日休，汝其敬識百辟享。爲天地立心，生民立極，賓春布萬國之和；以陰陽爲炭，造化爲工，脩月揭重輪之照。茲峻三孤之秩，益章萬世之功。以保保身，在明明德。耻一夫之不獲，當無求備於一夫；輔萬物之自然，要必曲成於萬物。巨川作舟楫則剡木皆有用之器，震風知帡幪則廣夏無可棄之材。邦其永孚于休，公有無窮之聞。尚念某倍勤埏埴，獨困泥塗。菁莪在彼中阿，曾出於春風披拂之內；菲葑無以下體，望收之秋霜刻轢之餘。《梅亭先生四六標準》卷一五。

### 代黃知縣燾上史丞相啓

錦製彌年，天不哀其陟屺；琴祥踰月，人交勸其入京。盍從小宰之銓，勿累大鈞之播。惟是沈憂之後，難於故步之尋，故提孤蹤，更干宰物。伏念某骨凡難換，器竄亡奇。廣殿賜袍，已作半枯之葉；短檠照字，終無太喜之花。幸脫選於七階，甘服勞於百里。淒其風木，越在塊苦。棘人樂樂，亦既畢三年之制；余髮種種，難更宰百乘之家。儻繩以半九十之行，寧能免落千丈之懼！然痛定而思方痛，其可再乎；謂弓人而耻爲弓，則無是也。窮於五技，望在一陶。此蓋伏遇某官父我受民，承天載物。暨湯有一德，既簡在上帝之心；惟說總百官，必監于先王之憲。然並用湖海之士，未嘗拘日月之功。既於萬物而曲成，豈忍一夫之求備！乞漿得酒，詎敢希鴈鷺之行；點鐵成金，庶不辱龍虎之榜。

某敢不刮摩所學，澡雪此心？桃李悉在公門，詎敢詠沙堤之避；葑菲無以下體，尚庶幾藥籠之收。

《梅亭先生四六標準》卷一五。又見《啓雋類函》卷二四。

### 賀喬樞密行簡除參政兼知院啓

成都運司作

晉用真儒，升參大政。運籌決勝，久注意於安危；當軸處中，仍兼資於文武。用人如此，通國驩然。恭惟某官廣淵而篤誠，高明而博厚。好學本孔顏之學，用心乃禹稷之心。非仁義不陳於前，雨露夙深於獻納；有謀猷則順于外，風霆不顯其流形。翊贊斗樞，燮和天緯。折衝尊俎，鯨鯢服京觀之刑；申畫郊圻，鱗介慕衣裳之會。然南北兩朝不能一統，由東西二府分作兩塗。今內治外治交急之時，乃政柄兵柄合謀之日，宜崇夙夜宥密之任，并策旦夕丞弼之功。蘇民力之中乾，回夷情之內巽。建久安之勢而成長治之業，杜羣枉之塗而開衆正之門。歲大旱而作霖，啓沃良資於傳說；天未陰而徹土，綢繆允賴於周公。邦其永孚于休，公有無窮之聞。某雲邊輓粟，雪裏聞麻。回思太學之十年，嘗侍司成之丈席。今三賢方施政於天下，必無不獲之夫；縱四牡非有功之使臣，願鑑懷歸之悃。《梅亭先生四六標準》卷一六。又見《啓雋類函》卷一六，《八代四六全書》卷八。

## 代賀鄭簽書昭先除參政兼太子賓客啓

顯用正人，進參大政。試之宥密，已折衝樽俎之間；倚以弼諧，必銷患廟堂之上。一賢得路，四海傾心。恭惟某官清任以和，直方而大。陽休山立，粹爲廊廟之珍；地負海涵，凜有社稷之器。來從百里，甫閱七年，徧儀清切之司，彌積均弘之望。果由樞筦，遂贊機衡。作天子之股肱，兼儲皇之羽翼。惟公懋德，相我受民，式觀鼎鼎之調，益永旂常之載。某屬拘郡組，莫旅賓綦。千萬間之歡顏，既深賀厦；三十幅之共轂，尤慶得輿。《梅亭先生四六標準》卷一六。又見《翰苑新書》續集卷二。

## 賀俞樞密應符兼參政啓

鼎升兵本，晉豫政機。立武有常，將見五原之款塞；用儒無敵，更觀三后之協心。膺一時稠疊之榮，契千載明良之會。恭惟某官材宜王佐，智可帝師。自其不辭小官之時，已負將降大任之器。夙夜宥密，甫參帷幄之籌；乾坤清夷，益結冕旒之眷。既兼資於文武，盍並注於安危。爰命宗工，式兼亞相。上帝將復高祖德，坐令趙璧之還；皇天既付中國民，豈但齊疆之復！惟股肱之寄在忠力，則道德之威成安彊。邦其永孚于休，公有無窮之聞。某夙蒙揄拂，竟自沈冥。直柄當權，恐不吝曲成之陶

冶；近畿入幕，固未爲遠去於門墻。《梅亭先生四六標準》卷一六。又見《翰苑新書》續集卷二。

賀陳簽書貴誼除參政兼同知啓 成都運司作

升參大政，復翊洪樞。仲子之辭三公，夫固輕千鍾之祿；曲逆之出六計，終當遂萬物之宜。一賢得興，多士舉笏。恭惟某官直方而大，智勇且仁。早收麟角之科，夙負黿頭之望。讀孔璋之檄，嚴嚴經國之文；卧元龍之樓，耿耿濟時之略。四國茂蕃宣之績，六條高澄按之功。登山有得於徐行，乘舟惟恐其偏重。禁中頗、牧，鼓舞號令之風雷；甄上唐、虞，緝熙光明之日月。迄由翰苑，進陟機庭。尊俎折衝，京觀正鯨鯢之戮；郊圻申畫，介冑無蟣蝨之生。立武事以有常，顯真儒之無敵。今南北分庭，和戰未一，則東西二府，謀慮宜同。爰籍前疑後丞之功，入攄經文緯武之智。邇人安，遠人至，憂民正急於憂邊；大臣法，小臣廉，正己不難於正物。相尊等耳，時來爲之。無謂於我如浮雲，當念迨天之未雨。不遐有佐，無競維人。某學既拙疏，法當憔悴，十暑自安於絺葛，一寒誰與之綈袍！昔周旋元方之間，亦欲學屠龍之技；今疲敝益州之役，良難見流馬之功。忻聞黃麻之六經，合入繡衣之九戩。燕雀賀夏，捲簾必念其差池；蟋蟀鳴秋，瑾戶願徐於穹室。《梅亭先生四六標準》卷一六。

## 賀宣參政繒啓

申命真儒，顓參大政。公輔間于兩社，德因服而益彰；天子必有四鄰，官惟人而後備。制書誕布，歡頌交馳。恭惟某官忠結主知，道先民覺。泰山喬岳無運動之迹，人蒙潤而不知；祥風和氣以長養爲心，物有生而自遂。與其參夙夜宥密之寄，不若策旦夕承弼之功。臣哉孰重於鄰哉，賢者固識其大者。今海內之事勢，若火未然；公主上之信臣，知風之自。夷情外狡，民力中乾。即戎七年而無休息之期，拓地千里而無堅凝之術。使能定未保其能應，則所憂將重於所欣。實賴同心同德之臣，亟合羣策羣力之助。收草茅之公議而用之邦國，推槐棘之和氣而達諸閭閻。非常之功待非常之人，無窮之基有無窮之聞。某崎嶇巢幕，冒昧掃門。山甫舉之莫助之，故妄陳於千慮；原憲貧也非病也，詎敢冀於一陶！《梅亭先生四六標準》卷一六。又見《八代四六全書》卷八。

## 代賀禮部曾尚書從龍除簽書兼太子賓客啓

登延駿望，翊贊鴻樞。增寶鼎九九之安，國由人重；齊泰階兩兩之色，魁與台連。廊廟得賢，華夷胥慶。恭惟某官造道自得，經德不回。一舉首登，固有榮進之素定；孤忠自立，宜卑英俊之並游。

眷既厚於兩宮，名益高於九牧。果登宥府，仍冠儲寮。時來則爲之，佇正久虛之宰席；年不可及也，諒多仰羨於端門。民無不獲之夫，公有無窮之聞。某逖聞成命，倍動懽顏。孤鶩落霞，正竊垂天之庇；六鰲抃地，莫殫賀厦之悰。《梅亭先生四六標準》卷一六。又見《翰苑新書》續集卷三。

賀薛樞使極啓 成都運司作

顓席紫樞，均茵黃閣。仲虺居薛，宜登左揆之虛；皋陶謨虞，還倚右平之重。有常立武，無競維人。恭惟某官學可帝師，材堪王佐。智周萬物，炳著龜先見之明；節貫四時，凜松栢後凋之操。周旋三省兩省之椽，練達一日二日之機。合文武以兼資，佩安危而注意。熙帝載，宅百揆，民具爾瞻；掌邦政，統六師，軍則誰與。式端兵本，專領使權。匈奴款塞五原，固出干羽之舞；子房決勝千里，正須帷幄之籌。帝曰欽哉，相尊等耳。山有木而工則度，姑遜滕侯之先封；河如帶而國永存，實自薛公之上計。佇膺帝眷，徑位宰衡。某夙累一陶，尚驅六轡。輓武功原上之粟，覺心瘵而形疲；聞文德殿下之麻，嘆形留而神往。《梅亭先生四六標準》卷一六。又見《翰苑新書》續集卷三，《啓雋類函》卷五二，《八代

## 賀薛僉書極啓

顯膺上第，進貳洪樞。道德之威成安強，有常立武；股肱之寄在忠力，無競維人。渙號再揚，師虞允穆。恭惟某官風猷膚敏，宇量浚明。才刃立解於千牛，豈躊躇於肯綮；意匠洗空於萬馬，寧慘淡於斯須。輔造化而不言，正朝廷於既治。星辰聽履，久勤朝夕之論思；雨露賜袍，遂參夙夜之宥密。漢用三傑，運籌允藉於子房；舜有四鄰，舞羽實資於伯益。遙觀偉績，追配前聞。某濫厠冗員，獲瞻盛事。帝王之興建輔弼，固知時亮於天工；甲兵之問至廟堂，更願勿窮於國力。《梅亭先生四六標準》卷一六。

## 賀程同知卓啓

登庸儒宗，陪輔兵本。綢繆牖戶，及國家間暇之時；典領樞機，基夙夜宥密之命。軍民心愜，夷虜膽寒。恭惟某官峻稟扶輿，清儲沆漑。何蕃初入於太學，共知仁義之必流；下惠不卑於小官，豈以佚遺而或怨！揚歷勞人之州縣，從容範我之馳驅。迨作牧於閩山，寢簡知於魏闕。紬書史觀，昭回雲漢之章；批敕瑣闥，鼓舞風雷之令。迄由東省，進貳西樞。惟春秋九世之讎，固將酬於千古；然乾坤

一擲之舉，不如出於萬全。願思無競之維人，益務有常而立武。運帷幄而決勝千里，正賴協心；亮天地而弼予一人，即觀顙面。某隴西冷裔，江右庸儒。頃作塵氓，正出藍田老槐之下；茲爲幕客，詎忘豐水有芑之仁！所未知鼎鼐之新，果猶念鑪錘之舊。燕雀之賀大夏，豈憂淩雨而震風；烏鵲之遶何枝，尚託稀星於明月。《梅亭先生四六標準》卷一六。又見《翰苑新書》續集卷三。

### 賀俞僉書應符啓

使北道而簡僚，曾玷網羅之舊；翊西樞而基命，茲逢鼎鼐之新。往年身未可以許人，今日士固伸於知己。輒修燕雀賀夏之敬，併吐蟋蟀吟秋之懷。恭惟某官背負天風，胸吞雲夢。自其克勤小物於州縣，已具可以大受之規模。二螭坳處之記言，一麾乃出；千騎上頭之賦政，再命茲共。回回紫橐之間，諤諤青蒲之上。露門晝講，緝熙日月之光明；瑣闥夕趨，鼓舞風雷之號令。廷臣無出右者，天子居然器之。迄自東臺，峻躋西府。九天渙號，簡二三執政之股肱；兩地升賢，繫億兆生靈之肝腦。有常立武，無競惟人。春秋九世之讎，固將必報；匈奴百年之運，未有不亡。今犬羊交噬之已深，計蚌鷁相持之不久。下策莫危於浪戰，上兵實貴於伐謀。在帝王之萬舉萬全，固求耆定；然疆場之一彼一此，正欠堅凝。幸而及間暇之時，亟宜定修攘之計。取亂侮亡兼弱也，時則易然；同寅協恭和衷哉，政將焉往。洪鈞既轉於一氣，黃麻即似於六經。伏念某拓落一官，欽崎萬狀。才固自知其無似，命亦

可歎其不猶。瞻白日於舉頭，遭海風而引去；上青天而仰脇，窘峽水之倒流。甫欲釣錦江之魚，乃忽騎將軍之馬。二年劍外，寸步矛頭，徒令蟣蝨介冑之生，安得貂蟬兜鍪之出。茲歸身於司敗，妄干祿於有司。適值大君子之登庸，不勝小丈夫之距躍。士曰時哉相君實，皆舉笏以相驩；誰其識之有歐陽，辱捲簾之有素。願煩啄抱，稍養翅翎。樂莫樂兮相知，更傍誰家之門戶；遲之遲而又久，正須大匠之鑪錘。《梅亭先生四六標準》卷一六。又見《翰苑新書》續集卷三，《八代四六全書》卷八，《宋四六選》卷一二。

## 賀太府余大卿鑄除中書舍人仍兼右司除戶部侍郎兼知臨安啓

成都運司作

帝重詞臣，公遷閣老。裁縫雲霧，便應拜學士之真；鼓舞雷風，更盡展舍人之樣。紫微炳煥，黃道開明。恭惟某官忠肅而惠和，博習而脩潔。清姿秀骨，下獨鶴於人間；厚德長材，載六鼇於海上。心醉六經之醲郁，目營四海之溺饑。文人多不護文，細行易虧於大德；宰士固習爲宰，遠圖或奪於近功。惟公超然，過人遠矣。彌綸兩省，標表九卿。久兼內史之贊書，茲正中書之三字。惟天子之義範曰制，以聖人之情見乎辭。扶山東之癯，戀漢恩而忍死；回河朔之悍，存唐祚於幾亡。一札可服於隗

囂，尺書足招於贊普。不但取九制一揮之敏，亦非專四駢六儷之工。俾萬姓咸曰大哉，則一字不容易也。衣冠盛事，夙尊八葉之科；翰墨大勳，詎止五花之判。既敷華而緯國，行迪哲以爽邦。文章於道未爲尊，風斯在下矣；富貴乃吾所自有，時來則爲之。某頃侍同朝，且依鄰壁。韓非老子，又嘗共傳，公叔大夫，詎望同升。范叔一寒，哀之命也；不哀之命也；杜陵十暑，可以言歟，未可以言歟。聞耻納溝，亦嘗推轂。上界足官府，斷不希雞犬之仙；散人拜江湖，願徑入魚蝦之侶。《梅亭先生四六標準》卷一七。又見《翰苑新書》續集卷四。

賀黃秘監序除中書舍人啓 代董制置

中宸渙號，內史升賢。三神在海上之山，久勤攝領；一佛出人間之世，遂見真除。綸綍有光，紳綏胥慶。恭惟某官材猷膚碩，學術醇深。探周情孔思之微，淵源千載；發宋艷班香之秘，膾炙四方。親結龍宸之知，聿新鳳閣之樣。辭達而已矣，要必見聖人之情；才難不其然，蓋欲極天下之選。得君爲重，緯國以文。好對紫微，草尺書而招贊普；却登黃閣，提一筆以福蒼生。某聳聽除音，阻陪賀履。千門柳色，誰憐芻狗之陳人；萬里草堂，遙想槐龍之新影。《梅亭先生四六標準》卷一七。

## 賀直院莊少卿夏除中書舍人啓

優詔上卿，正班內史。北門視草，謂當進學士之班；西掖拜真，聊復示舍人之樣。斯文增氣，有識傾心。恭惟某官蓄學醇明，揆材鉅麗。沈浸醲郁，蓋下逮於《莊》《騷》；雅健雄深，無足多之。崔、蔡。盡兼兩制，已四三年。號令鼓舞風雷，亦云多矣；獻納司存雨露，莫若專之。濃薰班、馬之香，高振綺、園之翼。有偉用儒之效，會當秉國之鈞。某假守魚鳧，阻陪燕雀。碧梧幕府，幸稍安雪外之城；紅藥主人，儻或念天涯之客。《梅亭先生四六標準》卷一七。又見《翰苑新書》續集卷四，《啓雋類函》卷八一。

# 全宋文卷七二八〇

李 劉 一六

## 賀聶左史子述啓

中宸渙號，左侍升賢。夾立螭頭，均爲清切；進携龍角，愈近凝嚴。彰清朝選用之公，示君子登庸之漸。恭惟某官材全而業鉅，學廣而聞多。秀出班行，固已芒寒而色正；凜然氣節，不爲義疚而利回。五年省闈之彌綸，萬里戶庭之清晏。賴舍人之解事，爲天子而記言。續用孔殷，序遷惟允。楚左史之能讀八索，蓋儲倚相之材；唐中禁之用第一流，亦爲議政之地。佳傳相期於千載，脩名剩跨於數公。某遠落魚鳧，阻陪燕雀。甚愧丈人厚，頃嘗聞所聞而來；屢爲丞相言，是有得不得之命。灑灑既令其膽破，岷峨亦使之眼高。望五雲多處之星，早登魁輔；倩萬里橋邊之水，聊送客心。《梅亭先生四

賀聶左史啓 代董制置

南衙渙號，東史升賢。雖君舉必書，均號司存之切；而王置諸左，益知位置之親。正人登崇，善類鼓舞。恭惟某官負材有用，蓄學不貲。健步豐扛，連六鼇於海上；清標秀質，下獨鶴於雲間。五年密贊於宰司，庶績自凝於道揆。螭頭坳處，久稱解事之舍人；龍尾道中，遂進讀書之倚相。柱下之光有耀，甌中之姓可占。某最辱挈提，尤深距躍。歸心羽翼，已久懷石潤之泉；餘論齒牙，更幸及玉關之老。《梅亭先生四六標準》卷一七。

賀章尚書啓

申命秩宗，正班宰伯。春官六十，立之長以維專；曲禮三千，待其人而後舉。有隆圖任，茲遂真除。恭惟某官重德鎮浮，清規厲俗。中流砥柱，百壬夙避其鋒；野水孤舟，六丁莫措其手。偉雲山之舒卷，關天下之重輕。迨茲改絃，復此持橐。堅車大輿，安徐而後進；光風霽月，逾久而益明。粵從貳卿，實典三禮，振自古寅清之職，還斯民子諒之心。不惟和上下而治神人，蓋將經國家而定社稷。茲引星辰而上，益高日月之依。武德間有讜言，忠無不報；貞觀初踐台斗，理有固然。某阻作鳬趨，但深黿

抃。小草有遠志，懷哉並世之醫和；大夏無棄材，盍以與聞於匠石。《梅亭先生四六標準》卷一七。

### 賀任尚書希夷啓

晉長冬官，復兼夕闋。國有六典，孰如事典之優閑；命出一人，實預舍人之駁正。況躋中庶，尤簡上知。恭惟某官胸湛秋霜，筆翻春潦。獻納日月，仁義陳於王前；鼓舞風雷，言語妙於天下。久典三禮，既諧兆民。疇若予工，併任塗歸之責；乃在吾禁，就兼翼贊之華。忠既結於兩宮，名益高於九牧。投珠委地，必有清平尚書之言；批勅回天，更觀儒者給事之效。既劑高馮之藥石，即羹傳說之鹽梅。某聳聞除音，喜至滿面。君子得興，民所載也，豈但收稽古之功；袞職有闕，我儀圖之，知必稱納言之任。若方朔之餓欲死，與杜陵之凍且僵。不知命而且鳴且號，亦無耻矣；其潔己之與進與退，惟所命之。《梅亭先生四六標準》卷一七。又見《翰苑新書》續集卷五。

### 賀陳尚書率除吏部尚書仍兼內翰啓

成都運司作

峻長六卿，增崇八座。惟王有成績，紀于日月之常；命汝作納言，引此星辰之履。仍專鼇禁，增重雞翹。恭惟某官學躋道真，器函天粹。絕識洗空於萬馬，全材立解於千牛。積江漢經營之勞，有河

山帶礪之烈。允文允武，立德立功。還頗、牧於禁中，悍卒回心於讀詔；講唐、虞於氍毹上，頑民聽命於舞干。茲膺典選之升，始是奮庸之漸。文昌垂象，實爲上將上相之躔；武帳前驅，行有爲保爲師之命。暫煩長文制九品之任，行見曲逆遂萬物之宜。某未解漕冰，正馳驛路。聞尚書之踐台斗，或垂念於孤槎；聽散人之拜江湖，早歸身於三徑。《梅亭先生四六標準》卷一七。又見《翰苑新書》續集卷六，《啓雋類函》卷三八。

### 賀鍾侍郎震除侍左侍郎兼中書及侍講啓

大君渙號，小宰升賢。三銓審官，尤重左曹之衡尺；一佛出世，仍兼右掖之絲綸。碧落彌高，紫微增煥。恭惟某官日營四海，胸著千年。關百聖於寸心，不夷不惠而願孔子之學；掃千軍於獨筆，非韓非孟而成歐陽之文。雲雷十載之經綸，江漢六年之方泳。怒鵬既擊，凡馬皆空。蛻骨地仙，直上蓬萊瀛洲之島；影纓天策，徧儀承明金馬之庭。堯醴舜醺，最宜爲誥；班香宋艷，安敢比材！非道不陳於前，在庭無出其右。日獻月納，亦有嘉謀；年除歲遷，士無異論。四輔既備，命史佚以記言；五禮有庸，咨伯夷而降典。露門重席，星戶鳴珂。緝熙有賴於仔肩，左右宜咨於汝翼。掌六典之貳，更追裴馬之蹤；遂萬物之宜，即接夔龍之武。某夙蒙推挽，竟自顛隳。今墮孤雲落照之邊，誰復高山流水之賞！江梅尚難於寄驛，海棕詎易以移栽。然蓬婆雪邊，十暑碎杜陵之葛；在玉堂天上，一寒望范叔

之袍。《梅亭先生四六標準》卷一七。又見《翰苑新書》續集卷七，《八代四六全書》卷九。

### 賀江陵趙制置方除工部侍郎啓

優詔元戎，升卿起部。司空用以寵舊荆之牧，未曰殊恩；貴人不待入長安之城，亶爲異數。中權增壯，上眷彌深。恭惟某官氣直而溫，材弘以毅。稟衡山扶輿之積，人知鍾駿嶽之神；師葵軒正大之傳，天使壽熊湘之學。聞善若決，疾惡如風。粵從使指之膚，出領制垣之重。姦貪膽落，洗空當道之豺狼；夷虜心寒，驚遁繞枝之烏鵲。寬九重顧，既四三年。江左見導無憂，固將大用；北門非準不可，未免小留。惟無敵知儒者之真，況有功見賢人之久。徒得君重，使若予工。豹尾雞翹，獻納上司於雨露；熊旂犀節，嘽嘽外震於雷霆。營壘旗幟，初無所更；朝野人士，皆爲之慶。洞庭彭蠡，可但爲分北之區；廣漢江沱，蓋亦繫二南之化。況占雲祲，當護風寒。竊窺往年根本宜固之言，及讀近日事業無窮之奏。萬國玉帛，豈甘安王業之偏；百年丘墟，亦貴度時賢之力。願謹郊圻之申畫，故思牖戶之綢繆。中興當用實材，更訪英豪於物外；上策莫如自治，合商得失於楮中〔二〕。與民守之，吾庸多矣。朝廷已深知治行，豈但儀簪橐之班；牙纛不足爲公榮，要當勉旂常之績。某雖無學術，知有忠賢。頃捧辟書，輒干賓謁。不緣介紹，蒙稱人品之高；尋因憂恫，又爲地主之累。今者尋磨驢之步，復茲修賀燕之恭。登樓而憶仲宣，豈但感凋零之迹；下堂而執駸蔑，或許傾結約之心。《梅亭先生四六

標準》卷一七。又見《八代四六全書》卷九。

〔一〕楮：原作「楮」，據四庫本改。

### 賀趙制置彥呐除兵部侍郎啓

顯冊宗藩，升卿武部。司馬掌九伐之法，外益重於中權；元戎先十乘之行，遠式遄於近列。傳聞四海，忻懌一詞。恭惟某官迪德碩膚，負材瓌特。獻宗英之禮樂，卓爾不羣；謀元帥於詩書，飄然無敵。文武作萬邦之憲，精神折千里之衝。三百廛兮，竊笑無功之祿利；十八年矣，備嘗在外之艱難。自殄鯨鯢之妖，滋奪犬羊之氣。茲膺天寵，迄拜夏卿。獎三軍以定中原，聿觀偉績；間兩社而輔公室，佇接前芳。某治任方歸，聞報失喜。知有功之則悅，見無德之不酬。錦城雖樂，不如早還，益增西望；繡裳無所，於汝信處，更佇東歸。《梅亭先生四六標準》卷一七。

### 賀朱倉在除度支啓

任兩浙運幹作

勞使臣之還而歌《四牡》，知入重於郎垣；旅天子之命而作《嘉禾》，又暫留於輔邸。蓂爾幕下之

士，託於畿內之侯。敬德已深，修辭敢後？恭惟某官政由學出，心以家傳。昔者周公，固望伯禽之拜後；趨亦夫子，誰知孔鯉之異聞。雖剛大之氣浩然，而中庸之德至矣。揭節以出，送以禮樂而有光；當官而行，編之詩書而無愧。茲拜握蘭之召，又爲騎竹而留。歛惠而施一州，寧容黔突；輯瑞而班羣后，即聽紫泥。某偶爾依蓮，正茲索米。囊粟二百之俸，實隸治封；遣介咫尺之書，敢修庸敬。《梅亭先生四六標準》卷一七。

### 代回宮使待制史侍郎彌堅啓

貳訓夏之刑，已慙弗績；攝司冬之典，尤愧誤恩。曾巽謝之未遑，遽謙光之先辱。恭惟某官久勞于外，式遄其歸。大纛高牙，茂展幹方之略；珍臺間館，暫從均佚之謀。輟湘水之曉行，趣宣室之夜對。有勤餘芘，亦及陳人。某視蔭幾何，強顏已甚。司納言之喉舌，轉覺濫竽；借餘論於齒牙，早期納履。《梅亭先生四六標準》卷一七。

### 代胡尚書回趙編修啓

二日栗烈，寒但感於實冰；五雲郁紛，文乃工於翻水。物將其意，愧在於肝。恭惟某官有偉宗

英，入陪廟筭。駕輕就熟，問津槐棘之榮；噓枯吹生，假寵桑蓬之賤。粲然駢儷，幸此衰遲。郭令二十四考之書，此言何爲至我；魯侯萬有千歲之頌，所有更以贈君。《梅亭先生四六標準》卷一七。又見《翰苑新書》續集卷八。

### 賀洪郎中咨夔除察院啓

成都運司作

親擢郎潛，進司臺察。十年去國，安泉石之膏肓；一札起家，任朝廷之耳目。公無欣戚，邦有榮懷。恭惟某官行守宮庭，道探壺奧。養以剛大，獨扛百斛之龍文；出其緒餘，連中八科之麟角。惟其守專而退勇，是以任重而進難。社下之肉既均，尋拜護軍之曲逆；治中之足未展，顧令乘障於陰平。儀粉省以歸班，封皂囊而論事。回天有力，方將批徑尺之鱗；偃月生疑，已不容立仗之馬。曾謂考功一出息之頃，遂見拾遺九鑕火之明。星既坼於中台，席遂前於半夜。甫登表著，徑拜裏行。獬豸觸邪，難置豺狼而不問；鷹隼始擊，尤關龍象之共觀。聳聞破頭，已足落膽。刊九山滌九川，陂九澤，通地氣以上騰；辟四門明四目，達四聰，發天光而下濟。此真御史矣，豈憂匈奴哉。鑄金鼎以圖姦，不難調鼎；察玉衡而齊政，然後保衡。某一寒漕冰，六暑戍雪。將返閭閻而曝日，喜聞臺閣之生風。鵬鶚之在秋天，儼或寬於西擊；烏鵲之繞夜月，願姑聽其南飛。《梅亭先生四六標準》卷一七。又見《翰苑新書》續集卷五。

賀王寺簿遂除察院啓 成都運司作

峻擢容臺，進司糾院。明天子厲精之日，爭睹親除；真御史遴選其人，迄符衆望。風雲感會，山嶽動搖。恭惟某官心幹九秋，文焰萬丈。摘髭名第，不應州縣之徒勞；策足要津，共擬公侯之必復。堅車大艦，每難於進；光風霽月，既久則明。上欲求忠臣之尊，念無易太常之肅。嚴霜烈日，姑令鑄金鼎以察姦；縫霧裁雲，行即登玉堂而草制。某久違楓陛，聞進蓋臣。行行且止而避驄，莫陪旅賀；皇皇者華之維駱，願以汰歸。《梅亭先生四六標準》卷一七。又見《翰苑新書》續集卷五。

賀董司諫居誼啓

進思補闕，仍侍邇英。責重寄隆，益可告嘉猷于后；謀從言聽，轉當下膏澤於民。朝野喧然，宗社幸甚。恭惟某官所養剛大，而道中庸。人方此重而彼輕，公獨以退而爲進。廷臣無出右者，天子居然器之。拔自州麾，徧儀朝著，亟拜拾遺之命，仍陪勸誦之聯。緝日月之光，良多啓沃；犯雷霆之怒，大有激揚。不賣直以取名，惟格王而正事。簡在中宸，遂升左垣。考司諫七品官之階，雖云序進；然大人一正君之事，正屬司存。今目前無必至之憂，而天下有未形之患。戎心外狡，民力中乾。

天文變怪而難謀，人才卑少而不競。民保於信而信屢爽，位守以仁而仁不流。吏惰且貪，兵虛仍脆。無非事者，請先大者之圖；彼何人斯，尤願辨之之早。自古建久安之勢，成長治之業，莫若杜羣枉之路，開衆正之門。國人曰賢，左右皆曰賢，無使滯淹之久；君心以正，遠近一以正，切防浸潤之行。閫內閫外，不容二心；宮中府中，當爲一體。舍豺問狸則民不服，如鷹逐雀則君自尊。察嫠婦之私憂，回倉公於驚走。庶淮南知憚於汲黯，而昌黎無惑於陽城。名節皎然，芬芳多矣。富貴乃吾所有，何足計哉；忠良得路之難，切宜念此。某當獻嘉頌，顧進苦辭，蓋有感平日之知，不敢作細人之愛。諸公不喜生語，柔則茹之；善人能受盡言，遐不謂矣。尚欲作石守道紀德之頌，幸勿還李師中落韻之詩。《梅亭先生四六標準》卷一七。又見《翰苑新書》續集卷五。

### 代回傅大諫伯成啓

自天分閫，易地殿藩。南內思賢，已使候西廂之對；東甌報政，又當綰北固之符。恭惟某官王之蓋臣，邦之司直。觀其動搖於山嶽，安閒狐狸；使之感會乎風雲，蔚如虎鳳。汲黯願居於禁闥，望之願出於平原。一言寧急於封侯，萬物盡令其吐氣。茲驅大纛，又卧長江。邊秋一鴈聲，幸騎烽之灌燧；人生五馬貴，羨燕寢之凝香。某自愧秋零，阻陪夏賀。仁義與王言者，寧千里而莫追；邂逅適我願兮，或一見而後去。《梅亭先生四六標準》卷一七。

# 賀黃安撫除大理少卿啓

知榮州作

晉卿叢棘，升帥前茅。乘八月之槎，既瞻相於斗柄；回二星之部，仍典領於參旗。四履歡然，重臨幸甚。恭惟某官負材明允，蓄德碩膚。齋沕澄深，得龍津炳靈之秀；扶輿鬱積，繼龜山正學之傳。久留金馬之坊，妙幹木牛之運。中兼閫制，外憺戎昭。遠略折衝，南人不復反矣；從臣虛位，東山以公歸兮。然河內競借於寇恂，宜關中復留於蕭相。峻升金掌，併總玉鈴。公去公來，信有關於輕重；時行時止，俱不失其光明。共羨班景倩登仙之除，咸有樂正子爲卿之喜。佇盡護於諸將，遂進長於六官。某淒其一寒，去此十暑。未問五馬二毛之無用，最覺孤鴻獨影之可憐。矧熬波之素封，今掃地而赤立。水旱重蓼蟲之苦，風景增蓴鱸之思。所幸潁川黃霸之復來〔二〕，或察夜郎李白之可念。老牛舐犢，誰敢論瓜葛之連；孤鳳求凰，或亦備蘋蘩之薦。其爲頌侯，罔既鋪菜。《梅亭先生四六標準》卷一八。又見《翰苑新書》續集卷九，《宋四六選》卷一三。

〔二〕潁：原作「穎」，據四庫本改。

## 賀岳總領珂除大卿啓

四牡奏最，九扈升班。王人不微，夙序諸侯之上；臣卿雖少，有光八使之間。邊面驩然，帝心簡在。恭惟某官天材敏邵，地望穹華。滿腹精神，解千牛之肯綮；撐腸文字，空萬馬之躊躇。豈惟建武功臣之家，亦習貞元供奉之曲。久將餉指，仍領价藩。盍歸乎來，遂登龍尾，見知則悅，聊進豹祛。卿不同乎，暫掌九功之貳；侯誰在矣，亟膺一札之招。某共飲玻璃，未覲珪玠。視諸故府，龍猪竊幸於同宮；于彼新田，燕雀敢稽於賀夏！  
《梅亭先生四六標準》卷一八。又見《八代四六全書》卷九。

## 代回王大卿補之啓

入覲楓宸，升卿棘寺。民之攸墜，久凝畫戟之清香；王曰遄歸，復畀青氈之舊物。恭惟某官器質膚敏，機量浚明。京兆有王之歌，至今未泯；江東無卿之嘆，所去見思。輟自銀符，入躋金掌。敬爾攸獄，監于祥刑。民自以不冤，行課清明之效；王言惟作命，即登獻納之班。某過沐幸臨，更勤委重。冷秋菰，寒水玉，覺執熱之頓清；金錯刀，英瓊瑤，愧報嘉之不腆。  
《梅亭先生四六標準》卷一八。又見《啓雋類函》卷七八，《八代四六全書》卷一三。

### 代回李寺正直柄啓

拜命楓宸，陞華棘正。好生如舜，方惟刑之恤哉；選衆舉臯，則不仁者遠矣。恭惟某官持心近厚，折獄惟良。自再轉而爲丞，益揚淑問；宜片言之寤主，茂進崇階。某有幸爲寮，未皇稱慶，猥辱鳴謙之賜，聊申叙復之私。《梅亭先生四六標準》卷一八。

### 代回劉寺正啓

刑期無刑，丞非余負；正率不正，帝曰汝諧。先庚具孚，同寅良幸。某謬忝秋官之貳，極深夏賀之私，姑奉手牋，別遲面慶。《梅亭先生四六標準》卷一八。

### 代回李寺丞直柄啓

拜命明庭，司刑贊府。一麾出守，所至如破竹然；再轉爲丞，此行若登仙矣。恭惟某官機神明浚，識度端凝。治己治人，洞知周、孔之情思；讀書讀律，又欲堯、舜其君民。徧儀棘寺之華，幾致

草扉之鞠。郡符既合，邊瑣多驚。甫清遠障之風塵，旋奉殊庭之香火。帝念師旅饑饉之後，折民惟刑；人思賢明慈惠之師，命汝作士。肆敷芝檢，參貳李官。昔張蘊古之直聲，由茲論賞；雖狄梁公之相業，自此升階。欲識遠圖，請觀近比。某與聞犴獄，似是馬曹。具嚴天威，望盡心於閱實；頗哀老子，或袖手以蒙成。少遲九遷，當不一賀。《梅亭先生四六標準》卷一八。

### 代回陳寺丞振啓

方欲取違，先勤言別。出處亦吾輩之先事，是非至他日而後明。風雨蕭蕭，願雞鳴之不爽；雪霜貿貿，終麥秀以何疑。敢因報章，并申善禱。《梅亭先生四六標準》卷一八。

### 代回呂寺丞祖平啓

奏最竹符，陞華棘寺。辟以止辟，九重之念在茲；丞不負丞，三尺之平必矣。恭惟某官象賢濟美，燕譽騰芳。伯仲墳簞，曲突之忠甚切；公侯閥閱，直鈎之釣猶遲。茲從漢化之更，宜有呂刑之命。某辱同寮案，喜倍等倫。自此蒙成，不負嘉師之託；逃於司敗，亦惟餘潤之依。《梅亭先生四六標準》

卷一八。又見《啓雋類函》卷七八。

# 全宋文卷七二八一

李 劉 一七

## 代回大理沈寺丞繹啓

久參棘屬，進貳李官。丞不負丞，益懋平反之蹟；辟以止辟，助成欽恤之仁。某有幸爲寮，未遑趨慶。《梅亭先生四六標準》卷一八。

## 代回沈評事啓

榮持邑最，歸領廷評。惟丹筆之祥刑，實青氈之舊物。頭銜如故，步武已高。恭惟某官服襲芳馨，蜚騰聲實。早脫囊中之穎，詳明柱後之文。棘寺參華，竹書惟允。屬拘邦典，暫試民庸。麥熟兩岐，雖道途之交詠；桃栽千樹，宜車馬之重來。某有幸爲寮，未遑贊慶。遣長鬚而致雙鯉，良感先

施；跂織女而終七襄，更慙匪報。《梅亭先生四六標準》卷一八。

### 代回大理樓評事澄啓

舉賢有格，當簡乃僚；折獄惟良，徒得君重。公車之牘晚矣，私室之謝何哉。恭惟某官地望已高，天資仍茂。讀書不讀律，懼無術以致君；治己後治人，寧以身而試法！決科雋甚，詳讞瞭然。豈無他人，恐未如于一鶚；惠而好我，何不吝于雙魚。某濫貳秋卿，又見春序。小狐汔濟，亦奚事于聽冰；良馬空羣，望自期于追電。《梅亭先生四六標準》卷一八。又見《啓雋類函》卷七八。

### 代回程監丞準啓

五雉分工，誤恩攝長；雙魚尺素，取數過情。恭惟某官四海老成，累朝耆舊。人生待足何時足，得住爲佳；官職有來還自來，不聞亦式。應笑戀軒之疲馬，未能返肆於屠羊。某自揣頭顱，難司喉舌。匪朝伊夕，即騰納祿之章；爲官擇人，空忍見賢之渴。《梅亭先生四六標準》卷一八。

### 代回程監丞準啓

出命明庭，祝釐間館。隽永乎山林之味，樂且無央；參寥乎香火之緣，老當益壯。恭惟某官棲遲盛福，笑傲明時。詔祿珍臺，又拜散人之號；養神丹鼎，應與造化者游。所恐蒲迎，不容橘隱。某歸已晚矣，行或使之。汗漫相期，本許以急流之勇退；侏儒獨飽，敢久於暮夜而倒行！《梅亭先生四六標準》卷一八。

### 代回軍器王監簿渥啓

對越宸綸，勾稽武庫。爲太守選所表，既有文章；除戎器戒不虞，亶爲稱職。公議如此，私謝何爲。恭惟某官故家典刑，中州胄出。婉贊幕中之畫，勇分海上之符。焉能使予不遇哉，姑從外補；有欲爲不留行者，迄得內除。時雖旣戢於干戈，法合咸精於器械。小煩會計，會即騫騰。某自嘆望秋，未遑賀夏。豈無青精飯，此心惟切于謀歸；贈我綠綺琴，無說可從而厚報。《梅亭先生四六標準》卷一八。

## 回朱司令在啓

渙奉宸綸，晉司帝籍。用過庭所學之禮，習祈年孔夙之詩。有渥新除，式光舊德。恭惟某官清門偉望，名世故家。先正接伊洛之宗，源流甚正；後學出河汾之派，沾丐居多。卒老于行，克昌厥後。故從綠水紅蓮之幕，入庀紺轅黛耜之司。此非不稼而取禾，政欲敷菑而肯播。少培飛步，即輅華塗。某偶此綴班，何勤委贄。自憐往日識野鶴於未仙，猶喜殘年見名駒之有種。《梅亭先生四六標準》卷一八。

## 代回詹大社久中啓

陞華司社，贊治容臺。惟是詩書禮樂之儒，始明籩豆簠簋之事。用人如此，通國欣然。恭惟某官奮自清門，徑收名第。下帷分教，不辭獨冷之氈；當路交章，爭取橫前之寶。果從蜀道，入典漢祠。拜如絲如綸如綍之言，實自今始；考以松以栢以栗之義，應有古心。某有幸識賢，過蒙委贄。數旬爲客，會已見於榮遷；一日不齋，猶願安於承教。《梅亭先生四六標準》卷一八。

### 代回趙太社汝讜啓

庀司太社，贊治奉常。舍文字旁午之勞，共夙夜惟寅之命。恭惟某官九苞威鳳，千里名駒。抱朱虛之忠，請鉏呂產；笑紅休之陋，更媚王音。毅然料虎之頭，樂只跋狼之尾。忠精既白，論諫如丹。徑咨禮樂之英，入司籩豆之事。雖離肅肅，何嫌三百日之齋；親親賢賢，行有十六相之舉。某未遑旅賀，先辱臨存。贈綠綺琴，愧不辦南金之報；植青藜杖，滿期校東壁之書。《梅亭先生四六標準》卷一八。又見《啓雋類函》卷八二。

### 代回李國錄誠之啓

知賢不早，聊剡需章；委贄相先，足鳴謙德。不知所報，藏奔爲榮〔一〕。恭惟某官殖學精深，摛文鉅麗。早飛英於學省，即中雋於儒科。固知几閣之文書，難屈朝廷之翰墨。爲數旬客，已光文學掌故之聯；無幾何時，果見國子先生之入。比者公車之牘，豈其私室之恩！過辱臨存，更勤巽謝。某無能報國，惟有薦賢。憑豐隆，懇飛廉，雖寄聲之已晚；登閭風，歷閭闔，猶刮目以相期。《梅亭先生四六標準》卷一八。又見《翰苑新書》續集卷九。

〔一〕奔：原作「去」，據四庫本改。

## 代回曾國正準啓

晉司樂正，益重儒官。盈几閣之文書，久勤作主；申庠序之孝弟，茲遂得師。恭惟某官賦敵凌雲，文成翻水。排空直上，合盛之白玉之堂；取勢斜飛，亦宜在青藜之館。茲以文學之掌故，入爲國子之先生。佇德成而教尊，必言揚而事舉。某過勤投壁，愧乏報瓊。化民成俗由學乎，儀圖莫助；傳道授業解惑也，切幸自強。《梅亭先生四六標準》卷一八。

## 賀聶宮教子述啓

疇庸軍計，分教宮藩。王事我獨賢勞，恬然終歲；仁人誼不謀利，展也自今。除目一傳，滿口交慶。恭惟某官蓄學有裕，撝材不貲。人見其五兵之精神，孰窺其一劍之肝膽。長沙射鴨，袖不足以回旋；郴嶺割雞，氣益高而磅礴。甫通班筭，又宰盤根。取美最以來朝，紛文章之至闕。諸公之登臺省，盍息吾黥；此士之落江湖，真令人癭。爲州別駕，去國期年。皇帝曰嘻，誰會廩人之出；丞相言是，莫如國士之追。方當楮幣新舊之交承，頗覺中外人情之訐阻。公能調益，民得懋遷。茂丕績於帝

庭，進嘉謀於王府。會計當而已，昔專出納之司；誦說云乎哉，今乃範模之職。於皇列邸，肇建明師。高帝子孫，固有殊人之龍種；梁王賓客，豈徒授簡於兔園！必明禮義廉耻之原，使知君臣父子之實。庶淮南知憚汲黯，而東海亦敬王尊。此外功名，時來則爲之耳；向來學問，公烏得無情哉。某辱知頗深，圖報失喜。行行驄馬，孰不知尺五之去天；戢戢魚頭，詎敢乞斗升而活我。《梅亭先生四六標準》卷一八。又見《翰苑新書》續集卷九。

### 代回史文思彌忠啓

率其屬以僦功，慙於尸位；簡乃僚而剡奏，幸甚得賢。公義宜然，私謝何也！恭惟某官早收名第，晚步選階。鵲鴒在原，固不私詔王之爵祿；鴻鴈于野，寧當廢治世之羽儀！茲聯事之偶同，難見善而不舉。惟是四六之惠，則貽方寸之慙。某非曰納交，聊復借重。子若無言幾失子，幸暮取之拔尤；君家所有更贈君，無歲寒而易葉。《梅亭先生四六標準》卷一九。

### 代回黃文思燾啓

共工率屬，獲陪鄉曲之英；應格薦賢，實致邦家之助。是爲公舉，何以謝爲！恭惟某官早決科

名，久淹選調。學深純而有本，氣穩重而不浮。久矣卜鄰，欠李邕之識面；偶然結綬，勤貢禹之彈冠。何愛一鶚之章，少效匹雛之力。名節皎日，富貴浮雲。願無忘激昂之言，庶不孤期待之意。某不善爲斲，兆足以行。偶成一簣之山，亦持自賀；切玩連編之月，却愧所蒙。《梅亭先生四六標準》卷一九。又見《翰苑新書》續集卷九。

### 代回王文思自適啓

聯事爲僚，見賢當舉。同年有子，相識已深。輒剡櫝於公車，豈收恩於私室！恭惟某官世濟其美，父教之忠。不謂二十年之間，未脫六七階之選。聊爲破白，何必謝青！某老矣斲輪，味於推轂。奏記誓報，非所望於高明；處事律身，願不孤於題品。《梅亭先生四六標準》卷一九。

### 代回趙文思師桌啓

率屬共工，已愧薦賢之不武；陳篇奏記，更勤博我之以文。恭惟某官天派甚清，人門具美。轅駒奏步，自是千里之奇；方鳩僦功，未脫七階之選。察其實歷，當以名聞。某不勝匹雛，濫長五雉。同官爲僚之義，固已盡心；爲善最樂之功，更期勉力。《梅亭先生四六標準》卷一九。

### 代回彭文思耕啓

五雉爲工正，甚幸爲僚；雙魚有尺書，先勤委贄。恭惟某官崇蘭流馥，喬木故家。在梓匠輪輿，亦足以試；有準繩規矩，何患無成！所恐出入如相避然，莫助左右爲先容也。某濫茲攝長，行矣告休。聞弦賞音，已認相求之意；留渴待飲，所望見察以情。《梅亭先生四六標準》卷一九。

### 代回龔告院堪啓

疇庸外轄，服采中朝。乃積乃倉乃糧，久勤回謁；如絲如綸如綍，盍賴主張。恭惟某官學本家傳，美由世濟。京邑翼翼，恬於風月之分；江漢浮浮，裕此丘山之積。進掌四司之告，出專一札之文。諒不俟駕而行，必有勿藥之喜。某淒其骯髒，久此蹢躅。已騰二宜去之章，足以行矣；猶及再相別而去，顧不幸哉！《梅亭先生四六標準》卷一九。又見《翰苑新書》續集卷九，《秘笈新書》卷六。

## 代回万俟卨院似啓

渙奉明綸，晉司理甌。導人使諫，聖上實千載之逢；命汝納言，堂下無萬里之隔。恭惟某官世濟其美，德浮于言。練詳臺閣之儀，服襲廟堂之學。積勞于外，益閱其中。果騰列剡之章，入掌四方之牘。告嘉謀于后，應無不得其言；下膏澤於民，亦有無窮之聞。某未遑燕賀，先辱魚牋。驅飛廉而寄聲，恍已迷於昨夢；排閭闔而披腹，猶有望於朝陽。《梅亭先生四六標準》卷一九。又見《翰苑新書》續集卷九，《啓雋類函》卷七八。

## 代回新監文思院門史從政彌忠啓

分職率屬，疇若予工；同官爲寮，徒得君重。貽書寵甚，陳義曄然。恭惟某官氣節雄深，詞華炳蔚。丹穴五色，皆鳴孤竹之聲；青雲共登，已正三槐之面。居然斂板，獨此抱關。漢相不以兄故私，未妨緩步；史魚直哉邦有道，願接芳塵。某爲長於斯，懷歸久矣。或論道，或審曲，等是王官；非邀譽，非納交，願成晚器。《梅亭先生四六標準》卷一九。

### 代回吳架閣柔勝啓

起自珍祠，入司故府。人登龍斷，孰知靜退之風；公不蠅營，宜有登崇之命。恭惟某官器資莊裕，德履淑均。讀數萬言，信一第之直溷子；閱三十載，猶屢薦而不入官。茲回香火之功名，來主文書之几閣。假途數月，發軔九衢。某有幸協恭，先勤遣記。匪我言耄，實慚堂下之斲輪；及爾同寮，知免袖間之縮手。《梅亭先生四六標準》卷一九。

### 代回薛架閣君用啓

渙奉新綸，晉司故籍。文書盈於几，愛莫助之；牒訴裝其懷，今知免矣。恭惟某官河東鸞鷟，冀北麒麟。自中雋於文闈，即舒翹於侯泮。鷗臯未集，豺虎已多。車麟麟，馬蕭蕭，君誰與守；印纍纍，綬若若，吾不徒行。宜哉薦揚，有此除寵。佇憲章之明習，即臺閣之飛騰。某甚愧濫巾，猥勤銜袖。居州在宋，真足爲王所之賢；夫子却齊，願更觀儒者之效。《梅亭先生四六標準》卷一九。

## 代回曾架閣準啓

奉一扎之新除，司兩部之故籍。簿書獄訟之事，似屈長材；文學禮義之官，豈非妙選。未繇旅賀，猥辱損牋。恭惟某官琴瑟廉溫，琮璜秀潤。摩空作賦，早呼殿陛之臚；重席談經，久繫堂階之馬。身纔趨於幕府，名益震于京師。朝方虛掌故之負，人皆有欲炙之色。下交章而薦禰，上弄印以授堯。群無留良，衆乃退聽。今雖刑清而役簡，政須綱舉而目張。几閣文書，何厭數旬之客；朝廷翰墨，會歸三館之英。某一自識賢，數勤委贄。引重鼎，不程力，長恐見笑於大方；既識路，又疾驅，敢願益堅於壯履。《梅亭先生四六標準》卷一九。

## 代回黃架閣伯劑啓

渙奉新綸，晉司故府。俎豆軍旅之事，允藉通材；文學禮義之官，亶爲妙選。恭惟某官蟠書拄腹，取第摘髭。祭竈一同，有珞珞球球之氣；隨軺萬里，無乖乖刺刺之情（二）。流聲實於朝廷，主文書於几閣。更培風力，會決雲衢。某何與推賢，過勤委翰。投我木李，莫輸論報之情；期君蟠桃，姑寫願忠之意。《梅亭先生四六標準》卷一九。又見《翰苑新書》續集卷六。

〔二〕乖乖：原作「無」，據四庫本改。

### 賀桂侍郎如淵再任制帥啓

知榮州作

進直奎文，借留井絡。惟益部刺史之寄，在漢已嚴；而瀛洲學士之官，至唐尤重。備茲異數，允在真儒。恭惟某官器博以周，材洪而毅。文武式萬邦之憲，精神折千里之衝。江漢經營，早追蹤於羊、杜；日月獻納，旋接武於夔、龍。帝念岷峨，地連關陝。四松候對，中權足壯於前茅；尺筆策勳，數節可窺於破竹。爰進真學士之職，式重大元帥之威。河內共借於寇君，檐帷暫駐；關中既留於蕭相，營壘益堅。光增東壁之圖書，權重北門之管鑰。式遄袞繡，歸耀旂常。某乘障雪邊，庇身宇下，愧涸魚之喁喁，隨賀燕以差池。牽牛而奪之牛，誰能回幕中之辯；御馬而窮其馬，度決非門下之心。儻或愛尺寸之膚，更幸貸斗升之水。我有二天之飲酒，誰敢望於私恩；爾來三月之無鹽，更乞參於公議。其爲頌望，曷既敷陳。《梅亭先生四六標準》卷二〇。

### 賀黃安撫大卿除工部侍郎仍兼安撫制置副使啓

換冊元戎，升卿起部。修車馬，備器械，夙重小司空之權；閱禮樂，崇詩書，將正大行臺之任。

命申重巽，驪溢全坤。恭惟某官智勇且仁，直方而大，肝膽鍾一雙之劍，精神峻百丈之峰。叔度萬頃之陂，世莫得而澄撓；次公重臨之政，人轉服其寬明。坐令火井之沈熒，真覺雪山之增重。敬刑而成三德，既平夏辟之三千；事典以治萬民，爰長冬官之六十。藉五雉五工之正，挽一龜一琴之留。當益州疲敝之秋，須朔方精明之令。星辰聽履，豈但高法從之班；日月爲常，佇滿載元功之籍。某承流支郡，席芘和門。誰其采白露之葭，顧使轉青天之粟。不能者止，未容叱馭而驅之；克壯其猶，尚倚約軹之率只。《梅亭先生四六標準》卷二〇。

### 賀聶侍郎子述除制置啓

代董侍郎

躋班禹閣，宅牧蜀都。輟言語侍從之臣，盡護諸將；藉文武威風之帥，式遏四夷。渙號風行，坤垠雷動。恭惟某官氣噓海岱，胸湛冰霜。善刀遊肯綮之間，全牛立解；意匠淡經營之表，凡馬坐空。惟其日千里而有餘，是以歲九遷而無慊。鸞臺鳳閣，積彌縫輔贊之功；螭陛雞翹，弘獻納論思之益。上矜遠服，中遣近臣。弄印無以易堯，爰峻西清之職；披圖指以示禹，俾圖北伐之功。惟真學士象十二月之班，而大府帥總六十州之重。獬豸匪茹，須方叔之壯猷；皇帝曰嘻，命崇文而奉詔。不但洗岷峨之愴，又將蕩秦隴之妖。玉壘既安，金甌必啓。某五年承乏，百伎已窮。賴公爲父老而來，許我託子孫之契。田間索栗，看即騰新尹之誇；門外種瓜，便可遂故侯之隱。《梅亭先生四六標準》卷二〇。又

見《翰苑新書》續集卷一〇，《八代四六全書》卷九。

### 賀聶侍郎交割啓

代董侍郎

涓選剛辰，恢張制閫。千二百里之邊面，威令風行；六十餘郡之人心，驩呼雷動。恭惟某官秀姿玉峙，炯識冰明。鞭霆駕風，既出漢廷臣之右；捫參歷井，肯爲蜀父老而來。行宣暢於皇靈，即蕩搖於戎索。佛狸之死卯有數，何待來年；晉公之雄甲成功，應在今日。氣色一新於壁壘，勳勞滿載於旂常。某聳聞建牙，遂可納履。催飛將而追驕虜，正虞或累於指麾〔一〕；躍歸鞍而飛賀書，猶冀亟諧於邂逅。《梅亭先生四六標準》卷二〇。

〔一〕指麾：原缺，據四庫本補。

### 賀聶制置子述啓

庭揚成渙，閫制全坤。璧府奎圖，莫重東頭之學士；參旂井鉞，況專西道之行營。夷虜膽寒，士民心愜。恭惟某官天資弘毅，風采浚明。精神五兵，六丁莫擬其銳；肝膽一劍，百壬爭避其鋒。策勳

自馴雉而來，取官有驅羊之易。今之從政，容有位隆而道污，公所過人，正惟功大而心小。茲煩雍橐，來牧蜀都，許以金城之便宜，盡護玉關之疆場。三分籌策，小試渭濱耕戰之謀；百二山河，行復關中帝王之業。功名留於久遠，富貴乃其緒餘。某夙累公知，何辭吏役。然受敢不敬蚤夜之祝，愧乏寸長；況讀忍着主衣裳之詩，義難再適。況妻病不離於牀簀，而男寒久澀於詩書，固知公爾以忘私，然亦愛之而莫助。某榆枋尺鷃，但願適逍遙之遊〔二〕；渤澥雙鳧，亦不計多少之數。《梅亭先生四六標準》卷二〇。

〔二〕適：原作「通」，據四庫本改。

# 全宋文卷七二八二

李 劉 一八

## 賀丁制置交割啓

紫殿陞班，建碧幢而制閫；綠綈趣駕，滌紅籀以開藩。四履重臨，萬井改觀。恭惟某官材弘以毅，德直而方。所學一本於孔、周，有言皆合於稷、契。一堂偃月，勢炙手以絕倫；四海倚冰，公掉頭而不住。四國于蕃之已久，九卿當相以何疑。顧自桂林，復尋邛竹。清獻之琴再鼓，當阜民財；乖崖之劍重磨，足新軍律。中權有資於後勁，外攘全賴於內修。暫分治於四封，即盡護於諸將。先聲誕播，和氣交騰。雪嶺之白界天，公來則重；騎火之紅照夜，王曰遄歸。某乘傳無堪，代庖非據。崇詩書，閱禮樂，忻逢元帥之鼎來；封府庫，籍吏民，敬待將軍而解去。《梅亭先生四六標準》卷二〇。

## 通董制置居誼啓

十乘啓行，既孤剡牘；三年過隙，又玷招羅。曾微曉暢之才，可答頻煩之顧。疾驅行李，往役前茅。伏念某學餒而材蕪，氣凋而力腐。少年妄意，頗懷竹帛之功名；半世拙謀，未了布韋之事業。強爲祿仕，直坐飢驅。諸公貴人，間欲出其門下；古來此物，自當棄之道旁。獨銜國士之知，積愧文人之厚。因同邑而薦嚴助，自古有之；未下車而辟慈明，此恩異甚。窮人命薄，中道憂歸。勞心博博，鑽火頓驚於三蟄；達官衮衮，刺天難附於羣飛。止或尼之，會且歸矣。駭置郵之有命，仍尊選以見招。惟兩喜多溢美之言，故再鼓回愈淡之聽。奏函朝徹，俞旨夕頒。荀文若之不進不休，今寧愧古；閔仲叔之且喜且懼，寵實若驚。茲蓋伏遇某官以社稷臣，爲詩書帥。留泰階台符之步，撫坤垠井絡之民。去來關雪山之重輕，出入係蜀道之難易。公鎮踰歲月，共期裴相之來歸；小隊出郊垌，復喜嚴公之再駐。羣彥固多於集幕，匹夫猶耻於納溝。龜放長江，使認重來之路；燕尋故壘，復窺新捲之簾。豈但顯不遺故舊之仁，亦足占雜進巧拙之量。某敢不循其頂踵，銘在肺肝！謹無負有志斯世之將，仍每守圖利大夫之戒。忽騎將軍馬，難希處士之壯懷；真釣錦江魚，敢學拾遺之懶性。《梅亭先生四六標

準》卷二〇。又見《翰苑新書》續集卷一〇。

通制帥安大資丙啓

代董制帥作

筆橐贅負，濫竊郡符之寵；韉刀執禮，行依制閫之尊。瞻中權勁後之威，修小侯事大之敬。輒裁柔櫜，仰溷高牙。恭惟某官直大以方，清和而任。凜然忠貫於日月，巍乎義薄於雲天。左袒以呼，作熊羆不二之士；左顧而跽，收麒麟第一之功。皇咨耆定之勳，冊命保釐之寄。盡護諸將，外撫四夷。料天驕之必亡，諒風寒之宜護。蕭何全關中以鎮撫，西顧何憂；周公有天下之勳勞，東歸孔邇。佇由節斧，徑秉鈞樞。立非常之功，待非常之人，剩光竹帛；建無窮之基，有無窮之聞，滿載旂常。某承學無奇，立朝何補。二螭載筆，初無記述之長；五雉貳卿，非有論思之益。誤蒙一扎，假守三刀。不辭捫歷之艱，但切震凌之懼。欲具宣於上意，正有託於下風。望太白橫岷峨，惟切高山之仰止；詣大府受約束，更希陰雨而膏之。《梅亭先生四六標準》卷二〇。

代回成都黃待制疇若啓

輟賢禁甬，作鎮少城。周家地官，方賴小司徒之貳；益州天府，遽勤大元帥之行。戾止高牙，屹然方面。恭惟某官靖恭而肅括，膚敏而疏通。生寶劍之故墟，地靈人傑；接金華之宗派，玉潔日光。

自策名躋，徧儀要路，厭承明，勞侍從，久陪上雍之祠；望太白，橫峨嵋，爰馳諭蜀之檄。擁元戎之小隊，布方國之細書。火井沉熒，雪山增重。考西鄰之近比，歸秉左鈞；況東極之深知，可操右契。某老不得謝，命作納言。慕幾兩幾駟之榮，會且歸矣；望一琴一龜之出，行或使之。《梅亭先生四六標準》卷二〇。

### 代回成都吳制置獵啓

裁一箋而起敬，未宣摧謝之私；疊累幅以鳴謙，仍拜駢章之寵。施輕報重，虛往實來。佩故舊之高情，發衰遲之深愧。恭惟某官知推人傑，學覺天民。屹偉績於控荆，蔚奇勳於諭蜀。凜然趙清獻之氣節，行以張忠定之規模。撫五十四州之軍民，瘡痍帖泰；壯一百八盤之門戶，氣色晶明。雪山之重既多，沙堤之築非遠。某不堪視蔭，復此綴班。無以公歸，或一見而後去，豈惟我賀，亦衆目之具瞻。《梅亭先生四六標準》卷二〇。又見《八代四六全書》卷一三。

### 代回李制帥大東啓

疇庸帥閫，升鎮制垣。犀甲熊旂，名在江淮之草木；麟符魚鑰，光通河洛之圖書。甚愜師言，可

爲國賀。恭惟某官材由世濟，學與古稽。自其不卑於小官，人知將降之大任。故國非喬木之謂，夙盤仙李之根；今人莫棠棣之如，皆近宮槐之影。雅聞偉望，尤抱長材，洊分半虎之符，妙落全牛之刃。風寒數處，人物渺然。固封守以畫郊圻，徒得君重；訖外庸而作丞輔，無以公歸。某濫守洪都，密依廣廈。落霞秋水，漸欲尋吳會之舟；暮日春天，安得對江東之酒。《梅亭先生四六標準》卷二〇。又見《八代四六全書》卷一三，《宋四六選》卷二三。

### 代董侍郎回京湖趙制置方啓

分閫罔功，濫叨璽召；循墻俟命，敢辱賀緘！顧蒙一介之專，遠畀雙鱗之重。卷還有覲，冒受何居。恭惟某官以社稷臣，爲詩書帥。細氈廣廈，應接武於夔、龍；緩帶輕裘，即近蹤於羊、杜。一賢制勝，萬里折衝。天子遣趙將軍，真得破羌之策；路人問霍去病，行收絕漠之勳。功名剩跨於數公，同書竹帛；步武徑躋於兩社，歸勒鼎勳。某守蜀非才，擒胡不力。以此衆戰，無可奏之膚公；不自意全，亦粗殲於羣醜。尚欲決焚舟之戰，乃不容俟駕而行。已貢天牋，願省愆于田里；尚依雲芘，得佚老於林泉。《梅亭先生四六標準》卷二〇。

## 回趙副帥彥呐啓

守偏城而惕日，無以瘡人；使一道以觀風，何爲至我。方茲踏地，志在回天，敢圖副元帥之尊，先畀小行人之問！恭惟某官篤誠而明允，剛直而忱恂。無鳳笙龍管之豪奢，有麟趾兔置之信厚。文王之昭周人之祚，固多千里之駒；河間之略江夏之功，罕露一斑之豹。獨公慷慨，同國戚休。星紀一周，未皇皇而奠枕；風寒數處，屹在在之長城。寸心如丹，百鍊愈白。四郊多壘，未容尋鷗鷺之閑；二矛重弓，且並總貔貅之旅。峴山既捷，泗水來歸。不十日至長安，會有官軍見威儀之喜；用丸泥封函谷，無以賊虜遺君父之憂。惟國爾忘家，主爾忘身；則男子當戰，女子當運。黃河以南，行皆晉土；自陝而東，是在周公。某愛莫助之，遐不謂矣。木牛流馬，敢辭轉粟以上天；桃蟲莽蜂，但願徹桑於未雨。《梅亭先生四六標準》卷二〇。

## 代回廣西李經略訢啓

代何月湖

小司寇之持平，躡陞五雉；大府帥之委重，遠寄雙魚。懷感有之，寘懷無所。恭惟某官名高斗北，惠滿天南。槃槃都會之雄，庶邦君之奔走；英英文武之特，一號令而精明。公無遐心，民可吐

氣。某斲輪既老，整履已晡。宜人獨桂林，遙想玉簪之碧；忍渴望梅嶺，願調金鉉之黃。《梅亭先生四六標準》卷二〇。

### 代回廣西李經略訢啓

荷囊輟直，桂笏分符。靴刀列郡之迎，古稱大府；襦袴萬家之喜，今在細侯。仁氣南驅，善聲東迤，恭惟某官通材治劇，厚德鎮浮。財貨本末源流，早振地官之職；侍從論思獻納，晚深天宸之知。遽厭承明之廬，歸拜散人之號。時方多事，公未可閑。謀帥須賢，起家甚寵。若衛公之鎮撫九十六郡，與襲志之都督二十八年。能安越人，莫非李姓。宜其苗裔，復此蕃宣。顧恐青羅碧玉之江山，難駐黃閣紫樞之步武。某龍鍾已久，燕賀無由。夔府竹枝之歌，既成昨夢；漢節梅花之句，願寄故人。

《梅亭先生四六標準》卷二〇。

### 代回廣西李經略訢啓

价藩報政，秘殿升班。八桂不曰炎荒，固號登仙之勝；四松取之熱撰，殆非寄祿之常。帝綍渙孚，帥符鼎重。恭惟某官材全業鉅，器博聲宏。厭直承明之廬，作牧始安之徼。玉簪羅帶，江山分一

半之天；金節油幢，庭戶行千里之地。果臻帝璽，進庀宸奎。河洛圖書之淵，榮光上燭；嶺海輦轂之治，和氣旁行。會見出綸，又迎歸袞。某無由旅賀，猥辱撝謙。誦大古而歌散人，吾事濟矣；去上天而辭宰相，公自計之。《梅亭先生四六標準》卷二〇。又見《粵西文載》卷五五。

### 賀衛參政涇除江西帥啓

九重圖任，起東府之元勳；十乘申咨，撫南昌之故郡。蔚憩棠之未翦，紛騎竹以爭迎。四履驩然，重臨幸甚。恭惟某官智仁且勇，直大而方。崑山片玉之挺生，天寧無意；虎丘一輪之未滿，公亦何心。然夷狄之間寇公，與兒童之誦君實，是關國體，難久家居。與我處畎畝之中，只成歸潔；使人得湖山之外，盍尉去思。宜煩熊旂犀節之嚴，更借鶴嶺鸞峰之重。軍民雷動，共欣吾父之重來；道路風傳，仍喜我公之未老。凡自卯至酉之交說，蓋先庚後甲之素孚。善人七年，流秋殺春生之惠；長天一色，洗星移物換之悲。昔黃霸之於潁川〔二〕，及馬總之於郾鎮，雖云再泣，詎足並言！蓋申命宅南之咨，及歸公于東之漸。魁台齊色，益足光牛斗之墟；霖雨思賢，會即騎尾箕而上。某一違材館，四候觀臺。造舟爲梁，鬢已蓬于灩澦；荷戈與役，骨幾藁于褒斜。難爭汗馬之功，徑返屠羊之肆。忽聞閱禮樂之有帥，喜至捲詩書而欲狂。偶見苦於小兒，未得詣於大府。下榻而延孺子，詎敢希舊物之收；踵門而告文公，惟當致新甿之敬。《梅亭先生四六標準》卷二一。又見《八代四六全書》卷九。

〔一〕穎：原作「穎」，據四庫本改。

### 賀任樞密希夷除福建帥啓

元老得閑，价藩出牧。道古今而譽盛德，既將相之兼資；至將相而歸故鄉，在古今而有幾？遙觀全德，足立懦夫。恭惟某官輔世真儒，爽邦良弼。春風沂水，夙卑游、夏之淵源；界雪岷山，更陋卿、雲之河漢。早克勤於小物，晚服在於大僚。非仁義莫陳於前，有謀猷乃順於外。雖風霆不顯流形之迹，然天地能知體國之心。用兵數年〔一〕，拓地萬里。疇若予采，方當顙面以正槐；民具爾瞻，何遽剖符而分竹！拂衣勇甚，懷綬忻然。問之往來，皆云昔疾而今愈；決於去就，足窺衆醉而獨醒。爲之兆，兆足行；奠而發，發必中。全閩鄉部，秘殿政塗。尋某丘童子之釣遊，聽去時兒女之笳鼓。所貴於天下士者，動靜不失其光明；豈不誠大丈夫哉，進退一歸於禮義。不負所學，是在我公。林下有人，少伴越地禽魚之樂；橘中未老，尚見商山鴻鵠之飛。某夙累公知，敬爲國賀。江空而歲年晚，載歌百年幾見之詩；水煩而鱗介勞，更致列城一陶之請。《梅亭先生四六標準》卷二一。又見《翰苑新書》續集卷一一。

〔一〕用：原缺，據四庫本補。

## 代曹安撫賀衛參帥涇啓

疇咨舊弼，出牧价藩。泰階六符，下照星沙之地；元戎十乘，大開天柱之雲。前茅甫臨，全楚底豫。恭惟某官洪深而肅括，明允而篤誠。魁下三台，付榮進於素定；胸中五色，補造化而不言。由兩地以養恬，爲二天而出守。辰猷定命，聯漢殿以通班；甲令著忠，盡衡山而賜履。玉麟訢合，竹馬驩迎。令湘安流，使嶽修貢。政平訟理而無愁嘆，聊寬南顧之宵衣；國小地狹不足回旋，即徯東歸之晝繡。某濫揚前糝，幸及戍瓜。以望君如歲之心，願言叱馭；然用汝作霖之命，猶恐追鋒。《梅亭先生四六標準》卷二一。

## 賀廣西管漕湛除靜江帥啓

代衛參帥作

寓班東觀，宅牧南郊。一道熟於馳驅，不勤易地；五筦資其節制，何止觀風。恭惟某官器諳浚明，風猷凝邵。自望郎而襍被，進退可觀；由膚使而褰帷，光華益遠。尋領將輸之寄，益高澄按之功。帝謀帥之惟難，公撫封而少駐。英英桂林之伯，願懋膚功；渺渺洞庭之波，尚資餘潤。某濫承嘉惠，竊倚德鄰。湘水安流，正藉戈船之重；夜郎爲徼，敢忘銅柱之威！《梅亭先生四六標準》卷二一。又

見《啓雋類函》卷六二。

### 賀夔路徐安撫瑄除瀘帥啓

西瀼奏功，東川徙鎮。占一星之入蜀，謂合遄歸；不五月而渡瀘，却疑采入。賢勞何憚，聖眷惟深。恭惟某官胸湛明冰，膽韜古劍。意匠淡經營之表，凡馬坐空；才刃游肯綮之間，全牛立解。入朝屬爾，乞郡翩然。漢水爲池，民無愁嘆，巫山猶錦，使有光華。雲出無心，且聊爾陽臺之下；春行有脚，又移之熨道之間。若時江陽，實雄益部。地望隆重，視古元侯；民俗恬熙，爲今道院。然天大地大，自足着鵬鷗之游；何月更歲更，獨不出魚鼈之國。殆欲紓憂於西顧，即觀錫命以東歸。某越在師行，無由旅賀。轅下甚安於局促，狹中敢累於提檠！不進不休，聞又綴鸚書之末；載飢載渴，但願從魚服之歸。庶因青簾白舫之回，一見紅旆碧油而去。《梅亭先生四六標準》卷二一。

### 賀徐漕瑄除東路安撫啓

升班延閣，就鎮价藩。耀東壁之圖書，光千列宿；控西陵之門戶，專在三巴。無改舍易轍之勞，有弭節建牙之寵。用賢如此，通國驩然。恭惟某官得天委和，與月爭皎。一時歐、范，共推無黨之雄。

文；千載于、張，終愧有功之陰德。甫更再轉，亟取一麾。化行江漢之未幾，名震京師而難掩。周爰咨度，遠有光華。白帝城高，符節久煩於兼領；烏孫國亂，藩籬有貴於預防。就煩使指之膚，專總帥連之重。肆加內秘，益壯中權。不十日而至長安，漸試魏延之策；命一將以向宛洛，將圖葛亮之功。諒飽巖排峽束之詩，合勒地關天開之頌。某絕無操挾，獨辱知憐。頃徒據地以承顏，聞亦爲天而啓齒。實不知師德之薦，遂有缺君房之書。諒姑充賦於公車，豈欲收恩於私室。待李生者何道，豈當求益於速成；知徐公之有常，定不昨取而今捨。《梅亭先生四六標準》卷二一。

### 通湖南安撫曾參政從龍啓

任武岡倅作

望魁台之下，久隔師門，趨翼軫之旁，今依帥閫。肅馳函於籤府，嗣歛版於轅門。恭惟某官氣擊扶搖，胸藏磅礴。學粹然而出正，文卓爾以不羣。榮進負素定之科，溫飽非平生之志。蓋中興狀頭之盛，三十有三；自大節終身而觀，幾年無幾。獨凜凜梅溪之氣槩，與英英無垢之風標。民鮮舉之，公其人也。不然既登兩地之峻，何至弗能一日之安！春容東海之濱，殫盡南陔之孝。三年過隙，謂當宣文德之麻；十乘啓行，顧使分武安之竹。洞庭九州之大，詎止价藩；衡山千里而遙，是爲岳牧。暫借傳岳之雨，略行湘水之春。無回旋不足之疑，見塊圯無垠之大。對半夜之間，亟遄宣室之歸；反《九章》之騷，即報脩門之入。惟公懋德，相我受民。某甘以迂愚，老於廢棄。誨諸生於館下，以冗見

治；試別駕之治中，無材可展。然都梁之斗壘，固全楚之井疆。自昔非螃蟹之鄉，詎容置倅；比年更虺蜮之警，浪轉爲丞。茲載忻而載奔，幸受容而受察。門生不知恩非人也，竊自憐柳子之窮；相國求余文知我哉，何敢學韓公之傲？《梅亭先生四六標準》卷二一。

通興元楊安撫九鼎啓

任武岡倅

隨帥幕於西滇，濫綴賓僚之末；望將壇於南鄭，遙依節制之尊。姓名難摸於暗中，牋記盍馳於麾下。伏念某嶽崎半世，拓落一官。口耳止數寸之間，淺哉學問；頭顱入四十之後，荒矣功名。亦欲守山澤之臞，又恐俱草木之腐。昨獻公車之牘，謾投光範之書。大鈞塊圯而無垠，曷嘗遐棄；小技卷曲而不中，自欲卷懷。適會文翁留再剖之符，復令王陽叱九折之馭。沐浴而戒行李，極知見笑於大方；蹉跎而效小忠，亦欲少酬於知己。然乏蚍蜉蟻子之援，而落魚鳧蠶叢之邦，繞樹淒然，託根何所！恭惟某官肝膽一劍，精神五兵。攬轡登車，湘水詠楊憑之德；輕裘緩帶，峴山留叔子之名。既思鱸以歸吳，忽乘輅而諭蜀。天旋夔峽，良費馳驅；地重秦關，徑煩彈壓。況是四郊之多壘，尤須千里以折衝。遠其慮以圖非常之功，積其力以俟可乘之隙。公固有志於世，世寧無望於公？惟無敵知儒者之真，則可大皆賢人之業。尚念某藐無操挾，全蹈疏庸。仰天漢之云高，相國方追於國士；思月湖之所與，中郎或識其典刑。《梅亭先生四六標準》卷二一。

## 通湖南曹安撫彥約啓

截江而屹廬山，仰高有日；披雲而睹衡嶽，拜下可期。藐然縣椽之抗塵，昉此帥連之隸役。事有稽於故實，書足達其姓名。敢以畸涼，敝之耦儷。恭惟某官風猷明浚，天韻崇竑。自其不卑小官於州縣之時，已知將降大任爲社稷之器。曩者恢復之役，事有至難，誰歟倉猝之謀，談何容易！維時漢廣，孰是皇華。能與城以俱存，尊乃勇耳；使自焚之弗戢，燕可伐歟！中冒鵝鵲魚麗之行，旁絕虺蜉蟻子之援。所忠者國，遑恤乎他。屹然孤墉，遂作百川之障；只此一事，已堪千載之垂。來自重湖，徧持三節。人不疑其爲驟，天亦憐於未酬。鋒蝟斧螳，敢肆萌芽之怒；帶牛佩犢，忍違葱韭之安。奏刀割然，苞枿黜矣。太守不有，肯與許以爭功；皇帝曰嘻，盍召曹而入相。復念鯨鯢之已戮，得無鴻鴈之未安，非高牙大纛之小留，恐右粥左餐之或闕。仍熊羆之總帥，峻龍馬之負圖。無以我公歸兮，恐須袞繡；樂爲天下道也，請被弦歌。某拙不時宜，窮自天賦。粗識丹鉛之點勘，安知朱墨之勾稽！負米屢空，爲親勉出；繞枝自許，非賢疇依。然長沙不足回旋，先生升矣；縱短簿能令喜怒，伊誰念之！使得侍一日之間，亦足慰平生之願。湖南於人不輕接，何恃而來；冀北之野無留良，實非所望。

《梅亭先生四六標準》卷二一。

### 通安撫衛大參涇啓

書生漫仕，抗塵縣椽之卑；卜史涓辰，隸役帥連之下。藐塵埃之簿領，跂霄漢之階符。斐然修辭，甚矣犯分。恭惟某官造道自得，經德不回。退然得聖人之清，進則任天下之重。外凌雲之未剪，內偃月之方深。去而違之，十載孤舟之橫水；時乎可矣，一朝巨棟之擎天。不負獨對袞衣之詩，盡洗兩造吾門之誚。入參國論，出庀祠宮。卒以道而屈伸，初何心於止速。在外則植旗旄，羅弓矢，公豈此榮；其功之銘鼎彝，被弦歌，士誠有望。不謂聽麻於文德，轉而分竹於武安。長沙千里之平，古稱清絕；洞庭九州之大，新困繹騷。茲勤二三執政之行，殆非尋常謀帥之比。自天有命，固已興宣室之思；惟帝念功，寧久作南邦之式！暫撫湘纍之蘭芷，即歸商鼎之鹽梅。民無不獲之夫，公有無窮之聞。某起家素賤，受質朱愚。學不前人，空守嗜書之癖；飢來驅我，遂生竊祿之饒。不虞小吏之凌兢，正託大鈞之塊圯。筮俊造而厠下列，嘗累一陶；裹章服而揖上官，惟當三沐。《梅亭先生四六標準》

卷二一。又見《八代四六全書》卷一三。

## 通浙西袁安撫韶啓

十年幕府，負公事未了之癡；千里王畿，隸華使周爰之度。聊步邯鄲之故，欲瞻京兆之真。輒修偶儷之詞，薄叙畸孤之迹。伏念某學惟洛誦，家本唐餘。因應詔而惰農〔一〕，遂去民而就吏。昨貪近祿，浪賦遠游。歷井捫參〔二〕，再造魚鳧之國；逾沔入渭，兩經鳥鼠之邦。偶爾得歸，置之勿論。茲操破釜，來問大鈞。辱令芻狗之陳，更贊木牛之運。舉頭見日，良忻近咫尺之天；滿腹飲河，政不過斗升之水。然非有萬間之茆，將若爲三匝之依。伏遇某官器博而周，材弘且毅。無曲學以阿世，言言博士之風；不錮人以收功，挺挺司徒之烈。徧儀廡仕，具載休聲。惟長安諸夏之原，視商邑四方之極，宜得翁歸之公潔，仍兼廣漢之聰明。弄印無以易堯，持教使之告舜。京師浩穰，已迎刃肯綮之間；侍從論思，即聽履凝嚴之上。尚念某不堪位置，何足控搏。效韓愈謹奉大尹之書，非爲文也；慕劉向獨序馮翊之傳，尚有志焉。《梅亭先生四六標準》卷二一。又見《八代四六全書》卷一三，《宋四六選》卷二一。

〔一〕詔：原缺，據四庫本補。

〔二〕井：原作「并」，據右引改。

### 代回臨安趙帥師石啓

拜命中宸，參華外府。彈壓輦轂，既知天邑之尊；平準京師，又借月卿之重。少騰歌於張、趙，即接武於夔、龍。某方聽除書，欲陳慶語，不虞貶損，猥賜鳴謙。會見九遷之榮，當不一賀而足。

《梅亭先生四六標準》卷二一。

### 代回夔路王安撫宗孟啓

垂共工而服命，躡視大常伯之班；夔有國以建侯，遠致故將軍之體。燁然尺牘，展也千金。恭惟某官殖學端深，提身凝遠。建武功臣之後，文獻具存；貞元朝士之間，德音孔碩。由觀風而分閫，不易地以開藩。睠是陳人，接粉榆於西派；憐其舊日，拾橡栗於東屯。雖糠粃不足於簸揚，然草木實同於臭味。春風披拂，楸樹馨香。仍飛剪穀之文，見寵斲輪之老。某強顏曳履，有味挂冠。共飲玻璃江，固已蒙九里之潤；俱是蓬萊守，願早乘兩腋之風。《梅亭先生四六標準》卷二一。

## 代回湖南曹安撫彥約啓

陞華延閣，作牧价藩。長沙千里之平，孰主張是；元戎十乘之啓，實寵綏之。恭惟某官抱負寬疏，踐敷詳熟。崇詩書，閱禮樂，天稟有餘；羅弓矢，植旂旄，人疑爲晚。以扶輿磅礴之地，有奪攘矯虔之風。哀兇鞠頑，未正鯨鯢之戮；烜威赫德，是資虎豹之韜。願疇末乃取闢之功，行有使果召參之寵。某緬懷先契，實托通家。拙政在前，乃不足乎揚之糠粃；同年有後，亦助旁而譟其鼓旗。《梅亭先生四六標準》卷二一。

## 代回夔州王帥宗孟啓

肅將使節，就易帥垣。號令晶明，初不勤於易地；圖書清邃，果何遠於去天。恭惟某官昭代通材，名門勝士。從容宦牒，鴈所至而有聲；剖決吏文，牛雖全而自解。茲乘漢傳，出護蜀門。八陣縱橫，久督木牛之運；三巴疏鑿，更分銅虎之符。念糠粃之在前，餘草木之同味。竹枝嘔啞，敢望播揚；楸樹馨香，滿期封植。用仁侯之新政，慰太守之舊民。愛莫助之，遐不謂矣。某無由旅賀，猥沐謙摛。指瓜偶然，終憶飛鴻之泥上；頭顱如此，更慙神虎之門中。《梅亭先生四六標準》卷二一。

代回襄陽劉安撫光祖啓

陞華殿左，輟鎮山南。千里見王，雖未究獻納論思之益；十連爲帥，亦可策還定安集之功。邊面晏然，上心簡在。恭惟某官三代遺直，一世偉人。儒特立而獨行，蓋以有益於國；士任重而道遠，不止獨善其身。抗正論於經帷，吐苦言於諫紙。芳馨香矣，流落久之。屬時改弦，令公趣駕。方抱同朝之喜，忽聞分鑰之殊。休兵屯田，政須元凱之規畫；輕裘緩帶，會繼叔子之功名。無有遐心，益觀遠業。某曾同臭味，頗共浮沉。唱白銅鞮，空羨接籬之倒；吟青玉案，不供繡段之酬。《梅亭先生四六標準》卷二一。

代回史安撫彌堅啓

光膺芝檢，進陟松班。一札細書，渙絲綸之溫潤；十連大國，添旗幟之晶明。恭惟某官世濟壯猷，家傳遠業。輦轂之下，彈壓夙著能聲；侍從之間，論思益高雋軌。遽厭承明之夜直，出爲湘水之曉行。展長沙千里之平，袴襦自得；鎖洞庭九州之險，舟楫無虞。蓊然獠蠻，囂于鼠穴。勝之不武，雖多殺以奚爲；綏之斯來，宜脅從而罔治。帝嘉成績，詔錫隆名。東璧圖書，姑暫煩於寓直；南邦藩

翰，會趣用以遄歸。某自媿望秋，未遑賀夏。徒以前之糠粃，荷不鄙夷；其如莫報以瓊瑤，止深感戢。《梅亭先生四六標準》卷二一。

### 代回徐安撫邦憲啓

陞華法從，作尹神臯。疇若予工，有渥貳卿之命；徒得君重，底寧千里之畿。渙號既揚，師虞允穆。恭惟某官靖共而正直，肅括而弘深。中外久於踐揚，上下孚其名實。太宗正之盤礴，公豈曰淹；少常伯之超騰，人不謂早。當日畿之謀帥，勤天陞之掄材，特陞獻納之班，俾任浩穰之寄。欲粟賤，追李峴，少慰閭閻；錄囚歸，問不疑，更光史冊。某自聞先庚之令，亟展同寅之恭。材俊滿前，欲譽盛德而不敢；珠玉在側，始媿先施之未能。《梅亭先生四六標準》卷二一。

### 代回潼川劉閣學甲啓

出綸北闕，賜履東川。臣作股肱，宜職五言之納；王之喉舌，游勤四國之蕃。西顧既寬，南圖益大。恭惟某官清標拔俗，厚德鎮浮。二十四郡之無人，已見真卿之節；一千餘家之失火，何勤長孺之行。然使玉帳之輕，孰借銅官之重。元戎小隊，聊復班石谷之春；方國細書，恐趣侍雲臺之下。某久

燕居息，復鳩僦功。憑飛廉以寄聲，若爲厚報；望崦嵫而勿迫，猶佇遄歸。《梅亭先生四六標準》卷二一。

### 代回揚州崔安撫與之啓

建纛偃藩，方欲馳於慶牘；濫巾分閫，何遽辱於朋緘！一謙之光，三復以愧。恭惟某官氣涵天粹，材應時需。德性得南方之強，文字喧西都之價。仁勇充然於六館，獨何蕃歟；言行考之而一人，如清河者。羣飛方銳，勇退尤高。甫躋郎舍之華，即領帥垣之寄。堰橫古埭，尚如召伯之棠；地對長江，曾擊祖生之楫。惟良刺史，尚友古人。使功名配於前聞，則富貴乃其餘事。某何功湘楚，又守勾吳。捲雨西山，良有愧閭公之望；觀梅東閣，恨莫窺何遜之詩。《梅亭先生四六標準》卷二一。

### 代董侍郎回夔路丁安撫輔啓

疇庸靈石，改牧夔藩。畫舫青簾，昔固識灩澦之馬；碧油紅旆，今重認常山之蛇。建牙云初，滿目交慶。恭惟某官風華俊茂，天韻崇鉉。正色立朝，有嘉猷則告于后；抗章請外，取膏澤而下諸民。廣信之政既成，承明之召宜亟。適茲魚復，重在麟符。出幕十年，去思未遠；賜書一扎，易鎮攸宜。

盧矢彤弓，新元戎之號令；白鹽赤甲，壯全蜀之藩垣。不俟突黔，即膺詔紫。某守邊弗績，受代得歸。已問檣烏，頓有身輕之喜；尚陪厦燕，獲伸面賀之誠。《梅亭先生四六標準》卷二一。

### 代回畢安撫再遇啓

疇庸邊閫，進秩內徽。宣化承流，將視儀於三事；定功保大，仍作鎮於十連。成渙載揚，在師允吉。恭惟某官果毅而有守，沉鷲而善謀。心潛濟北之一編，材駕山西之諸將。屬當敵警，屢挫虜鋒。鶴唳風聲，走苻堅於淝水〔二〕；鵝鳴雪夜，擒元濟於蔡城。公將策大漠之功，上已棄單于之過。戢干戈，橐弓矢，既放桃林之牛；安邊境，立功名，真跨揚州之鶴。鼎來恩綽，晉錫師麾。英節麟符，勉徇借留之請；神旗豹尾，佇聞入衛之榮。某拘以綴班，闕於馳慶。十部從事，慚無瓊玖之酬；千里折衝，願體冕旒之眷。《梅亭先生四六標準》卷二一。

〔二〕苻：原作「符」，據四庫本改。

# 全宋文卷七二八三

李 劉 一九

## 賀牛都大大年除總領啓

知榮州作

結知宸扆，改領餉臺。千里餽糧有飢，孰堪將指；六計以廉爲本，疇可易公。成命風馳，驩聲雷動。恭惟某官弘深而肅括，忠肅而篤誠。爲淮海維揚之俊人，得伊洛入河之宗派。仁爲己任，此心即禹、稷之心；謹厥身修，所學皆孔、周之學。安行塗轍，動中和鑾。名既震于京師，才合居於給諫。行行且止避御史，已播流聞；皇皇者華遣使臣，乃煩咨度。茗駿之登既羨，槐龍之對可占。留蕭相於關中，且專餉事；任武侯於渭上，式敏戎公。然劍閣雖曰崢嶸而崔嵬，而益州實覺疲敝之危急。舐糠何止於及米，放手寧恤於傷葵。人知罪歲之徒然，天遣福星之臨止。序諸侯之上，暫借重於王人；折千里之衝，即遄歸於政地。某比緣井改，益覺困窮。雖飲冰食蘖以自將，然求牧與芻之未獲。置郵傳命，喜聞君子之得興；升斗疏恩，庶免波臣之涸轍。其爲忻懌，罔既敷宣。《梅亭先生四六標準》卷二

二。又見《啓雋類函》卷六一。

### 賀黃運使申除總領啓

內躋郎省，外總餉臺。西賓出幕之十年，遂專主席；東漕下車之三月，盡總賦輿。人歆錫命之蕃，上恨用公之晚。恭惟某官器資凝遠，業履端溫，言行夙擇乎中庸，名實久孚於上下。頃歲紅巾之變，折衝白刃之間。數進忠規，刈葵惟恐其放手；縱無恩澤，徙薪豈下於焦頭。共推江夏之無雙，再試潁川之第一〔二〕。維駒維騏維駱，暫紆苞栩之飛；如熊如羆如貔，孰飽樵蘇之爨。帝咨衆望，僉曰公宜。王人下視於諸侯，有嚴天節；郎官上應於列宿，肯歷土山。政令先庚而已孚，軍民旁午以相賀。田里愁恨嘆息，久已周知；財貨本末源流，尤皆宿講。皮不存則毛將安傅，唇既亡則齒得無寒？欲兵食兼足之沛然，在制閫同心而已爾。既無間越、秦之肥瘠，何難圖韓、范之功名。某百無一能，億或屢中。頃進總領甚稱之語，蓋在咨諏周爰之初。茲聆除目之頒，豈勝頓足之喜！惟榮之歲租無五千斛，而使所月解近七萬緡，昨賴管煎抱賣之贏，用補大科帶補之欠。近困井仙之後，難施箕歛之苛。在小郡官兵既多空腸，而大司符移尚理虛額，巧但施於有麵，窮莫甚於無錐。與物爲春，望公如歲。今夕飲者恩，明日按者法，正累故人；觀察急於賦，刺史私於民，願哀老子。《梅亭先生四六標準》卷二二。又見《翰苑新書》續集卷一二，《宋四六選》卷一四。

〔二〕穎：原作「穎」，據四庫本改。

### 賀楊總領九鼎啓

升賢九列，總賦兩川。無踰老臣，久望甲寅之報；厥有成命，足寬庚癸之憂。除目一傳，滿口交慶。恭惟某官資弘且毅，器博而周。解十二牛而有餘，才固高於一世；繫千駟馬而弗視，氣亦蓋於諸公。天使之爲入蜀之星，人以此卜擒胡之月。知彼知己，漢中方務於養民；擒賊擒王，許下幾爲之避地。徒緣食乏，遂致師還。皇欲我公，身任此事，爰峻上卿之拜，俾專計相之權。金掌月升，光無不燭；玉關夜閉，守或有餘。聊寬西顧之憂，即聽東歸之命。某聳聞出綍，竊喜得輿。敢問遲之遲，長恐遭羣吠之怪；可以速則速，幸即遄四牡之驅。《梅亭先生四六標準》卷二二。

### 通四川王總領鉛啓

代董制帥

企郎宿之周天，夙瞻景耀；望使星於蜀野，行挹餘光。同是天涯，莫非王事。欲掄方寸之愜，可無咫尺之書？恭惟某官器度崇鉉，典刑炳蔚。江左風流之後，代不乏人；襄陽耆舊之家，世濟其美。恬於再轉，翩若一麾。日近長安，謂即登於金馬；天通蜀道，又出護於木牛。惟關中餽餉之功，實海

內安危之本。樵蘇後爨，今多宿飽之師；弩矢前驅，古有晝行之羨。行詠勞還之《四牡》，佇觀趣侍於六飛。某起家單平，蒙恩優渥。立朝已濫，況塵六典之卿；試郡猶慙，輒冒十連之帥。躊躇四顧，冒昧一來。惟方國奉十行之書，妄希宣布；諒王人序諸侯之上，亦願將明。《梅亭先生四六標準》卷二。

### 代回趙總領不憊啓 一

餉師天塹，晉秩月卿。峙乃糗糧，坐給列屯之衆；厲以爵祿，宜登九州之命。恭惟某官育德忱恂，撝材膚敏。方公私之積可哀痛，孰與阜通；顧財貨之出有源流，當加斟酌。期年而變，千里無飢。載疇流馬之功，宜進執羔之寵。某阻陪賀旅，先辱撝謙。卿不同乎，已升華於玄冕；公歸無所，會加畀於繡裳。《梅亭先生四六標準》卷二。

### 代回趙總領不憊啓 二

祥刑訓夏，深愧曠官；事典司冬，猥令率屬。冒恩有覲，竊茆知歸。恭惟某官給餽上流，簡知中宸。樵蘇宿飽，知調度之賢勞；袞繡晝行，佇詔書之趣覲。有華餘潤，且及陳人。某度其夕陽，宜於

野服。猶曳鄭崇之履，小立斯須；行巾元亮之車，又奚惆悵。《梅亭先生四六標準》卷二二。

### 代董帥回楊總卿交割啓

榮駕駟車，遄開犀印。卿士惟月，班通河海之間；軍聲如雷，驩溢關山之外。恭惟某官材弘且毅，器博而周。運斤成風，解全牛於四顧；策轡奔電，洗凡馬而一空。皇咨分閫之勳，命亞執珪之位。合東西而瞻使節，共稱總賦之有人；分南北而立王庭，何患擒胡之無日！亟觀舍爵，佇即歸班。某有幸爲寮，又將徼福。百里九十，正倚同舟共濟之功；一日三秋，願叱負弩前驅之效。《梅亭先生四六標準》卷二二。

### 代回四川陳總卿咸啓

陞卿九農，給餉四蜀。事權增重，光弩矢之前驅；氣色益明，飽樵蘇之後爨。恭惟某官學宗洙泗，秀稟岷峨。介然忠勤，屹立江流之砥；見於調度，傍流地上之錢。致詳慮於講解之餘，定經制於裁節之內。粟塞其庾，已成末乃取闢之功；印弄於庭，宜有無以易堯之命。庸進執羔之寵，以彰流馬之勞。正觀游刃之若新，何慮强弩之已末。某僇功愒日，得謝爲期。取御史於九卿之中，行觀更迭；

序王人於諸侯之上，願立斯須。《梅亭先生四六標準》卷二二。

### 代回湖廣趙總領彥櫛啓

疇庸外府，進位上卿。禮樂光華，既茂明於調度；貨財平準，茲益重於事權。除目一盼，輿言胥穆。恭惟某官持心信厚，臨事浚明。恭懿篤誠，繼高陽之六子；切磋磨琢，蹈衛國之武公。揚歷彌深，聲華甚茂。茲肅將於使指，俾總視於軍儲。曾不淹時，已聞奏最。爰進四大夫之祿，仍幹半天下之贏。是亦平遷，行有峻擢。某未繇旅賀，例辱巽牋。卿不同乎，已陞華於玄冕；公歸無所，會加寵於繡裳。《梅亭先生四六標準》卷二二。

### 代回湖北錢總領文子啓

自違貝闕，寢遠珠庭。迹雖遠於行藏，心實馳於賢德。恭惟某官材全而業鉅，學廣而聞多。鞭霆駕風，已上蓬萊之島；捫參歷井，遽登蜀道之天。飛芻遍給於列屯，叱馭不辭於九折。成功者去，盍歸乎來。惟是洞庭、彭蠡之間，實接夜郎、牂牁之徼，少須澄按，庶免繹騷。當飢饉師旅之餘，民亦勞止；在諮諏詢度之事，公優爲之。顧恐詔溫，不容席煖。某腰黃無補，頭白思歸。嬉笑文章，良感

雙魚之遺；光華禮樂，願遄四牡之驅。遷召新榮，眷委庸敬，不敢煩瀆，併幸照知。《梅亭先生四六標準》卷二二。

### 代回淮西趙總卿不憊啓

陞卿九扈，給餽列屯。人自日邊，恩榮晝錦之遺；錢流地上，師有宿飽之期。下車云初，載路相慶。恭惟某官直溫而肅括，明敏而疏通。早練達於民庸，洞講明於邦計。懋轉輸之績，飛不盡翰；持經濟之材，翔而後集。屬邊防之小定，惟糧道之孔艱。爰興前席之思，久不見賈；復念弄印而授，無以易堯。庸疏執羔之榮，俾專流馬之運。序王人於諸侯之上，姑驅馳數月之間；求宰相於宗室之中，會凌厲九人之後。某託交惟舊，話別方新。闔伺視龜，正欲致燕雀之賀；勤渠專騎，乃先辱鯉魚之書。徒華巾笥之藏，莫遂檐榆之報。《梅亭先生四六標準》卷二二。又見《翰苑新書》續集卷二二。

### 賀新除川秦茶馬魏戶部泌啓

顯陟臺郎，總提旤政。文昌六部，地官見謂之劇曹；武騎萬營，天府復專於隆委。祿因德詔，材與事宜。恭惟某官心平而氣和，人今而學古。公侯子孫之必復，固有世臣，名義鬼神之難欺，實由家

學。琮璧不雕而自貴，鸞和隨動而有聲。屹立夔人之藩籬，何翅晉陽之保障。儉以足用，節而愛人。迄轉上聞，首膺表選。握闌依烏之位，內陪從於太微；摘茗市駿之司，外分節於少府。職任昔分而今合，事權滋重以不輕。一洗空萬古之凡，會如雲錦；六經濟三尺之法，歸近天顏。輕破睡正濃之詩，小試思無邪之學。某苦慙駑骨，復飲蟆頤。王良後，造父先，亦有馳驅之志；汲黯戇，寬饒猛，恐非采掇之材。《梅亭先生四六標準》卷二三。

### 代通制帥四川趙茶馬彥綰啓〔二〕

分巴跡之旌旗，濫膺守土；占益州之分野，知有使星。欣竊庇之自今，愧修辭之已晚。恭惟某官風猷凝遠，天韻宏深。博極羣書，太乙之藜相照；文焰萬丈，長庚之夢不虛。藉未陳周、召之詩書，亦宜獻間、平之禮樂。恬爲丞之再轉，甘出守之一麾。刻銅虎之符，洊揚美最；護木牛之餉，益茂膚公。謂宜運海以搏鵬，又使摘山而市駿。周原之茶膴膴，包以緇奩；魯垞之馬駟駟，爛如雲錦。豈容黔突，行有紫泥。某頑頓之資，疏鹵於事。將指以出，濫持天子之節旄；無功而還，不得月氏之要領。敢意冒升於荷橐，且令假守於銅梁。有如凌兢，何以全度。東西之瞻使節，儻未賦於旋歸；前後之間清塵〔二〕，尚有餘於同味。《梅亭先生四六標準》卷二三。又見《八代四六全書》卷一三。

〔一〕「帥」下原衍「通」字，據四庫本刪。

〔二〕間：疑誤。

## 代回張茶馬子震啓

純用茶馬事

奏最蕃宣，易司樵牧。卧雲而逼象緯，榮分東壁之光；摘山而市駿蹄，益固西秦之圉。恭惟某官味甘苦永，心秉塞淵。出乘兩腋之清風，已親法駕；勒回中道之奔電，歸扞渴羌。茲揚春山之旗，久擁東方之騎。非環非玦，上有雙鸞；載馳載驅，駕彼四牡。取月團三百片之羨，包以緗奩；供天子十二閑之須，爛如雲錦。佇頒鳳夸，趣扈龍旂。某有味溪芽，無心天秣。烹玉澆過秦之論，徒抱渴塵；籥雲作徠漢之歌，更觀逸足。《梅亭先生四六標準》卷二三。又見《翰苑新書》續集卷一二。

## 代錢塘趙縣丞彦的通史都大啓

佐赤縣於京畿，曾微善狀；望繡衣於霄漢，輒贄空函。誠知使者之輶軒，寧顧丞哉之廳壁。恃仁人之在上，實善類之焉依。敢瀝寸丹，敬裁尺素。伏念某地寒無挾，天賦甚慳，濫綴族盟，既愧宗英之卓爾；僅憑門蔭，又慙舉首之衰然。粗謹守於廉勤，亦徒勞於州縣。每發辛勤三十年之嘆，若爲扶

搖九萬里之程。頃贊武夷之六條，及識文昌之八座。青冥強箭，妄希一發以五犯；綠水寒波，竟少九門之兩翼。茲贊日畿之邑，輒爲露剡之謀。冒於一來，茫然四顧。盡枿去牙角，豈無對立之松槐；託根借恩光，誰念無言之桃李。茲聞皇華之使，實司造化之爐，遂忘躍冶之嫌，輒控問鈞之請。恭惟某官清涵沆瀣，峻稟扶輿。若伊陟，若咸賢，合繼相門之相；有封胡，有羯末，乃安常調之常。五馬不受於二毛，八駿又馳於四牡。良弓良冶，廣開橐籥之權；鑄金鑄人，總出陰陽之炭。圜法令行而禁止，方兄昔歉而今豐。點鐵成金。實在一陶之巧匠；鎔銅合穎，即成百尺之浮屠。《梅亭先生四六標準》卷二三。

### 代回史都大定之啓

光奉宸綸，真持使籜。方千里而賦政，久歛惠於一州；圜九府以通財，遂褰華於數路。恭惟某官人門有偉，風調不凡。番君得江湖之心，不但蕃宣之績；史公引漳鄴之利，更高城築之功。暫司坯冶之權，洞識貨財之本。恩隆正任，使以大名。地上流錢，會當裕子母之積；階前生玉，行將繼叔父之風。某密託鄰光，遠依夏庇。六轡如組，未遑瞻原隰之華；萬物爲銅，願益楸陶鎔之業。《梅亭先生四

六標準》卷二三。

### 代回鞏都大嶸啓

杓携龍角，星駕賢勞。氣轉鴻鈞，天休滋至。恭惟某官司存圜法，瞻足方今。坯冶一陶，財不期而豐美；陰陽爲炭，道已長於泰交。撫于五辰，斂是百福。某空糜囊俸，猶綴橐班。誤出山林，聚鐵已難於鑄錯；頌成椒相，磨鉛聊具於報章。《梅亭先生四六標準》卷二三。

### 代回鞏都大啓

恭惟某官總攝三官，阜通九府。錢流地上，知鞭筭之奏功；人自日邊，佇軺封之趣覲。《梅亭先生

四六標準》卷二三。

### 代回鞏都大啓

持橐無功，蒙誤恩之起廢；飛箋爲惠，勤妙語之嘘枯。有味其言，不知所謝。恭惟某官器資凝遠，材諳深長。時方多艱，政有藉貨財之本；公雖少屈，亦足試陶冶之權。行觀地上之錢流，即聽日

邊之璽召。某投閑暮境，臘貳秋卿。燁然尺牘之臨，甚矣蒼顏之愧。藏之十襲，感厚意以無忘；雖則七襄，覺報章之弗稱。《梅亭先生四六標準》卷二三。

### 代回市舶聶提舉周臣啓

肅駕星輶，總司海舶。舳艫千里，有無得以懋遷；胡越一家，內外服其平準。是爲膚使，允屬通材。恭惟某官世濟象賢，早騰燕譽。青氈舊物，蓋旋北斗之樞；畫戟凝香，晚試南交之宅。不嚴而化，所去見思。惟是嶺陬，久資碇稅。扶胥黃木，習廉介之具孚；銀甕白環，紛貢珍之並入。貪泉酌水，已知吳隱之心；祥飈送颿，佇應孔戣之召。某卜鄰有幸，賀厦已稽。六柜五羊，難續遊仙之夢；尺書雙鯉，空慙寄驛之情。《梅亭先生四六標準》卷二三。

### 代回趙市舶伯鳳啓

奏課分符，乘輶司舶。候風入貢，固常聚蠻越之珍；酌水獻箴，要當試夷齊之飲。聞君廉甚，職此宜哉。恭惟某官蔚若宗英，濟之世美。再試弦歌之政，所去見思；一陶襦袴之功，不嚴而治。惟時嶺外，交貨海中。然商賈筭至舟車，漢非得已；若犀珠賄及僕隸，唐已病之。今大夫不務富其家，則

行旅必願出於市。得人如此，通國稱之。某雖縻於茲，行引而去。露螢不暖，安得照十二乘之車；檣燕語留，聊復答咫尺書之便。《梅亭先生四六標準》卷二三。又見《翰苑新書》續集卷一二。

### 賀新潼川黃運使申啓

知榮州作

疏恩北闕，將漕東州。次公之最既殊，宜登丞弼；叔度之撓不濁，暫借澄清。和氣褰帷，仁聲載路。恭惟某官負材瓌碩，迪德忱恂。怡然不辭小官之時，恢乎可以大受之量。盤根利器，無四顧之全牛；大輅鳴鸞，洗萬古之凡馬。茲收三近古之郡，實昔再轉丞之邦。田里無愁嘆之聲，所居民富；原隰有光華之遣，果若人言。惟益部之使星俱高，而潼漕之門地尤峻。建臺移治，蓋田諫議之言；持節策名，有趙清獻之烈。惟公濟美，與古匹休。使臣得咨訪之周，上意知總領之稱。某偶乘一障，獲託萬間。蹊田方窘於奪牛，斗水誰哀於涸鮒！即日褰裳而求去，聞公攬轡而少留。有刺史之榮，無刺史之難，是在使者；飲故人者恩，按故人者法，惟所命之。贊慶攸初，乞憐是愧。《梅亭先生四六標準》卷

# 賀黃運使申交割啓

知榮州作

攬轡撫封，褰帷問俗。漕下冰解，僊原隰之載馳；財阜風薰，與輶軒而偕至。民無罪歲，帝有德星。恭惟某官簡要而恢通，優游而昭晰。萬頃不濁，何能撓叔度之清；四國于宣，所去思次公之政。暫別峨眉之月，來觀涪右之風。豈徒榮練鵲之袍，察二千石；蓋將倚木牛之運，出五丈原。列城暫倚於澄清，衆職恐煩於總領。某冒乘斗壘，幸隸井封。君子憂道不憂貧，餅之罄矣；國人望公如望歲，雨以潤之。《梅亭先生四六標準》卷二四。

# 賀呂提刑徐運使啓

詳刑奏最，轉漕升華。統部不移，令已孚於先甲；事權益進，命不待於重申。六轡借留，百城胥抃。恭惟某官負材鴻碩，蓄德駿厖。家學淵源，擅箕裘之弓冶；世臣閥閱，屹鼎鼎之樓臺。盍徑歸清切之班，顧游屈皇華之寄。二節三節，俾詳察於風謠；特書屢書，已茂登於歲績。茲峻登於延閣，俾專制於計臺。地上錢流，欲暫煩於鞭筭；日邊人至，即遡上於橐班。某幸甚受容，復茲竊蔭。三熏三沐，僅能寓致於雙魚；載馳載驅，行賦勞還之《四牡》。《梅亭先生四六標準》卷二四。又見《啓雋類函》卷

九四。

### 賀夔路徐運使瑄啓

叱馭及疆，褰帷問俗。察二千石，知遠有於光華；登百八盤，亦備嘗於險阻。神明所相，忠厚爲周。恭惟某官德配春華，氣涵秋杳。平生仁義，所學皆本於孔、周；單辭明清，致君亦欲其堯、舜。出騰縣最，入重郎潛。謂拾級以升高，忽抗章而引外。汶川鄖水，今爲湖北之偏州；漢廣江沱，久矣召南之美化。雙旌戾止，五袴暖然。諒思檢校於杜詩，遂賦馳驅之周雅。瞿唐五六月，自昔畏團團之天；巫山十二峰，何況濟朝朝之雨。遂勞六轡，峻陟萬山。蛇退猿愁，人何堪而至此；狻啼鷖嘯，公所過以晏然。聞蜀道分八使之權，以夔漕爲諸司之冠。家有鹽井，固足操用度之贏；民無錢爐，似亦困征輸之役。一賢既入，百姓何憂！遠而使之觀其忠，可窺上意；使者專焉得其道，寧有遐心！功名留久遠之看，富貴乃緒餘之事。如某者無用於世，所敬惟賢。頃聞武城之弦，睢盱慕藺；近載益州之舫，邂逅識荆。便蒙許載之後車，且復指迷於前路。稱曰知己，知己未也，更容受察於六條；待以國士，國士報之，寧敢貢諛於尺牘！

《梅亭先生四六標準》卷二四。

## 賀李運使鼎啓

起家將漕，揭節濟湘。舊令尹之雙鳧，甫去十五年之近；部刺史之四牡，今察二千石而來。民距躍以爭迎，公馳驅其何憚。恭惟某官篤誠而明允，簡要而清通。言行擇君子之中庸，德業得賢人之久大。十年出幕，孰居行營司馬之前；萬里封侯，乃在諸妄校尉之後。勇襮望郎之被，出褰膚使之帷。爰從綠波青草之間，盡覽赤甲白鹽之勝。金掌甫升於卿月，玉鈴又屬之將星。與其食武昌之魚，又看種柳；不若蠟永嘉之屐，少待戍瓜。有懷清絕之《大招》，復賦皇華之《小雅》。暮捲西山之雨，曉行湘水之春。洞庭無波，聊護木牛之運；牂牁爲徼，皆知竹馬之迎。有功見知，不遠伊邇。某強顏佐郡，僂指終更。非有海沂之功，可歌別駕；豈謂瀟湘之地，又逢故人。偶聞報之不先，慚奏記之已晚。儻憐秋水長天之共，且善助之；庶安清風明月之分，會且歸矣。《梅亭先生四六標準》卷二四。

## 通張運使嗣古啓

飲水西江，未及瞻舍人之樣，披雲南嶽，行當參都漕之臺。欲提聾丞，上累膚使。寸丹炯若，尺素布之。恭惟某官心契九秋，眼高四海。周情孔思，探鳳髓以調膠；宋艷班香，拔鯨牙於刺手。早司

存於雨露，既感會於風雲。厭承明之廬，人共期於三入；歸靈光之殿，天實相其獨存。聊歌《小雅》之皇華，來領《大招》之清絕。上原下隰，拓長沙千里之平；重江複湖，護洞庭九州之大。齒髮未凋於計相，腹心當屬於留侯。豈舍王哉，今召君矣。伏念某蟬聯成紀，鳬徙臨川。家故一寒，無蚍蜉蟻子之援；官仍獨冷，有驪駒狗曲之嘲。歸尋黃獨之苗，甘老青精之飯。猥蒙文石之陞，俾讀武岡之銘。自非使者之汝容，轉恐丞哉之余負。鄉人見孺子之入，諒亦惻於仁心；長史無宰相之才，詎敢干於薦口！

《梅亭先生四六標準》卷二四。

# 全宋文卷七二八四

李 劉 二〇

## 通湖南黃運使桂啓

乘輶將漕，攬轡濟湘。光粲璧奎，卿月謂升於金掌；祥開翼軫，魁星顧聚於玉衡。四海歉然，重湖幸甚。恭惟某官果達而藝，直大以方。文武兩科，蚤占羣英之冠冕；忠信一念，允爲百世之楷模。恬要路之在前，甘急流之勇退。東觀聿躋於蓬頂，南風遽愴於棘心。既釋素冠，盍持紫橐。顧賦皇華之《雅》，來尋清絕之《騷》。開天柱紫蓋之雲，民巖洞見；澄洞庭青草之水，地險彌堅。杜陵何憚於曉行，賈傅即觀於夜對。某一寒寡與，三暑投閑。頃者誨館下之生，不能教胄；今茲補黔中之佐，定是負丞。所幸綴曲江之題，或可逃直指之斧。貴賤位矣，雖有一龍一猪之分；左右采之，固在四牡四駱之下。《梅亭先生四六標準》卷二四。

### 通潼川程運使遇孫啓

度劍閣之險，戍月淒然；望玉臺之遙，使星明甚。久欲布仰高之悃，茲併修賀上之恭。恭惟某官心平而行高，人今而學古。影纓諾仕，大夫爭羅而致之；澤笏造朝，廷臣無出其右者。捨萬里九霄之騰踏，甘五年一節之回翔。不辭載馳載驅之勞，茲見可久可大之業。碩果何嫌於不食，包瓜自得於含章。皇皇者華，昔固重周原之寄；湜湜其沚，今況屯渭上之師。願策木牛流馬之功，却振金爵觚稜之步。某學未能信，年不後人。直爲文翁留再剖之符，遂使石洪棄一盂之飯。舟經灩澦，鬢已覺其雙蓬；路入褒斜，命已危於破竹。徒覺長安之咫尺，竟慚淝水之八千。河內願借留恂，豈但任轉輸之委；漢中無所事信，倘或辱薦引之知。《梅亭先生四六標準》卷二四。

### 代通成都梁運使綸啓

代董制帥

隨八月之槎，遂離漢闕；望一星之分，已次蜀都。瞻之在前，瞠若乎後。敢伺下車之始，輒修上記之恭！恭惟某官器宇弘深，風猷凝茂。學有家法，肯甘州縣之徒勞；政作吏師，自合公侯之必復。勇襟潛郎之被，高褰膚使之帷。古來天府之腴，莫如益部；今使雪山之重，是在我公。諒由四牡之

華，即有九年之積。不勞黔突，亟下紫泥。某久汙班行，獲聯事契。豈謂半符之剖，又依六轡之馳。江路市橋，想已遂碧雞之訪；天梯石棧，得無憐黃鶴之飛。《梅亭先生四六標準》卷二四。

### 上兩浙丘運使壽雋啓

索米待公車之命，僅志抱關；轉粟給中都之官，猥容入幕。實有得賢主人之賀，未知事大君子之方。斐然修辭，滂若下汗。伏念某寸勇尺懦，一拙百罹。學不知方，徒爾疲精神於蹇淺；仕未能信，尚何計班資之崇庠！然半生脫進士之場，已三仕作諸侯之客。碧雞坊裏，側身猶望於早還；白鹿坡前，戰骨自甘於速朽。偶獲返屠羊之役，乃洊罹舐犢之悲。五削猶溫，一簣正須於補考；百念既冷，連年不果於到銓。親故開陳，勉強抵此；公卿推輓，伺候久之。敢期得闕於日畿，乃可託身於冰漕。使者持斧，實總陝東陝西之權，賓之初筵，宜得洛北洛南之彥。詎應庸謫，可備諮諏！伏遇某官學本家傳，材周世濟。四顧千牛之立解，一鳴萬馬以皆瘖。人懷召虎之來宣，日望伯禽之拜後。導夙夜宥密之命，亦既許時；聯朝夕論思之班，自應平步。顧以翼翼四方之極，託之皇皇六轡之華。磔其梟狼，了不容於掩耳；壯哉雀鼠，必從是以革心。六條觀風，萬物吐氣。孝者善繼人志，是以似之；欽哉時亮天功，自此升矣。尚念某一無操挾，全蹈闊疏。鵲繞月以何依，幸二天之獨有；魚泳川而相得，或尺地之可通。尚從吏師，稍勉政學。大事則從其長，倘堪藏拙於小官；先達者爲之前，諒亦垂

情於後輩。《梅亭先生四六標準》卷二四。

### 上湖南曾運使槃啓

主俗吏之簿書，竈方夜祭；瞻華使之禮樂，槎自天來。半生忍渴於見賢，一旦奉身而受察。喜而不寐，文以足言。恭惟某官得春委和，與秋爭潔。接江西之正派，克肖茶山；抱河南之遺書，久窺禹穴。根柢學問，緒餘功名。平生惡巧宦之圖，握蘭屬耳；所至成循吏之傳，騎竹驩然。游蔽芾於甘棠，始逶迤於苞栩。謂予環而趣侍，又濡轡以載馳。去江入湖彼善此，蓋有之矣；轉倉將漕唯與阿，相去幾何。人疑王事之獨賢，公未帝城之願入。洞庭九州之大，近困轉輸；衡山千里而遙，正須廉訪。揮王志慮，摩俗痛愁。續荆潭唱和之詩，不妨幽眇；對宣室鬼神之間，會即超遷。某承學諸生，就官一列。寒窗事業，私知對白以抽黃；矮屋官曹，今使出朱而入墨。懷哉君子之易事，樂只小官而不辭。向來一瓣香之詩，南豐固在；下有千歲苓之句，東坡謂何。《梅亭先生四六標準》卷二四。

### 通權運司牛都大大年啓

承流弗績，亦思歸味於蓴鱸；轉漕非才，敢取棄餘之竹馬。負決難於超乘，僂已見於循墻。盍以

寸肩，布之尺牘。恭惟某官洙泗正學，淮海俊人，言行一擇乎中庸，名實兩孚於上下。清標雅操，立獨鶴於人間；遠韻遐心，送孤鴻於天末。頃厭獬豸鷗鶚之命，來爲蠶叢魚鳧之遊。天子十二閑，爛如雲錦；月團三百片，美若金莖。廉不近名，儉皆中禮。脂膏自潤，昔者人謂斯何；圖史凝塵，去之日如始至。王覲爲可，帝念在茲。正須清獻之一琴，往減汾陽之半樂。某游從二紀，奔走百罹。方甘弄月於眉山，敢望占星於益部！已騰免牘，冀奉俞音。萬一不已於馳驅，再三尚求於教誨。汝張汝弓汝鼓，當飽顏行；我任我輦我車，悉希指示。《梅亭先生四六標準》卷二四。

### 代回夔路王漕顧問啓

疇庸司庾，易節將輸。激江西之波，既蘇涸轍之鮒；踏巴東之磧，更觀常山之蛇。使乎賢勞，王所簡在。恭惟某官德浮於位，材裕其官。熟路輕車，固有長驅之地；急流巨艦，獨高難進之風。一麾江海之行，千里湖山之得。既田里之無愁恨，宜原隰之有光華。或謂斂散之權，未展澄清之志。木牛轉漕，何妨籌策之紆；金馬著書，行見詔除之渥。某緬惟新治，恍憶舊遊。福星所臨，遙想疲民之樂業，豐年可慶，幸爲老守而寄聲。《梅亭先生四六標準》卷二四。

### 代回夔路王運判宗孟啓

洊歷麾符，榮將節傳。彤檐繡斧，新禮樂之光華；赤甲白鹽，壯江山之彈壓。既均六轡，坐幹千艘。恭惟某官抱負甚奇，踐揚茲久。屢登一鶚之表，綽著能聲；四分五馬之符，居多善政。有華將指，不遠觀風。認常山之蛇，默識木牛之運；跨灩澦之象，佇觀畫鷁之來。某漫浪之期，差池其羽。走長安之日，又陪上雍之祠；占蜀道之星，還作高唐之想。《梅亭先生四六標準》卷二四。又見《八代四六全書》卷一三。

### 代回潼川張運判師夔啓

代董制置

傾蓋相驩，夙承雅契；驅車見顧，敬佩高情。更勤四六之貽，彌認再三之眷。恭惟某官材猷膚敏，器諝端凝。使節皇皇，夙抱靡依之感；吉事總總，行膺不次之除。某甚感珍投，莫知瓊報。藏之十襲，足爲篋笥之光；雖則七襄，不稱檐榆之贈。《梅亭先生四六標準》卷二四。

## 代回楊國博啓

丹筆祥刑，幸依光於翼軫；繡衣轉漕，忽改次於斗牛。甚慙徇鐸之初，有缺褰帷之慶。高情厚甚，下問燁然。恭惟某官獨抱古心，力行正道。太學晨入，士皆樂於有師；湘水曉行，民蓋幾於無訟。自天出綍，易地乘輅。莫非王民，何此界彼疆之隔；徒得君重，助春生秋殺之仁。尤恐紫泥，不容黔突。某罔功閱歲，撫事懷人。有所不通，方將考德而問業；何去之速，遂使離群而索居。所幸鄰壁之輝，尚借滎河之潤。交泰亨而君子長，惟此爲然；有德進則朝廷尊，遐不謂矣。《梅亭先生四六標準》卷二四。

## 代董制置回利路楊運判九鼎啓

升班延閣，易漕价藩。煥乎有文章，上直堯言之秘；送之以禮樂，再華周道之驅。就擁雙旌，榮開疊組。恭惟某官揆材膚敏，稟德浚明。湘水兒童，能說輶軒之風采；峴山父老，尚懷裘帶之功名。暫從神園之遊，實簡明庭之眷。駕言龍節，將指夔藩。富媪孕靈，坐溢牢盆之利；姦胥落膽，盡空訟牘之冤。帝念葭萌，地鄰嶓冢。木牛轉粟，路即達於褒斜；銅虎剖符，師可臨於秦隴。有嚴三命，欲

集兩長。東壁圖書，自它有耀；北門管鑰，無競惟人。某辱託爲寮，尤深贊慶。聞之道路，恐又啓十乘之行；修其簡書，尚當爲九遷之賀。《梅亭先生四六標準》卷二四。

### 代回湖南鄭漕肇之啓

曉行湘水，遠知禮樂之華；老入明光，近抱簡書之畏。因遺我雙魚之繾綣，知駕彼四牡之春容。恭惟某官奧學長材，英聲茂實。勒足奔電，洗凡馬而一空；運斤成風，解全牛於四顧。入朝甫爾，出牧翩然。撫字勞心，香未安於燕寢；澄清有志，恩已賜於鵲袍。拓長沙千里之平，既均六轡；護洞庭九州之險，坐幹萬艘。行奏計於甘泉，即立班於文石。某蒲柳之質，糠粃在前。芻狗已陳，不意復蒙於文繡；槐龍對舞，所期及識於衣冠。《梅亭先生四六標準》卷二四。

### 代回淮南徐運判輝啓

榮驅漢節，給饋淮壖。禮樂遠而光華，著聞于古；師旅加之飢饉，聚見于今。欲息隱雷之聲，正藉福星之照。恭惟某官學爲可用，才靡不宜。素所蘊藏，皆及物之志；久於歛退，無希世之心。既交章於北臺，迄來歸於東海。夜前席而入對，晝衣繡以亟行。奪螻蟻烏鳶之遺黎，使肉骨之再活；捕螟

蝨螽賊之餘孽，無翅股之復搖。苟可救民，諒深體國。盤根之別利器，歲計有餘；乘槎而歷天津，風斯在下。某過勤巽謝，仰認謙撝。寒日荒荒，詎宜貪帝所之夢；春郊處處，猶將觀使者之功。《梅亭先生四六標準》卷二四。

### 代回福建趙運判善宣啓

起家越上，將漕閩中。送禮樂而有光華，古莫重乎膚使；一道德而同風俗，今又在於廉車。公無遐心，民可吐氣。恭惟某官持操甚厚，揚歷采深。至今京兆之歌，曰前有趙；宜入承明之直，無以易堯。不應七聚落之間，復勤單輶傳之出。惟西北風塵之已息，而東南雨露之猶慳。問俗及豚羔，山谷之詩云爾；羨君超鸞鶴，坡仙所詠非耶。少觀荔子之丹，即拜芝函之紫。某未由旅賀，例辱損箋。分民病之憂，願謹衣篝之護；後天下而樂，佇榮袞繡之歸。《梅亭先生四六標準》卷二四。

### 代回江東莊運使夏啓

奏功司庾，將漕陪京。一道服於教條，不勤易地；六轡熟於原隰，益足觀風。中宸眷隆，上流勢重。恭惟某官材全業鉅，學廣聞多。高義之薄雲天，早奮何蕃之勇；道山之鄰日月，晚讎劉向之書。

輟從著作之庭，出任皇華之寄。聚萬民於荒政，驅四牡以賢勞。如此人才，盍來歸於金馬；奈何天塹，方仰給於木牛。風景不殊，星言夙駕。師旅因之饑饉，正藉筭鞭；氣色益以晶明，佇頒召璽。某冒焉浪出，未以汰歸。訪斗牛邊，已後君平之問；以春秋對，佇觀莊助之來。《梅亭先生四六標準》卷二四。

### 代回江西李運使珏啓

起家乘傳，將漕餽軍。浙河以東之民，去思未遠；大江而西之地，來莫已歌。有志澄清，何憂盤錯。恭惟某官名隨日起，材應時需。近使之，煩使之，殆無施而不可；善人也，信人也，似未足以相名。方人物之眇然，而江濤之如此。天子有詔，固將大任於陸君；皇帝曰嘻，猶有未平之劉闢。樵蘇後爨，弩矢前驅。繭絲乎，保障乎，公必本根之急；濡需者，卷婁者，彼何鼎鑊之逃！紅旗破賊，黃紙除書，直相先後；畫棟飛雲，珠簾捲雨，寧久回旋！某側聞下車，方規上記。受一廛於仁政，亟欲謀歸；勞四牡之使臣，別遲贊喜。《梅亭先生四六標準》卷二四。

## 代回成都林漕文仲啓

將輸沔北，易節劍南。斜谷列屯，方仰木牛之運；少城一道，已先牡馬之迎。下車云初，載路相慶。恭惟某官好是正直，擇乎中庸。迎風寒露之玉壺，潔其清矣；暖日生煙之錦瑟，和亦溫然。自奏郡庸，出司漕計。乘槎直上，天已界於漢中；叱馭疾驅，星忽臨於益部。聞數萬人通千里之役，須十餘鍾致一石之糧。弩矢前驅，樵蘇後爨。諒賢勞之無憚，在聖眷則甚深。某借潤德鄰，升華工正。錦城雖樂，期公乃在於早還；金門少留，即日會觀於暮召。《梅亭先生四六標準》卷二四。

## 代回湖南曹漕彥約啓

按刑湖右，轉漕湘中。六轡如絲，雖賢勞於原隰；三軍挾纊，亦流潤於京師。恭惟某官儒學醇明，吏材膚敏。自策扞城之績，亟膺持斧之榮。告舍人趣治裝，適當寇警；見大夫無可使，誰給軍儲。徑煩行李之來，以成破竹之捷。民亦勞止，因之師旅以柰何；我儀圖之，殲厥渠魁而已矣。小觀耆定，即見勞還。某縻職雉官，馳神燕厦。歲月如代，空驚揚粃之在前；造化爲工，行見積薪之居上。《梅亭先生四六標準》卷二四。

### 代回湖北王漕允初啓

起曹謁日，甚慙清切之司；信使觀風，有渥皇華之遣。先勤下問，良佩高情。恭惟某官望實飛騰，典刑炳蔚。一俞一拂，當入陪廣廈之甄；載馳載驅，還復動陽春之脚。有華清樾，施及凋蒲。某曳履胡顏，投簪甚力。老驥真老，寧復戀立仗之芻；孤山不孤，行當迓在原之轡。《梅亭先生四六標準》卷二四。

### 代回淮西傅漕誠啓

虎符奏最，龍節疇庸。禮樂遠而光華，遐心何有；師旅因之饑饉，敏手是資。恭惟某官機量醇明，材猷敏劭。駒在彼谷，已空北馬之羣；魚躍于淵，盡展南鵬之翼。甫班天上，復守雲中。帖四境之繹騷，集萬民之離散。茲由畫戟，就易繡衣。雖合符得節，若平進之常；然疊組重珪，非他道之比。少煩咨度，會即勤歸。某願友多聞，獨欠一識。整六師而截淮浦，正藉來宣；使百工而求傅巖，猶堪共役。《梅亭先生四六標準》卷二四。

## 代回趙漕彥倓啓

殿藩江介，轉漕湘流。袁得賢侯，州乃無於一事；衡爲巨鎮，食何有於九年。宜煩單車，以餉千里。恭惟某官傑韜國器，表立宗英。出而專城，璽書勉厲之有效；入焉繕器，工匠技巧之咸精。侈兮南箕，歸止西陌。自起家而予郡，已知國之得人。田里既無於嘆愁，原隰遂華於禮樂。四郊如靖，一節以趨。某引分投簪，蒙恩分組。景翳翳以將入，所欣瞻衡宇而載奔；芳菲菲其彌章，更願折瓊枝而繼佩。《梅亭先生四六標準》卷二四。

## 代回江西胡漕槻啓

奪情許國，將指餽軍。移孝則忠，蓋古所謂大臣者；知遠之近，故今用之鄉人焉。恭惟某官挺有祖風，蔚爲世德。中外踐敷之久，聖明簡注之深。素韞三年，方枕曾參之塊；綠林一日，忽干通德之鄉。觀察使急於賦焉，見大夫無可使者，惟閔子嘗要經而服事，至伯禽亦卒哭而御戎。帝曰汝諧，公爲民起。樵蘇後爨，政觀韓信之奇；弩矢前驅，豈耀長卿之貴！某相識雖晚，所聞已多。山林魑魅之姦，何遽至是；京觀鯨鯢之績，願早圖之。《梅亭先生四六標準》卷二四。

### 代回黃漕榮啓

典獄參聯，久虞瘵曠，共工闕長，忽冒攝承。退自揣於頭顱，難上司於喉舌。露章控免，天聽莫回。諒《四牡》之光，實分鄰壁；致五鳩之正，躡代庖人。方伺遄歸，亟圖候謝。忽鳴謙之先辱，寧裁復之敢稽！《梅亭先生四六標準》卷二四。

### 代回湖南徐運判輝啓

《四牡》之勞使臣，久稽王覲；五雉之爲工正，謬竊君恩。曾巽謝之未遑，已謙光之先辱。恭惟某官王之膚使，古之謀人。雖駕單車，身實兼於數器；故纍四印，勞不嘆於獨賢。淮海無波，京師知潤。遂使雲司之白，與分水佩之蒼。某聽履可慙，投簪甚切。集于苞栩，遙瞻星言夙駕之光；收之桑榆，已畏日暮倒行之戒。《梅亭先生四六標準》卷二四。

## 代回廣西楊漕方啓

起家予節，將漕宅南。高明有融，及物之心未了；選擇而使，重遠之意可知。恭惟某官明善成身，爲仁由己。三仕無喜色，三已無愠色，養之浩然，兩喜多美辭，兩怒多惡辭，聽其自爾。及茲更化，復此立朝，遽爲襤被之行，遄有褰帷之寵。莫非王土，寧辭五嶺之災；無有遐心，行歌四牡之勞。某罔功曳履，有請投簪。我營小山之居，將委身而就老；公作《太玄》之草，願載酒以相從。

《梅亭先生四六標準》卷二四。又見《粵西文載》卷五五。

## 代董侍郎回辛運使克承啓

帖荆報政，泝峽觀風。原隰之事孔殷，正煩咨度；疆場之虞未靖，尤藉轉輸。賢者之來，民所攸賴。恭惟某官天資凝遠，風韻浚明。巍峨千佛之姓名，早宜臺閣；屈折三神之步武，晚落江湖。茲煩漢節之華，來假夔藩之重。跨灩澦之象，不辭王事之艱難；俯常山之蛇，要識老臣之開濟。飛騰自此，翹企俟之。某別德恍然，爲僚幸甚。尚憐往日，聽夜雨於巴山；安能扁舟，披朝雲於巫峽。《梅亭先生四六標準》卷二四。又見《八代四六全書》卷一三。

## 代回淮南林運使拱啓

陞班中秘，將漕邊陲。禮樂遠而光華，遐心何有；師旅因之飢饉，敏手爲宜。天不違顏，星言夙駕。恭惟某官器資膚敏，德履弘深。自司庾於日畿，益舒翹於歲最。屬淮人之離散，求牧與芻；忘漢德之寬仁，帶牛佩犢。徒得君重，無俾民憂。峻奎壁圖書之聯，兼錢穀刑獄之任。餽千金之日費，正賴通材；護數處之風寒，更觀奇績。某未遑望履，甚慶得興。遺我雙魚，愧莫酬於繾綣；駕彼四牡，願加毖於馳驅。《梅亭先生四六標準》卷二四。

## 代回湖北范漕子長啓

肅將使指，兼擁州麾。一道觀風，足展澄清之志；專城宣化，又彰鎮撫之材。重湖無憂，四海相慶。恭惟某官人門具美，天分素高。久矣踐揚，名實孚於上下；恬然歛退，言行擇乎中庸。公道方申，薦章旁午。宜絲綸之一札，畀符節以並驅。夏口、武昌，三國之山川如舊；江沱、漢廣，諸侯之風化一新。不俟席溫，即膺環召。某摧頽暮齒，塵綴朝紳。只今數日以謀歸，外無榮望；期公五月之報政，別致賀忱。《梅亭先生四六標準》卷二四。

# 全宋文卷七二八五

李 劉 二

## 賀李知府錫除潼川提刑啓

丹檢起家，繡衣問俗。故國非喬木之謂，世選爾勞；奕葉茂猗蘭之光，汝陳時臬。星言雙節，風聳列城。恭惟某官器博而通，材弘以毅。卓犖坐空於萬馬，笑談立解於千牛。謂之《檇杙》，謂之《春秋》，素高家學；有若伊陟，有若臣扈，宜襲世官。與其勞四國之蕃宣，不若奉六條而廉察。公私之積可痛，有賴阜通；輕重諸罰有權，尤資閱實。昔者鯉趨而獨立，今茲虎拜以揚休。載馳載驅，共說西平之有子；善繼善述，更觀東府之象賢。某濫守憩棠，獲依蔭樾。作鹹作辛作苦，幾不容一日之安；惟內惟貨惟來，詎敢追二天之按！其爲歸倚，罔既編摩。《梅亭先生四六標準》卷二五。

### 賀潼川李提刑錫除夔路提刑啓

自天出綍，易地褰帷。家人有嚴君焉，舊膺此選；皇華遣使臣也，今世其官。雖曰因避親之嫌，亦見善繼人之志。夔藩幸甚，梓部駭然。恭惟某官器重以周，材弘且毅。與人忠而執事敬，見善明而用心剛。四國于蕃，茂《甘棠》之蔽芾，六轡如組，訝《苞栩》之倭遲。曾未暖席之間，倏有改轅之命。惟四蜀之門戶，倚三峽爲咽喉。昔先正保衡，於此展澄清之志；今命汝大正，庶乎體欽恤之心。遙知叱馭而驅之，會有解印而去者。忠信缺矣，蓄積缺矣，暫勞雙節之馳；錢穀幾何，斷獄幾何，佇對九宸之問。某方依雲覆，忽報星移。雖難留有脚之陽春，然尚冀驩顏於廣廈。送我而入楚澤，固猶恨遠水之遮；思君而下渝州，會問訊清溪之發。其爲忻懌，罔既編摩。《梅亭先生四六標準》卷二五。

### 賀新潼川王提刑禧啓

奏最觀風，詳刑易地。天旋夔峽，垂光來近於蔚藍；星入益都，載驟復歌於《苞栩》。仁聲籍甚，封部驩然。恭惟某官從容以和，洵美且直。自爲名進士之日，蔚有古君子之風。既疇庸磊落之州，合入從通明之殿。顧煩雙節，往控三巴。蜂腰鶴膝之飢甿，復盈膚革；雀角鼠牙之滯訟，洞燭肺肝。古

井無波，陽春有脚。還濡牡轡，來顧鶴林。禮樂言遠而有光，況接鄉閭之近；刑罰不中則無措，更兼倉庾之平。雖則劬勞，又復馳驅於原隰；周爰咨度，便當獻納於軒墀。某乘障非材，奉身受察。五善重拜，忻聞君子之得興；百拙一勤，儻許小人之全璧。其爲頌詠，未易編摩。《梅亭先生四六標準》卷二五。

### 通劉提刑屋啓

丹墀賜對，繡斧詳刑。君遣使臣，固光華於在遠；獄爲司命，必明謹而不留。一賢觀風，萬物吐氣。恭惟某官器函方重，識抱浚明。胸中風月之無邊，一塵不染；筆下源泉之不擇，萬斛而贏。頃厭承明，出將英盪。以九畿施邦政，天不違顏；障百川回狂瀾，海爲縮足。顧退須於榮戟，復出駕於輶軒。司長沙千里之平，惟良折獄；澄洞庭九州之大，何擇非人。徒知察小大之情〔一〕，必不容上下其手。周爰咨度，即開衡嶽之雲；慨然澄清，何愧滄浪之水。所恐思賢於宣室，還當問路於脩門。某起家一寒，去國三暑。強顏倚席，昔慚洛下之生；箝尾對牆，今補黔中之佐。雖云貳郡，正隸六條。廉不掩聾，敢嘆丞哉之余負；戇今成癖，亦惟使者之汝容。《梅亭先生四六標準》卷二五。又見《翰苑新書》

續集卷一三。

〔二〕徒：原作「從」，據四庫本改。

### 通成都周提刑居信啓

捫參歷井，再爲油幕之趨；挹斗揚箕，總隸繡衣之察。欲徹畸孤之名氏，例須耦儷之簡書。斐然抽毫，滂若下汗。伏念某學未聞道，年不後人。亦知富貴之浮雲，不如貧賤；豈無名教之樂地，何必事功。直以飢驅，爲此祿仕。西望太白，窘峽水之倒流；東訪蓬萊，值海風而引去。不謂詩書之元帥，尚憐鄉里之小兒。表之鶚書，隨以馬幣。遂冒瞿唐五六月之險，來訪巫山十二峰之高。揆材地以闕然，託使天而近只。恭惟某官人今而心古，行峻而氣平。少年公瑾之綸巾，豈甘寂寂；他日伯仁之金印，徑可纍纍。居然盤旋州縣之間，無乃培養廊廟之業。勇訪半輪之月，徑登九折之塗。載酒凌雲，頓釋里閭之愁嘆；埋輪當路，欲周原隰之咨諏。何敬非刑，惟明克允。歛此大惠，亦既洽魚鳧之民；訖其外庸，即歸接夔龍之武。尚念某不遠萬里，來奉六條。安於小官而不辭，亦惟君子之易事。昔在嚴公幕，聞俱爲蜀使之知；難甘原憲貧，或竊效貢公之喜。《梅亭先生四六標準》卷二五。

## 通潼川丁提刑必稱啓

登蜀猶天，撫塵蹤而自嘆；仰韓如斗，瞻熒次以非遙。敢裁小子之斐然，敬告大夫之賢者。伏念某才疏而力腐，少賤而長窮。託疲薶於山林，未能辟穀；繫饑愚於簪笏，却媿伐檀。居然四十之頭顱，孰是尺寸之竹帛。頃自湘濱之憔悴，誤爲錦里之逢迎。半路屯遭，竟勤回於俗駕；三年飄忽，難重入於禮羅。不謂再剖符之文翁，未廢三折肱之韓子。撰書詞而具幣，又委重焉；肩岫幌而掩關，既無及矣。惟是居攸之、褱、允之任，却愧乏儀之、群、博之材。治法征謀，逼人己甚。臺評幕辯，忤物亦多。未論雞犬之求仙，誰許龜魚之託蔭。恭惟某官器資凝遠，材具寬宏。畫棟朱簾，屈平蠻之籌策；清江碧嶂，蔚治郡之功名。謂宜進之清朝，庶可行其素學。居然龍節，戾止蠶叢。禮樂言遠而有光，斯言信矣；刑罰不中則無措，自古謹之。有如使者之賢，足寄欽哉之恤。繡衣持斧，寧久滯銅官之山；簪筆荷囊，行入侍玉皇之案。尚念某貌無所挾，誰適與容。燕谷自寒，敢望春風之披拂；吳船未辦，尚依夏屋之帡幪。《梅亭先生四六標準》卷二五。

### 通湖南楊提刑楫啓

晨入太學之下，曾識明師；曉行湘水之春，今依膚使。禮有嚴於事大，書敢廢於恭先？恭惟某官守道真儒，庇民正學。自其驅馳於外，不辭小官；固知磅礴於中，而可大受。由子男之百里，游賓客於諸侯。廩給百司，簿正九扈。人皆疑其婉晚，公何有於鄙夷。園橋億萬人，甫知矜式；起家二千石，忽有薦揚。上憐皖伯之邦，久缺桐君之政，徒得君重，無俾民憂。一札細書，朝聞命而夕引道；三年成聚，今有袴而昔無襦。孰期清絕之鄉，又缺皇華之使。爰將隆指，出總祥刑。德星臨翼軫之間，楚氛已靖；仙槎來雲漢之表，衡嶽頓開。遙知登車之慨然，必有解印而去者。周爰咨度，胡不均弘。某副墨謏聞，勾朱末屬。譬諸川澤之下，獨何蕃歟；不知酈醪之前，有賈生否。適是褰帷之始，欣然祭竈之榮。簿領中有是人耶，非敢望也；夫子嘗爲委吏矣，能勿誨乎。《梅亭先生四六標準》卷二五。

### 代回夔路李憲丞啓

奏最涪江，按刑巫峽。于蕃而歷四國，所去見思；察州而奉六條，其有所試。恭惟某官分輝井

絡，擅秀岷峨。名父子之天資，璵璠之器；難弟兄之家學，金玉其相。環轍久之，褰帷晚矣。惟良折獄，何擇非人。送以《禮》《樂》而有光，既深簡在；編之《詩》《書》而無媿，願益周爰。某跂遠莫前，賀成已後。三巴疏鑿，雖莫瞻繡斧之持；六轡馳驅，猶願謹衣篝之護。《梅亭先生四六標準》卷二五。

### 代回浙東譙提刑令憲啓

畫戟奏功，繡衣疏寵。專城作牧，既優撫字之材；一道觀風，更展澄清之志。有嚴星駕，增重日畿。恭惟某官蓄德淵深，提身肅括。郎潛甚久，不矯世以爲中；卿列彌高，忽抗章而請外。寄隆名於壁府，歛大惠於金華。民欲借君於一年，公已報政於五月。進之旬服，寄以獄平。遠有光華，況近長安之日；周爰咨度，已接蓬萊之雲。某甚慶得輿，未遑削牘。儻無雀角，可使圜扉之空；似是馬曹，亦竊廣厦之芘。《梅亭先生四六標準》卷二五。

### 代回陳提刑啓

守藩弗績，扁舟欲問於吳江；改組有嚴，輿轎俾踰於關嶺。方露章而請免，倏雲翰之寵貽。愧非

所蒙，願竊有復。恭惟某官抱材膚碩，蓄學崇鉉。右臧左平，獻納盍司於清切；上原下隰，咨諏久屈於皇華。既潛消佩劍之風，又密移珥筆之俗。日月之貴名方起，乾坤之新渥必蕃。諒凡吾味之同，皆借君波之及。某采入其阻，兆足以行。共飲玻璃之江，已有倚蒹之幸；或入鳴珂之里，尚希拔薤之規。《梅亭先生四六標準》卷二五。

### 代回提刑樂郎中啓

繡衣平糴，久勤周道之馳驅；丹筆祥刑，更奉漢條之寬大。民非改聚，官不易方。雖四海之望未饜，然重湖之幸何厚。恭惟某官器資凝遠，德履直方。摩蜀道之青天，豺虎莫投其距；歌郢中之白雪，犬羊難肆其腥。名大震於京師，材合居於給諫。惟是山海之征推，難損一雞；欲其財貨之懋遷，是資四牡。遂煩英節，來按熊湘。皇皇原隰之華，民無遺便；暴暴丘山之積，居有積倉。公若違之他邦，民必爭於境上。惟良折獄，何擇非人。既無得而易堯，信莫如於借寇。衡雲改觀，頓令山嶽之自搖；湘水澄波，便覺江河之易避。第虞詔紫，不俟突黔。某辱託比肩，每蒙合志。勞來還定安集，欲慰疲忙；同寅協恭和衷，正資益友。所慙尺牘，有缺朋箋。魚相忘于江湖，諒不責腹中之素；鳳又繼之日夜，尚同歌肘後之騷。《梅亭先生四六標準》卷二五。

## 代回江東提刑譙寶文令憲啓

寶廬寓直，玉節按刑。江淮草木之威名，亶孚有衆；河洛圖書之經緯，爰寵此行。恭惟某官奧閤刺天，脩名拔地。胸吞雲夢，何小者之足言；舟近蓬萊，又悠然而引去。萬牛莫挽，四牡載馳。禮樂有光，公不負澄清之志；哀矜勿喜，吏何敢輕重其心。有功見知，不遠伊邇。某民庸索寞〔一〕，歸夢飛騰。望南浦之朝雲，未能捲雨；懷江東之暮日，正阻論文。《梅亭先生四六標準》卷二五。又見《啓雋類函》卷八八。

〔一〕庸：原作「唐」，據四庫本改。

## 代回福建詹提刑徽之啓

疏恩中禁，持憲外臺。褰帷風動於列城，洗印日新於衆聽。湖山自得，原隰有光。恭惟某官早抱通材，徧儀華貫。游刃有餘矣，經肯綮之未嘗；善刀而藏之，得躊躇之滿志。屬時更化，加意審刑，徑疇淑問之賢，往任皇華之寄。維閩七聚，不勝鱗介之勞；奉漢六條，寧止狐狸之問。必有澄清之

志，乃無愁恨之民。其審克之，行且召矣。某未遑燕賀，先辱魚書。君乘使者車，固可想雲煙之風采；詔詣行在所，或少慰塵土之心期。《梅亭先生四六標準》卷二五。

### 代回湖南胡提刑解啓

還節荆襄，按刑湘楚。父老迎嘆，見百年之故家；叔姪交承，侈一門之盛事。賢勞何憚，聖眷方深。恭惟某官擇乎中庸，好是正直。一經教子，諂機寧觸於屏風；萬里隨翁，直氣早鏘於門限。忠無不報，孝可以移。何周道之驅馳，忘漢闔之補拾。天高蜀道，甫休捫歷之嗟；地徧長沙，又作回旋之舞。蓋今褰帷之所，自昔稅駕其間。嶺北長蛇，無復元城之迎侍；遼東孤鶴，足榮華表之來歸。某視螺川爲近鄰，恍夔門之遠別。殘燈翳復吐，寧有可借之光；可人期不來，徒抱相違之恨。滿期召璽，猶可盍簪。《梅亭先生四六標準》卷二五。

### 代回江西李提刑珣啓

予環將漕，持斧按刑。一道三司，公殆踐揚之徧；兼旬並命，上應簡注之深。前賀方馳，後緘狎至。恭惟某官鎮浮雅量，撥劇長材。左馮翊，右扶風，居多善政；朝天津，夕西極，未究遠猷。當戎

狄講解之餘，有溪洞猖披之醜，見大夫無可使者，明天子選而用之。知效一官，笑他人之劫劫；身兼數器，覺餘地之恢恢。民爲上所不爲，本原安在；我往寇亦能往，保障奚先？願繼周使臣之光華，豈徒漢刺史之風采。某見賢忍渴，得報忘飢。不解世俗書，謾瓊瑤之效報，實爲天下賀，願金玉之盡珍。《梅亭先生四六標準》卷二五。

### 代回湖南胡憲解啓

老形已具，久自分於投簪；成命莫回，猶罔功而曳履。燁然下問，厚甚高情。恭惟某官政爲吏師，行有家法。皇華原隰之上，久職咨諏；清切雨露之邊，合班獻納。顧令衰白，亦復佩蒼。得非鄰壁之光，密借滎河之潤。某負二宜去，已三上章。行或使之，即返屠羊之肆；願有復也，遙瞻回鴈之峰。《梅亭先生四六標準》卷二五。

### 代回成都林憲潔已啓

畫戟疇庸，繡衣疏寵。田里之無愁恨，歷試茂哉；原隰之有光華，載驅榮甚。恭惟某官人門具美，天分仍高。我搆時流，窘邊幅者多矣；公抱國器，願縑籍以須之。久於典州，方此將指。川合東

西而瞻使，豈不足歟；王置左右而輔台，恐未免耳。既均牡轡，益煥龍光。某年以衰侵，心爲形役。已屢章而告老，兆足以行；望三節之鼎來，每懷靡及。《梅亭先生四六標準》卷二五。

### 代回江東葉憲簣啓

骭髀雲司，將謀退而飲山綠；便蕃天寵，使無功而佩水蒼。徒噴人言，誰俯予美。恭惟某官好是正直，多所平反。江以東之瘡痍，各安饘粥；斗維北之喉舌，難挹酒漿。猶贈以言，欲華其老。然持總衆職而相望，恐難備百工之所爲。某鳩僇非長，狐疑已決。薦尚書不煩以政，終非孔戣之宜；白丞相去歸其鄉，當希疏廣之老。《梅亭先生四六標準》卷二五。

### 代回江西李憲珏啓

制五刑以即天，已慙占筆；居四民而時地，猥使代庖。諒皆皇華之光，密有蔽芾之蔭。恭惟某官徧持三節，洊歷諸司。方赤子之弄兵，金堅蔓熾；賴繡衣之持斧，風動草披。仁遠及於一塵，官躡升於八座。某水焉得北，日已薄西。總余轡於扶桑，安知飭化；集王事於苞栩，願見勞還。《梅亭先生四

## 代回廣西郭提刑斌啓

隨輶而薦栢酒〔一〕，遠莫致之；得書而已麥秋，報之何以。恭惟某官馳心拱北，將指宅南。漢節梅花，已弄青黃之實；周原苞栩，既成蒼翠之陰。諒惟平秩之功，如在始和之吉。某雲司玩歲，水部媮閑。三月不違仁，勞飛鴻之遠到；五嶺皆炎熱，願秣馬以遄歸。《梅亭先生四六標準》卷二五。又見《粵西文載》卷五五。

〔一〕輶：原缺，據四庫本補。

## 代回利路鮮于提刑申之啓

虎符遲次，龍節載驅。禮樂遠而光華，遐心何有；師旅因之饑饉，敏手是資。恭惟某官籍甚人門，燁然地望。吏民相告，方懷季子之章；郡縣未澄，宜攬孟博之轡。劍閣今爲平地，鮮于世號福星。公有埋輪之心，民何懸釜之慮！功德如是，祥祉如是，其善持之；刑獄幾何，錢穀幾何，行且召矣。某老而浪出，冗未汰歸。五雉爲工，徒積汗顏之媿；四牡勞使，願收直指之功。《梅亭先生四六標

準》卷二五。

### 代回江西陳提刑天宜啓

自天申命，易地詳刑。南海之陬既濡，無復跼蹐之困；西江之水方涸，更爲活鮒之謀。恭惟某官奧學名家，通材資世。恢乎餘刃，孰嬰紫電之鋒；飛不盡翰，斜取青雲之勢。頃分半竹，惠滿三楓。尋專刺舉之六條，迄用澄清於五管。惟是畫冠之化，未孚珥筆之民〔一〕。欲銷赤子之弄兵，必假繡衣之持斧。周爰咨度，行將勞星駕之還；遠有光華，何況接日畿之近。某濫茲聯事，幸甚依仁。所望使者之車，疾驅沃轡；庶假忠焉之誨，叶濟疲甿。《梅亭先生四六標準》卷二五。

〔一〕珥：原作「珥珥」，據文意刪。

### 代回廣東潘提刑涓啓

分符奏最，持節祥刑。田里之無嘆愁，選諸所表；原隰之周咨度，遠乃有光。恭惟某官器宇浚明，風猷膚碩。頃儀六館，實倡諸儒。玉石一區，時方負隴西之媿；淄澠異味，何至空冀北之群。迄

著顯庸，蔚爲循吏。一麾出守，方幸同寅；六轡載馳，復聞後甲。片言可折，必能體欽恤之心；五嶺皆炎，正足展澄清之志。星言夙駕，天不違顏。某十國爲連，再鼓愈淡。落霞孤鶩，不能奪蓴菜之思；尺素雙魚，願無廢梅花之寄。《梅亭先生四六標準》卷二五。

### 代回江東葉憲簣啓

斜日投閑，冒誤恩而入侍；朵雲借潤，儷好語以相先。有味其言，不知所報。恭惟某官恢然抱負，久矣踐敷。榮分刺史之符，勇襍郎官之被。甫陞華於卿月，又趣駕於使星。簸弄明珠，自是驚人之質；追隨瑣闥，會歸密地之班。某起家一寒，去國十暑。頭顱如此，難遮西崦之光陰；膂力既愆，又踏東華之塵土。會且歸矣，焉用文之。《梅亭先生四六標準》卷二五。

### 代回曹提刑叔遠啓

顯奏郡庸〔一〕，肅將使指。凝香畫戟，政成數月之間；直指繡衣，象應一星之入。用賢如此，載路驩然。恭惟某官天韻崇鉉，風猷峻潔。三年博士，推韓愈之見治〔二〕；六館諸生，留陽城而不果。徘徊南浦，檢校東屯。却念枳城，實產伊川之《易》；因尋涪水，欲昌山谷之詩。孔席未溫，曹裝又

趣。刑罰不中則無措，自昔欽哉；禮樂言遠而有光，是在使者。佇從四牡，歸侍六飛。某方襞賀緘，已蒙謝牘。我留綿谷，正方深通漢之防；君把繡衣，未可動思吳之興。《梅亭先生四六標準》卷二五。

〔二〕奏：原作「奉」，據四庫本改。

〔三〕推：原作「誰」，據右引改。

### 代回新夔路李提刑至啓

凝畫戟之香，久分漢竹；持繡衣之斧，式憩甘棠。燕賀厦之未能，鴈寄書而何速。恭惟某官氣鐘井絡，秀出岷峨。真難兄之弟，難弟之兄；信名父之子，名子之父。人生五馬貴，四出守而無嫌；權門九牛毛，屢掉頭而不顧。乃今直指，猶是斜飛。持衡秉鈞，此言何爲至我；明刑種德，所有更以贈君。某日既薄山，雲猶出岫。惠文柱後，殆非佚老之謀；神武門中，行進乞身之請。《梅亭先生四六標準》卷二五。

## 代回方提刑信孺啓

已下代衛參作

觀風嶺外，公遠有於光華，易地江湄，我但慙于玩愒。鼎來下問，益仞高情。恭惟某官學與古稽，美全世濟。江濤如此，誰知戮力於神州；人物眇然，士頗傾心於執事。久於直指，無乃斜飛。然小大之獄既得其情，則澄清之志亦足以展。風雲之會，朝久以須。某分閩何功，投林是幸。叔夜不便於書疏，遂緩報章；莊周無索其形骸，尚祈終惠。《梅亭先生四六標準》卷二五。又見《啓雋類函》卷九三。

## 代回方提刑信孺啓

報政九疑，觀風五嶺。萬物吐氣，正須結輩之賢；六轡周咨，何慮越人之瘠。恭惟某官風猷強濟，業履浚明。學禮之有異聞，蚤駿萬夫之望；誦詩而能專對，卒鳩二國之民。九重念功，再命作牧。與其田里之無嘆息，賀其見鳳之鳴；何如原隰之有光華，惠爾跼鵲之外。星言雙節，山鎮百城。刑獄幾何，錢穀幾何，不嫌纍印；功德如是，祥祉如是，佇即予環。某方欲修辭，遽勤委重。雙魚尺素，何言衛公綠竹之詩；兩驂四黃，請繼方叔葱珩之詠。《梅亭先生四六標準》卷二五。

### 回夔路李提刑錫啓

二年和義之郡，粗護憩棠；再命通德之邦，獲依仙李。不謂我入而公出，真成室邇而人遐。辱寄朵雲，如對落月。恭惟某官負材鯁亮，蓄德鴻深。雪檜霜松，凜凜祖風之似；公槐卿棘，英英家學之傳。四奏郡庸，兩將使指。巖巖漢沔，帳下之甲多奔；往往巴渝，舟中之指可掬。去孔伋君誰與守，見王導吾復何憂。共歌四牡之有功，行趣八鸞之入覲。某獲通族譜，且託交盟。勿勞乎，勿誨乎，尚希忠告；同姓也，同業也，宜不遐遺。《梅亭先生四六標準》卷二五。又見《啓雋類函》卷九三。